


UNIVERSITY OF TORONTO



3 1761 00004220 0



$$\frac{3}{4}$$






1000

1000

1000



T. LIVII PATAVINI  
HISTORIARUM  
LIBRI

QUI SUPERSUNT OMNES

CUM INTEGRIS

JOANNIS FREINSHEMII

SUPPLEMENTIS



VOLUMEN TERTIUM

BIPONTI

EX TYPOGRAPHIA SOCIETATIS

CMDCCCXXXV

PREAU


PA

6452

A-2

1984

V. 3



887648

# TITI LIVII PATAVINI HISTORIARUM

AB URBE CONDITA

LIBER X.

---

EPITOME

LIBRI DECIMI.

Coloniæ deductæ sunt Sora, & Alba, & Carfeoli. Marfi in deditionem accepti sunt. Collegium augurum ampliatum est, ut essent novem, cum antea quaterni fuissent. Lex de provocatione ad populum a Valerio consule tunc tertium lata est. Duæ tribus adjectæ sunt, Anienfis & Terentina. Samnitibus bellum indictum, & adversus eos sæpe prospere pugnatum est. Cum adversus Etrufcos, Umbros, Samnites, Gallos, P. Decio & Q. Fabio ducibus, pugnaretur, Romanusque exercitus in maximo esset discrimine, P. Decius, secutus exemplum patris, devovit se pro exercitu, & morte sua victoriam ejus pugnae populo Romano dedit. Papirius Cursor Samnitium exercitum, qui jurejurando obstrictus, quo majore constantia virtutis pugnaret, in aciem descenderat, fudit. Census actus est. Iustrum conditum. censa sunt civium capita ducenta sexaginta duo millia, & trecenta viginti duo.

*T. Liv. Vol. III.*

A

1. **L**UCIO Genucio, Ser. Cornelio consulibus, ab externis ferme bellis otium fuit. Soram atque Albam coloniæ deductæ. Albam in Æquos sex millia colonorum scripta. Sora agri Volsci fuerat; sed possederant Samnites. eo quatuor millia hominum missa. Eodem anno Arpinatibus Trebulanisque civitas data. Frusinates tertia parte agri damnati, quod Hernicos ab eis sollicitatos compertum: capitaque conjurationis ejus, quæstione ab consulibus ex senatusconsulto habita, virgis cæsi ac securi percussi. Tamen, ne prorsus imbellem agerent annum, parva expeditio in Umbria facta est; quod nuntiabatur, ex spelunca quadam excursionibus armatorum in agros fieri. In eam speluncam penetratum cum signis est: & ex eo loco obscuro multa vulnera accepta, maximeque lapidum ictu; donec, altero specus ejus ore (nam pervius erat) invento, utræque fauces congestis lignis accensæ: ita intus fumo ac vapore ad duo millia armatorum, ruentia novissime in ipsas flammæ, dum evadere tendunt, absumpta. Marcis Livio Dentre & Æmilio consulibus, redintegratum Æquicum bellum. Coloniam ægre patientes velut arcem suis finibus impositam, summa vi expugnare adorti, ab ipsis colonis pelluntur. Ceterum tantum Romæ terrorem fecere, quia vix credibile erat, tam affectis rebus solos per se Æquos ad bellum coortos, ut tumultus ejus causa dictator diceretur C. Junius Bubulcus: is, cum M. Titinio magistro

equitum profectus, primo congressu Æquos subegit; ac, die octavo triumphans in urbem cum redisset, ædem Salutis, quam consul voverat, censor locaverat, dictator dedicavit.

II. Eodem anno classis Græcorum, Cleonymo duce Lacedæmonio, ad Italiæ litora appulsa, Thurias urbem in Sallentinis cepit. Adversus hunc hostem consul Æmilius missus proelio uno fugatum compulit in naves. Thurix redditæ veteri cultori: Sallentinoque agro pax parta. Junium Bubulcum dictatorem missum in Sallentinos, in quibusdam annalibus invenio: & Cleonymum prius, quam confliendum esset cum Romanis, Italia excessisse. circumvectus inde Brundisii promontorium, medioque sinu Hadriatico ventis latus, cum læva importuosa Italiæ litora, dextra Illyrii Liburnique & Istri, gentes feræ, & magna ex parte latrociniis maritimis infames, terrerent, penitus ad litora Venetorum pervenit. ibi expositis paucis, qui loca explorarent, cum audisset, tenue prætentum litus esse, quod transgressis stagna ab tergo sint, irrigua æstibus maritimis; agros haud procul proximis campestres cerni; ulteriora colles; inde esse ostium fluminis præalti, quo circumagi naves in stationem tutam vidisse: (Meduacus amnis erat:) eo invectam classem subire flumine adverso jussit. Gravissimas navium non pertulit alveus fluminis. in leviora navigia transgressa multitudo armatorum ad frequentes agros, tribus maritimis Patavinorum vicis colentibus eam oram, pervenit. Ibi egressi, levi præsidio navibus relicto, vicos ex-

pugnant, inflammant tecta, hominum pecudumque prædas agunt, & dulcedine prædandi longius usque a navibus procedunt. Hæc ubi Patavium sunt nuntiata, (semper autem eos in armis accolæ Galli habebant) in duas partes juventutem dividunt, altera in regionem, qua effusa populatio nuntiabatur; altera, ne cui prædonum obvia fieret, altero itinere ad stationem navium (millia autem quatuordecim ab oppido aberat) ducta. In naves parvas, custodibus interemtis, imperus factus; territique nautæ coguntur naves in alteram ripam amnis transjicere. & in terra prosperum æque in palatos prædatores prælium fuerat: refugientibusque ad stationem Græcis Veneti obsistunt. Ita in medio circumventi hostes cæsiq; pars capti classem indicant regemque Cleonymum tria millia abesse. Inde, captivis proximo vico in custodiam datis, pars fluviatiles naves, ad superanda vada stagnorum apte planis alveis fabricatas, pars captiva navigia armatis complent. profectique ad classem, immobiles naves, & loca ignota plus, quam hostem, timentes, circumvadunt: fugientesque in altum acrius, quam repugnantes, usque ad ostium amnis persecuti, captis quibusdam incensisque navibus hostium, quas trepidatio in vada intulerat, victores revertuntur. Cleonymus, vix quinta parte navium incolumi, nulla regione maris Hadriatici prospere adita, discessit. Rostra navium spoliæque Laconum, in æde Junonis veteri fixa, multi supersunt, qui viderunt. Patavii monumentum navalis pugnae eo die, quo pugnatum est, quotian-



nis sollemni certamine navium in flumine oppidi medio exercetur.

III. Eodem anno Romæ cum Vestinis, petentibus amicitiam, ictum est foedus. Multiplex deinde exortus terror. Etruriam rebellare, ab Arretinorum seditionibus motu orto, nuntiabatur: ubi Cilnium genus præpotens, divitiarum invidia pelli armis coeptum: simul Marfos agrum vi tueri, in quem colonia Carfeoli deducta erat, quatuor milibus hominum scriptis. Itaque propter eos tumultus dictus M. Valerius Maximus dictator, magistrum equitum sibi legit M. Æmilium Paullum. id magis credo, quam Q. Fabium ea ætate atque eis honoribus Valerio subiectum. ceterum ex Maximi cognomine ortum errorem haud abnuerin. Profectus dictator cum exercitu, proelio uno Marfos fundit. compulsis deinde in urbes munitas, Millioniam, Plestinam, Fesiliam, intra dies paucos cepit: & parte agri multatis Marfis, foedus restituit. Tum in Etruscos versum bellum. &, cum dictator auspiciorum repetendorum causa profectus Romam esset, magister equitum, pabulatum egressus, ex insidiis circumvenitur; signisque aliquot amissis, foeda militum cæde ac fuga in castra est compulsus. qui terror non eo tantum a Fabio abhorret, quod si qua alia arte cognomen suum æquavit, tum maxime bellicis laudibus: sed etiam, quod, memor Papirianæ sævitæ, nunquam, ut dictatoris injussu dimicaret, adduci potuisset.

IV. Nuntiata ea clades Romam majorem, quam res erat, terrorem excivit. nam, ut exercitu de-

leto, ita iustitium indictum; custodiæ in portis;  
 vigiliæ vicatim exactæ; arma, tela in muros con-  
 gesta. Omnibus junioribus sacramento adactis, dic-  
 tator, ad exercitum missus, omnia spe tranquilliora  
 & composita magistri equitum cura, castra in tu-  
 tiorem locum redacta, cohortes, quæ signa ami-  
 ferant, extra vallum sine tentoriis destitutas, in-  
 venit; exercitum avidum pugnae, quo maturius  
 ignominia aboleretur. Itaque confestim castra inde  
 in agrum Rufellanum promovit. Eo & hostes se-  
 cuti. & quanquam ex bene gesta re summam &  
 in aperto certamine virium spem habebant; tamen  
 insidiis quoque, quas feliciter experti erant, ho-  
 stem tentant. Testa semirutæ vici, per vastationem  
 agrorum deusti, haud procul castris Romanorum  
 aberant. ibi abditis armatis, pecus in conspectu  
 præsidii Romani, cui præerat Cn. Fulvius legatus,  
 propulsum. ad quam illecebram cum moveretur  
 nemo ab Romana statione; pastorum unus, pro-  
 gressus sub ipsas munitiones, inclamat alios, cunc-  
 tantes ab ruinis vici pecus propellentes, *quid*  
*cessarent, cum per media castra Romana tuto agere*  
*possent?* Hæc cum legato Cærites quidam inter-  
 pretarentur, & per omnes manipulos militum in-  
 dignatio ingens esset, nec tamen injussu movere  
 auderent; jubet peritos linguæ attendere animum,  
 pastorum sermo agresti, an urbano, propior esset.  
 Cum referrent, sonum linguæ, & corporum ha-  
 bitum, & nitorem, cultiora, quam pastoralia, esse;  
*Ite igitur, dicite, inquit, detegant nequidquam con-*  
*ditas insidias; omnia scire Romanum; nec magis jam*

*dolo capi, quam armis vinci, posse.* Hæc ubi audita sunt, & ad eos, qui confederant in insidiis, perlata, confurrectum repente ex latebris est, & in patentem ad conspectum undique campum prolata signa. Visa legato major acies, quam quæ ab suo præsidio sustineri posset. itaque propere ad dictatorem auxilia accitum mittit; interea ipse impetus hostium sustinet. x

V. Nuntio allato, dictator signa ferri, ac sequi armatos jubet. sed celeriora prope omnia imperio erant. Rapta extemplo signa armaque; & vix ab impetu & cursu tenebantur. cum ira ab accepta nuper clade stimulabat, tum concitatio accidens clamor ab increcente certamine. Urgent itaque alii alios, hortanturque signiferos, ut ocius eant. quo magis festinantes videt dictator, eo impensius retentat agmen, ac sensim incedere jubet. Etrusci contra, principio exciti pugnae, omnibus copiis aderant. Et super alios alii nuntiant dictatori, omnes legiones Etruscorum capefisse pugnam; nec jam ab suis resisti posse: & ipse cernit ex superiore loco, in quanto discrimine præsidium esset. Ceterum, fatis fretus, esse etiam nunc tolerando certamini legatum, nec se procul abesse periculi vindicem, quam maxime vult fatigari hostem, ut integris adoriatur viribus fessos. Quanquam lente procedunt, jam tamen ad impetum capiendum, equiti utique, modicum erat spatium. prima incedebant signa legionum, ne quid occultum aut repentinum hostis timeret: sed reliquerat intervalla inter ordines peditum, qua satis laxo spatio equi

permitti possent. Pariter sustulit clamorem acies ; & emissus eques libero cursu in hostem invehitur , incompotitisque adversus equestrem procellam subito pavorem offundit. Itaque , ut prope serum auxilium jam pæne circumventis , ita universa requies data est. integri acceperere pugnam : nec ea ipsa longa , aut anceps fuit. Fusi hostes castra repetunt , inferentibusque jam signa Romanis cedunt , & in ultimam castrorum partem conglobantur. Hærent fugientes in angustiis portarum : pars magna aggerem vallumque conscendunt , si aut ex superiore loco tueri se , aut superare aliqua & evadere possent. Forte quodam loco male densatus agger pondere superstantium in fossam procubuit : atque ea cum Deos pandere viam fugæ conclamassent , plures inermes , quam armati , evadunt. Hoc prælio fractæ iterum Etruscorum vires : & , pacto annuo stipendio , & duum mensium frumento , permissum ab dictatore , ut de pace legatos mitterent Romam. Pax negata : induciæ biennii datæ. dictator triumphans in urbem rediit. Habeo auctores , sine ullo memorabili prælio pacatam ab dictatore Etruriam esse , seditionibus tantum Arretinorum compositis , & Cilnio genere cum plebe in gratiam reducto. Consul ex dictatura factus M. Valerius. non petentem , atque adeo etiam absentem , creatum credidere quidam ; & per interregem ea comitia facta. id unum non ambigitur , consulatum cum Appulejo Panfa gessisse.

VI. M. Valerio & Q. Appulejo consulibus , satis pacatæ foris res fuere. Etruscum adversa belli res

& induciæ quietum tenebant: Samnitem, multorum annorum cladibus domitum, haud dum fœderis novi pœnitebat. Romæ quoque plebem quietam & exoneratam deducta in colonias multitudo præstabat. tamen, ne undique tranquillæ res essent, certamen injectum inter primores civitatis, patricos plebejosque, ab tribunis plebis Q. & Cn. Ogulniis. qui, undique criminandorum Patrum apud plebem occasionibus quæsitis, postquam alia frustra tentata erant, eam actionem susceperunt, qua non infimam plebem accenderent, sed ipsa capita plebis, consulares triumphalesque plebejos: quorum honoribus nihil, præter sacerdotia, quæ nondum promiscua erant, deesset. Rogationem ergo promulgarunt, ut, cum quatuor augures, quatuor pontifices ea tempestate essent, placeretque augeri sacerdotum numerum, quatuor pontifices, quinque augures, de plebe omnes, adlegerentur. Quemadmodum ad quatuor augurum numerum, nisi morte duorum, id redigi collegium potuerit, non invenio; cum inter augures constet, imparem numerum debere esse, ut tres antiquæ tribus, Ramnes, Titientes, Luceres, suum quæque augurem habeant; aut, si pluribus sit opus, pari inter se numero sacerdotes multiplicent: sicut multiplicati sunt, cum ad quatuor quinque adjecti novem numerum, ut terni in singulas essent, expleverunt. Ceterum, quia de plebe adlegebantur, juxta eam rem ægre passi Patres, quam cum consulatum vulgari viderent. Simulabant ad Deos id magis, quam ad se, pertinere: ipsos visuros, ne sacra sua pol-

luantur. id se optare tantum, ne qua in rempublicam clades veniat. Minus autem tetendere, affueti jam tali genere certaminum vinci. & cernebant, adversarios non id, quod olim vix speraverint, affectantes magnos honores, sed omnia jam, in quorum spem dubiam erat certatum, tamen adeptos, multiplices consulatus, censurasque & triumphos.

VII. Certatum tamen suadenda dissuadendaque lege inter Ap. Claudium maxime ferunt, & inter P. Decium Murem. qui cum eadem ferme de jure Patrum ac plebis, quæ pro lege Licinia quondam contraque eam dicta erant, cum plebejis consulatus rogabatur, differuissent; retulisse dicitur Decius parentis sui speciem, qualem eum multi, qui in concione erant, viderant, incinctum Gabino cultu, super telum stantem, quo se habitu pro populo ac legionibus Romanis devovisset. *Tum P. Decium consulem purum piūque Deis immortalibus visum, æque ac si T. Manlius collega ejus devoveretur. eundem P. Decium, qui sacra publica populi Romani faceret, legi rite non potuisse? id esse periculum, ne suas preces minus audirent Dii, quam Ap. Claudii? castius eum sacra privata facere, & religiosius Deos colere, quam se? quem pœnitere votorum, quæ pro republica nuncupaverint tot consules plebeji, tot dictatores, aut ad exercitus euntes, aut inter ipsa bella? Numerarentur duces eorum annorum, quibus plebejorum ductu & auspicio res geri cœptæ sunt: numerarentur triumphi. jam ne nobilitatis quidem suæ plebejos pœnitere. pro certo habere, si quod repens bellum oriatur, non plus spes*

fore senatui populoque Romano in patriciis, quam in plebejis ducibus. Quod cum ita se habeat, cui Deorum hominumve indignum videri potest, inquit, eos viros, quos vos sellis curulibus, toga prætexta, tunica palmata, & toga picta, & corona triumphali laureaue honorariis, quorum domos spoliis hostium affixis insignes inter alias feceritis, pontificalia atque auguralia insignia adjicere? qui, Jovis optimi maximi ornatu decoratus, curru aurato per urbem vectus in Capitolium ascenderit, si conspiciatur cum capide ac lituo, capite velato victimam cædat, auguriumve ex arce capiat? Cujus imaginis titulo consulatus, censuraque, & triumphus, æquo animo legetur; si auguratum aut pontificatum adjeceritis, non sustinebunt legentium oculi? Equidem (pace dixerim Deum) eos nos jam populi Romani beneficio esse spero, qui sacerdotiis non minus reddamus dignatione nostra honoris, quam acceperimus; & Deorum magis, quam nostra causa expetamus, ut, quos privatim colimus, publice colamus.

VIII. Quid autem ego sic adhuc egi, tanquam integra sit causa patriciorum de sacerdotiis, & non jam in possessione unius amplissimi sumus sacerdotii? Decemviros sacris faciundis, carminum Sibyllæ ac fatorum populi hujus interpretes, antistites eosdem Apollinaris sacri caerimoniarumque aliarum, plebejos videmus. Nec tum patriciis ulla injuria facta est, cum duumviris sacris faciundis adjectus est propter plebejos numerus: & nunc tribunus, vir fortis ac strenuus, quinque augurum loca, quatuor pontificum adjecit, in quæ plebeji nominentur; non ut vos, Appi, vestro loco pel-

*lant, sed ut adjuvent vos homines plebeji divinis quoque rebus procurandis, sicut in ceteris humanis pro parte virili adjuvant. Noli erubescere, Appi, collegam in sacerdotio habere, quem in censura, quem in consulatu collegam habere potuisti: cujus tam dictatoris magister equitum, quam magistri equitum dictator esse potes. Sabinum advenam, principem nobilitatis vestrae, seu Attum Clausum, seu Ap. Claudium mavultis, illi antiqui patricii in suum numerum acceperunt. Ne fastidieris nos in sacerdotum numerum accipere. multa nobiscum decora afferimus; immo omnia eadem, quae vos superbos fecerunt. L. Sextius primus de plebe consul est factus. C. Licinius Stolo primus magister equitum, C. Marcius Rutilus primus & dictator & censor, Q. Publilius Philo primus praetor. Semper ista audita sunt eadem, penes vos auspicia esse, vos solos gentem habere, vos solos justum imperium & auspicium domi militiaeque. Aequè adhuc prosperum plebejum ac patricium fuit, porroque erit. En unquam fando audistis, patricios primo esse factos, non de caelo demissos, sed qui patrem ciere possent, id est, nihil ultra quam ingenuos? Consulem jam patrem ciere possum, avumque jam poterit filius meus. Nihil est aliud in re, Quirites, nisi ut omnia negata adipiscamur. certamen tantum patricii petunt, nec curant, quem eventum certaminum habeant. Ego hanc legem, quod bonum, faustum, felixque sit vobis ac reipublicae, uti rogas, jubendam censeo.*

IX. Vocare tribus extemplo populus jubebat, apparebatque accipi legem: ille tamen dies est intercessione sublatus. postero die, deterritis tribu-



nis, ingenti consensu accepta est. Pontifices creantur suavor legis P. Decius Mus, P. Sempronius Sophus, C. Marcius Rutilus, M. Livius Denter. Quinque augures item de plebe, C. Genucius, P. Ælius Pætus, M. Minucius Fessus, C. Marcius, T. Publius. Ita octo pontificum, novem augurum numerus factus. Eodem anno M. Valerius consul de provocatione legem tulit, diligentius sanctam. tertio ea tum post reges exactos lata est, semper a familia eadem. Causam renovandæ sæpius haud aliam fuisse reor, quam quod plus paucorum opes, quam libertas plebis, poterant. Porcia tamen lex sola pro tergo civium lata videtur: quod gravi poena, si quis verberasset necassetve civem Romanum, sanxit. Valeria lex, cum eum, qui provocasset, virgis cædi, securique necari vetuisset, si quis adversus ea fecisset, nihil ultra, quam improbe factum, adjecit. Id (qui tum pudor hominum erat) visum, credo, vinculum fatis validum legis. nunc vix serio ita minetur quisquam. Bellum ab eodem consule haudquaquam memorabile adversus rebelantes Æquos, cum præter animos feroces nihil ex antiqua fortuna haberent, gestum est. Alter consul Appulejus in Umbria Nequinum oppidum circumfedit. locus erat arduus, atque in parte una præceps, ubi nunc Narnia sita est. nec vi, nec munito capi poterat. Itaque eam infectam rem M. Fulvius Pætinus, T. Manlius Torquatus, novi consules, acceperunt. In eum annum cum Q. Fabium consulem non petentem omnes dicerent centuriæ, ipsum auctorem fuisse Macer Licinius ac Tubero

tradunt differendi sibi consulatus in bellicosiorum annum: eo anno majori se usui reipublicæ fore, urbano gesto magistratu. ita nec dissimulantem, quid mallet, nec petentem tamen, ædilem curulem cum L. Papirio Cursore factum. Id ne pro certo ponerem, vetustior annalium auctor Piso effecit; quæ eo anno ædiles curules fuisse tradit C. Domitium Cn. F. Calvinum, & Sp. Carvilius Q. F. Maximum. Id credo cognomen errorem in ædilibus fecisse: secutamque fabulam mixtam ex ædiliciis & consularibus comitiis, convenientem errori. Et lustrum eo anno conditum a P. Sempronio Sopho & P. Sulpicio Saverione censoribus: tribusque additæ duæ, Anienfis ac Terentina. Hæc Romæ gesta.

X. Ceterum ad Nequinum oppidum cum segni obsidione tempus tereretur, duo ex oppidanis, quorum erant ædificia iuncta muro, specu facto ad stationes Romanas itinere occulto perveniunt: inde ad consulem deducti, præsidium armatum se intra mœnia & muros accepturos confirmant. Nec aspernanda res visâ, neque incaute credenda. cum altero eorum (nam alter obses retentus) duo exploratores per cuniculum missi: per quos satis comperta re, trecenti armati, transfuga duce in urbem ingressi, nocte portam, quæ proxima erat, cepere. qua refracta, consul exercitusque Romanus sine certamine urbem invasere. Ita Nequinum in dittonem populi Romani venit. Colonia eo adversus Umbros missa, a flumine Narnia appellata: exercitus cum magna præda Romam reductus. Eodem anno ab Etruscis adversus inducias paratum bellum.

sed eos alia molientes Gallorum ingens exercitus, fines ingressus, paulisper a proposito avertit. Pecunia deinde, qua multum poterant, freti, socios ex hostibus facere Gallos conantur, ut eo adjuncto exercitu cum Romanis bellarent. De societate haud abnuunt barbari: de mercede agitur. qua pacta acceptaque, cum parata cetera ad bellum essent, sequique Etruscus juberet, inficias eunt, *mercedem se belli Romanis inferendi pactos. quidquid acceperint, accepisse, ne agrum Etruscum vastarent, armisque lacerarent cultores. Militaturos tamen se, si utique Etrusci velint; sed nulla alia mercede, quam ut in partem agri accipiantur, tandemque aliqua sede certa consistant.* Multa de eo concilia populorum Etruriæ habita: nec perfici quidquam potuit; non tam quia imminui agrum, quam quia accolas sibi quisque adjungere tam efferatæ gentis homines horrebat. ita dimissi Galli pecuniam ingentem sine labore ac periculo partam retulerunt. Romæ terrorem præbuit fama Gallici tumultus ad bellum Etruscum adjecti: eo minus cunctanter foedus ictum cum Picenti populo est.

XI. T. Manlio consuli Etruria provincia sorte evenit; qui, vixdum ingressus hostium fines, cum exerceretur inter equites, ab rapido cursu circumagendo equo effusus, extemplo prope exspiravit. tertius ab eo casu dies finis vitæ consuli fuit. Quo velut omine belli accepto, Deos pro se commisisse bellum memorantes Etrusci, sustulere animos. Romæ, tum desiderio viri, tum incommoditate temporis, tristis nuntius fuit: ut Patres ab juben-

do dictatore consulis subrogandi comitia, ex sententia principum habita, deterruerint. M. Valerium consulem omnes sententiæ centuriæque dixere, quem senatus dictatorem dici jussurus fuerat. tum extemplo in Etruriam ad legiones proficisci jussit. Adventus ejus compressit Etruscos, adeo ut nemo extra munimenta egredi auderet, timorque ipsorum obsidioni similis esset. neque illos novus consul vastandis agris urendisque testis, cum passim non villæ solum, sed frequentes quoque vici, incendiis fumarent, elicere ad certamen potuit. Cum hoc segnius bellum opinione esset, alterius belli, quod multis invicem cladibus haud immerito terribile erat, fama Picentium, novorum sociorum, indicio exorta est: *Samnites arma & rebellionem spectare, seque ab iis sollicitatos esse*. Picentibus gratiæ actæ, & magna pars curæ Patribus ab Etruria in Samnites versa est. Caritas etiam annonæ sollicitam civitatem habuit: ventumque ad inopiæ ultimum foret, ut scripsere, quibus ædilem fuisse eo anno Fabium Maximum placet, ni ejus viri cura, qualis in bellicis rebus multis tempestatibus fuerat, talis domi tum in annonæ dispensatione, præparando ac convehendo frumento, fuisset. Eo anno (nec traditur causa) interregnum initum. interreges fuere Ap. Claudius, dein P. Sulpicius. Is comitia consularia habuit. creavit L. Cornelium Scipionem, Cn. Fulvium consules. Principio hujus anni oratores Lucanorum ad novos consules venerunt, questum, *quia conditionibus pellicere se nequiverint ad societatem armorum, Samnites infesto exer-*

*citu ingressos fines suos vastare, belloque ad bellum cogere. Lucano populo satis superque erratum quondam: nunc ita obflinatos animos esse, ut omnia ferre ac pati tolerabilius ducant, quam ut unquam postea nomen Romanum violent. Orare Patres, ut & Lucanos in fidem accipiant, & vim atque injuriam ab se Samnitium arceant. Se, quanquam bello cum Samnitibus suscepto necessaria jam facta adversus Romanos fides sit, tamen obsides dare paratos esse.*

XII. Brevis consultatio senatus fuit. ad unum omnes jungendum foedus cum Lucanis, resque repetendas ab Samnitibus, censent. Benigne responsum Lucanis, idumque foedus. Feciales missi, qui Samnitem decedere agro fociorum, ac deducere exercitum finibus Lucanis juberent. quibus obviam missi ab Samnitibus, qui denuntiarent, *Si quod adissent in Samnio concilium, haud inviolatos abituros.* Hæc postquam audita sunt Romæ, bellum Samnitibus & Patres censuerunt, & populus jussit. Consules inter se provincias partiti sunt. Scipioni Etruria, Fulvio Samnites obvenerunt; diversique, ad suum quisque bellum, proficiscuntur. Scipioni, segne bellum & simile prioris anni militiæ expectanti, hostes ad Volaterras instructo agmine occurrerunt. Pugnatum majore parte diei, magna utrinque cæde. nox incertis, qua data victoria esset, intervenit: lux insequens victorem victumque ostendit. Nam Etrusci silentio noctis castra reliquerunt. Romanus, egressus in aciem, ubi profectione hostium concessam victoriam videt, progressus ad castra, vacuis cum plurima præda (nani & stativa

trepide deferta fuerant) potitur. inde in Faliscum agrum copiis reductis, cum impedimenta Faleriis cum modico præsidio reliquisset, expedito agmine ad depopulandos hostium fines incedit. Omnia ferro ignique vastantur; prædæ undique actæ: nec solum modo vastum hosti relictum, sed castellis etiam vicisque illatus ignis: urbibus oppugnandis temperatum, in quas timor Etruscos compulerat. Cn. Fulvii consulis clara pugna in Samnio ad Bovianum haudquaquam ambiguae victoriæ fuit. Bovianum inde aggressus, nec ita multo post Aufidenam vi cepit.

XIII. Eodem anno Carseolos colonia in agrum Æquicorum deducta. Fulvius consul de Samnitibus triumphavit. Cum comitia consularia instarent, fama exorta, Etruscos Samnitesque ingentes conscribere exercitus: palam omnibus conciliis vexari principes Etruscorum, quod non Gallos quacunque conditione traxerint ad bellum: increpari magistratus Samnitium, quod exercitum adversus Lucanum hostem comparatum, objecerint Romanis: itaque suis sociorumque viribus consurgere hostes ad bellum, & haudquaquam pari defungendum esse certamine. Hic terror, cum illustres viri consulatum peterent, omnes in Q. Fabium Maximum, primo non petentem, deinde, ut inclinata studia vidit, etiam recusantem, convertit. *Quid se jam senem, ac perfunctum laboribus laborumque præmiis, sollicitarent? Nec corporis, nec animi vigorem remanere eundem: & fortunam ipsam vereri, ne cui Deorum nimia jam in se, & constantior, quam*

*velint humanæ res, videatur. Et se gloriæ seniorum succrevisse, & ad suam gloriam consurgentes alios lætum adspicere. nec honores magnos fortissimis viris Romæ, nec honoribus deesse fortes viros. Acuebat hac moderatione tam iusta studia; quæ verecundia legum restringenda ratus, legem recitari iussit, qua intra decem annos eundem consulem resciri non liceret. Vix præ strepitu audita lex est: tribunique plebis, nihil id impediementi futurum, ajebant: se ad populum laturos, uti legibus solveretur. Et ille quidem in recusando perstabat, quid ergo attineret leges ferri, rogitans, quibus per eosdem, qui tulissent, fraus fieret? Jam regi leges, non regere. Populus nihilominus suffragia inibat: &, ut quæque intro vocata erat centuria, consulem haud dubie Fabium dicebat. Tum demum consensu civitatis victus, Dii approbent, inquit, quod agitis, acturique estis, Quirites. Ceterum, quoniam in me, quod vos vultis, faciuri estis, in collega sit meæ apud vos gratiæ locus. P. Decium, expertum mihi concordi collegio virum, dignum vobis, dignum parente suo, quæso, mecum consulem faciatis. Iusta suffragatio visa. omnes, quæ supererant, centuriæ Q. Fabium, P. Decium consules dixere. Eo anno plerisque dies dicta ab ædilibus, quia plus, quam quod lege finitum erat, agri possiderent. nec quisquam ferme est purgatus: vinculumque ingens immodicæ cupiditatis injectum est.*

XIV. Consules novi, Q. Fabius Maximus quartum & P. Decius Mus tertium, cum inter se agerent, uti alter Samnites hostes, alter Etruscos deligeret; quantæque in hanc aut in illam provin-

ciam copiae fatis, & uter ad utrum bellum dux idoneus magis esset; ab Sutrio & Nepete & Faleriis legati, auctores, concilia Etruriae populorum de petenda pace haberi, totam belli molem in Samnium averterunt. Profecti consules, quo expeditiores commeatus essent, & incertior hostis, qua venturum bellum foret, Fabius per Soranum, Decius per Sidicinum agrum, in Samnium legiones ducunt. Ubi in hostium fines ventum est, uterque populabundus effuso agmine incedit. explorant tamen latius, quam populantur. Igitur non fefellere ad Tifernum hostes in occulta valle instructi, quam ingressos Romanos superiore ex loco adoriri parabant. Fabius, impedimentis in locum tutum remotis, praesidioque modico imposito, praemonitis militibus adesse certamen, quadrato agmine ad praedictas hostium latebras succedit. Samnites, desperato improvise tumultu, quando in apertum femel discrimen evasura esset res, & ipsi acie iusta maluerunt concurrere. itaque & in aequum descendunt, ac fortunae se, majore animo, quam spe, committunt. Ceterum, siue quia ex omnium Samnitium populis, quodcunque roboris fuerat, contraxerant, seu quia discrimen summæ rerum augebat animos, aliquantum aperta quoque pugna praeberunt terroris. Fabius, ubi nulla ex parte hostem loco moveri vidit, M. Fulvium & M. Valerium, tribunos militum, cum quibus ad primam aciem procurrerat, ire ad equites jubet, & adhortari, *ut, si quando unquam equestri ope adjutam rempublicam meminerint, illo die annitantur, ut or-*



*dinis ejus gloriam invictam præsent. Peditum certamine immobilem hostem restare; omnem reliquam spem in impetu esse equitum. & ipsos nominatim juvenes, pari comitate utrumque, nunc laudibus, nunc promissis onerat. Ceterum, quando ne ea quoque tentata vis proficeret, consilio grassandum, si nihil vires juvarent, ratus, Scipionem legatum hastatos primæ legionis subtrahere ex acie, & ad montes proximos, quam posset occultissime, circumducere jubet: inde ascensu abdito a conspectu erigere in montes agmen, aversoque hosti ab tergo repente se ostendere. Equites, ducibus tribunis, haud multo plus hostibus, quam suis, ex improvviso ante signa evecti, præbuerunt tumultus. Adversus incitatas turmas stetit immota Samnitium acies, nec parte ulla pelli aut perrumpi potuit. Et, postquam irritum inceptum erat, recepti post signa prælio exceßerunt. Crevit ex eo hostium animus; nec sustinere frons prima tam longum certamen incrementemque fiducia sui vim potuisset, ni secunda acies jussu consulis in primum successisset. Ibi integræ vires sistunt invehentem se jam Samnitem: & tempore improvisa ex montibus signa clamorque sublatus non vero tantum metu terruere Samnitium animos. nam & Fabius Decium collegam appropinquare exclamavit, & pro se quisque miles, adesse alterum consulem, adesse legiones, gaudio alacres fremunt; errorque utilis Romanis oblatus fugæ formidinisque Samnites implevit, maxime territos, ne ab altero exercitu integro intactoque fessi opprimerentur: &, quia passim in fugam dissipati sunt,*

minor cædes, quam pro tanta victoria, fuit. tria millia & quadringenti cæsi, capti trecenti ferme & tringinta: signa militaria capta tria & viginti.

XV. Samnitibus Apuli se ante prælium conjunxissent, ni P. Decius consul iis ad Maleventum castra objecisset, extractos deinde ad certamen fuisset. Ibi quoque plus fugæ fuit, quam cædis. duo millia Apulorum cæsa: spretoque eo hoste, Decius in Samnium legiones duxit. Ibi duo consulares exercitus, diversis vagati partibus, omnia spatio quinque mensium evastarunt. Quadraginta & quinque loca in Samnio fuere, in quibus Decii castra fuerunt: alterius consulis sex & octoginta. nec valli tantum ac fossarum vestigia relicta, sed multo illis insigniora monumenta vastitatis circa regionumque depopulatarum. Fabius etiam urbem Cimetram cepit. ibi capta armatorum duo millia quadringenti: cæsi ferme pugnantes ad quadringentos triginta. Inde, comitiorum causa Romam profectus, muturavit eam rem agere. cum primo vocatæ Q. Fabium consulem dicerent omnes centuriæ, Ap. Claudius consularis candidatus, vir acer & ambitiosus, non sui magis honoris causa, quam ut patricii recuperarent duo consularia loca, cum suis, tum totius nobilitatis viribus, incubuit, ut se cum Q. Fabio consulem dicerent. Fabius primo, de se eadem fere, quæ priore anno, dicendo, abnuere. circumstare sellam omnis nobilitas: orare, ut ex cœno plebejo consulatum extraheret, maiestatemque pristinam tum honori, tum patriciis gentibus redderet. Fabius, silentio factò, media ora-

tionē studia hominū sedavit. *facturum enim se fuisse dixit, ut duorum patriciorum nomina reciperet, si alium, quam se, consulem fieri videret: nunc se sui rationem comitiis, cum contra leges futurum sit, pessimo exemplo non habiturum.* Ita L. Volumnius de plebe cum Ap. Claudio consul est factus, priore item consulatu inter se comparati. Nobilitas objectare Fabio, fugisse eum Ap. Claudium collegam, eloquentia civilibusque artibus haud dubie praestantem.

XVI. Comitiis perfectis, veteres consules iussi bellum in Samnio gerere, prorogato in sex menses imperio. Itaque insequenti quoque anno, L. Volumnio, Ap. Claudio consulibus, P. Decius, qui consul in Samnio relictus a collega fuerat, proconsul idem populari non destitit agros, donec Samnitium exercitum, nusquam se proelio committentem, postremo expulit finibus. Etruriam pulsī petierunt: & quod legationibus nequidquam saepe tentaverant, id se tanto agmine armatorum, mixtis terrore precibus, adiuros efficacius rati, postulaverunt principum Etruriae concilium. Quo coacto, per quot annos pro libertate dimicent cum Romanis, exponunt. *omnia expertos esse, si suismet ipsorum viribus tolerare tantam molem belli possent: tentasse etiam haud magni momenti finitimarum gentium auxilia: petisse pacem a populo Romano, cum bellum tolerare non possent: rebellasse, quod pax servientibus gravior, quam liberis bellum, esset. Unam sibi spem reliquam in Etruscis restare. Scire, gentem Italiae opulentissimam armis, viris, pecunia, esse: ha-*

*bere accolas Gallos, inter ferrum & arma natos, feroces cum suopte ingenio, tum adversus Romanum populum: quem captum a se auroque redemptum, haud vana jaçtantes, memorent. Nihil abesse, si sit animus Etruscis, qui Porſenæ quondam majoribusque eorum fuerit, quin Romanos, omni agro cis Tiberim pulſos, dimicare pro salute ſua, non de intolerando Italiæ regno, cogant. Samnitum illis exercitum paratum, inſtructum armis, ſtipendio, veniſſe: confeſſim ſecuturos, vel ſi ad ipſam Romanam urbem oppugnandam ducant.*

XVII. Hæc eos in Etruria jaçtantes molientefque, bellum domi Romanum urebat. nam P. Decius, ubi comperit per exploratores profectum Samnitium exercitum, advocato concilio, *Quid per agros, inquit, vagamur, viciatim circumferentes bellum? quin urbes & mœnia aggredimur? nullus jam exercitus Samnio præſidet. ceſſere finibus, ac ſibi met ipſi exſilium conſcivere.* Approbantibus cunctis, ad Murgantiam, validam urbem, oppugnandam ducit: tantuſque ardor militum fuit, & caritate ducis, & ſpe majoris, quam ex agreſtibus populationibus, prædæ, ut uno die vi atque armis urbem caperent. ibi duo millia Samnitium & centum pugnantes circumventi captique: & alia præda ingens capta eſt. quæ ne impedimentis gravibus agmen oneraret, convocari milites Decius jubet. *Haccine, inquit, victoria ſola, aut hac præda contenti eſtis futuri? Vultis vos pro virtute ſpes gerere? omnes Samnitium urbes, fortunæque in urbibus relictæ, veſtre ſunt; quando legiones eorum, tot præliis*

*fusas, postremo finibus expulistis. Vendite ista, & illicite lucro mercatorem, ut sequatur agmen. ego subinde suggeram, quæ vendatis. Ad Romuleam urbem hinc eamus, ubi vos labor haud major, præda major manet.* Divendita præda, ultro adhortantes imperatorem ad Romuleam pergunt. Ibi quoque sine opere, sine tormentis, simul admota sunt signa, nulla vi deterriti a muris, qua cuique proximum fuit, scalis raptim admotis, in mœnia evasere. captum oppidum ac direptum est: ad duo millia & trecen- ti occisi; & sex millia hominum capta; & miles ingenti præda potitus: quam vendere, sicut prio- rem, coactus, Ferentinum inde, quanquam nihil quietis dabatur, tamen summa alacritate ductus. Ce- terum ibi plus laboris ac periculi fuit. & defensa summa vi mœnia sunt, & locus erat munimento naturaque tutus: sed evicit omnia assuetus prædæ miles. ad tria millia hostium circa muros cæsa: præda militis fuit. Hujus oppugnatarum urbium de- coris pars major in quibusdam annalibus ad Maxi- mum trahitur. Murgantiam ab Decio, a Fabio Fe- rentinum Romuleamque oppugnatas tradunt: sunt, qui novorum consulum hanc gloriam faciant. Qui- dam non amborum, sed alterius, L. Volumnii: ei Samnium provinciam evenisse.

XVIII. Dum ea in Samnio, cujuscunque ductu auspicioque, gererentur; Romanis in Etruria ite- rum bellum ingens multis ex gentibus concitur; cujus auctor Gellius Egnatius ex Samnitibus erat. Tusci fere omnes consciverant bellum: traxerat contagio proximos Umbriæ populos: & Gallica

auxilia mercede sollicitabantur. omnis ea multitudo ad castra Samnitium conveniebat. Qui tumultus repens postquam Romam perlatus est, cum jam L. Volumnius consul cum legionibus secunda ac tertia, sociorumque millibus quindecim profectus in Samnium esset, Ap. Claudium primo quoque tempore in Etruriam ire placuit. duæ Romanæ legiones secutæ, prima & quarta, & sociorum duodecim millia. castra haud procul ab hoste posita. Ceterum magis eo profectum est, quod mature ventum erat, ut quosdam spectantes jam arma Etruriæ populos metus Romani nominis comprimeret, quam quod ductu consulis quidquam ibi satis scite aut fortunate gestum sit. Multa prælia locis & temporibus iniquis commissa: spesque in dies graviorem hostem faciebat. & jam prope erat, ut nec duci milites, nec militibus dux satis fideret. Literas ad collegam arcessendum ex Samnio missas, in trinis annalibus invenio. piget tamen incertum ponere, cum ea ipsa inter consules populi Romani, jam iterum eodem honore fungentes, discrepatio fuerit: Appio abnuente missas: Volumnio affirmante, Appii se literis accitum. Jam Volumnius in Samnio tria castella ceperat, in quibus ad tria millia hostium cæsa erant, dimidium fere ejus captum: & Lucanorum seditiones, a plebejis & egentibus ducibus ortas, summa optimatum voluntate per Q. Fabium proconsulem, missum eo cum veteri exercitu, compresserat. Decio depopulandos hostium agros relinquit. ipse cum suis copiis in Etruriam ad collegam pergat: quem advenientem læti omnes ac-

cepere. Appium ex conscientia sua credo animum habuisse haud immerito iratum, si nihil scripserat: illiberali & ingrato animo, si eguerat ope, dissimulantem. Vix enim salute mutua reddita, cum obviam egressus esset, *Satin' salvæ*, inquit, *L. Volumni?* ut sese in Samnio res habent? Quæ te causa, ut provincia tua excederes, induxit? Volumnius in Samnio res prosperas esse ait, literis ejus accitum venisse. quæ si falsæ fuerint, nec usus sui sit in Etruria, extemplo conversis signis abiturum. Tu vero abbas, inquit, neque te quisquam moratur: et nimis minime consentaneum est, cum bello tuo forsitan vix sufficias, hic te ad opem ferendam aliis gloriari venisse. Bene, Hercules, verteret, dicere Volumnius: malle frustra operam insumtam, quam quidquam incidisse, cur non satis esset Etruriæ unus consularis exercitus.

XIX. Digredientes jam consules legati tribuni-que ex Appiano exercitu circumstant: pars imperatorem suum orare, ne collegæ auxilium, quod acciendum ultro fuerit, sua sponte oblatum sperneretur: plures abeunti Volumnio obsistere, atque obtestari, ne pravo cum collega certamine rempublicam prodat. Si qua clades incidisset, desertori magis, quam deserto, noxiæ fore. Eo rem adductam, ut omne rei bene aut secus gestæ in Etruria decus dedecusque ad L. Volumnium sit delegatum. neminem quæsiturum, quæ verba Appii, sed quæ fortuna exercitus fuerit. Dimitti ab Appio eum, sed a republica & ab exercitu retineri; experiretur modo voluntatem militum. Hæc monendo obtestandoque, prope resistentes consules in concionem pertraxerunt, ibi orationes lon-

giores habitæ in eandem ferme sententiam, in quam inter paucos certatum verbis fuerat. Et cum Volumnius, causa superior, ne infacundus quidem adversus eximiam eloquentiam collegæ visus esset; cavillansque Appius, *sibi acceptum referre, diceret, debere, quod ex muto atque elingui facundum etiam consulem haberent: priore consulatu, primis utique mensibus, hiscere eum nequisse, nunc jam populares orationes ferere. Quam mallem, inquit Volumnius, tu a me strenue facere, quam ego abs te scite loqui didicissem. Postremo conditionem ferre, quæ decretura sit, non orator, (neque enim id desiderare rempublicam) sed imperator uter sit melior. Etruriam & Samnium provincias esse: utram mallet, eligeret. suo exercitu se vel in Etruria, vel in Samnio rem gesturum. Tum militum clamor ortus, ut simul ambo bellum Etruscum susciperent. quo animadverso consensu, Volumnius, Quoniam in collegæ voluntate interpretanda, inquit, erravi; non committam, ut, quid vos velitis, obscurum sit. manere, an abire me velitis, clamore significate. Tum vero tantus est clamor exortus, ut hostes e castris exciret. armis arreptis in aciem descendunt. & Volumnius signa canere, ac vexilla efferri e castris iussit. Appium addubitasse ferunt, cernentem, seu pugnante, seu quieto se, fore collegæ victoriam: deinde veritum, ne suæ quoque legiones Volumnium sequerentur, & ipsum flagitantibus suis signum dedisse. Ab neutra parte factis commode instructi fuerunt. nam & Samnitium dux Gellius Egnatius pabulatum cum cohortibus paucis ierat; suoque impetu magis mi-*



lites, quam cujusquam ductu aut imperio, pugnam capeſſebant. & Romani exercitus nec pariter ambo ducti, nec ſatis temporis ad inſtruendum fuit. Prius concurrit Volumnius, quam Appius ad hoſtem perveniret. itaque fronte inæquali concurſum eſt: &, velut forte quadam mutante aſuetos inter ſe hoſtes, Etruſci Volumnio, Samnites, parumper cunctati, quia dux aberat, Appio occurrere. Dicitur Appius in medio pugnae diſcrimine, ita ut inter prima ſigna manibus ad cœlum ſublatis conſpiceretur, ita precatus eſſe: *Bellona, ſi hodie nobis victoriam duiſ, aſt ego templum tibi voveo.* Hæc precatus, velut inſtigante Dea, & ipſe collegæ & exercitus virtutem æquavit. Duces imperatoria opera exſequuntur; & milites, ne ab altera parte prius victoriâ incipiat, annituntur. Ergo fundunt fugantque hoſtes, majorem molem haud facile ſuſtinentes, quam cum qua manus conſerere aſſueti fuerant. urgendo cedentes, inſequendoque effuſos compulſere ad caſtra. Ibi, interventu Gellii cohortiumque Sabellarum, pauliſper recrudit pugna. iis quoque mox fuſis, jam a victoribus caſtra oppugnabantur: &, cum Volumnius ipſe portæ ſigna inferret; Appius, Bellonam victricem identidem celebrans, accenderet militum animos, per vallum, per foſſas irruerunt. Caſtra capta direpraque: præda ingens parta & militi conceſſa eſt. ſeptem millia ac trecenti hoſtium occiſi, duo milia & centum viginti capti. x

XX. Dum ambo conſules omniſque Romana vis in Etruſcum bellum magis inclinât, in Samnio

novi exercitus, exorti ad depopulandos imperii Romani fines, per Vescinos in Campaniam Falernumque agrum transcendunt, ingentesque prædas faciunt. Volumnium, magnis itineribus in Samnium redeuntem, (jam enim Fabio Decioque prorogati imperii finis aderat) fama de Samnitium exercitu populationibusque Campani agri ad tuendos socios convertit. Ut in Calenum agrum venit, & ipse cernit recentia cladis vestigia, & Caleni narrant, tantum jam prædæ hostes trahere, ut vix explicare agmen possint: itaque jam propalam duces loqui, extemplo eundem in Samnium esse; ut, relicta ibi præda, in expeditionem redeant, nec tam oneratum agmen dimicationi committant. Ea, quanquam similia veris erant, certius tamen exploranda ratus, dimittit equites, qui vagos prædatores in agros palantes excipiant: ex quibus inquirendo cognoscit, ad Vulturnum flumen sedere hostem: inde tertia vigilia moturum: iter in Samnium esse. His satis exploratis profectus, tanto intervallo ab hostibus confedit, ut nec adventus suus propinquitate nimia nosci posset, & egredientem e castris hostem opprimeret. Aliquanto ante lucem ad castra accessit; gnarosque Oscæ linguæ, exploratum quid agatur, mittit. Intermixti hostibus (quod facile erat in nocturna trepidatione) cognoscunt, infrequentia armatis signa egressa, prædam prædæque custodes exire, ignobile agmen, & sua quemque molientem, nullo inter alios consensu, nec satis certo imperio. Tempus aggrediendi aptissimum visum est: & jam lux appetebat. itaque signa canere jussit;

agmenque hostium aggreditur. Samnites, præda impediti, infrequentes armati, pars addere gradum, ac præ se agere prædam, pars stare, incerti utrum progredi, an regredi in castra tutius foret, inter cunctationem opprimuntur. & Romani jam transcenderant vallum, cædesque ac tumultus erat in castris. Samnitium agmen, præterquam hostili tumultu, captivorum etiam repentina defectione turbatum erat: qui partim ipsi soluti vinctos solvebant: partim arma in sarcinis deligata rapiebant, tumultumque, proelio ipso terribiliorem, intermixti agmine præbebant. Memorandum deinde edidere facinus: nam Stajum Minacium ducem, adeuntem ordines hortantemque, invadunt; dissipatis inde equitibus, qui cum eo aderant, ipsum circumstunt, infidentemque equo captum ad consulem Romanum rapiunt. Revocata eo tumultu prima signa Samnitium: proeliumque jam profligatum integratum est, nec diutius sustineri potuit. Cæsa ad sex millia hominum: duo millia & quingenti capti: in eis tribuni militum quatuor: signa militaria triginta: &, quod lætissimum victoribus fuit, captivorum recepta septem millia & quadringenti; præda ingens sociorum: accitque edicto domini ad res suas noscendas recipiendasque. Præstituta die, quarum rerum non exstitit dominus, militi concessæ; coactique vendere prædam, ne alibi, quam in armis, animum haberent.

XXI. Magnum ea populatio Campani agri tumultum Romæ præbuerat: & per eos forte dies ex Etruria allatum erat, post deductum inde Vo-

lumnianum exercitum Etruriam concitam in arma, & Gellium Egnatium, Samnitium ducem, & Umbros ad defectionem vocari, & Gallos pretio ingenti sollicitari. His nuntiis senatus conterritus iustitium indici, delectum omnis generis hominum haberi iussit. nec ingenui modo aut juniores sacramento adacti, sed seniorum etiam cohortes factæ, libertinique centuriati. & defendendæ urbis consilia agitabantur; summæque rerum prætor P. Sempronius præerat. Ceterum parte curæ exonerarunt senatum L. Volumnii consulis literæ, quibus cæsos fusosque populos Campaniæ cognitum est. Itaque & supplicationes ob rem bene gestam consulis nomine decernunt. iustitium remittitur, quod fuerat dies decem & octo, supplicatioque perlata fuit. Tum de præsidio regionis, depopulatæ ab Samnitibus, agitari coëptum. Itaque placuit, ut duæ coloniæ circa Vescinum & Falernum agrum deducerentur: una ad ostium Liris fluvii, quæ Minturnæ appellata; altera in saltu Vescino, Falernum contingente agrum, ubi Sinope dicitur Græca urbs fuisse, Sinuessæ deinde ab colonis Romanis appellata. Tribunis plebis negotium datum est, ut plebeiscito juberetur P. Sempronius prætor triumviros in ea loca colonis deducendis creare. nec, qui nomina darent, facile inveniebantur, quia in stationem se prope perpetuam infestæ regionis, non in agros, mitti rebantur. Avertit ab eis curis senatum Etruriæ ingravescens bellum, & crebræ literæ Appii, monentis, ne regionis ejus motum negligerent: *quatuor gentes confer-*

*re arma, Etruscos, Samnites, Umbros, Gallos. jam castra bifariam facta esse, quia unus locus capere tantam multitudinem non possit. Ob hæc, & (jam appetebat tempus) comitiorum causa L. Volumnius consul Romam revocatus: qui prius, quam ad suffragium centurias vocaret, in concionem advocato populo, multa de magnitudine belli Etrusci differuit. jam tum, cum ipse ibi cum collega rem pariter gesserit, fuisse tantum bellum, ut nec duce uno, nec exercitu geri potuerit: accessisse postea dici Umbros, & ingentem exercitum Gallorum. Adversus quatuor populos duces consules illo die deligi meminissent. se, nisi confideret, cum consensu populi Romani consulem declaratum iri, qui haud dubie tum primus omnium ductor habeatur, dictatorem fuisse extemplo dicturum.*

XXII. Nemini dubium erat, quin Q. Fabius omnium consensu destinaretur; eumque & prærogativæ, & primo vocatæ omnes centuriæ consulem cum L. Volumnio dicebant. Fabii oratio fuit, qualis biennio ante: deinde, ut vincebatur consensu, versa postremo ad collegam P. Decium poscendum. id senectutis suæ admiculum fore: censura duobusque consulatibus sentis gestis expertum se, nil concorde collegio firmitus ad rempublicam tuendam esse. novo imperii socio vix jam assuescere senilem animum posse: cum moribus notis facilius se communicaturum consilia. Subscripsit orationi ejus consul, cum meritis P. Decii laudibus, tum, quæ ex concordia consulum bona, quæque ex discordia mala in administratione rerum militarium evenirent, memorando, quam prope ultimum discrimen suis & collegæ

*certaminibus nuper ventum foret : admonendo Decium Fabiumque, ut uno animo, una mente viverent. esse præterea viros natos militiæ, factis magnos, ad verborum linguæque certamina rudes : ea ingenia consularia esse. Callidos solertesque, juris atque eloquentiæ consultos, qualis Ap. Claudius esset, urbi ac foro præsides habendos, prætoresque ad reddenda jura creandos esse. His agendis dies est consumptus. postridie ad præscriptum consulis & consularia & prætorialia comitia habita. Consules creati Q. Fabius & P. Decius : Ap. Claudius prætor ; omnes absentes. & L. Volumnio ex senatusconsulto & scito plebis prorogatum in annum imperium est.*

XXIII. Eo anno prodigia multa fuerunt : quorum averruncandorum causa supplicationes in biduum senatus decrevit. Publice vinum ac tus præbitum. supplicatum iere frequentes viri feminæque. Insignem supplicationem fecit certamen in sacello Pudicitæ patriciæ, quæ in foro boario est ad ædem rotundam Herculis, inter matronas ortum. Virginiam, Auli filiam, patriciam plebejo nuptam L. Volumnio consuli, matronæ, quod e Patribus enupsisset, sacris arcuerant. Brevis altercatio inde ex iracundia muliebri in contentionem animorum exarsit. cum se Virginia & patriciam & pudicam in patriciæ Pudicitæ templum ingressam, & uni nuptam, ad quem virgo deducta sit ; nec se viri honorumve ejus ac rerum gestarum poenitere, vero gloriaretur. Facto deinde egregio magnifica verba adauxit. in vico Longo, ubi habitabat, ex parte ædium, quod fatis esset loci modico sacello,

exclūsit; aramque ibi posuit. &, convocatis plebejis matronis, conquesta injuriam patriciarum, *Hanc ego aram*, inquit, *Pudicitiae plebejæ dedico: vosque hortor, ut, quod certamen virtutis viros in hac civitate tenet, hoc pudicitiae inter matronas sit: deique operam, ut hæc ara, quam illa, si quid potest, sanctius & a castioribus coli dicatur.* Eodem ferme ritu & hæc ara, quo illa antiquior, culta est; ut nulla, nisi spectatæ pudicitiae matrona, & quæ uni viro nupta fuisset, jus sacrificandi haberet. Vulgata dein religio a pollutis, nec matronis solum, sed omnis ordinis feminis, postremo in oblivionem venit. Eodem anno Cn. & Q. Ogulnii ædiles curules aliquot foeneratoribus diem dixerunt: quorum bonis multatis, ex eo, quod in publicum redactum est, ænea in Capitolio limina, & trium menfarum argentea vasa in cella Jovis, Jovemque in culmine cum quadrigis, & ad ficum Ruminalem simulacra infantium conditorum Urbis sub uberibus lupæ posuerunt; semitamque saxo quadrato a Capena porta ad Martis straverunt. & ab ædilibus plebejis L. Ælio Pæto & C. Fulvio Curvo, ex multatitia item pecunia, quam exegant pecuariis damnatis, ludî facti; pateræque aureæ ad Cereris positæ.

XXIV. Q. inde Fabius quintum & P. Decius quartum consulatum ineunt, tribus consulatibus censuraque collegæ; nec gloriâ magis rerum, quæ ingens erat, quam concordia inter se clari. quæ ne perpetua esset, ordinum magis, quam ipsorum, inter se certamen intervenisse reor: patriciis ten-

dentibus, ut Fabius Etruriam extra ordinem provinciam haberet; plebejis auctoribus Decio, ut ad sortem revocaret. Fuit certe contentio in senatu; &, postquam ibi Fabius plus poterat, revocata res ad populum est. in concione, ut inter militares viros, & factis potius, quam dictis, fretos, pauca verba habita: Fabius, *quam arborem conseruisset, sub ea legere alium fructum, indignum esse, dicere; se aperuisse Ciminiam silvam, viamque per devios saltus Romano bello fecisse. Quid se id ætatis sollicitassent, si alio duce bellum gesturi essent? Nimirum adversarium se, non socium imperii, legisse, sensim exprobrat: & invidisse Decium concordiis collegiis tribus. Postremo, se tendere nihil ultra, quam ut, si se dignum provincia ducerent, in eam mitterent: in senatus arbitrio se fuisse, & in potestate populi futurum. P. Decius senatus injuriam querebatur: quoad potuerint, Patres annisos, ne plebejis aditus ad magnos honores esset: postquam ipsa virtus pervicerit, ne in ullo genere hominum inhonorata esset, queri, quemadmodum irrita sint non suffragia modo populi, sed arbitria etiam fortunæ, & in paucorum potestatem vertantur. Omnes ante se consules sortitos provincias esse; nunc extra sortem Fabio senatum provinciam dare. Si honoris ejus causa: ita eum de se, deque republica meritum esse, ut faveat Q. Fabii gloriæ, quæ modo non sua contumelia splendeat. Cui autem dubium esse, ubi unum bellum sit asperum ac difficile, cum id alteri extra sortem mandetur, quin alter consul pro supervacaneo atque inutili habeatur? Gloriarî Fabium rebus in Etruria gestis, velle & P.*



*Decium gloriari: & forsitan, quem ille obrutum ignem reliquerit, ita ut toties novum ex improvise incendium daret, eum se extincturum. Postremo se collegæ honores præmiaque concessurum verecundiæ ætatis ejus majestatisque; cum periculum, cum dimicatio proposita sit, neque cedere sua sponte, neque cessurum. &, si nihil aliud ex eo certamine tulerit, illud certe latuerum, ut, quod populi sit, populus jubeat potius, quam patres gratificentur. Jovem optimum maximum Deosque immortales se precari, ut ita sortem æquam sibi cum collega dent, si eandem virtutem felicitatemque in bello administrando daturi sint. certe id & natura æquum, & exemplo utile esse, & ad famam populi Romani pertinere, eos consules esse, quorum utrolibet duce bellum Etruscum geri recte possit. Fabius, nihil aliud precatus populum, quam ut prius, quam intro vocarentur ad suffragium tribus, Ap. Claudii prætoris allatas ex Etruria literas audirent, comitio abit. nec minore populi consensu, quam senatus, provincia Etruria extra sortem Fabio decreta est.*

XXV. Concursum inde ad consulem factus omnium ferme juniorum: & pro se quisque nomina dabant. tanta cupido erat sub eo duce stipendia faciendi. Qua circumfusus turba, *Quatuor millia, inquit, peditum & sexcentos equites dumtaxat scribere in animo est: hodierno & crastino die qui nomina dederitis, mecum ducam. majori mihi curæ est, ut omnes locupletes reducam, quam ut multis rem geram militibus.* Profectus apto exercitu, & eo plus fiducia ac spei gerente, quod non desiderata multitudo erat, ad oppidum Aharnam, unde haud pro-

cul hostes erant, ad castra Appii prætoris pergit. paucis citra millibus lignatores ei cum præsidio occurrunt: qui, ut lictores prægredi viderunt, Fabiumque esse consulem accepere, læti atque alacres Diis populoque Romano grates agunt, quod eum sibi imperatorem misissent. Circumfusi deinde cum consulem salutarent, quærit Fabius, quo pergerent; respondentibusque, lignatum se ire, *ain' tandem*, inquit, *num castra vallata non habetis?* Ad hoc cum succlamatum esset, *duplici quidem vallo, & fossa, & tamen in ingenti metu esse: habetis igitur*, inquit, *assatim lignorum. redite, & vellite vallum.* Redeunt in castra, terroremque ibi, vellentem vallum, & iis, qui in castris remanserant, militibus, & ipsi Appio fecerunt. Tum pro se quisque alii aliis dicere, *consulis se Q. Fabii facere jussu.* Postero inde diè castra mota, & Appius prætor Romanam dimissus. inde nusquam stativa Romanis fuisse. negabat utile esse, uno loco sedere exercitum: itineribus ac mutatione locorum nobiliorem ac salubriorem esse. fiebant autem itinera, quanta fieri sinebat hiems haud dum exacta. Vere inde primo, relicta secunda legione ad Clusium, quod Camars olim appellabant, præpositoque castris L. Scipione proprætore, Romam ipse ad consultandum de bello rediit: sive ipse sponte sua, quia bellum ei majus in conspectu erat, quam quantum esse famæ crediderat; sive senatusconsulto accitus. nam in utrumque auctores sunt. Ab Ap. Claudio prætore retractum quidam videri volunt; cum in senatu & apud populum (id quod per literas assidue

fecerat) terrorem belli Etrusci augetet: *non suffecturum ducem unum, nec exercitum unum, adversus quatuor populos. Periculosum esse, sive juncti unum premant, sive id diversi gerant bellum, ne ad omnia simul obire unus non possit. Duas se ibi legiones Romanas reliquisse: & minus quinque millia peditum equitumque cum Fabio venisse. sibi placere, P. Decium consulem primo quoque tempore in Etruriam ad collegam proficisci: L. Volumnio Samnium provinciam dari. Si consul malit in suam provinciam ire; Volumnium in Etruriam ad consulem cum exercitu jussu consulari proficisci.* Cum magnam partem moveret oratio prætoris, P. Decium censuisse ferunt, ut omnia integra ac libera Q. Fabio fervarentur, donec vel ipse, si per commodum reipublicæ posset, Romam venisset, vel aliquem ex legatis misisset; a quo disceret senatus, quantum in Etruria belli esset, quantisque administrandum copiis, & quot per duces esset.

XXVI. Fabius, ut Romam rediit, & in senatu & productus ad populum median orationem habuit, ut nec augere, nec minuere videretur belli famam; magisque in altero assumendo duce aliorum indulgere timori, quam suo aut reipublicæ periculo consulere. *ceterum, si sibi adiutorem belli sociumque imperii darent, quonam modo se oblivisci P. Decii consulis per tot collegia experti posse? Neminem omnium secum conjungi malle: & copiarum satis sibi cum P. Decio, & nunquam nimium hostium fore. Sin collega quid aliud malit; at sibi L. Volumnium darent adiutorem.* Omnium rerum arbitrium & a po-

pulo, & a senatu, & ab ipso collega, Fabio permissum est. & cum P. Decius se in Samnium vel in Etruriam proficisci paratum esse ostendisset; tanta lætitia ac gratulatio fuit, ut præciperetur victoria animis, triumphusque, non bellum decretum consulibus videretur. Invenio apud quosdam, ex templo, consulatu inito, profectos in Etruriam Fabium Deciumque, sine ulla mentione fortis provinciarum certaminumque inter collegas, quæ exposui. Sunt, quibus ne hæc quidem certamina exponere satis fuerit. adjecerunt & Appii criminationes de Fabio absente ad populum, & pertinaciam adversus præsentem consulem prætoris, contentionemque aliam inter collegas, tendente Decio, ut suæ quisque provinciæ sortem tueretur. Constare res incipit ex eo tempore, quo profecti ambo consules ad bellum sunt. Ceterum, antequam consules in Etruriam pervenirent, Senones Galli multitudine ingenti ad Clusium venerunt, legionem Romanam castraque oppugnaturi. Scipio, qui castris præerat, loco adjuvandam paucitatem suorum militum ratus, in colle, qui inter urbem & castra erat, aciem erexit. Sed, ut in re subita, parum explorato itinere ad jugum perrexerit, quod hostes ceperant, parte alia egressi. ita cæsa ab tergo legio, atque in medio, cum hostis undique urgeret, circumventa. Deletam quoque ibi legionem, ita ut nuntius non superesset, quidam auctores sunt; nec ante ad consules, qui jam haud procul a Clusio aberant, famam ejus cladis perlatam, quam in conspectu fuere Gallorum equites,

pectoribus equorum suspenſa geſtantes capita, & lanceis infixæ, ovantesque moris ſui carmine. Sunt, qui Umbros fuiſſe, non Gallos, tradant; nec tantum cladis acceptum: & circumventis pabulatoribus cum L. Manlio Torquato legato Scipionem proprætorem ſubſidium e caſtris tuliſſe, victoresque Umbros, redintegrato prælio, victos eſſe: captivosque eis ac prædam ademtam. Similius vero eſt, a Gallo hoſte, quam Umbro, eam cladem acceptam; quod, cum ſæpe alias, tum eo anno, Gallici tumultus præcipuus terror civitatem tenuit. Itaque præterquam quod ambo conſules proſecti ad bellum erant cum quatuor legionibus, & magno equitatu Romano, Campanisque mille equitibus delectis, ad id bellum miſſis, & ſociorum nominisque Latini majore exercitu, quam Romani; alii duo exercitus haud procul urbe Etruriæ oppoſiti, unus in Falifco, alter in Vaticano agro. Cn. Fulvius & L. Poſtumiſ Megellus, proprætoreſ ambo, ſtativa in eis locis habere juſſi.

XXVII. Conſules ad hoſtes, tranſgreſſo Apennino, in agrum Sentinatem pervenerunt. Ibi quatuor millium ferme intervallo caſtra poſita. Inter hoſtes deinde conſultationes habitæ: atque ita convenit, ne unis caſtris miſcerentur omnes, neve in aciem deſcenderent ſimul. Samnitibus Galli, Etrufcis Umbri adjecti. dies indiſta pugnæ: Samniti Gallisque delegata pugna: inter ipſum certamen Etrufci Umbrique juſſi caſtra Romana oppugnare. Hæc conſilia turbarunt tranſfugæ Cluſini tres, clam nocte ad Fabium conſulem tranſgreſſi. qui, editis

hostium consiliis, dimissi cum donis, ut subinde, ut quæque res nova decreta esset, exploratam perferrent. Consules Fulvio, ut ex Falisco, Postumio, ut ex Vaticano exercitum ad Clusium admoveant, summaque vi fines hostium depopulentur, scribunt. Hujus populationis fama Etruscos ex agro Sentinate ad suos fines tuendos movit. Instare inde consules, ut absentibus iis pugnaretur. per biduum laceffiere proelio hostem. biduo nihil dignum dictu actum. Pauci utrinque cecidere: magisque irritati sunt ad justum certamen animi, quam ad discrimen summa rerum adducta. tertio die descensum in campum omnibus copiis est. Cum instructæ acies starent, cerva fugiens lupum e montibus exacta per campos inter duas acies decurrit: inde diversæ feræ, cerva ad Gallos, lupus ad Romanos cursum deflexit. Lupo data inter ordines via; cervam Galli confixere. Tum ex antesignanis Romanus miles, *Illac fuga, inquit, & cædes vertit, ubi sacram Dianæ feram jacentem videtis. Hinc victor Martius lupus, integer & intactus, gentis nos Martiæ & conditoris nostri admonuit.* Dextro cornu Galli, sinistro Samnites constiterunt. adversus Samnites Q. Fabius primam ac tertiam legiones pro dextro cornu; adversus Gallos pro sinistro Decius quintam & sextam instruxit. secunda & quarta cum L. Volumnio proconsule in Samnio gerebant bellum. Primo concursu adeo æquis viribus gesta res est, ut, si affuissent Etrusci & Umbri, aut in acie, aut in castris, quocunque se inclinassent, accipienda clades fuerit.

XXVIII. Ceterum, quanquam communis adhuc Mars belli erat, necdum discrimen fortuna fecerat, qua datura vires esset; haudquaquam similis pugna in dextro lævoque cornu erat. Romani apud Fabium arcebant magis, quam inferebant, pugnam; extrahebaturque in quam maxime serum diei certamen: quia ita persuasum erat duci, & Samnites & Gallos primo impetu feroces esse, quos sustineri satis sit; longiore certamine sensum residere Samnitium animos: Gallorum quidem etiam corpora intolerantissima laboris atque æstus fluere; primaque eorum prælia plus quam virorum, postrema minus quam feminarum esse. In id tempus igitur, quo vinci solebat hostis, quam integerrimas vires militi servabat. Ferocior Decius & ætate & vigore animi, quantumcunque virium habuit, certamine primo effudit. &, quia lentior videbatur pedestris pugna, equitatum in pugnam concitat, & ipse, fortissimæ juvenum turmæ immixtus, orat procures juventutis, in hostem ut secum impetum faciant: duplicem illorum gloriam fore, si ab lævo cornu & ab equite victoria incipiat. Bis avertere Gallicum equitatum. iterum longius eVectos, & jam inter media equitum agmina prælium cientes, novum pugnae conterruit genus: effedis carrisque superflans armatus hostis ingenti sonitu equorum rotarumque advenit, & insolitos ejus tumultus Romanorum conterruit equos. Ita victorem equitatum velut lymphaticus pavor dissipat: sternit inde ruentes equos virosque improvida fuga. Turbata hinc etiam signa legionum: multique impetu equo-

rum ac vehiculorum raptorum per agmen obtriti antesignani : & infecuta, simul territos hostes vidit, Gallica acies nullum spatium respirandi recipiendique se dedit. Vociferari Decius, *Quo fugerent? quamve in fuga spem haberent?* obistere cedentibus, ac revocare fusos. deinde, ut nulla vi perculsos sustinere poterat, patrem P. Decium nomine compellans, *Quid ultra moror, inquit, familiare fatum? datum hoc nostro generi est, ut luendis periculis publicis piacula simus. Jam ego mecum hostium legiones mactandas Telluri ac Diis Manibus dabo.* Hæc locutus, M. Livium pontificem, quem descendens in aciem digredi vetuerat ab se, præire jussit verba, quibus se legionesque hostium pro exercitu populi Romani Quiritium devoveret. Devotus inde eadem precatione eodemque habitu, quo pater P. Decius ad Veferim bello Latino se jusserat devoveri. Cum secundum sollemnes precationes adjecisset, *præ se agere sese formidinem ac fugam, cædemque ac cruorem, cælestium, inferorum iras : contacturum funebribus diris signa, tela, arma hostium ; locumque eundem suæ pestis & Gallorum ac Samnitium fore.* Hæc exsecratus in se hostesque, qua confertissimam cernebat Gallorum aciem, concitat equum : inferensque se ipse infestis telis est interfectus.

XXIX. Vix humanæ inde opis videri pugna potuit. Romani, duce amisso, quæ res terrori alias esse solet, sistere fugam, ac novam de integro velle instaurare pugnam. Galli, & maxime globus circumstantis consulis corpus, velut alienata mente, vana



incassum jactare tela. torpere quidam, & nec pug-  
næ meminisse, nec fugæ. At ex parte altera ponti-  
fex Livius, cui lictores Decius tradiderat, jusse-  
ratque proprætorem esse, vociferari, *Vicisse Ro-  
manos, defunctos consulis fato. Gallos Samnitesque  
Telluris matris ac Deorum Manium esse. Rapere ad  
se ac vocare Decium devotam secum aciem; suria-  
rumque ac formidinis plena omnia ad hostes esse.* Su-  
perveniant deinde his restituentibus pugnam L. Cor-  
nelius Scipio & C. Marcius, cum subsidiis ex no-  
vissima acie jussu Q. Fabii consulis ad præsidium  
collegæ missi. ibi auditur P. Decii eventus, ingens  
hortamen ad omnia pro republica audenda. Itaque  
cum Galli structis ante se scutis conferti starent,  
nec facilis pede collato videretur pugna; jussu le-  
gatorum collecta humi pila, quæ strata inter duas  
acies jacebant, atque in testudinem hostium con-  
jecta. quibus plerisque in scuta, verutis in cor-  
pora ipsa fixis, sternitur cuneus; ita ut magna pars  
integris corporibus attoniti conciderent. hæc in  
sinistro cornu Romanorum fortuna variaverat. Fa-  
bius in dextro, primo (ut ante dictum est) cunc-  
tando extraxerat diem: deinde, postquam nec cla-  
mor hostium, nec impetus, nec tela missa, ean-  
dem vim habere visa; præfectis equitum jussis ad  
latus Samnitium circumducere alas, ut signo da-  
to in transversos, quanto maximo possent impe-  
tu, incurrerent; sensim suos signa inferre jussit,  
& commovere hostem. Postquam non resisti vi-  
dit, & haud dubiam lassitudinem esse; tum, col-  
lectis omnibus subsidiis, quæ ad id tempus refer-

vaverat, & legiones concitavit, & signum ad invadendos hostes equitibus dedit. Nec sustinuerunt Samnites impetum; præterque aciem ipsam Gallorum, relictis in dimicatione fociis, ad castra effuso cursu ferebantur. Galli, testudine facta, conferti stabant. Tum Fabius, audita morte collegæ, Campanorum alam, quingentos fere equites, excedere acie jubet, & circumvectos ab tergo Gallicam invadere aciem: tertiæ deinde legionis subsequi principes, &, qua turbatum agmen hostium viderent impetu equitum, instare ac territos cedere. Ipse ædem Jovi Victori spoliæque hostium cum vovisset, ad castra Samnitium perrexerit; quo multitudo omnis consternata agebatur. Sub ipso vallo, quia tantam multitudinem portæ non recipere, tentata ab exclusis turba suorum pugna est. Ibi Gellius Egnatius imperator Samnitium cecidit. compulsi deinde intra vallum Samnites: parvoque certamine capta castra, & Galli ab tergo circumventi. Cæsa eo die hostium viginti quinque millia, octo capta. nec incruenta victoria fuit. nam ex P. Decii exercitu cæsa septem millia; ex Fabii, mille ac ducenti. Fabius, dimissis ad quærendum collegæ corpus, spolia hostium coniecta in acervum Jovi Victori cremavit. Consul is corpus eo die, quia obrutum superstratis Gallorum cumulis erat, inveniri non potuit. postero die inventum relatumque est cum multis militum lacrimis. Intermissa inde omnium aliarum rerum cura, Fabius collegæ funus omni honore laudibusque meritis celebrat.

XXX. Et in Etruria per eosdem dies ab Cr.

Fulvio proprætores res ex sententia gesta; &, præter ingentem illatam populationibus agrorum hosti cladem, pugnatum etiam egregie est: Perusinarumque & Clusinarum cæsa amplius millia tria, & signa militaria ad viginti capta. Samnitium agmen, cum per Pelignum agrum fugeret, circumventum a Pelignis est. ex millibus quinque ad mille cæsi. Magna ejus diei, quo in Sentinati agro bellatum, fama est, etiam vero fianti. sed superjecere quidam augendo fidem; qui in hostium exercitu peditum quadraginta millia trecentos triginta, equitum sex millia, mille carpentorum scripsere fuisse: scilicet cum Umbris Tuscisque, quos & ipsos pugnae affuisse. &, ut Romanorum quoque augerent copias, L. Volumnium pro consule ducem consulibus, exercitumque ejus legionibus consulum adjiciunt. In pluribus annalibus duorum ea consulum propria victoria est. Volumnius in Samnio interim res gerit, Samnitiumque exercitum, in Tiferinum montem compulsus, non deterritus iniquitate loci, fundit fugatque. Q. Fabius, Deciano exercitu relicto in Etruria, suis legionibus deductis ad urbem, de Gallis Etruscisque ac Samnitibus triumphavit. milites triumphantem secuti sunt. Celebrata inconditis carminibus militaribus non magis victoria Q. Fabii, quam mors præclara P. Decii est: excitataque memoria parentis, æquata eventu publico privatoque filii laudibus. Data ex præda militibus æris octogeni bini, sagaque & tunicæ; præmia illa tempestate militiæ haudquaquam spernenda.

XXXI. His ita rebus gestis, nec in Samnitibus

adhuc, nec in Etruria pax erat. nam & Perusinis auctoribus, post deductum ab consule exercitum rebellatum fuerat: & Samnites prædatum in agrum Vescinum Formianumque, & parte alia in Æterninum, quæ Vulturno adjacent flumini, descendere. Adversus eos Ap. Claudius prætor cum exercitu Deciano missus. Fabius in Etruria rebellante denuo quatuor millia & quingentos Perusinorum occidit: cepit ad mille septingentos quadraginta: qui redempti singuli æris trecentis decem. præda alia omnis militibus concessa. Samnitium legiones, cum partim Ap. Claudius prætor, partim L. Volumnius pro consule sequeretur, in agrum Stellatem convenerunt. ibi & Samnitium legiones omnes confidunt, & Appius Volumniusque castra conjungunt. Pugnatum infestissimis animis, hinc ira stimulante adversus rebellantes toties, illinc ab ultima jam dimicantibus spe. Cæsa ergo Samnitium sexdecim millia trecenti, capta duo millia septingenti. ex Romano exercitu cecidere duo millia septingenti. Felix annus bellicis rebus, pestilentia gravis, prodigiisque sollicitus. nam, & terram multifariam pluuisse, & in exercitu Ap. Claudii plerosque fulminibus ictos, nuntiatum est: librique ob hæc aditi. Eo anno Q. Fabius Gurgæ, consulis filius, aliquot matronas ad populum stupri damnatas pecunia multavit. ex quo multatio ære Veneris ædem, quæ prope Circum est, faciendam curavit. Superfunt etiam nunc Samnitium bella, quæ continua per quartum jam volumen, annumque sextum & quadragesimum, a M. Valerio, A. Corne-

lio consulibus, qui primi Samnio arma intulerunt; agimus: & ne tot annorum clades utriusque gentis laboresque actos nunc referam, quibus nequiverint tamen dura illa pectora vinci; proximo anno Samnites in Sentinati agro, Pelignis, ad Tifernum, Stel-  
latibus campis, suis ipsi legionibus, mixti alienis, ab quatuor exercitibus quatuor ducibus Romanis cæsi fuerant, imperatorem clarissimum gentis suæ amiserant; socios belli, Etruscos, Umbros, Gallos, in eadem fortuna videbant, qua ipsi erant: nec suis, nec externis viribus jam stare poterant; tamen bello non abstinebant. adeo ne infeliciter quidem defensæ libertatis tædebat: & vinci, quam non tentare victoriam, malebant. Quinam sit ille, quem non pigeat longinquitatis bellorum scribendo legendoque, quæ gerentes non fatigaverunt?

XXXII. Q. Fabium, P. Decium, L. Postumius Megellus & M. Atilius Regulus consules secuti sunt. Samnium ambobus decreta provincia est; quia tres scriptos hostium exercitus, uno Etruriam, altero populationes Campaniæ repeti, tertium tuendis parari finibus, fama erat. Postumium valetudo adversa Romæ tenuit: Atilius extemplo profectus, ut in Samnio hostes (ita enim placuerat Patribus) nondum egressos opprimeret. Velut ex composito ibi obvium habuere hostem; ubi & intrare, nedum vastare, ipsi Samnitium agrum prohiberentur: & egredi inde in pacata sociorumque populi Romani fines Samnitum prohiberent. Cum castra castris collata essent, quod vix Romanus toties victor auderet, ausi Samnites sunt (tantum desperatio ultima

remeritatis facit) castra Romana oppugnare. & quanquam non venit ad finem tam audax inceptum, tamen haud omnino vanum fuit. Nebula erat ad multum diei densa adeo, ut lucis usum eriperet, non prospectu modo extra vallum adempto, sed propinquo etiam congregientium inter se conspectu. Hac velut latebra insidiarum freti Samnites, vixdum satis certa luce, & eam ipsam premente caligine, ad stationem Romanam in porta segniter agentem vigilias perveniunt. Improviso oppressis nec animi satis ad resistendum, nec virium fuit. Ab tergo castrorum decumana porta impetus factus. itaque captum quæstorium: quæstorque ibi L. Opimius Pansa occisus. conclamatum inde ad arma.

XXXIII. Consul, tumultu excitus, cohortes duas fociorum, Lucanam Sueffanamque, quæ proximæ forte erant, tueri prætorium jubet: manipulos legionum principali via inducit. Vixdum satis aptatis armis, in ordines eunt: & clamore magis, quam oculis, hostem noscunt: nec, quantus numerus sit, æstimari potest. Cedunt primo incerti fortunæ suæ, & hostem introrsum in media castra accipiunt. inde cum consul vociferaretur, *expulsine extra vallum, castra deinde sua oppugnaturi essent*, rogitans; clamore sublato connisi primo resistunt: deinde inferunt pedem urgentque, & impulsos semel terrore eodem agunt, quo coeperunt. Expellunt extra portam vallumque. inde pergere ac persequi (quia turbida lux metum circa insidiarum faciebat) non ausi, liberatis castris contenti,

receperunt se intra vallum, trecentis ferme hostium occisis. Romanorum stationis primæ vigilumque & eorum, qui circa quæstorium oppressi, periere ad ducentos triginta. Animos inde Samnitibus non infelix audacia auxit; & non modo proferre inde castra Romanum, sed ne papulari quidem per agros suos, patiebantur. retro in pacatum Soranum agrum pabulatores ibant. Quarum rerum fama, tumultuosior etiam, quam res erant, perlata Romam, coegit L. Postumium consulem, vixdum validum, proficisci ex urbe. Prius tamen, quam exiret, militibus edicto Soram jussis convenire, ipse ædem Victoriæ, quam ædilis curulis ex multatitia pecunia faciendam curaverat, dedicavit. Ita ad exercitum profectus, ab Sora in Samnium ad castra collegæ perrexit. inde postquam Samnites, diffisi duobus exercitibus resisti posse, recesserunt; diversi consules ad vastandos agros urbesque oppugnandas discedunt.

XXXIV. Postumius Miloniam oppugnare adortus, vi primo atque impetu, dein, postquam ea parum procedebant, opere ac vineis demum adjunctis muro cepit. Ibi, capta jam urbe, ab hora quarta usque ad octavam fere horam omnibus partibus urbis diu incerto eventu pugnatum est. postremo potitur oppido Romanus. Samnitium cæsit tria millia ducenti: capti quatuor millia ducenti, præter prædam aliam. Inde Ferenatinum ductæ legiones: unde oppidani cum omnibus rebus suis, quæ ferri agique potuerunt, nocte per averfam portam silentio excefferunt. Igitur, simul advenit con-

ful, primo ita compositus instructusque mœnibus successit, tanquam idem, quod ad Milioniam fuerat, certaminis foret: deinde, ut silentium vastum in urbe, nec arma, nec viros in turribus ac muris vidit, avidum invadendi deferta mœnia militem detinet, ne quam occultam in fraudem incautus rueret. Duas turmas sociorum Latini nominis circumequitare mœnia, atque explorare omnia jubet. equites portam unam alteramque eadem regione in propinquo patentes conspiciunt, itineribusque iis vestigia nocturnæ hostium fugæ. Adequitant deinde sensim portis, urbemque ex tuto rectis itineribus perviam conspiciunt: ad consulem referunt, excessum urbe; solitudine haud dubia id perspicuum esse, recentibus vestigiis fugæ, ac strage rerum in trepidatione nocturna passim relictarum. His auditis, consul ad eam partem urbis, qua adierant equites, circumducit agmen: constitutisque haud procul porta signis, quinque equites jubet intrare urbem, & , modicum spatium progressos, tres manere eodem loco, si tuta videantur; duos explorata ad se referre. Qui ubi redierunt, retuleruntque, eo se progressos, unde in omnes partes circumspectus esset, longe lateque silentium ac solitudinem vidisse; extemplo consul cohortes expeditas in urbem induxit; ceteros interim castra communire jussit. ingressi milites, refractis foribus, paucos graves ætate aut invalidos inveniunt, relictæque, quæ migratu difficilia essent. Ea direpta; & cognitum ex captivis est, communi consilio aliquot circa urbes conscisse fugam: suos prima vi-



gilia profectos. credere, eandem in aliis urbibus solitudinem inventuros. Dictis captivorum fides existit: desertis oppidis consul potitur.

XXXV. Alteri consuli M. Atilio nequaquam tam facile bellum fuit. Cum ad Luceriam duceret legiones, quam oppugnari ab Samnitibus audierat, ad finem Lucerinum ei hostis obvius fuit. ibi ira vires æquavit. Proelium varium & anceps fuit: tristius tamen eventu Romanis; & quia insueti erant vinci, & quia digredientes magis, quam in ipso certamine, senserunt, quantum in sua parte plus vulnere ac cædis fuisset. Itaque is terror in castris ortus, qui si pugnantes cepisset, insignis accepta clades foret. Tum quoque sollicita nox fuit, jam invasurum castra Samnitum credentibus, aut prima luce cum victoribus conferendas manus. Minus cladis, ceterum non plus animorum, ad hostes erat. ubi primum illuxit, abire sine certamine cupiunt. Sed via una, & ea ipsa præter hostes, erat: qua ingressi, præbuere speciem recta tendentium ad castra oppugnanda. Consul arma capere milites jubet, & sequi se extra vallum; legatis, tribunis, præfectis sociorum imperat, quod apud quemque facto opus est. Omnes affirmant, *se quidem omnia facturos, sed militum jacere animos. tota nocte inter vulnera & gemitus morientium vigilatum esse. Si ante lucem ad castra ventum foret, tantum periculi fuisse, ut relicturi signa fuerint: nunc pudore a fuga contineri, alioquin pro victis esse.* Quæ ubi consul accepit, sibimet ipsi circumeundos alloquendosque milites ratus, ut ad quosque ven-

rat, cunctantes arma capere increpabat: *Quid cessarent, tergiversarenturque? Hostem in castra venturum, nisi illi extra castra exissent, & pro tentoriis suis pugnaturos; si pro vallo nollent. armatis ac dimicantibus dubiam victoriam esse. Qui nudus atque inermis hostem maneat, ei aut mortem, aut servitutem patiendam.* Hæc jurganti increpantique respondebant: *Confectos se pugna hesternæ esse: nec virium quidquam, nec sanguinis superesse. majorem multitudinem hostium apparere, quam pridie fuerit.* Inter hæc appropinquabat agmen: &, jam breviori intervallo certiora intuentes, vallum secum portare Samnitum affirmant; nec dubium esse, quin castra circumvallaturi sint. Tunc, *enimvero*, consul, *indignum facinus esse, vociferari, tantam contumeliam ignominiamque ab ignavissimo accipi hoste. Etiamne circumsedebimur*, inquit, *in castris, ut fame potius per ignominiam, quam ferro, si necesse est, per virtutem, moriamur? Dii bene verterent, facerentque, quod se dignum quisque ducerent.* Consulem M. Atilium vel solum, *si nemo alius sequatur, iturum adversus hostes: casurumque inter signa Samnitium potius, quam circumvallari castra Romana videat.* Dicta consulis legati, tribunique, & omnes turmæ equitum, & centuriones primorum ordinum, approbavere. Tum pudore victus miles segniter arma capit, segniter e castris egreditur. longo agmine, nec continenti, moesti ac prope victi procedunt adversus hostem, nec spe, nec animo certiores. Itaque simul conspecta sunt Romana signa, extemplo a primo Samnitium agmine ad novissimum fremitus

perfertur, *Exire, id quod timuerint, ad impediendum iter Romanos. Nullam inde ne fugæ quidem patere viam. illo loco aut cadendum esse, aut, stratis hostibus, per corpora eorum evadendum.* ✕

XXXVI. In medio sarcinas conjiciunt; armati suis quisque ordinibus instruunt aciem. Jam exiguum inter duas acies erat spatium, & stabant expectantes, dum ab hostibus prius impetus, prius clamor inciperet. neutris animus est ad pugnandum. Diversique integri atque intacti abissent, ni cecedenti instaturum alterum timuissent. sua sponte inter invitos tergiversantesque segnīs pugna, clamore incerto atque impari, cœpit: nec vestigio quisquam movebatur. Tum consul Romanus, ut rem excitaret, equitum paucas turmas extra ordinem immisit: quorum cum plerique delapsi ex equis essent, & alii turbati; & ab Samnitium acie ad opprimendos eos, qui ceciderant, & ad suos tuendos ab Romanis procursum est. Inde paululum irritata pugna est, sed aliquanto & impigre magis, & plures procurrerant Samnites: & turbatus eques sua ipse subsidia territis equis proculcavit. hinc fuga cœpta totam avertit aciem Romanam. Jamque in terga fugientium Samnites pugnant, cum consul, equo prævectus ad portam castrorum, ac statione equitum ibi opposita, edicto-que, *ut, quicumque ad vallum tenderet, sive ille Romanus, sive Samnis esset, pro hoste haberent; hæc ipsa minitans, obstitit profuse tendentibus suis in castra. Quo pergis, inquit, miles? & hic arma & viros invenies. nec, vivo consule tuo, nisi victor castris*

*intrabis. Proinde elige, cum cive, an hoste, pugnare malis.* Hæc dicente consule, equites infestis cuspidibus circumfunduntur, ac peditem in pugnam redire jubent. Non virtus solum consulem, sed fors etiam adjuvit; quod non institerunt Samnites, spatiumque circumagendi signa, vertendique aciem a castris in hostem fuit. Tum alii alios hortari, ut repeterent pugnam: centuriones ab signiferis rapta signa inferre: & ostendere suis, paucos & ordinibus incompositis effuse venire hostes. Inter hæc consul, manus ad cælum attollens, voce clara, ita ut exaudiretur, templum Jovi Statori vovet, si constitisset a fuga Romana acies, redintegratoque prælio cecidisset vicissetque legiones Samnitium. Omnes undique annisi ad restituendam pugnam, duces, milites, peditum equitumque vis. numen etiam Deorum respexisse nomen Romanum visum: adeo facile inclinata res, repulsique a castris hostes; mox etiam redacti ad eum locum, in quo commissa pugna erat. Ibi, objacente sarcinarum cumulo, quas conjecerant in medium, hædere impediti: deinde, ne diriperentur res, orbem armatorum sarcinis circumdant. Tum vero eos a fronte urgere pedites, ab tergo circumvesti equites. ita in medio cæsi captique. Captivorum numerus fuit septem millium ac ducentorum, qui omnes nudi sub jugum missi. cæsos retulere ad quatuor millia octingentos. Ne Romanis quidem læta victoria fuit. recensente consule biduo acceptam cladem, amissorum militum numerus relatus septem millium ac ducentorum. Dum hæc in Apulia

gerebantur, altero exercitu Samnites Interamnam, coloniam Romanam, quæ via Latina est, occupare conati, urbem non tenuerunt: agros depulati cum prædam aliam inde mixtam hominum atque pecudum, colonosque captos agerent, in victorem incidunt consulem, ab Luceria redeuntem: nec prædam solum amittunt, sed ipsi longo atque impedito agmine incompofiti cæduntur. Consul, Interamnam edicto dominis ad res suas noscendas recipiendasque revocatis, & exercitu ibi relicto, comitiorum causa Romam est profectus. Cui de triumpho agenti negatus honos, & ob amissa tot millia militum, & quod captivos sine pactione sub jugum misisset.

XXXVII. Consul alter Postumius, quia in Samnitibus materia belli deerat, in Etruriam traducto exercitu, primum pervastaverat Volsiniensem agrum: dein cum egressis ad tuendos fines haud procul moenibus ipsorum depugnat. duo millia occingenti Etruscorum cæsi: ceteros propinquitas urbis tutata est. In Rusellanum agrum exercitus tractus. ibi non agri tantum vastati, sed oppidum etiam expugnatum: capta amplius duo millia hominum, minus duo millia circa muros cæsa. Pax tamen clarior majorque, quam bellum in Etruria eo anno fuerat, parta est. Tres validissimæ urbes, Etruriæ capita, Volsinii, Perusia, Arretium, pacem petiere; &, vestimentis militum frumentoque pacti cum consule, ut mitti Romam oratores liceret, inducias in quadraginta annos impetraverunt. multa præsens quingentum millium æris in singu-

las civitates imposita. Ob hæc res gestas, consul cum triumphum ab senatu, moris magis causa, quam spe impetrandi, petisset, videretque alios, quod tardius ab urbe exisset, alios, quod injussu senatus ex Samnio in Etruriam transfisset, partim suos inimicos, partim collegæ amicos, ad solatium æquatæ repulsæ sibi quoque negare triumphum : *Non ita*, inquit, *Patres conscripti, vestræ majestatis meminero, ut me consulem esse obliviscar. eodem jure imperii, quo bella gessi, bellis feliciter gestis, Samnio atque Etruria subactis, victoria & pace parta, triumphabo.* Ita senatum reliquit. Inde inter tribunos plebis contentio orta : pars intercessuros, ne novo exemplo triumpharet, agebant ; pars auxilio se adversus collegas triumphanti futuros. Jactata res ad populum est : vocatusque eo consul, cum M. Horatium, L. Valerium consules, C. Martium Rutilum nuper, patrem ejus, qui tunc censor esset, non ex auctoritate senatus, sed jussu populi triumphasse diceret ; adjiciebat, *se quoque laturum fuisse ad populum, ni sciret, mancipia nobilium tribunos plebis legem impedituros : voluntatem sibi ac favorem consentientis populi pro omnibus jussis esse, ac futura.* Posteroque die auxilio tribunorum plebis triumphum, adversus intercessionem septem tribunorum & consensum senatus, celebrante populo diem, triumphavit. Et hujus anni parum constans memoria est. Postumium, auctor est Claudius, in Samnio captis aliquot urbibus, in Apulia fuscum fugatumque, faucium ipsum cum paucis Luceriam compulsum : ab Atilio in Etruria res gestas, eumque trium-

phasse. Fabius, ambo consules in Samnio & ad Luceriam res gessisse, scribit, traductumque in Etruriam exercitum, (sed ab utro consule non adjecit) & ad Luceriam utrinque multos occisos. inque ea pugna Jovis Statoris ædem votam, ut Romulus ante voverat: sed fanum tantum, id est, locus, templo effatus, sacratu fuerat. Ceterum, hoc demum anno ut ædem etiam fieri senatus juberet, bis ejusdem voti damnata respublica in religionem venit.

XXXVIII. Sequitur hunc annum & consul insignis L. Papirius Cursor, qua paterna gloria, qua sua: & bellum ingens victoriæque, quantam de Samnitibus nemo ad eam diem, præter L. Papirium patrem consulis, pepererat: & forte eodem conatu apparatuque omni opulentia insignium armorum bellum adornaverant: & Deorum etiam adhibuerant opes, ritu quodam sacramenti vetusto velut initiatis militibus, delectu per omne Samnium habito nova lege: ut, qui juniorum non convenisset ad imperatorium edictum, quique injussu abisset, caput Jovi sacratum esset. Tum exercitus omnis Aquiloniam est indictus. ad quadraginta milia militum, quod roboris in Samnio erat, convenerunt. Ibi mediis fere castris locus est consecutus cratibus pluteisque, & linteis contectus, patens ducentos maxime pedes in omnes pariter partes. Ibi ex libro vetere linteo lecto sacrificatum, sacerdote Ovio Pactio quodam, homine magno nato, qui se id sacrum petere affirmabat ex vetusta Samnitium religione; qua quondam usi majores eo-

rum fuissent, cum adimendæ Etruscis Capuæ clandestinum cepissent consilium. Sacrificio perfecto, per viatorem imperator acciri jubebat nobilissimum quemque genere factisque. singuli introducebantur. Erat cum alius apparatus sacri, qui perfundere religione animum posset; tum in loco circa omni contexto aræ in medio, victimæque circa cæsæ, & circumstantes centuriones strictis gladiis. Admovebatur altaribus miles; magis ut victima, quam ut sacri particeps: adigebaturque jurejurando, quæ visa auditaque in eo loco essent, non enuntiaturum. Dein jurare cogebatur diro quodam carmine, in execrationem capitis familiæque & stirpis composito, nisi isset in prælium, quo imperatores duxissent: & si aut ipse ex acie fugisset, aut, si quem fugientem vidisset, non extemplo occidisset. Id primo quidam abnuentes juraturos se, obtruncati circa altaria sunt: jacentes deinde inter stragem victimarum documento ceteris fuere, ne abnuerent. Primoribus Samnitium ea detestatione obstrictis, decem nominatis ab imperatore, eis dictum, ut vir virum legerent, donec sexdecim millium numerum confecissent. ea legio linteata ab integumento consepti, quo sacrata nobilitas erat, appellata est. His arma insignia data, & cristatæ galeæ, ut inter ceteros emerent. Paulo plus viginti millium alius exercitus fuit, nec corporum specie, nec gloria belli, nec apparatu linteatæ legioni dispar. hic hominum numerus, quod roboris erat, ad Aquiloniam confedit.

XXXIX. Consules profecti ab urbe: prior Sp.



Carvilius, cui veteres legiones, quas M. Atilius, superioris anni consul, in agro Interamnati reliquerat, decretae erant, cum eis in Samnium profectus, dum hostes, operati superstitionibus, concilia secreta agunt, Amiternum oppidum de Samnitibus vi cepit. Caesa ibi millia hominum duo ferme atque octingenti: capta quatuor millia ducenti septuaginta. Papirius novo exercitu (ita decretum erat) scripto, Duroniam urbem expugnavit. minus, quam collega, cepit hominum, plus aliquanto occidit. praeda opulenta utrobique est parta. Inde pervagati Samnium consules, maxime depopulato Atinate agro, Carvilius ad Cominium, Papirius ad Aquiloniam (ubi summa rei Samnitium erat) pervenit. ibi aliquamdiu nec cessatum ab armis est, neque naviter pugnatum: laceffendo quietos, resistentibus cedendo, comminandoque magis, quam inferendo pugnam, dies absumebatur. quod cum inciperetur, remittereturque, omnium rerum etiam parvarum eventus proferebatur in dies. Altera Romana castra viginti millium spatio aberant: & absentis collegae consilia omnibus gerendis intererant rebus: intentiorque Carvilius, quo majore discrimine res vertebatur, in Aquiloniam, quam ad Cominium, quod obsidebat, erat. L. Papirius, jam per omnia ad dimicandum satis paratus, nuntium ad collegam mittit: *sibi in animo esse, postero die, si per auspicia liceret, confligere cum hoste. Opus esse, & illum, quanta maxima vi posset, Cominium oppugnare, ne quid laxamenti sit Samnitibus ad subsidia Aquiloniam mittenda. Diem ad proficiscendum*

nuntius habuit: nocte rediit, approbare collegam consulta referens. Papirius, nuntio misso, extemplo concionem habuit; multa de universo genere belli, multa de præsentis hostium apparatu, vana magis specie, quam efficaci ad eventum, differuit. *Non enim cristas vulnera facere; & per picta atque aurata scuta transire Romanum pilum: & candore tunicarum fulgentem aciem, ubi res ferro geratur, cruentari. Auream olim atque argenteam Samnitium aciem a parente suo occisione occisam: spoliaque ea honestiora victori hosti, quam ipsis arma, fuisse. Datum hoc forsani nomini familiæque suæ, ut adversus maximos conatus Samnitium opponerentur duces; spoliaque ea referrent, quæ insignia publicis etiam locis decorandis essent. Deos immortales adesse propter toties petita fœdera, toties rupta: tum, si qua conjectura mentis divinæ sit, nulli unquam exercitui fuisse infestiores, quam qui, nefando sacro mixta hominum pecudumque cæde respersus, ancipiti Deum iræ devotus, hinc fœderum cum Romanis idolorum testes Deos, hinc jurisjurandi adversus fœdera suscepti execrationes horrens, invitatus juraverit, oderit sacramentum, uno tempore Deos, cives, hostes metuat.* ✓

XL. Hæc, comperta perfugarum indicibus, cum apud infensos jam sua sponte milites differuisset, simul divinæ humanæque spei pleni, clamore consentienti pugnam poscunt: poenitet in posterum diem dilatum certamen; moram diei noctisque oderunt. Tertia vigilia noctis, jam relatis literis a collega, Papirius silentio surgit, & pullarium in auspiciū mittit. Nullum erat genus hominum in

castris intactum cupiditate pugnae: summi infimique æque intenti erant: dux militum, miles ducis ardorem spectabat. Is ardor omnium etiam ad eos, qui auspicio intererant, pervenit. nam, cum pulli non pascerentur, pullarius, auspiciū menti-ri ausus, tripudium solistimum consuli nuntiavit. Consul lætus, auspiciū egregium esse, & Deis auctoribus rem gesturos, pronuntiat; signumque pugnae proponit. Exeunti jam forte in aciem nuntiat perfuga, viginti cohortes Samnitium (quadringenariae ferme erant) Cominium profectas. quod ne ignoraret collega, extemplo nuntium mittit: ipse signa ocius proferri jubet, subsidiaque suis quæque locis, & præfectos subsidiis attribuerat. Dextro cornu L. Volumnium, sinistro L. Scipionem, equitibus legatos alios, Cajos Cædiciū & Trebonium, præfecit. Sp. Nautium mulos, detractis clitellis, cum cohortibus alariis in tumulum conspectum propere circumducere jubet, atque inde inter ipsam dimicationem, quanto maxime posset, moto pulvere ostendere. Dum his intentus imperator erat, altercatio inter pullarios orta de auspicio ejus diei, exauditaque ab equitibus Romanis: qui, rem haud spernendam rati, Sp. Papirio fratris filio consulis, ambigi de auspicio, renuntiaverunt. Juvenis, ante doctrinam Deos spernentem natus, rem inquisitam, ne quid incompertum deferret ad consulem, detulit. cui ille, *Tu quidem male virtute diligentiaque esto: ceterum qui auspicio adest, si quid falsi nuntiat, in semet ipsum religionem recipit. Mihi quidem tripudium nuntiatum, populo Romano exercituique egre-*

*gium auspiciū est.* Centurionibus deinde imperavit, ut pullarios inter prima signa constituerent. Promoveant & Samnites signa, insequitur acies ornata armataque, ut hostium quoque magnificum spectaculum esset. Priusquam clamor tolleretur, concurrereturque, enisso temere pilo ictus pullarius ante signa cecidit. quod ubi consuli nuntiatum est, *Dii in prælio sunt,* inquit; *habet pœnam noxium caput.* Ante consulem hæc dicentem corvus voce clara occinuit. quo lætus augurio consul, affirmans nunquam humanis rebus magis præsentes interfuisse Deos, signa canere, & clamorem tolli iussit.

XLI. Proelium commissum atrox, ceterum longe disparibus animis. Romanos ira, spes, ardor certaminis, avidos hostium sanguinis in proelium rapit: Samnitium magnam partem necessitas ac religio invitos magis resistere, quam inferre pugnam, cogit. nec sustinuissem primum clamorem atque impetum Romanorum, per aliquot jam annos vinci assueti, ni potentior alius metus insidens pectoribus a fuga retineret. Quippe in oculis erat omnis ille occulti paratus sacri, & armati sacerdotes, & promiscua hominum pecudumque strages, & respersæ fando nefandoque sanguine aræ, & dira execratio, ac furiale carmen, detestandæ familiæ stirpique compositum. his vinculis fugæ obstricti stabant, civem magis, quam hostem, timentes. Instare Romanus a cornu utroque, a media acie, & cædere Deorum hominumque attonitos metu. repugnatur segniter, ut ab iis, quos timor morare-

tur a fuga. Jam prope ad signa cædes pervenerat, cum ex transverso pulvis, velut ingentis agminis incessu motus, apparuit. Sp. Nautius (Octavium Metium quidam eum tradunt) dux alaribus cohortibus erat. pulverem majorem, quam pro numero, excitabant: insidentes mulis calones frondosos ramos per terram trahebant: arma signaque per turbidam lucem in primo apparebant: post altior densiorque pulvis equitum speciem cogentium agmen dabat. Fefellitque non Samnites modo, sed etiam Romanos: & consul affirmavit errorem, clamitans inter prima signa, ita ut vox etiam ad hostes accideret, *captum Cominium, victorem collegam adesse: anniterentur vincere prius, quam gloria alterius exercitus fieret.* Hæc infidens equo. inde tribunis centurionibusque imperat, ut viam equitibus patefaciant. Ipse Trebonio Cædicioque prædixerat, ut, ubi se cuspidem erectam quatientem vidissent, quanta maxima vi possent, concitarent equites in hostem. Ad nutum omnia, ut ex ante præparato, fiunt. panduntur inter ordines viæ: provolat eques, atque infestis cuspidibus in medium agmen hostium ruit; perrumpitque ordines, quacunque impetum dedit. instant Voluminius & Scipio, & perculos sternunt. Tum, jam Deorum hominumque victa vi, funduntur linteatæ cohortes: pariter jurati injuratique fugiunt, nec quenquam, præter hostes, metuunt. Peditum agmen, quod superfuit pugnae, in castra ad Aquiloniam compulsus est. nobilitas equitesque Bovianum perfigerunt: equites eques sequitur, peditem pedes

ac diversa cornua, dextrum ad castra Samnitium, lævum ad urbem tendit. Prior aliquanto Volumnius castra cepit: ad urbem Scipioni majore resistitur vi; non quia plus animi victis est, sed melius muri, quam vallum, armatos arcent. inde lapidibus propulsant hostem. Scipio, nisi in primo pavore, priusquam colligerentur animi, transacta res esset, lentio rem fore munitæ urbis oppugnationem ratus, interrogat milites, *Satin' æquo animo paterentur, ab altero cornu castra capta esse: se victores pelli a portis urbis?* Reclamantibus universis, primus ipse, scuto super caput elato, pergit ad portam: secuti alii, testudine facta, in urbem per-rumpunt: deturbatisque Samnitibus, qui circa portam erant, muros occupavere. penetrare in interiora urbis, quia pauci admodum erant, non audent.

XLII. Hæc primo ignorare consul, & intentus recipiendo exercitui esse: jam enim præceps in occasum sol erat, & appetens nox periculosa & suspecta omnia etiam victoribus faciebat. Progressus longius ab dextra, castra capta videt: ab læva clamorem in urbe mixtum pugnantium ac paventium fremitu esse. & tum forte certamen ad portam erat. Advectus deinde equo propius, ut suos in muris videt, nec jam integri quidquam esse, quoniam temeritate paucorum magnæ rei par-ta occasio esset, acciri, quas receperat, copias, signaque in urbem inferri jussit. Ingressi proxima ex parte, quia nox appropinquabat, quievire. nocte oppidum ab hostibus desertum est. Cæsa illo die ad Aquiloniam Samnitium millia triginta trecenti qua-

draginta : capta tria millia octinginti & septuaginta : signa militaria nonaginta septem. Ceterum illud memoriæ traditur, non ferme alium ducem lætiorē in acie visum, seu suopte ingenio, seu fiducia bene gerendæ rei. Ab eodem robore animi neque controverso auspicio revocari a prælio potuit; & in ipso discrimine, quo templa Diis immortalibus voveri mos erat, voverat Jovi Victori, si legiones hostium fudisset, pocillum mulsi prius, quam temetum biberet, sese facturum. id votum Diis cordi fuit : & auspicia in bonum verterunt.

XLIII. Eadem fortuna ab altero consule ad Cominium gesta res. Prima luce, ad mœnia omnibus copiis admotis, corona cinxit urbem; subsidiaque firma, ne qua eruptio fieret, portis opposuit. Jam signum dantem eum nuntius a collega trepidus de viginti cohortium adventu & ab impetu moratus est, & partem copiarum revocare instructam intentamque ad oppugnandum coegit. D. Brutum Scævam legatum cum legione prima & decem cohortibus alariis equitatuque ire adversus subsidium hostium iussit : quocunque in loco fuisset obvi-  
us, obsisteret ac moraretur; manuque, si forte ita res posceret, conferret : modo ne ad Cominium cæ copię admoveri possent. Ipse scalas ferri ad muros ab omni parte urbis iussit, ac testudine ad portas successit. simul & refringebantur portæ, & vis undique in muros fiebat. Samnites, sicut, antequam in muris viderent armatos, satis animi habuerunt ad prohibendos urbis aditu hostes; ita, postquam jam non ex intervallo nec missilibus, sed

cominus gerebatur res, &, qui ægre successerant ex plano in muros, loco, quem magis timuerant, victo, facile in hostem imparem ex æquo pugnant; relictis turribus murisque, in forum omnes compulsi, paulisper inde tentaverunt extremam pugnae fortunam. Deinde, abjectis armis, ad undecim millia hominum & quadringenti in fidem consulis venerunt. cæsa ad quatuor millia trecenti octoginta. Sic ad Cominium, sic ad Aquiloniam gesta res. Inde medio inter duas urbes spatio, ubi tertia exspectata erat pugna, hostes non inventi. septem millia passuum cum abessent a Cominio, revocati ab suis neutri proelio occurrerunt. Primis ferme tenebris cum in conspectu jam castra, jam Aquiloniam habuissent, clamor eos utrinque par accidens sustinuit: deinde e regione castrorum, quæ incensa ab Romanis erant, flammæ late fusa certioris cladis indicio progredi longius prohibuit. Eo ipso loco prope temere sub armis strati passim inquietum omne tempus noctis, exspectando timendoque lucem, egere. prima luce, incerti quam in partem intenderent iter, repente in fugam consternantur, conspecti ab equitibus: qui, egressos nocte ab oppido Samnites persecuti, viderant multitudinem, non vallo, non stationibus firmatam. Conspecta & ex muris Aquiloniæ ea multitudo erat. jamque etiam legionariæ cohortes sequebantur. Ceterum nec pedes fugientes persequi potuit: & ab equite novissimi agminis ducenti ferme & octoginta interfecti. Arma multa pavidi ac signa militaria duodeviginti reliquere. alio agmine incolumi,



ut ex tanta trepidatione, Bovianum perventum est.

**XLIV.** Lætitiâ utriusque exercitus Romani auxit & ab altera parte feliciter gesta res. uterque ex alterius sententia consul captum oppidum diripiendum militi dedit; exhaustis deinde testis ignem iniecit: eodemque die Aquilonia & Cominium deflagraverunt. & consules, cum gratulatione mutua legionum suarum, castra conjunxerunt. In conspectu duorum exercituum & Carvilius suos pro cuiusque merito laudavit donavitque; & Papirius, apud quem multiplex in acie, circa castra, circa urbem, fuerat certamen, Sp. Nautium, Sp. Papirium, fratris filium, & quatuor centuriones, manipulumque hastatorum, armillis aureisque coronis donavit: Nautium propter expeditionem, qua magni agminis modo terruerat hostes: juvenem Papirium propter navatam cum equitatu & in prælio operam, & nocte, qua fugam infestam Samnitibus ab Aquilonia clam egressis fecit: centuriones militisque, quia primi portam murumque Aquiloniæ ceperant. equites omnes, ob insignem multis locis operam, corniculis armillisque argenteis donat. Consilium inde habitum, cum jam tempus esset deducendi ab Samnio exercitus, aut utriusque, aut certe alterius. Optimum visum, quo magis fractæ res Samnitium essent, eo pertinacius & infestius agere cetera & persequi: ut perdomitum Samnium insequentibus consulibus tradi posset. Quando jam nullus esset hostium exercitus, qui signis collatis dimicaturus videretur, unum superesse belli genus, urbium oppugnationes; quarum per excidia mili-

tem locupletare præda, & hostem pro aris ac focis dimicantem conficere possent. Itaque, literis missis ad senatum populumque Romanum de rebus ab se gestis, diversi, Papirius ad Sæpinum, Carvilius ad Volanam oppugnandam legiones ducunt.

XLV. Literæ consulum ingenti lætitia & in curia & in concione auditæ; & quadridui supplicatione publicum gaudium privatis studiis celebratum est. nec populo Romano magna solum, sed peropportuna etiam, ea victoria fuit; quia per idem forte tempus rebellasse Etruscos allatum est. Subibat cogitatio animum, quonam modo tolerabilis futura Etruria fuisset, si quid in Samnio adversi venisset; quæ, conjuratione Samnitium erecta, quoniam ambo consules omnisque Romana vis averfa in Samnium esset, occupationem populi Romani pro occasione rebellandi habuisset. Legationes sociorum, a M Atilio prætore in senatum introductæ, querebantur, uri & vastari agros a finitimis Etruscis, quod desciscere a populo Romano nollent: obtestabanturque Patres conscriptos, ut se a vi atque injuria communium hostium tutarentur. Respondit legatis, *curæ senatui futurum, ne socios fidei suæ pæniteret: Etruscorum propediem eandem fortunam, quam Samnitium, fore.* Segnius tamen, quod ad Etruriam attinebat, acta res esset, ni Faliscos quoque, qui per multos annos in amicitia fuerant, allatum foret, arma Etruscis junxisse. Hujus propinquitas populi acuit curam Patribus, ut feciales mittendos ad res repetendas censerent. quibus non redditis, ex auctoritate Patrum jussu populi bel-

lum Faliscis indictum est: jussique consules fortiri, uter ex Samnio in Etruriam cum exercitu transiret. Jam Carvilius Volanam, & Palumbinum, & Herculaneum ex Samnitibus ceperat: Volanam intra paucos dies, Palumbinum eodem, quo ad muros accessit. Ad Herculaneum bis etiam signis collatis ancipiti proelio, & cum majore sua, quam hostium, jactura dimicavit. Castris deinde positis, moenibus hostem inclusit. oppugnatum oppidum captumque. In his tribus urbibus capta aut cæsa ad decem millia hominum: ita ut parvo admodum plures caperentur. Sortientibus provincias consilibus, Etruria Carvilio evenit secundum vota militum, qui vim frigoris jam in Samnio non patiebantur. Papirio ad Sæpinum major vis hostium restitit. sæpe in acie, sæpe in agmine, sæpe circa ipsam urbem adversus eruptiones hostium pugnatum: neque obsidio, neque bellum ex æquo erat: non enim muris magis se Samnites, quam armis ac viris moenia, tutabantur. Tandem pugnando in obsidionem justam coegit hostes: obsidendoque vi atque operibus urbem expugnavit. itaque ab ira plus cædis editum, capta urbe: septem millia quadringenti cæsi: capta minus tria millia hominum: præda, quæ plurima fuit, congestis Samnitium rebus in urbes paucas, militi concessa est.

XLVI. Nives jam omnia opleverant, nec durari extra tecta poterat: itaque consul exercitum de Samnio deduxit. Venienti Romam triumphus omnium consensu est delatus. triumphavit in magistratu, insigni, ut illorum temporum habitus erat,

triumpho. Pedites equitesque insignes donis transferre, ac transvecti sunt: multæ civicæ coronæ, vallaresque, ac murales conspectæ. Inspectata spolia Samnitium: & decore ac pulchritudine paternis spoliis, quæ nota frequenti publicorum ornatu locorum erant, comparabantur. nobiles aliquot captivi, clari suis patrumque factis, ducti. Æris gravis transvecta vicies centena & ad triginta tria millia. id æs redactum ex captivis dicebatur. argenti, quod captum ex urbibus erat, pondo millia trecenta triginta. omne æs argentumque in ærarium conditum. Militibus nihil datum ex præda est. auctaque ea invidia est ad plebem, quod tributum etiam in stipendium militum collatum est: cum, si spreta gloria fuisset captivæ pecuniæ in ærarium illatæ, & militi tum dari ex præda, & stipendium militare præstari potuisset. Ædem Quirini, quam in ipsa dimicatione votam apud neminem veterem auctorem invenio, (neque, Hercule, tam exiguo tempore perficere potuisset) ab dictatore patre votam, filius consul dedicavit, exornavitque hostium spoliis. quorum tanta multitudo fuit, ut non templum tantum forumque his ornaretur; sed sociis etiam colonisque finitimis, ad templorum locorumque publicorum ornatum, dividerentur. A triumpho exercitum in agrum Vescinum, quia regio ea infesta ab Samnitibus erat, hibernatum duxit. Inter hæc Carvilius consul, in Etruria Troilium primum oppugnare adortus, quadringentos septuaginta ditissimos, pecunia grandi pactos, ut abire inde liceret, dimisit: ceteram mul-

itudinem oppidumque ipsum vi cepit. inde quinque castella, locis sita munitis, expugnavit. Cæsa ibi hostium duo millia quadringenti, minus duo millia capti. Et Faliscis pacem petentibus annuas inducias dedit, pactus centum millia gravis æris, & stipendium ejus anni militibus. His rebus actis ad triumphum decessit, ut minus clarum de Samnitibus, quam collegæ triumphus fuerat, ita cumulo Etrusci belli æquatum. Æris gravis tulit in ærarium trecenta octoginta millia: de reliquo ære ædem Fortis Fortunæ de manubiis faciendam locavit, prope ædem ejus Deæ ab rege Ser. Tullio dedicatam. & militibus ex præda centenos binos asses, & alterum tantum centurionibus atque equitibus (malignitate collegæ gratius accipientibus munus) divisit. Favor consulis tutatus ad populum est L. Postumium legatum ejus: qui, dicta die a M. Cantio tribuno plebis, fugerat in legationem (ut fama ferebat) populi judicium: jactarique magis, quam peragi, accusatio ejus poterat.

XLVII. Exacto jam anno, novi tribuni plebis magistratum inierant: iisque ipsis, quia vitio creati erant, quinque post dies alii suffecti. Lustrum conditum eo anno est a P. Cornelio Arvina, C. Marcio Rutilo, censoribus: censa capitum millia ducenta sexaginta duo trecenta viginti duo. Censores vicesimi sexti a primis censoribus; lustrum undevicesimum fuit. Eodem anno coronati primum, ob res bello bene gestas, ludos Romanos spectaverunt: palmæque tum primum, translato e Græcia more, victoribus datæ. Eodem anno ab ædili-

bus curulibus, qui eos ludos fecerunt, damnatis aliquot pecuariis, via a Martis filice ad Bovillas perstrata est. Comitia consularia L. Papirius habuit: creavit consules Q. Fabium Maximi filium Gurgitem & D. Junium Brutum Scævam. ipse Papirius prætor factus. Multis rebus lætus annus vix ad solatium unius mali, pestilentiae urentis simul urbem atque agros suffecit; portentoque jam similis clades erat. & libri aditi, quinam finis, aut quod remedium ejus mali ab Diis daretur. Invenum in libris, Æsculapium ab Epidauro Romam arcessendum. neque eo anno, quia bello occupati consules erant, quidquam de ea re actum: præterquam quod unum diem Æsculapio supplicatio habita est.

---

JOANNIS FREINSHEMII  
 SUPPLEMENTORUM  
 LIVIANORUM  
 LIBER I.  
 IN LOCUM LIB. XI LIVIANI.

---

EPITOME  
 LIBRI UNDECIMI.

*Cum Fabius Gurgēs consul male adversus Samnites pugnasset, & senatus de removendo eo ab exercitu ageret, Fabius Maximus pater, deprecatus hanc sibi ignominiam, eo maxime senatum movit, quod iterum se filio legatum pollicitus est, idque præsstitit. ejus consiliis & opera filius consul adjutus, cæsis Samnitibus, triumphavit. C. Pontium, imperatorem Samnitium, ductum in triumpho securi percussit. Cum civitas pestilentia laboraret, missi legati, ut Æsculapii signum Romam ab Epidaurō transferrent, arguē, qui se in navem eorum contulerat, in quo ipsum numen esse constabat, deportare: eoque in insulam Tiberis egresso, eodem loco ædes Æsculapii consecrata est. L. Postumius consularis, quoniam, cum exercitui præesset, opera militum in agro suo usus erat, damnatus est. Cum Samnitibus pacem petentibus fœdus quarto renovatum est. Curius Dentatus consul, Samnitibus cæsis, & Sabinis, qui rebellaverant, victis, & in deditionem acceptis, his in eodem magistratu triumphavit. Colonie deductæ sunt, Ca-*

*strum, Sena, Hadria. Triumviri capitales tunc primum creati sunt. Censu acto, lustrum conditum est. censa sunt civium capita ducenta septuaginta duo millia. Plebs propter æs alienum, post graves & longas seditiones, ad ultimum secessit in Janiculum: unde a Q. Hortensio dictatore deducta est, isque in ipso magistratu decessit. Res præterea contra Volsinenses gestas continet: item adversus Lucanos, contra quos auxilium Thurinis ferre placuerat.*

I. **F**RACTÆ jam multis præliis Samnitium opes erant: neque dubium habebatur, quin bello finis imponi posset, si percussio & debilitato hosti quam minimum ad confirmandos animos spatii relinqueretur. Igitur Q. Fabius consul ardens juvenia, & confecti belli gloriam sibi comparare certus, delectu haud segniter acto, protinus in Campaniam cum exercitu profectus est. Samnites enim, dura gens, & ad desperationem potius quam timorem tot claudibus acta; quod superioris anni consules ad triumphum suum legiones deduxerant, occasione temporum usi, non prænitendas copias ex reliquiis priorum pugnarum & novis delectibus coegerant: & quoniam pestilentia Romanos urgeri sciebant, præterea consules, nec experientia bellorum, nec auctoritate magnopere metuendos, eum in annum factos esse audiverant; in spem erecti, Campanos semper spretos, tum autem ut auctores periculorum malorumque suorum invisiores, populationibus & vastatione agrorum lacebabant.

II. Erat in duce Romano par dignitati Fabiæ domus animus, sed contemptus toties a suis victæ gentis, & rei gerendæ cupiditas, consilium eripuerant. raptim ad hostes exercitu ducto, cum præmissos ab imperatore Samnitium speculatores vidisset, qui conspecto Romanorum agmine se recipiebant ad suos; universam hostium multitudinem fugere arbitratus, non locorum, non hominum ex-



plorato habitu, tanquam omnis victoriæ spes in celeritate posita esset, quanta maxima festinatione poterat, signa inferri iussit. Apud Samnites, a suis præmonitos, omnia circumspectius acta sunt: præcipi opportuna loca, strui acies, alloquiis ducum accendi militis animi potuerunt. Igitur eventus prælii qualis esse debuit, fuit. Fessos ex itinere & cursu, turbatis ordinibus, tanquam ad prædam magis quam pugnam venientes, instructus paratusque miles haud magno negotio pepulit: Fabius, desideratis suorum millibus tribus, majore etiam numero fauciorum, quo minus omnem exercitum amitteret, superventu noctis defensus est.

III. Tum loco paulo æquiore capto, quantum in illa trepidatione fieri potuit, castra communita sunt. in quibus haud multo melior quam in ipsa acie aut facies rerum, aut fiducia animorum fuit. non requies fessis, non cibus esurientibus, non fomenta faucibus suppetebant; tantum cum armis egressi, prioribus in castris impedimenta omnia reliquerant. Igitur inter gemitus morientium & querelas superstitum tota nox exacta est, omnibus imminenti diem cum horrore ac desperatione, ut supremam, operientibus. *Neque enim laboribus fessos, exhaustos vigiliis, vulneribus debiles, perculsos infelici prælio, numero etiam multum imminuto, resistere posse hostibus, quos incolumis adhuc, integris animis corporibusque, & optima spe incensus exercitus suslinere nequiverat.* Rebus conclamatibus, uti solet, remedium ab hostis errore fuit. Ille venientis alterius consulis fama perterritus, ne, si oppugnare castra Fabiana adortus esset, recentium copiarum adventu a tergo circumveniretur, rerum supra spem felicium successu contentus, motis castris iter alio convertit. Digressis hostibus, Romani quoque ad tutiora loca se receperunt.

IV. Postquam ista Romam allata sunt, magis ignominia quam accepto detrimento mota civitas, molestissime tulit, temeritate consulis effectum, ut bellum, quo diuturnius

nullum fuerat, cum jam in exitu esset, nova spe repletis Samnitium animis, formidabilius iterum, quam a longo tempore fuisset, renasceretur. Neque tribuni modo plebis, quorum hæ propriæ artes erant, frequentibus ad populum concionibus invidia & odio cuncta repleverant: verum etiam apud patres agitata re, atroces sententiæ dicebantur. factumque Senatus consultum est, quo *certum ante diem Fabius consul ad dicendam Romæ causam adesse* jubebatur. Venientem magna vis accusatorum adorta est: neque defendi factum quibat, & quod unum maxime prodesse debebat reo, Fabii senis gratia, in contrarium verterat. Minus enim ignoscendum ei putabant, qui a præstantissimo viro genitus, & inter paternos triumphos educatus, non modo Romanum nomen, sed suæ quoque familiæ laudes, & partas a majoribus victorias, per tantam imprudentiam accepta clade cœdavisset.

V. Exulcerati animi, & defensionem paranti reo vix æquas aures præbituri, Fabii patris insigni pietate primum, mox etiam oratione leniti sunt. Is enim veritus, ne propter rem male gestam filius ab exercitu removeretur, ab ipsa quidem culpa purganda penitus abstinuit: sed *sua & majorum merita* modeste commemorans, *tam acerbam sibi jam seni, tam ignominiosam genti Fabiæ notam* deprecabatur. *Neque tamen se postulare, ut ceteris tot Fabiis, qui ab ipsis prope Urbis primordiis Romanam rem virtute consilioque auxissent; ut trecentis etiam illis, qui Rempublicam suam & tantum non universi nominis Fabii internecione texissent, error unius condonetur; si immedicabilis ille sit, majusque commodum ex pœna filii sui, quam incolumitate, perventurum esse videatur: se enim caritatem patriæ affectibus aliis omnibus anteferre satis didicisse. Verum enimvero, quidquid in hoc adolescente metuendum fuit, transfatum est: bona autem, quæ mens illius indolesque, ac sub me non ineptissimo magistro, uti vobis visus sum, instituta & exercitata virtus pollicentur, adhuc exspectari possunt, nisi spem istam,*

*non quidem iniqua, sed tamen intempestiva severitate præcidimus. Multis initio rerum gerendarum impegisse, ad prudentiam & cautionem profuit: qui erroris admoniti, mediocria sæpe damna ingenti utilitate redemerunt.*

VI. *Et nescio, an non ad fortunæ potius invidiam, quam hominis cujusquam peccatum referri verius sit, quod & Reipublicæ nostræ, & Fabiæ gentis diuturna felicitas mediocri detrimento cassigata est: quanquam benevolentia magis hæc Deorum, quam invidia vocanda sit, cujus beneficio adversus exitiabilem superbiam, quæ res nimium secundas sequi solet, non tam damnosa civitati clude, quam ad documentum efficaci, conditionis humanæ admonemur. Quidquid id est, Quirites, mihi certe sinistri aliquid præsagiebat animus, cum die comitiorum sollicitè vobiscum agerem, ne filium meum consulem faceretur. Cum enim patrem meum, avum, proavum, alios majores meos sæpissime, ad hæc me ipsum quinquies hoc magistratu functum esse cogitarem, incipiebam vereri, ut eadem in gente summos honores continuari, vel Dii, vel homines, animo satis æquo paterentur. Atque utinam vel isto tempore, preces meæ valuissent; vel vobis beneficium vestrum tueri placeret, ne quod honoris causa, me recusante, tribuistis filio meo, inaudite hætenus ignominie occasio utrique fieret: vosque temeritatis argueremini; quos, si priorem de Q. Fabio sententiam alio judicio rescinditis, aut dedisse imperium sine causa, aut abrogasse posteri credent.*

VII. *At si mitiora decreveritis, & vestra vobis auctoritas, & Fabiæ gentis existimatio salva erit, errorque juvenilis, uti cum aliquo reipublicæ damno commissus est, ita majore cum ejus emolumento emendabitur. Sed quis spondere hoc ausit? Ego, Quirites, ego pro filio meo sponforem me Reipublicæ dabo: &, quod Senatui Populoque Romano, deinde nostræ domui felix faustumque sit, consuli legatus ibo, particeps futurus omnis fortunæ, quam aut invenire dabitur, aut facere. Viget adhuc animus; neque, ut in hac ætate, virium corporis pænitet: possum persene militiæ labores, possum in acie stare, &, si nihil aliud, memo-*

*ria veterum pugnarum terrere hostes, alacritatem augere nostrorum; & , quod caput est, possum adolescentiam consulis, quæ sola rerum fecius gestarum causa est, regere consilio, & ætatis præservidæ impetus senili cautione temperare. Nisi filii ingenium tenerem, cumque recte monenti morem gesturum confiderem, nollem in fine prope vitæ sine dedecore ætæ, post tot consulatus ex sententia mea vestraque gestos, post ingentes victorias & illustres triumphos, tot annorum laboribus periculisque partem belli domique gloriam, unius juvenis inconsultæ temeritati corrumpendam permittere. x*

VIII. Huic orationi nec ad movendos præsentium animos pondus; nec ad sponsonem melioris eventus fides defuit. Summo omnium consensu legatione decreta, rebus omnibus intentissima cura provisus, non minore favore speque profectus consul est, quam paulo ante conviciis & indignatione redierat. In itinere deinde & castris, nihil non ex disciplina veterisque imperatoris artibus curatum est: & focii, quos Q. Fabius pater multis beneficiis & virtutis admiratione devinxerat, ad omnia, quæ imperabantur, præsto fuere. Milites etiam ipsi delendæ ignominie cupidi, consilique consiliis ejus ducis, sub quo eandem illam gentem, a se patribusque suis sæpe fusam fugatamque meminuerant, copiam cum hoste configendi dari votis omnibus desiderabant.

IX. Neque minores a recenti victoria Samnitibus animi erant. ita, cum hi partum decus retinere, illi recuperare amissum niterentur, summis utrinque viribus concursum est. Et jam deteriore loco res Romana esse cœperat, consulemque ipsum dux hostium C. Pontius Herennius cum delecta manu circumveniebat: cum animadverso filii periculo, Maximus in confertum Samnitium agmen admissio equo se intulit. Secutus est equitum globus, supra solitam alacritatem pudore accensus, si tot florentissimi juvenes animis & robore a sene vincerentur. Hic impetus totius

prælii fortunam traxit: sustinere primum Romanæ legiones hostem, equitatus audacia animatæ, mox impulerunt: frustra obnitente Herennio, qui omnibus boni & ducis & militis muneribus eo die functus, dum redintegrare ordines, retinere fugientes, obsistere ingruentibus tendit, neque inhibere fugam suorum potuit, & opportunitatem evadendi ipse amisit. Capta cum duce millia Samnitium quatuor: ad millia viginti prælium & fuga hauserunt. Etiam castra hostium in potestatem redacta sunt, cum ingenti præda, quam statim agri hostium late vastati, passimque expugnata, aut dedita oppida luculenter auxerunt.

X. Tanta rerum commutatio accessione unius hominis facta est, ut paulo ante victor exercitus a victo caderetur: & eum imperatorem, a quo fusus fugatusque consul fuerat, ipse nunc captivum abduceret, ingens populo Romano spectaculum, & ornamentum triumphi sui: quem anno sequente ad urbem reversus summa omnium voluntate impetravit. Dum hæc a Fabiis in Samnio administrantur, etiam alter consul, D. Brutus, cui Falisci provincia evenerat, prosperis rebus usus est. Quippè adjutus a Sp. Carvilio legato (nam & Bruto legatum adjungi placuerat) viro bellorum & hostis gnaro, adversus quem superiore anno consul rem feliciter gesserat; & ceteræ Etruriæ partem non exiguam perpopulatus est; & Faliscos occurrere ausos prælio vicit.

XI. His rebus in Urbem nuntiatis, cum tempus comitiorum venisset, consulesque a rebus gerendis avocari parum e republica videretur; interregnum est initum. Interrex L. Postumius Megellus, comitiis quæ ipse habebat, consul declaratus est: nullo ad eam diem exemplo, præterquam Appii Claudii, quod bonus nemo probaverat. Sed Postumius non minore arrogantia magistratum gessit, quam acceperat. Jamprimum nobilitate generis & tertio consulatu inepte ferox, collegam ejus anni C. Junium Brutum, plebejum hominem, ut se longe inferiorem, olim

habebat despectui. Ut vero de provinciis agi cœptum est, neque comparare cum Bruto, neque fortiri voluit, *administrationem Samnitici belli extra ordinem* poscens, *tanquam sibi debitam*, quod duobus prioribus consulatibus res sese magnas adversus eundem illum hostem gessisse diceret. Multis in Senatu contentionibus jactato negotio; cum C. Junius se hominem novum adversus gratiam & potentiam collegæ jus suum obtinere non posse videret, ad extremum, *ne discordia consulum bono publico fraudi esset*, sponte se cedere testatus est.

XII. Premebat adhuc Urbem agrosque pertinax contagionis malum: quod tertium jam annum expertis omnia, neque divina ope ulla, neque humana pelli potuerat. Igitur sive Sibyllinis ex libris, sive Delphici oraculi admonitu (nam hoc quoque traditur) decem legati missi sunt, qui Æsculapium ab Epidaurio, qua in urbe natus esse credebatur, Romam arcefferent. Quanquam enim perplexum satis responsum erat, neque providere eventum rei Patres poterant, obsequendum tamen diis statuerunt; ipsos viam explicaturos esse rati, quā possent eorum fata procedere. Res inde mira dictu sequitur; sed multis fidisque auctoribus, ipsaque structura ædis, quæ tum in Tiberis insula facta dedicataque est, compertæ veritatis. Cum apud Epidaurios mandata legati Romani edidissent; excepti quidem benigne, sed quia parum liquebat quid concedi posset, ut ipsi deportarent, quidquid ex usu videretur, in templum Æsculapii deducti sunt.

XIII. Apud Græcos ferme locis apricis excelsisque numinis istius constitutæ sedes sunt: Epidaurii quoque quinque millibus passuum ab urbe distans templum habebant, celeberrima iis temporibus fama, donisque hominum, qui valetudinem credebant ibi recepisse, prædives. Huc adducti, dum ingentis molis simulacrum, Thraſymedis Parii nobili ingenio fabrefactum, admirantur; ingens repente serpens

§ XI. Liv. 27, 6. 3, 35. Dionys. apud Vales. Liv. 9, 44 & 10, 33. § XII. Suidas in posth. Val. Max. 8, 2. Ovid. Metam. 15. Pausan. 1. 2.

ex ipsis adytis prolapsus animos omnium horrore summo & religione perfudit. Sacerdotes enim venerabundi, *ipsum in hoc angue numen esse, & nonnunquam hac forma conspici, salutare semper ostento*, clamitabant. Biduo conspectus in templo serpens, deinde iterum reconditus est: tertio die per medios spectantium venerantiumque cœtus recta perrexit ad portum, ubi Romana triremis stabat; quam ingressus, in tabernaculo Q. Ogulnii, qui princeps legationis erat, multiplici spirarum orbe se composuit. Ferebatur antiquitus fabula, *eundem illum Æsculapium forma serpentis indutum, aliquando Epidauro Sicyonem mularum jugis deportatum fuisse, Nicagora quadam, Echetimi uxore, deducente.*

XIV. Læti ergo prodigio Romani, tanquam præsentem Deum veherent, vela dedere, paucisque diebus interjectum mare permensi prosperrimo cursu Antium tenuerunt. Ibi cum inhorrescens mare navigationem impediret, propens ex navigio serpens, qui totum per iter quietus ibi se tenuerat, in vestibulum fani, quod ea urbe celeberrimum erat, allabatur, eoque loco tres continuos dies exigit: magno cum metu legatorum, ne avelli inde non posset; quod toto eo tempore ad consuetos cibos non revererat: donec navigio redditum magna cum alacritate Romam detulerunt. Ad spectaculum incredibilis rei tota effusa civitate, passim in ripa fluminis, quo subvehebatur, positæ aræ sunt, accensique odores, & victimæ casæ. Jam ad eum locum perventum erat, ubi divisus modico intervallo Tiberis insulam efficit; cum relicta nave serpens eam insulam, quæ post *Æsculapii* vocata est, natatu petens, cerni ulterius ab hominibus desit. Patres *delectum a Deo locum* interpretati, decreverunt, *ut eadem in sede templum Æsculapio strueretur.* Morbi, sive illa ope, sive quod alioquin desituri fuerant, cessare. Templum mox insignibus donariis, & hominum, qui *remediis salutaribus ab eo numine se adjutos* ferebant, prædicatione nobilitatum est.

§ XIII. Plut. quæst. Rom. 94. Liv. 45, 28. Pauf. & Anst. de viris illust. c. 22. P. Diacon. 2, 21. Liv. Epit. 11. § XIV. Auctor de viris illust. Ovid. Val. Max.

XV. L. Postumius consul superbiam in Urbe adversus collegam suum exercitam, etiam in provinciam detulit. Cum enim Q. Fabius Gurges, qui priore anno consul fuerat, ex Senatusconsulto proconsule res in Samnio gereret: scripsit ad hunc Postumius arroganter, *excedere jubens provincia sua, se administrando ei bello sufficere*. Obtendente *jussa Patrum* Fabio, *neque integrum sibi deferere negotium, quod Senatus imposuisset*; cum Romam nuntiata res esset, metus incessit, ne per discordiam imperatorum respublica detrimentum caperet, Quare *mitti ad consulem legatos* placuit, *qui verbis Senatus peterent, ut Fabium ad exercitum & in Samnio esse pateretur*. Cum alias absurdum & præfractum fuisse responsum ferunt; tum etiam vocem adjectam singularis pervicaciæ: *Non se Senatui, quamdiu consul esset, sed Senatum sibi dicto audientem esse oportere*. neve locutus esse ferocius, quam fecisse videretur, protinus dimissis legatis Cominium (eam tum urbem Fabius obsidebat) cum exercitu progreditur, si alia ratione amoliri æmulum non posset, bello certaturus. Fœdum spectaculum præbuissem hostibus Romana arma, si pari stoliditate, qua petebatur, resistere Fabius voluisset. Sed ille natura & consiliis paternis moderatior, *non furori consulis, sed utilitati Reipublicæ cedere* præfatus, provincia excessit. Cominium post paucos dies a Postumio expugnatum est. Inde Venusiam ductus exercitus. hac quoque capta circumlatum ad alia oppida bellum: quorum complura, partim vi, alia deditione in potestatem venerunt. Hostium in ea expeditione decem millia cæsa sunt, sex millia ducenti traditis armis fidei victoris se permiserunt. Non erant spernendæ res, quas bello gesserat consul, sed gratiam earum superbia contumaciaque corruerat.

XVI. Itaque cum ad Patres missa epistola de rebus suis perscripsisset, *Venusinamque urbem & agrum deducendæ coloniæ*

§ XV. Suet. in Claud. c. 25. Tab. Marm. ap. Mercurial. de argymn. Dionys. apud Vales.



*accommodatissimum esse* monuisset; accepta quidem res est, sed præterito auctore victoriæ consiliique ab aliis deducta sunt colonorum millia viginti, sic enim apud scriptores minime contemnendos reperio; ingens numerus, & prope excedens fidem, nisi quod videri potest inter gentes indomitas, communi adversus Apulos Lucanosque præsidio, collocari validam manum placuisse. Ceterum importunitas L. Postumii, quemadmodum ipsi supra veteres offensas, ingentem conflagavit invidiam; ita Q. Fabio ad favorem omnium valde profuit: eique, postquam ad Urbem venit, deque rebus a se gestis differuit, triumphus haud ægre decretus est. Triumphavit proconsule de Samnitibus, qui *Pentri* cognominantur, Kalendis Sextilibus. Currum equo secutus est senex Fabius: quem non adiutorem magis victoriæ, quam auctorem, spectantium deducentiumque voces celebrabant.

XVII. Ipse summam rei bene gestæ gloriam ad consulem populi Romani trahens, sicuti nomine legati, sic etiam modestia utebatur; haud minori cum voluptate honores filii intuitus, quam cum adhuc parvulum in curru suo circumtulera, cum ipse triumpharet. Ceterum prædæ partem militibus consul dedit: reliqua in ærarium relata: C. Pontius Samnis in triumpho ductus, mox securi percussus est. Vir acer & memorabilis, qui vim Romanam iis temporibus diu sustinuit, cladesque non contemnendas, sed ignominiam multo maximam ad Caudinas furculas intulit. Quem ajunt dicere solitum, *Si in ea tempora natus esset, quibus munera accipere Romani didicissent, se illos diutius imperare non fuisse passurum.* Ita tum fortuna civitatis non armorum magis industria, quam innocentia morum stetit.

XVIII. L. Postumius interea non minus honoribus, quam æmulo concessi, quam qui sibi negati fuerant, fremens, per impotentiam animi, cum auctoritate Patrum contumacia certando, neque mederi acceptis vulneribus potuit; &

§ XVI. Horat. Sat. 2, 1. Col. Capitol. Plut. in Q. Fab. § XVII. Dio apud Vales. Val. Max. Zonaras. Liv. Epit. 11. Cic. de off. 2, 21.

ultra irritavit iras, quas modestia sermonum factorumque mitigare debuisset. Quippe non querelis adversus inimicos, non conviciis in ipsos ordines abstinens, quo Patribus ægre faceret, prædam omnem militibus distribuit, exercitumque, priusquam successor mitti posset, dimisit. Triumphum etiam contra voluntatem Senatus actum, quanquam ad secundum ejus consulatum relatus sit, ad hæc potius tempora pertinere crediderim; idque scriptores diligentiae fideique non postremæ in historiis suis prodiderunt. Ob hæc facta recentioribus odiis petitus est: eumque, simul atque magistratu abiit, duo tribuni plebis corripuerunt, die ad populum dicta. Præter ea, quæ memoravimus, crimini dabatur, *quod priusquam paludatus ex Urbe exiret, ex legionibus suis delectos milites, ad duo hominum millia, in agrum suum ad saltum repastinandum miserat: eosque in opere isto per multos dies detinuerat, immemor, non mancipia sibi, sed milites; neque ut suum agrum excoleret, sed ut publicum extenderet, datos.* His criminibus accusatus atrociter, frustra tentata defensione, suffragiis omnium tribuum damnatus, eique lis ducentis millibus nummum æstimata est.

XIX. Jam P. Cornelius Rufinus, M. Curius Dentatus novi consules magistratum inierant. Hi cum suis quisque legionibus, Samnium populationibus agrorum, & ruinis urbium fœde vastavere: Samnitesque multis locis congregi aulos ingentibus cladibus ad pacem fœdusque petendum compulerunt. Cum enim tot præliis juventutem pleramque, capto autem C. Pontio, consilium etiam & ducem amisissent; missis ad consules, & horum assensu Romam legatis, ut fœdus cum ipsis quarto renovaretur, impetrarunt: credo Romanis etiam vincendo fessis, cupientibusque bellum difficile, ipsisque sæpe calamitosum, tandem aliquando certæ pacis tranquillitate componere. Illata primum Samnitibus arma M. Valerio tertium, A. Cornelio Cossio consulibus reperio: quæ ad quartos & quinquagesimos inde consules vario Marte exercita, aut fœderibus parum diu.

turnis fufpenfa, populum utrumque occupatum follicitumque habuerunt.

XX. An ex hoc bello triumphaverit Cornelius, in obscuro est: de Manio non ambigitur; cujus fortuna eo fuit illuftrior, quod aliis fubinde victis hostibus, bis eodem in magistratu triumphavit. Quippe Sabini valida gens, & longa tum pace opulenta, five precibus Samnitium & propinquitatis mifericordia commoti; five victis vicinis ad fe quoque perventuro incendio volentes obfistere, armata juventute Romani juris loca quædam invaferunt. Adverfus hos egressus cum exercitu Curius, ut diduceret hostes; simul ne Sabinorum agri cladium bellicarum expertes haberentur, occultis itineribus copiarum partem mifit; datis mandatis, *ut quam latiffime poffent, terrorem ubivis vafitatemque facerent.* Ea neceffitas, ad fua tuenda diverfis abeuntibus agminibus, formidabile Sabinæ exercitus robur folvit, facilemque adverfus difperfos victoriam confuli præbuit. ✕

XXI. Hac expeditione ufque ad Adriaticum mare perventum est: agrorum hominumque tanta vis in poteftatem venit, ut celebrata deinde fuerit Curii vox, qui pro temporum illorum difciplina factis quam verbis promptior, cum explicare fingula nequiret, *Tantum, inquit, agrorum cepi, ut folitudo futura fuerit, nifi tantum etiam hominum cepiffem: tantum autem hominum, ut interituri fame fuerint, nifi tantum cepiffem & agrorum.* Sabinis pacem orantibus, veteris fub Tatio affinitatis memoria, & quia minime gravibus odiis certatum fuerat, etiam civitas, fed fine fuffragio, data eft. Confulatus, quem anno fequente M. Valerius Corvinus, cum Q. Cæditio Noctua gellit, tenuis admodum ad nos fama pervenit, nifi quod fub idem tempus colonias deductas effe reperio, Castrum & Adriam, unde mari nomen, & Senam in Gallico agro. Veruntamen nondum eoufque pacatis illis regionibus, magis eft ut accedam auctoribus

§ XIX. Dionyf. Eutrop. 1. 2. Orof. 32, 2. Liv. Epit. 11. § XX. Front. Strat. 1, 6.

aliis, qui coloniarum istarum originem ad inferiora tempora retulerunt.

XXII. Sed in Urbe coercendis, quæ increbuerant, maleficiis novus magistratus institutus est, qui vinculis fontium fervandis, & cum animadverti oporteret, supplicio fumendo auctores atque moderatores præessent, triumviri capitales appellati. Legis, a L. Papirio tribuno plebis eo de negotio latæ, hæc verba invenio: *Quicumque Prætor posthac factus erit, qui inter cives jus dicet, tres viros Capitales populum rogato. iique tres viros, quicumque facti erunt, sacramenta exigunt judicantque, eodemque jure sunt, ut ei ex legibus plebeique scitis exigere, judicare, esseque oportet.* Quo capite multarum quoque exigendarum potestas ipsis data videtur: *sacramentum* enim iis temporibus vocari solebat, quod pœnæ nomine pendebatur æs, quoniam illud ob sacrorum publicorum multitudinem, & angustias ærarii, sacrificiorum impensis destinari consueverat. Census quoque eo anno acti memoria non alia superest, quam quod *civium capita ducenta septuaginta tria millia censa* dicuntur. Principem Senatus ab his quoque censoribus lectum fuisse Q. Fabium Maximum certa conjectura est, quod aliunde scimus, ex ea gente continuum eum honorem tribus mansisse, ut Maximus acceptum ab Ambusto patre, mox ad Gurgitem filium transmisit.

XXIII. Interea cum foris res satis lætæ essent, gravibus domi discordiis seditionibusque laboratum est. Plebs ære alieno oppressa novas tabulas flagitabat, rem veterem, & ab ducentis amplius annis varie jactatam, ut turbulentus aliquis tribunus ad commovendos multitudinis animos stimulum eum admoverat; aut improbitate sceneratorum populi indignatio exarserat. Sed sub prioribus aliquot consulibus, morborum aut hostium metus remissiores in urbe contentiones fecerat: Q. Marcio Tremulo, P. Cornelio Ar-

§ XXI. Flor. 1, 15. Auſt. de vir. ill. c. 33. Vell. 1, 14. Cic. de leg. 3, 3. L. 2. § 30. ff. de off. Jud. § XXII. Epit. Liv. 11. Feſtus in voce Sacramentum. Plin. hiſt. nat. 7, 41.

vina consulibus; deinde proximo anno, cum M. Claudius Marcellus, C. Nautius Rutilus magistratum gererent, majores aliquanto motus exstiterunt. ad quos comprimendos, magis quam ullius alterius negotii bellive causa, dictatorem fuisse dictum existimem Appium Claudium, qui deinde Cæcus est cognominatus, quem dictatorem fuisse, in antiquis monumentis reperio.

XXIV. Sane præter acerbitalatem iniquissimi fœnoris, etiam nefaria C. Plotii libido, ægris jam hominum animis, ut citius atque vehementius exardescerent, subjecit faces. Huic T. Veturius, filius ejus Veturii, qui consul ob turpe fœdus Samnitium populo deditus fuerat, cum ob calamitatem domesticam ad æs alienum compulsus solvendo non esset, in nexum se dedit lubens, omniaque servilia ministeria patienter exsecutus est. Plotius adolescentulum forma liberali, ex magna spe consularis familiæ, ad infimæ fortunæ fordes depressisse non contentus, etiam pudicitiam extorquere instituit, cui jam & rem familiarem omnem, & libertatem ipsam eripuerat. Deinde Veturium aspernantem, & quidvis potius quam tantum flagitium pati paratum, verberibus crudelissimis lacerat: ille in publicum se proripiens, & ad consulum tribunal ab accurrente multitudine deductus, *de intolerabili crudelitate & libidine creditoris* queritur: & apparebant vibices, verberumque recentes notæ. Consules igitur rem non negligendam rati, de ea retulerunt ad Senatum: dictisque sententiis Plotius in carcerem duci jussus: omnesque per totam Urbem, quotquot æris alieni causa nexi erant, lege de eo negotio lata, liberati sunt.

XXV. Non sum nescius, pro T. Veturio ab aliis Publium quendam, tribuni, qui inter Caudinæ pacis auctores fuisset, filium memorari: sed & anno ante hæc tempora quadragesimo simillimam ob causam lex de nexis lata fertur. Ceterum nihil vetat, ut plurimum fœneratorum ea improbitas fuerit; & priori lege, ut fit, etiam per debitorum

§ XXIII. Zonar. Florus. § XXIV. Tab. Marm. ap. Onuphr. Val. Max. 5, 1, 9. Dionys. ap. Vales.

patientiam, inter angustias rei familiaris nihil recusantium, sensim neglecta, ejusdem exempli recens factum admonuerit, ut in posterum ea de causa plenius atque diligentius caveretur. Sed populo non modo nexu, verum etiam fœnoris sævitia liberari cupienti, græta licet ultionis legisque impetratio non satisfecit. Verum, ut in morbis quibusdam acrioribus remediorum diligentia cum mitigatus videri potest, magis accenditur dolor; non multo post adeo exulcerata res est, ut cum tribuni plebis legem de novis tabulis summo nisu perferre contenderent, neque minoribus aut copiis aut animis a creditoribus resisteretur, plebs exemplo majorum urbe relicta, trans animum in Janiculum montem secederet: obstinato consilio, nisi re impetrata, ad penates suos non redeundi.

XXVI. Cum parum adversus hæc opis in consulibus esset, (M. Valerium Potitum, C. Ælium Pætum fuisse conjiciunt) ad ultimum arduis temporibus remedium inventum est, ut dictator diceretur. dictus est Q. Hortensius. Is adhibitis, quæ tempus & causa postulabat, fomentis, cum eo maxime distineri pacem civitatis intelligeret, quod scita sua contemni, legemque Publiliam sperni plebs indigne ferret, quanquam multis reluctantibus, cedendum temporibus esse censuit: novaque lege in Esculeto lata iterum accuratius sanxit, *ut, quod plebes jussisset, omnes Quirites teneret.* His aliisque lenimentis revocata ad concordiam & lares suos plebe, dictator sive morbi subita vi, sive curis & laboribus oppressus, quod antea nemini contigerat, in magistratu mortuus est. Inde minor aliquamdiu ordinum in Urbe dissensio fuit: sed imperii sensim deformata dignitas, cum plebe ad ambitiosorum hominum fraudes parum cauta, & vel potestatis exercendæ causa quibuslibet rogationibus accipiendis facili, multa sciscerentur, quæ reipublicæ decus, & ad extremum ipsa fundamenta convellerent. documentum insigne res regentibus, ne vulgus, si re familiari commoda uti pollit, majora non cogitaturum, injuriis opu-

lentiorum ad cupiditatem potestatis, qua uti non didicit, adigi patiantur.

XXVII. Legem quoque de suffragiis circum hæc tempora latam esse crediderim, qua Patres in comitiorum incertum eventum auctores fieri cogeabantur. Hactenus enim eo jure utebantur, uti magistratum gerere non posset, cui populi suffragiis datus esset, nisi Patres auctores fuissent facti. Continebantur interdum hoc vinculo improvida plebis studia, & quanquam raro reprehenderent comitia Patres, tamen quia jus ipsis erat, tanquam reprehensuri metuebantur. Tum vero ferente legem tribuno plebis Mænio, populi quidem aucta potestas; sed eadem opera salubris & reipublicæ decora comitiorum severitas debilitata est. Q. Hortensio dictatore mortuo, creatum alium, quidam auctores sunt, rei gerendæ causa, Q. Fabium Maximum, cujus tertia hæc dictatura fuerit. ei L. Volumnius C. F. C. N. Flamma Violens magister equitum fuisse dicitur.

XXVIII. Bellum enim ea tempestate cum Volsinienfibus erat Etrusca gente: id opportunum fuit, ad exhaustiendum, quidquid in urbe novis rebus primum, ac superioris discordiæ nimium memor esset. Accessit etiam nova bellandi cum Lucanis causa: qui Thurinos, Italiæ, qua magna Græcia est, civitatem, prægraves accolæ multis injuriis ad fidem Romanorum confugere compulerant: bellumque adversus Lucanos C. Ælio tribuno plebis rogante populus sciverat. Educti igitur exercitus, & utrobique res gestæ sunt, quarum memoria, cum auctorum, qui eas perscripserant, annalibus, amissa est. Thurini C. Ælio statuem & coronam auream dono dederunt. Consulatus C. Claudii Caninæ, M. Æmilii Lepidi nulla re memorabili, quæ tradita reperitur, insignis sequitur; nisi quod Etrusca & Lucana bella tum etiam gesta videntur. Manii etiam Curii de Lucanis reperitur ovatio: quæ & inter quatuor ejus triumphos, toties enim

§ XXVI. Epit. Liv. 11. Liv. 8, 12. Plin. 16, 10. Agel. 15, 17. Aug. de civ. Dei. 3, 18. § XXVII. Liv. 1, 17. Cic. pro Plancio. Cic. in Bruto.

triumphasse illum invenio, numeranda est. Sed quo anno, quove in magistratu aut imperio res eas gesserit, ignoratur.

XXIX. Major inde moles & clade non contemnenda nobilis exorta est, bello cum Senonibus Gallica gente contracto. Hi sæpe bellum cum populo Romano, sæpe pacem habuerant; jamque decimum ferme annum post cladem in agro Sentinati acceptam, cum Decio se devovente magnus eorum numerus cæsus est, quieverant; nisi quod juventutem suam adversus Romanos mercede ab Etruscis conduci paterentur: tum vero majore cum manu, quam aliquot ab annis fuevissent, in Etruriam progressi, Arretium obsidebant. Arretini fœdus a Romanis & antea petierant, sed eo negato, impetraverant inducias, quarum tempus nondum exierat. Ceterum major in eo spes erat venturi auxilii, quod arma Gallica nunquam concuti sciebant, quin eam rem magnopere ad se pertinere Romani arbitrentur. Itaque missis in urbem legatis, ut sibi subveniretur adversus communem hostem, petebant. Interea se circumegit annus, quo C. Servilius Tucca, L. Cæcilius Metellus consules fuerunt. Pro Cæcilio Cœlium annales quidam memorant: sed Cœliæ gentis inferior nobilitas ante annum ab Urbe condita sexcentimum sexagesimum, consularem imaginem nullam habuisse creditur.

§ XXVIII. Pigh. *Annal. Rom.* an. 466. *Liv. Epit.* 11. *Plin.* 34. 6. *Auct. de vir. ill.* c. 33. § XXIX. *Polyb.* 2. *Liv.* 10, 19, 37.

---



# JOANNIS FREINSHEMII SUPPLEMENTORUM LIVIANORUM

## LIBER II.

IN LOCUM LIB. XII LIVIANI.

---

## EPITOME

### LIBRI DUODECIMI.

*Cum legati Romanorum a Gallis Senonibus interfec̃ti essent, bello ob id Gallis indicto, L. Cæcilius prætor cum legionibus ab iis cæsus est. Cum a Tarentinis classis Romana direpta esset, duumviro, qui præerat classi, occiso, legati ad eos a senatu, ut de iis injuriis quererentur, missi, pulsati sunt. ob id, bellum iis indictum est. Samnites defecerunt. Adversus eos & Lucanos, & Bruttios, & Etruscos aliquot præliis a compluribus ducibus bene pugnatum est. Pyrrhus Epirotarum rex, ut auxilium ferret Tarentinis, in Italiam venit. Cum in præsidium Rheginorum legio Campana cum præfesto Decio Jubbello missa esset, occisis Rheginis Rhegium occupavit.*

I. **P.** CORNELIO Dolabella, Cn. Domitio Calvino consulibus, cum iterum Gallici belli terror se commovisset, multosque Tuscorum arma cum Senonibus sociare nuntiaretur, Arretinorum periculum sibi minime negligendum esse

Patres censuerunt. Sed quia neque Dolabella ex Volturnensi agro, neque ex Lucania Domitius exciri sine rerum gerendarum incommodo poterant; *L. Cæcilium Metellum prioris anni consulem, tum prætura fungentem, ad Arretinos obsidione liberandos quamprimum coactis copiis exire* Senatus iussit. Ne tamen temere sumtum esse bellum videretur, præmitti legatos placuit, nuntiatiuros *Arretium in fide Romanorum esse: iustusque facturos videri Gallos, quando fœdus cum Romano populo habeant, si adversus amicos atque socios juventutem suam conduci non patiantur.* Hæc legatio cum pagos Senonum circumiret; Britomaris quidam regii generis ferox adolescens, cujus pater inter Etruscorum auxilia cæsus a Romanis fuerat, insana vindictæ cupiditate flagrans, non homines modo comprehensos, sed & ipsa sacrosancti muneris insignia, minutatim dissecuit sparsitque.

II. Rei tam atrocis fama cum hinc in Urbem, inde in castra Dolabellæ consulis accidisset, irritatis vehementer animis, bellum Senonibus indictum est: statimque missos fecit Etruscos Dolabella, magnisque itineribus cum exercitu per Sabinum ac Picenum agrum, ad fines Senonum contendit. Senones subito hostium incurfu, & absente copiarum suarum robore, cum paucis & inconditis occurrentes facile profligantur. Consul nullo dato victis spatio exurit vicos, ædificia omnia diruit, vastat agrum omnem, denique puberibus occisis, imbelli mulierum & puerorum multitudine abducta, quam paucissima potest humani cultus vestigia in locis relinquit. Britomaris captus, & vario cruciatuum genere tortus, ad triumphum servatur. Per eodem dies haudquaquam pari fortuna res apud Arretium gestæ. L. Cæcilius prætor ante ipsum oppidum cum Senonibus Etruscisque adverso Marte confligit. Septem tribuni militum, multique præterea insignes viri cum ipso prætore cæsi sunt: ex legionibus & auxiliis hominum millia plus minus tredecim desiderata.

§ I. Polyb. 1, 7. Marian. Scotus. Appian. ap. Ful. Ursl. § II. Epit. Liv. 12. Appian. Dionys. ap. Fulv. Urslin. Polyb.

III. Sed minor apud Gallos hujus victoriæ lætitia, quam cognito patriæ excidio luctus atque consternatio fuit. Contractis qui ubique per Etruriam militabant popularibus, homines iræ ac doloris pleni, consilii speique inopes, cum sedes, quibus reciperentur, nullas usquam haberent; quasi fato quodam ad exitium eos trahente, Romam pergendi capiunt impetum: *non aliter patriæ suæ vastatoribus rependi vicem posse, quam si urbem ipsorum simili clade affectam intueri cogerentur, neque minoribus animis viribusque, causis etiam acrioribus ab Arretio Romam petere; quam majores sui ab ejusdem Etruriæ oppido Clusio profecti, eandem illam urbem occupassent.* His inter se vocibus instincti, ruunt; natura impatientes moræ, & tum, ut incautos hostes opprimerent, etiam consilio properi. Sed per hostilem regionem ducentibus, varia impedimenta objecta sunt: spatiumque fuit, quo provideri adversus hunc tumultum posset.

IV. Ita rejecti, dum per ignota & infesta omnia, nulla certa destinatione vagantur, in Domitium consulem incidunt: protinusque cum eo conferunt manus. Sed adversus rationem atque disciplinam infelix temeritas fuit: occisis in prælio multis, reliqui desperatione atque rabie accensi, ferrum, quod frustra in hostes strinxerant, suis corporibus admoverunt. Ita florentissimam modo nationem, ob scelus interfectorum legatorum tam velox tamque vehemens ultio comprehendit; ut aliquot mensium intervallo penitus excisa, inter gentes, quarum jura violaverat, numerari desierit. Nam & parvæ Senonum reliquiæ, quæ ad Bojos, vicinam & consanguineam gentem, se receperant, eodem anno a Dolabella consule internecione deletæ sunt. Cum enim atrocitate cladium suarum, & ejusdem calamitatis metu, Bojos Etruscisque concivissent, ad lacum, qui Vadimonis appellatur, pugna commissa, magnus Etruscorum numerus cæsus est, Boji perpauci effugerunt, Senonum omne nomen ita periit, ut nemo superesse putaretur ex ea gente, quæ Romam urbem incenderat.

§ III. Aug. de civ. Dei 3, 17. Appian. Eutrop. l. 2.

IV. Flor. 1, 13. Polyb.

V. Sub id tempus, Senam coloniam deductam esse verò propius videtur: quo Romanis universa regione potitis, nomen Senonum in ea parte Italiæ funditus interiit. Etrusci tamen Bojique, sequente statim anno, cum ex iis, qui puberes interea facti fuerant, exercitum supplevissent, iterum fortunam pugnae tentare sunt ausi. Tum igitur a Q. Æmilio Papo victos fuisse crediderim: hujus enim & C. Fabricii consulatus primus eum in annum incidit; Papoque provinciam Etruriam obvenisse constat. Sed in plerisque annalibus, qui adhuc leguntur, rerum istarum memoria, majorum interventu oblitterata est. Quod enim tot continuis bellis atque victoriis, maxima virtutis & potentiae incrementa Romanus populus quotidie caperet; adductæ in metum, quæ adhuc per Italiam sui juris erant civitates gentesque, maximum atque periculosissimum conflavere bellum: junctis, tanquam ad communes omnium hostes prædonesque opprimendos, consiliis & viribus. Neque differri arma visum est, donec adhuc Bojorum Etruscorumque reliquæ distinendis Romanorum copiis sufficerent.

VI. Primi Samnites, fracto rursus fœdere cum Lucanis Bruttiiisque palam sociantes consilia, proruperunt. Sed hos C. Fabricius consul compluribus præliis vicit. Uno maxime memorabili, cum Thurinam urbem iterum premente Statio Statilio, signis collatis dimicatum est; fusisque magna cum strage hostibus, ipsa etiam castra expugnata captaque. Memoriae proditum est, cum strenue castra defenderentur, scalas afferente quodam vasti corporis juvene, Romanos animatos, plenam victoriam reportavisse. Cæsa dicuntur in prælio & castris hostium millia viginti: quinque millia, cum ipso imperatore, signisque militaribus viginti capta sunt. Postero die cum donaret eos consul, quorum insignis opera fuerat, *vallaremque coronam ei se daturum dixisset, qui castra hostium primus transcendisset*, quæsitus ingenti studio reperiri non potuit, si miles fuisset, ultro se oblaturus huic tanto honori. Creditum igitur vulgatumque

est, Martem ipsum auctorem ejus operis causamque victoriæ fuisse : consulisque edicto supplicatio ei est habita, militesque laudati magnâ cum lætitiâ supplicatum ierunt.

VII. Conspirantes adversus Romanum populos, nullis adhuc auxiliis publice Tarentini juverant : qui præcipui fœderis istius auctores, tamen aliorum laboribus quam suo discrimine laceffi Romana arma, bellicæ eventum prætentari, sapientius arbitrabantur. Sed minime diu tenuit ista dissimulatio, quin casu quodam insanæ plebis temeritatem provocante, civitatis consilia nudarentur. Jam tum ea Italiæ ora, consuetudine Græcorum, a quibus Tarentus ceterarumque urbium pars pleraque conditæ fuerant, deliciis spectaculorum atque histrionum immodice gaudebat, præcipua Tarentinorum luxuria, quos adeo corruptis moribus egisse memorant, ut plures epulas ludosque sollemnes reciperent, quam anni dies essent. Forte in theatro majore juxta portum sito ludos spectabant ; cum L. Valerius (alii Cornelium nominant) duumvir navalis, decemque Romanæ naves portum introituræ se ostendunt : pernicioso utrisque errore ; cum ignari rerum omnium Romani tanquam amicum & hospitale litus peterent ; Tarentini conscientia vecordes, classem hostili animo consilioque misfam esse interpretarentur. Adest Philocharis, quem ob turpitudinem vitæ cives sui *Thaidem* appellabant : is veterum quorundam fœderum illata mentione, fas esse Romanis negat Lacinium promontorium præternavigandi : *obviam iri stolide ferocibus barbaris, superbiamque malo coerceri* jubet. Acclamat temeraria multitudo præ continua crapula non bene mentis compos. Hominiis fœdissimi de tanta re sententia omnium assensu accipitur, nec mora : decurritur ad arma navesque. Romani nullam ad rem minus quam ad pugnam parati, fugæ se committunt. Sed celeriter insequentibus Tarentinis evadunt naves quinque, rotidem a pluribus circumventæ in portum rediguntur : ex his depri-muntur cum ipso duumviro quatuor ; unus capitur : homi-

nes ætate & robore militari interficiuntur : cetera turba in servitutem venditur. Mox ab eadem animi levitate bellum Thurinis inferunt, criminantes, *eorum opera Romanum ea in loca venisse, qui Græci cum essent, barbaram gentem, quam cognatos vicinosque Tarentinos, dubiis rebus defensores habere inluisse.* Urbs in potestatem redacta diripitur : ejiciuntur principes : præsidium Romanum pacta incolumitate dimittitur.

VIII. Romæ re audita, erat quidem pro magnitudine injuriæ non levis indignatio; sed bellum novum ea tempestate sumi non placuit : legatio, quæ de injuriis quæretur, decreta, mandatumque legatis, *ut captos restitui, Thurinis res ablatas aut æstimationem justam reddi, exsules reduci, rerum istarum auctores populo Romano dedi postularent.* More Græcarum urbium in theatro concionem populi coegere Tarentini solebant : huc ægre admissi legati, turbam ebrietate & otio lascivientem repererunt. nam tum quoque dies festus agebatur. ibi cum legationis princeps L. Postumius verba facere orsus esset, ludibriis petulantissimæ multitudinis exceptus, multo etiam acriores odiorum causas retulit Romam, quam extulerat. Quippe tam contentiam habuerant eum, ut sermoni ejus de cetero quidem attenderet nemo : sed quoties aliquid ut ab homine Romano parum Græce prolatum esset, tota concio solveretur in risum, barbarum increpantes conviciarentur : cultum Legatorum, nam togati aderant, exploderent : postremo etiam theatro extruderent; jura gentium nequidquam invocantes. Fœdum inde dictu, sed ad licentiæ popularis coercendam temeritatem utile exemplum traditur. abeuntibus legatis inter confertam Tarentinorum turbam, quæ in ipso theatri exitu confliterat, scurra quidam Philonides (nam hoc quoque moribus suis corrupta civitas debet, ut celebrata sint annalibus scurrarum nomina; Tarentinorum principum ignorentur) sacra legatorum vestimenta, canis impudentis

§ VII. Strabo l. 6. Flor. 1, 18. Zonar. Appian. Dio ap. Fulv. Orat. 4, 1. Diod.

instar, urina resperfit. Unius spurci & furiosi hominis ea noxa videri potuisset, nisi protinus agnovisset temulenta civitas, risuque & plausibus factum illud comprobantium totum theatrum insonuisset. Postumius hac voce edita, *accipimus omen, o scurra, quando & ea nobis datis, quæ non petimus*; conversus ad multitudinem, vestemque ignominia affectam ostentans, ubi redintegratis cachinnis, etiam versus in populum Romanum contumeliosos cani saltarique videt; *ridete*, exclamat, *ridete Tarentini, dum licet: nam poslea quidem large stebitis*, iratis ad hæc Tarentinis, & *quo magis*, inquit, *stomachemini, prædico, vestem istam sanguine multo vobis eluendum esse*. Post hæc, nullo alio accepto responso, abnavigarunt.

IX. Jam Romæ magistratum occeperant L. Æmilius Barbula, Q. Marcius Philippus consules. His senatum habentibus, cum & prætextam (nam uti erat fœdata, eam attulerant legati) cernerent; & ipsis exponentibus ceterum injuriæ tam multiplicis ordinem discerent patres: commotis majorem in modum animis omnium, dubium non erat, quin armis vindicari contumeliam oporteret. Sed quia tot aliis adversus validissimas gentes bellis districtæ vires erant, statimne, an postea, contra Tarentinos mittendus exercitus esset, parum expediebant: multosque per dies ab orta luce ad occasum solis re in senatu disceptata, cum alii *nihil tentandum, priusquam ceteræ civitates, aut saltem quæ finitimæ Tarento essent, pacarentur*; alii *sine mora decernendum esse bellum*, pugnarent: postremo numeratis sententiis Senatusconsultum factum est, *ut de bello Tarentinis inferendo ad populum ferretur*. Id cum populus consensu jussisset; ad Æmilium consulem, qui jam in Samnium ad exercitum profectus fuerat, scriptæ sunt literæ, *ut omissis præsentibus castra in Tarentino agro poncret, & nisi de illatis injuriis satisfaceret populus Tarentinus, eum justo pioque bello persequeretur*.

X. Tarentini non amplius cum paucis & inermibus ho-

§ VIII. Liv. Epit. 12. Appian. Dio ap. Fulv. Zonar. Dionys. ap. Fulv. Val. Max. 2, 2, 5. § IX. Zonar. Dionys. Appian.

minibus, sed instructo exercitu negotium sibi futurum esse cernentes, tanquam ex diuturna crapula expergefacti, jam serio, quid faciendum esset, consultabant. bellum accipere periculosum; imperata facere fervile videbatur: neque vitari utrumque poterat. Variantibus igitur sententiis exurgens quidam, *Quid frustra dies altercando terimus*, inquit, *Tarentini? Venerunt tempora, quæ facta magis quam verba postulent: sed ad quæ ex usu publico administranda consiliis rectis opus sit, & ore libero.* Neque sane moveor, quod antehac communi quodam liberarum civitatum morbo, dictis ad gratiam compositis, etiam si crebro nocerent, estis oblectati: tum enim, ut sit inter res prosperas, quid potissimum reipublicæ conducere, parum animadvertebatis. Jam autem in finibus nostris exercitus Romanus, & ante ipsas portas hostilis terror est: eo magis pro futura jucundis facile discetis anteponere.

XI. Neque sic accipiat, tanquam exprobraturus præterita surrexerim. nam veterem quidem culpam intempestive objicere, inimici & alienis erroribus petulanter insultantis animi est: probi viri & salutis communis studiosi, peccata civitatis regere, aut excusare malunt; nisi quoties ad calamitatem publicam amolendam, præteritarum offensarum recordatio grande momentum habet. Nam ab errore quidem omni, homines cum finis, immunes haberi velle, nimium est superbum: sed ad eundem lapidem crebro impingere, neque saltem eventu temeritatem castigante ad cautionem erudiri, id vero jam vix bene humanum est. Ad unius hominis vocem naves Romanas depressimus: mox Thurios cognatam gentem hostilibus odiis vexavimus, quod ab Romanis defendi, quam a Lucanis Brutiisque diripi maluerunt: legatos Romanorum per turpem dictu contumeliam violari tulimus. Bellum igitur, quo carere potuimus, & grave bellum, & periculosum, & improvisum, alienissimo tempore nostro attractum est. Denique jam in agro Tarentino Romana castra sunt: & nos adhuc incerti omnium, bellum formidabile an pacem indecoram satius sit accipere, deliberamus.

XII. Atque utinam nunc demum obliti blanditiarum, obliti



privatorum commodorum, dignitatem utilitatemque publicam spectantes in commune consuleremus! esset unde vel fœdera honeste, vel arma tuto sumerentur. nunc in duas vos abire partes, & propemodum fœctiones video, non judiciis, aut ex conditione rerum sumto consilio; sed suis quisque causis ducitur. cur enim tam paucos juvenes & pauperes in ea sententia esse video, quæ pacem laudat? aut cur nemini fere divitum & seniorum bellum placeat? an alia tam æqualiter divisæ civitatis causa est, quam quod hi rebus quietis sœnori suo agrisque frui volunt: illi, si bellum constatum sit, in imperiis, aut ex licentia prædæ compendium sperant? etiam olim hoc morbo laboramus, neque a longo jam tempore respublica nostra hominibus caruit, qui domesticas opes augere studerent, etiam cum periculo & detrimento civitatis.

XIII. Quibus omnibus occurrere poteritis rectissime (dicendum enim est, quod ex præsentibus utilissimum esse censeo) si neque pacem ematis ea conditionum vilitate, quæ jura liberæ civitatis minuat: neque vestras tantummodo vires belli tam difficilis terroribus opponatis. Sæpe a majoribus copiarum nostrarum imperium externis ducibus commissum est. Archidamum Agésilai filium, postea Cleonymum, mox Agathoclem, Peloponneso aut Sicilia evocavimus. Memoria nostra, cum finitimorum armis infestaremur, Alexandrum Epirensē patres nostri acciverunt: eo consilio non solum ipsi commodis rebus usi sunt, sed etiam nobis florentes reliquerunt. Est eadem hodie inter nos & Epirotas amicitia: neque illi hodie exercitū ac duce mirus valent. Et recens beneficium nostrum Pyrrhus habet, quem Corcyræos oppugnantem justa classe juvimus. Ergo non meum hoc, sed qui ante nos Rempublicam hanc felicissime rexerunt, hominum sapientissimorum consilium esse existimatote: quod vel ideo sequi debetis, quia in priore exēplo quasi totam ejus rationem cum eventu ipso perspicere potestis.

XIV. Sed tamen etiam alioquin argumenta magna sunt & evidentia. Nemo inter nostros ita excellit, ut ei æquo animo parituri sint ceteri. quæ vero sint æmulationis pericula, quoties acri

§ XII. Zonar. Diod. § XIII. Appian. Strabo l. 6. Liv. 8, 24. Paul. l. 1.

& potente cum hoste res est, scitis : & quemcunque faceretis imperatorem, vel nimio pacis studio, vel cupiditate gerendi belli, detrimentum vestris rebus asserere posset : taceo adversum Romanos, gentem armis induratum, non quolibet duce bellum tuto geri. Verum enimvero, quemadmodum nemo dubitat, virtute & consilio militari ante Pyrrhum nemo est. sed venire forsitan nolet ? immo vero quia rerum gerendarum cupidissimus, bellum in praesentia nullum aliud habet, non modo veniet ipse lubenter, sed etiam adducet copias validas & praeliorum non rudes, & ne ab ipso libertati nostrae metuamus, iis cum eo conditionibus transigetur, quibus respublica in tuto sit. Hac ratione fiet, ut bona cum spe sumere bellum, & vel impetrare pacem commodam, vel etiam dare gloriosam possimus. quanquam hoc potius eventuum non improbae spei est, ut prius Romani nobiscum aequis legibus transigant, quam hoc rerum statu Pyrrhum accipiant in Italiam, qui quondam ex eadem Epiro minoris aliquanto gloriae potentiaeque regem timuerunt. ✕

XV. Hoc consilium non eo tantum vicit, quod publicae salutis viam haud aspernamdam aperuisse videbatur ; sed etiam contrarias in opiniones divisa concione, cum neutra pars, obistente altera, pertendere posset, quod proximum erat, sententiam, quae media quodammodo videbatur, universi praetulerunt. Ferunt vulgato per civitatem rumore, decretum de Pyrrho acciando factum esse, Metonem quendam hominem frugi, summa corona marcida & facula, ebriorem more, cum tibicina theatrum intravisse : populum Tarentinum, solita lascivia, iussisse, ut *progressi in medium, ille voce, mulierculæ tibia canerent.* cum Metonem, facto silentio, dixisse : *Bene facitis, Tarentini, quod saltandi canendique copiam praestatis, quibus libet : nam Pyrrho in urbem admissio viæ erit, ut licet amplius nostro nobis arbitrari vivere.* Moto ad hæc populo, atque orto murmure, veriti qui auctores injuriarum adversus Romanos fuerant, ne pacificis consiliis valentibus ad supplicium ipsi dederentur, increpito vulgo, quod ab homine temerario tam indigne derideri pa-

*teretur*, impetu facto, Metonem theatro exegerunt. ita nemine deinceps adversante, decretum ratum fuit.

XVI. At Romanus consul, cum nihil ab Tarentinis pacati responderetur, præterea mitti ad Pyrrhum legatos cum muneribus accepisset, ad belli consilia conversus, agrum populatur, oppida alia pugnando, alia deditione capit, damno ac terrore complet omnia. Mittuntur etiam ad prohibendas injurias ab Tarento copiarum: fit conflictus acer, sed superiore Romano, multis suorum amissis, Græci in urbem compelluntur. Æmilius regionem omnem impune vastat uritque. Territis ea clade Tarentinis, ut multitudo, quanto secundis rebus insolentior, adversis tanto impensius in timorem præceps est, Agidi, qui Romanæ amicitiae retinendæ perpetuus auctor fuerat, imperium permittitur. Cupiditatem spemque pacis auxerant ex principibus quidam ab Romano duce dimissi, qui *humanitatem ejus*, & *ceteros etiam Tarentinos superiore prælio, aut per agros passim exceptos, indulgenter atque benigne haberi*, prædicabant.

XVII. Sed mutavit animos crexitque Cinæ fiducia, cum auxiliaribus copiis ab Epiro venientis. Namque Pyrrhus ingens animi, & Magni modo Alexandri æmulatione vastissimum imperium spe complexus, ipsis quali fati invitantibus, ad perficienda quæ destinasset, pandi sibi viam credebat. Confirmatum etiam oraculi Delphici voce narrant, ambigui quidem sensus, & utramvis in partem facilis flecti, sed quod interprete cupiditate rex pro certo & secundo acceperit. quippe de belli, quod suscepturus esset, eventu consulenti redditum responsum ferunt: *posse eum Romanos vincere*. Sed plus, opinor, animorum dabat Tarentina legatio, quæ ex sua civitate, *Lucanisque, Messapiis, & Samnitibus, ceterisque populis, qui eodem fœdere tenerentur, facile viginti millia equitum, trecenta quinquaginta pedum conferri posse*, attulerat. His igitur copiis si Romanos in ordinem redegisset, haud magno negotio ceteræ Italiæ dominationem se adepturum sperabat. Inde brevis in Sici-

liam trajectus ostentabat insulam Agathoclis excisa domo vacuam & discordem : quam etiam hereditario jure, quod ex Lanassa filia Agathoclis liberos susceperat, suæ domui posse vindicari rebatur. His ex sententia confectis, Carthaginem bello erat petiturus.

XVIII. Fama est, Cineam præstanti sapientia virum, quo immodicas regis cupiditates, paratamque felicitatem præsentibus bene utendi turbaturas, ipsius quoque confessione coercendas esse ostenderet, *quid de victis Romanis agere constituisset?* interrogasse. Atque illo subinde alias ex aliis victorias nascituras esse demonstrante, subjecisse : *quid igitur confectis istis omnibus acturi sumus?* Tum vero *pacis & otii bonis affectu in fruituros* respondente, excepisse Cineam : *quid igitur vetat, o Rex, quin statim iis fruamur, cum prælo sint : novis autem bellis suscipiendis corrumpi penitus amittique possint.* Sed Pyrrhus iterata legatione Tarentinorum, & ambitione sua victus, *patrium esse* respondit *Epirotis, non pro se tantum, sed etiam pro sociis & amicis bella capeßere.* Ceterum tegendo interiori consilio suo, cum legatis anxie pepigit, *ut lato ipsis auxilio statim rediret domum; neque diutius, quam necessum esset, ab iis in Italia detineretur.*

XIX. Inde confectum ad bellum apparandum ingenti studio versus, navium longarum magnum numerum complevit; alias præterea, quibus equi virique transportarentur, adornavit : plerisque legatorum Italicorum, quo sub specie honoris obsidum vicem retineret, in delectu agendo copiisque conducendis usus, ceteros cum tribus armatorum millibus, addito, qui præesset Cineas, Tarentum præmisit. Horum adventu spes pacis abrupta, abrogatum Agidi imperium, & uni eorum, qui ex legatione redierant, decreto populi datum est. Neque multo post missus a rege Milo Tarentinam arcem firmavit præsidio, murorumque custodiam & tutelam sibi depoposcit : gratulante imperita

§ XVII. Aug. de civ. Dei 3, 17. Ennius apud Cic. in divin. 2, 26. Plut. in Pyrrh. c. 27. Just. 18, 1. § XVIII. Just. Diod. Ecl. ex l. 22.

multitudine, quod penes peregrinos molestiam & labores esse, sibi otium cum securitate relictum existimabat. annona igitur militibus, pecunia Pyrrho, alacriter decreta.

XX. Interea L. Æmilius transmarini militis adventu cognito, quo tutioribus locis hibernaret, exercitum in Lucaniam transducere instituit. Erat iter per angustos quosdam calles, quos ab altera parte præruptæ inviæque rupes, ab altera mare claudabant: & intellecto ducis Romani consilio Tarentini naves scorpionibus & ballistis instructas admoverant litori; militenique per arctos & obnoxios tramites incedentem missilibus impetebant. Æmilius viam virtuti negatam astu explicuit, captivis, quos in ultimum agmen rejecerat, latera prætexens ordinum, quæ periculo patebant. Horum misericordia Tarentini, dum suos ferire metuunt, etiam hostibus pepercerunt. Hæc ferme eo anno ad Tarentum gesta. Romæ vero C. Fabricius Luscinus, qui in consulatu suo Samnitas Bruttiosque & Lucanos præclare vicerat, triumphans Capitolium ingressus est. Eundemque honorem non ita multis post diebus Q. Marcius consul obtinuit, ex Etruria, rebus ibi prospere gestis, reversus.

XXI. Quæ eum causa, bello Etrusco nondum finito, ex provincia revocaverit, tempore alieno (nam Fabricius a. d. III Nonas Martias triumphavit) non traditur: ego accitum a Senatu conjicio, qui tum expectatione Pyrrhi sollicitus, præsidia undique conquirebat. Nam & eo primum tempore, cum tanta undique belli mole coorta, imperium pluribus exercitibus defendi oporteret, proletarii, quibus antiquitus vacatio militiæ fuerat, sacramento rogari cœpere. arma, quæ parare per inopiam non poterant, publice data: ut legionibus alibi occupatis, hæc manus per globos in muris foroque disposita, stationibus & excubiis urbem tueretur. Neque tamen his consiliis averti potuisset imminens clades, nisi fortuna urbis imperaturæ periculosissimis temporibus ingentes viros reservasset, ac nescio an maximos omnium, qui unquam in ista civitate fuerint, non ita

divitiis & splendore generis, quam contemptu opum, & a virtute nobiles. Hæc enim ætas Curios, Fabricios, Cornelianos tulit: nullarum imaginum aut facultatum viros, sed amplissimæ gloriæ, quam rectissimi exempli homines, summo rei militaris usu, parique morum innocentia pepererunt: utrobique salutares patriæ, quæ adversus regem ambobus metuendum, non magis opus habebat viris, qui ferrum hostile retundere possent, quam qui aurum contemnere.

XXII. Pyrrhum interea vere non expectato peditum duo & viginti millia, tria equitum adducentem, elephantos præterea viginti, & funditorum sagittariorumque modicam manum, orta in medio cursu tempestas ita jactavit, ut ab extremo periculo minimum abesset. Classe disjecta, pluribusque navigiis afflictis, cum etiam prætoria navis laboraret, in mare se dedit Pyrrhus, & maximo cum labore vix tandem enatavit. Corporis tamen male habiti ægritudinem, animi robur sublevabat: & cura Messapiorum, qui suum in litus ejectum, omni studiorum officiorumque comitate coluerunt. Eorundem opera navibus quibusdam, quæ procellæ vim evaserant, adductis, pauci equites cum duobus elephantis, & minus duobus millibus peditum collecti. Cum hac manu Tarentum processit: obviam egresso cum militibus suis, Regemque deducente Cineas. Magnis Tarentinorum gratulationibus exceptus, paucos dies quieti dedit. quo spatio cum civitatis mores ira comparatos effecerneret, ut his obtinentibus, neque fervari a quoquam possent, & ipsos quoque defensores suos pessumdaturi essent, dissimulavit in præsentia. Sed ubi paulatim convenientibus, quæ dispersæ fuerant, navibus, copias idoneas habuit; gymnasia & porticus, in quibus otiosa juvenus dies totos obambulando nugandoque consumebat, occlusit: epulas computationesque vetuit: sollemnia ludorum ex intemperantissimo usu ad justam mediocritatem reduxit.

§ XXI. Oros. 4, 1. Aug. de civ. Dei 3, 17. Enn. ap. Agell. 16, 10. § XXII. Zonar. Plut. in Pyrrh. c. 31.

XXIII. Post hæc delectum juniorum severe egit: monitis, ut solebat, conquisitoribus suis, *grandes eligerent, se eos fortes redditurum*. Hos manipulis suorum permixtos, ne seorsim habiti seditiones agitarent, eadem durtia & severitate disciplinæ exercuit; capitis pœna infrequentibus proposita. Qui vero in armis non essent, eos majorem diei partem in foro agere coegit. Quarum rerum insolentia, homines inter pudendas delicias nati educatique, mirifice angebantur, *fortitudinem* appellando, si perire socordia & luxuria cupientes, salvi esse cogerentur. Onerabat invidiam satellitum quorundam regionum intemperies, qui suo arbitrato hospitia diligentes, etiam invitis & reluctantibus dominis occupabant: parique deinde licentia inter uxores eorum liberosque versabantur. Ergo fastidio præsentium multi relictâ urbe in agros emigrabant: donec id quoque clausis portis appositi custodes prohibuerunt.

XXIV. Tum vero Tarentini se pro socio dominum accepisse sero intelligentes, quod unum poterant, per indignationem & questus sortem suam miserabantur, aliquanto liberius, ubi per aliquam idoneam causam convenientes, præter solitos animi affectus, etiam vino incaluisse. Neque deerant, qui ad Pyrrhum referrent: arcessitique nonnulli, quod inter convivium parum honorifice de Rege locuti esse arguerentur. Sed horum quidem periculum cujusdam inter eos simplex & ingeniosa consilio discussit: *Et hæc diximus*, inquit, *& longe graviora distulimus, nisi vinum defecisset*. Ibi Pyrrhus, ut qui vini quam hominum eam culpam videri mallet, arridens dimisit eos. Ceterum diffusus civitatis moribus animisque, ut quemque plurimum apud Tarentinos auctoritate consilioque pollere animadverterat, causis repertis instructive, ad filium Ptolemæum (quem discedens ipse regno præfecerat annorum quindecim adolescentem) ablegabat: alios per oculos insidias de medio tollebat: erant, quos affectata humani.

tate complexus, inter familiarissimos haberet, quo populo suspectiores fierent.

XXV. In his Aristarchus erat, vir inter primates amore civium & eloquentia excellens. hunc, quia nihilominus in magna apud multitudinem gratia esse cernebat, per causam certi negotii navigare in Epirum iussit. Aristarchus, cum refragari Regis imperio præsentis exitii; obedire, non quidem æque velocis, sed tamen æque certi videretur: consensa navi paulum proventus, flexit cursum ad urbem Romanam, & receptus in fidem de rebus multis magnisque Senatui largiter edocuit. Dum hæc Tarenti Pyrrhus administrat, nihilo segnius ad bellum gerendum apud Romanos delectus agebantur, cogeantur pecuniæ, misso ad focias civitates C. Fabricio, qui auctoritate gratiaque sua deterret a studiis rerum novarum: quidam, quorum suspecta levitas erat, etiam præfidiis in opportuna loca impositis in fide retinebantur.

XXVI. Quidquid enim ubivis injuriæ acceptæ persuasione ægrum, aut cupiditate novandi turbidum erat: id omne, tot adversus unam gentem conspirantium populorum robur, & bellicosissimi Regis expectatio commovebat. quo intentiores Romani, capita seditionum mature opprimendo, securitati suæ providebant. Eo tempore casus Prænestinorum principum memorabilis fuit: qui nocte jam ingruente cum adducti Romam essent, custodiæ causa conclusi sunt in ærario publico, tum demum intellectis fallacis oraculi ambagibus, cujus fide popularibus suis, ad defectionem eos impulsuri, sæpe sponponderant, in fatis esse, *uti Romanum ærarium a Prænestinis occuparetur*. Sollicitos Patrum animos (nam & Fabricium a fociis retineri audiverant, ut eo pignore suos ab Romanis incolumes reciperent; & ad Etruscos, ad Umbros, ad Gallos contra populum Romanum incitandos, legatos mitti) nova insuper cura oppressit rei cum facto ipso atrocis, tum formi-

§ XXIV. Zonar. Val. Max. 5, 1, 3. Plut. Pyrrh. c. 16. Just. 18, 1. § XXV. Dio ap. Fulv.



dabilis exempli, ne apud omnes Italos alienissimo tempore Romana fides in suspensionem & odium adduceretur.

XXVII. In extremo Italiae litore contra Siciliam Rhegium est, Graeci nominis, temporibus illis florens & opulenta civitas. Ea cum adventu Pyrrhi magnum & terribile bellum cerneret consurgere, praeterea classibus Carthaginiensium in illo mari vagantibus terretur; diffusa viribus suis arcessendum a Romanis praesidium existimavit. Missa sunt militum millia quatuor, ex Campaniae coloniis scripta manus, & inde legio Campana appellata; tribuno militum Decio Jubellio deducente. His ab initio quidem neque fides in defendenda urbe, neque diligentia defuit. Deinde, quia belli propinquus metus nullus erat, paulatim otio & Graecae consuetudinis imitatione in luxum resoluti, praesentemque copiam cum dura & laboriosa vita, quam eoque egerant, comparantes, opportunitatem urbis, & incolarum felicitatem, sermone cupiditatis & invidiae pleno, in circulis & hospitibus suis agitare coeperunt.

XXVIII. Delectabatur eo facto Decius, qui & ipse pari vecordia ductus, sceleratum occupandae urbis consilium pridem animo conceperat. Favebat occasio praesentis belli, quo sciebat ita distringi Romanos, ut Rheginam rem curaturi non essent: & in adverso litore Mamertinos, exemplum simul felicitis sceleris, & similis perfidiae haud dubios propugnatores, praeterea communis patriae necessitudine junctos, intuebatur. Nam & hi ex Campania oriundi, cum superioribus annis inter Agathoclis auxilia stipendium fecissent, a Messeniis pro amicis excepti, civibus trucidatis aut ejectis urbem occupaverant, domosque & conjugia miserorum inter se partiti fuerant. Etiam veterum Campanorum subibat memoria, qui Capuam possederunt, simili latrocinio Tusciis ademptam.

XXIX. Cum res satis placeret, ea consultatio supererat, quonam modo facinus impune patraretur, neve, ut

¶ XXVI. Zonar. Dio ap. Fulv. § XXVII. Polyb. 1, 7. Liv. Epit. 12. Liv. 28, 3. § XXVIII. Polyb. l. 21. Liv. 4, 37.

in urbe populosa, pauciores a pluribus circumventi caderentur. Con fingit epistolas tanquam a Rheginis ad Pyrrhum scriptas, ut praesidium Romanum ei proderetur. Vocantur secreto milites: epistolae, quasi interceptae, recitantur: queritur acerbe de perfidia Rheginorum Decius: ex militari multitudine quidam, ad hoc praeparati, succlamant, *armis expediendam salutem, & exitium ipsis destinatum, in auctorum capita vertendum esse*: adest etiam ex compacto, qui nuntiet, *in Rhegino litore classem Pyrrhi conspectam esse, & secreta colloquia habita*. Miles supra priorem animi cupiditatem, etiam perfidia hostium & periculi metu accenditur. Consensu omnium in hanc sententiam disceditur, *ut ignari imparatique oppidani opprimantur: caede virorum facta, fortunae publicae privataeque omnes legioni cedant*. Fit facinus indignum & atrox: Decius quosdam ex principibus ad coenam vocatos, inter sacra hospitalis mensae obtruncat: alii passim in domibus suis trucidantur: majori parte Rheginorum interfecta, ceteri patria ejiciuntur ab iisdem illis, quos paulo ante, ut cum patria fervarentur, amicorum atque sociorum nomine in eam acceperant.

XXX. His patrat, nova sit publicae rei forma: aedes atque facultates miserorum, tanquam hostilis praeda, inter latrones dividuntur: caede adhuc recenti, matronae virginesque maritorum atque parentum suorum intersectoribus nubere coguntur: jura nomenque Rheginæ civitatis crudelis & perfidiosa legio sibi vindicat. Sed bene consuluit mortalium generi Deus, quod plerumque scelerum insignium exempla, eadem & vindictae illustris documenta sunt: ne quis magis successu maleficiorum animari ad paria consilia possit, quam exitu eventumque deterri. Adeo veræ felicitati cum facinorosis non convenit: neque ulla certior est infamia, quam existimare, scelere quinquam fieri beatiorum. Ut enim quæ post hanc vitam manent supplicia, quæ maxima sapientes esse sciunt, nulla putentur: (solet enim hominum incredibilis stulticia vix iis habere fidem, quæ

vident: nedum ut inexpertis moveantur) attamen etiam cum prosperrime procedunt omnia, interno vulnere lacerat animum delictorum conscientia: viventium nomen, mortuorum memoria, apud homines in odio & detestatione est: ac plerumque id ipsum quoque, quod foedissime partum, laboriosissime retentum est, non Deo, non hominibus inulta scelera diu patientibus, ingenti cum dolore eripitur.

XXXI. Juvat hic referre breviter Decii Jubellii ceterorumque furoris ejus participum pœnas, quæ quidem earum temporibus his connexa sunt: nam extremum exitium, interea variis casibus torti, decimum in annum distulerunt, ut in tempore memorabimus. Igitur prædonibus istis non diu lætæ, aut etiam inter ipsos tranquillæ res fuere. Metum a Romanis & Pyrrho utcunque, præter occasionem temporum, Mamertina societate propellebant, & consilio neutros laceßendi. Hæc enim tutissimum visum ex præsentibus, inter initia sua, dum ex violenta & subita origina nova civitas coalescit, abstinere bello: quod neque adversus Regem se tuto sumturos esse videbant; & promissionem sperabant a Romanis veniam, si contra ipsos arma non tulissent. Prima dissensionis causa, ut inter Litrones oportuit, ex iniqua divisione raptarum rerum orta est. Ejectus per seditionem Decius Messanam confugit: qui Rhegii erant milites scribam ejus M. Caelium imperatorem legerrunt: eodem honore Decius, cum pecuniam secum grandem attulisset, a Mamertinis auctus est; neque læta sibi, neque diuturna fortuna.

XXXII. Nam evenit, ut oculorum gravi ægritudine correptus, medicum insignem acciendum curaret; ultione divina jam ad plures acerbioresque pœnas nefarium hominem rapiente. Adductus ergo medicus est Rheginus domo, sed quia multis ab annis Messanæ habitaverat, origine non Decio tantum, nunquam ulli Rheginorum se commissuro, sed plerisque ejusdem urbis incolis incomperta. Ille me-

mor patriæ, & injurias ejus ulcisci certus, persuadet homini, se strenuum quidem afferre remedium, sed eventus tuti, celerrimæque efficaciam. Sic admoto medicamento, quod cantharidum succo temperaverat, vetitoque tolli, priusquam ipse reversus ad agrum esset, sine mora conscenso navigio, ex urbe Messana profugit. Decius incredibili dolore satis diu tolerato, postquam medicus non redit, amoveri collyrium jubet: eo diluto, luminibus orbatum se reperit. Ita infamis, exsul, contemptus, cæcus, animo & corpore ægro, tanquam vinculis constrictus, ad pœnam servatur: miro quodam divinæ ultionis ingenio, ut ab eo, cui salutem suam crediderat, cladem istam pateretur; qui prius ipse, quos tueri debuerat, immanitate perfidiaque circumvenisset. Quæ documenta historiis consignari tradique generis humani interest; cui nunquam satis persuadetur, quantum a recta prudentiæ ratione absit ea calliditas, per quam ob falsa quædam bona, virtute fideque spretis, per fœdas & iniquas libidines in vera mala ruitur.

§ XXXII. Appian. ap. Vales. Diodor.

---

JOANNIS FREINSHEMII  
 SUPPLEMENTORUM  
 LIVIANORUM  
 LIBER III.  
 IN LOCUM LIB. XIII LIVIANI.

---

EPITOME  
 LIBRI DECIMI TERTII.

*Valerius Lævinus consul parum prospere adversus Pyrrhum pugnavit, elephantorum maxime inusitata facie territis militibus. Post id prælium cum corpora Romanorum, qui in acie ceciderant, Pyrrhus inspiceret, omnia versa in hostem invenit, populabundusque ad urbem Romam processit. C. Fabricius, missus ad eum a senatu, ut de redimendis captivis ageret, frustra, ut patriam desereret, a rege tentatus est. Captivi sine pretio remissi sunt. Cineas, legatus a Pyrrho ad senatum missus, petiit, ut componendæ pacis causa rex in urbem reciperetur. de qua re cum ad frequentiore senatum referri placuisset, Ap. Claudius, qui propter valetudinem oculorum jamdiu consiliis publicis se abstinuerat, venit in curiam, & sententia sua tenuit, ut id Pyrrho negaretur. Cu. Domitius censor primus ex plebe lustrum condidit. censa sunt civium capita ducenta septuaginta octo millia, ducenta viginti duo. Iterum adversus Pyrrhum dubio eventu pugnatum est. Cum Carthaginensibus quartum sedus renovatum est. Cur.*  
*T. Liv. Vol. III.* H

*C. Fabricio consuli is, qui ad eum a Pyrrho transfugerat, polliceretur, se regi venenum daturum, cum indicio ad regem remissus est. Res præterea contra Etruscos, Lucanos, Brutios, & Samnites prospere gestas continet.*

**I.** INTEREA Romæ parte copiarum ad præsidium urbis, & incertos belli casus retenta, novis consulibus exercitus & provinciæ datæ sunt. P. Valerio Lævino Tarentini & Pyrrhus; Ti. Coruncanio Etrusci belli reliquiæ obven-  
runt. Lævinus magnificum ad famam & terrorem ratus, hostem a se lacessitum videri; simul utile civitati, si quam longissime belli metum & incommoda ab agro Romano avertisset: confestim in Lucaniam moto exercitu, castellum opportuno situ operibus permunivit, valido præsidio imposito, quo & Pyrrhi cœpta tardarentur, & Lucani, quorum perfidia timebatur, ad hostem non auderent de-  
sciscere. Audito Romani consulis adventu Pyrrhus, quan-  
quam focii nondum convenerant, turpe sibi & detrimen-  
tosum fore judicans, si inter primordia belli formidinis in-  
dicium ullum edidisset; cum copiis, quæ aderant, incun-  
tanter obviam progressus est.

II. Ut tamen per causam aliquam honestam traheret nego-  
rium, caduceatorem misit cum literis, quarum hæc sententia  
fuit: *Rex Pyrrhus Lævino Salutem. Audio te contra Taren-  
tinos venire cum exercitu. Sed eo dimisso, cum paucis ad me  
venito: causa enim cognita, quod alteros alteris præstare æquum  
erit, etiam nolentes præstare cogam.* Ad hæc Lævinus: *Nos  
neque controversiarum nostrarum te sumimus arbitrum, neque ho-  
stem pertinescimus. Tu vero absurde facere videris, causas alie-  
nas cognoscere satagens, qui propriæ culpæ reus, nondum Ita-  
liæ, injussu nostro, initæ pœnas nobis pependisti. Ergo non  
adversus te minus, quam adversus Tarentinos instructo cum exer-  
citu venio, Marte juvante, auctore generis nostri, de nostro jure  
disceptaturus.* Neque diu moratus signa movit; & inter Pan-

dofiam & Heracleam urbes, loco campeſtri, ab hoſtilibus caſtris diviſus Siri amne, conſedit. Fama eſt, Pyrrhum ſpeculandi cauſa ad amnem progreſſum, cum caſtra Romana diligenter ſpectaviſſet, uni ex amicis, cui Megacles nomen erat, dixiſſe: *Ordo certe barbarorum iſtorum minime barbarus eſt: at facta mox noſcemus.*

III. Tum autem ad ripam firma collocata ſtatione, quæ tranſitum tentantes arceret, opperiri ſocios conſtituit: ſuper rationem belli, quod Romanos in hoſtili regione rerum neceſſariarum inopia laboraturos eſſe ſperabat, etiam fiducia Lævini anxius: cujus ille admirationem novo teſtimonio nuper auxerat; dimiſſis impune hoſtibus, qui ad exploranda caſtra venerant: & adjecto, *ſibi præterea majorem alium exercitum eſſe.* Inter hæc, ut vicinis caſtris, velitationes continuæ fiebant: ad ſummam rerum proficiebatur nihil. Igitur diebus ferme quinquaginta per hæc leviora certamina conſumtis; conſul, quod iſdem cauſis ad feſcinandum prælium, quibus Pyrrhus ad differendum movebatur, milites in concionem vocatos conſilii ſui certiores facit, adverſus novi hoſtis metum confirmat. Pyrrhi famam, beluarum terrorem, quantum poteſt, elevat: denique rebus ita ſe parat, ut vel volente cum hoſte congrediatur, vel etiam invitum cogat ad certamen.

IV. Itaque poſtquam Pyrrhum manere in ſententia videt, equitatum omnem, tanquam ad agrorum prædam excurſurum, præmittit: ipſe cum inſtructis legionibus opperitur, donec in adverſa ripa tumultus & clamor fiat. Equites magno a caſtris intervallo circumveſti, qua incuſtoditum flumen erat, tranſjiciunt; ſtationem pro hoſtili ripa collocatam curſu petunt: Epirotæ, ſubita re perterriti, ad caſtra ſua ſe recipiunt. Pyrrhus intellecto hoſtem adeſſe, equitatum omnem, (tria millia erant,) quanta maxima celeritate poteſt, ad amnem rapit: ſperans, Romanos inter tranſeundum ordinibus ſolutis, & caeco vado cum iniquitate aque ſoli-

6 II. Zonar. Plut. § III. Zonar. Front. 4, 7. Gotefr. Viterb. Otto Friſing.

que luctantes, occupari posse. Sed cum Romani equites se objecissent, inactus ante primum suorum agmen, non imparē famæ suæ pugnam edidit, splendidis armis conspicuus, neque minus insigni robore animique præsentia: cum ita totam aciem consilio imperiisque regeret, tanquam omni alio labore solutus esset; ita ubi res poscebat accurrens præliaretur, tanquam solum ad se militis officium, ad alium universæ rei cura pertineret.

V. Interea Leonnatus quidam Macedo, cum ex hostibus quendam notasset, qui ceteris omiſſis omnibus, unum in Regem tota volitantem acie intentus, quacunque parte illum se inferre vidisset, eo quoque equum agebat, monuit Pyrrhum. Cui ille, *fatum*, inquit, *o Leonnate, mortalium effugerit nemo. Ceterum neque hic Italus mecum, neque alius quisquam, impune congregietur.* Vix elocutus hæc fuerat, cum Oplacus (hoc nomen erat viro, Frentanæ turmæ præfecto) infesta lancea equum percutit Regis: atque illius equum vicissim excipiens Leonnatus. ibi circumfusi Regis amici Oplacum pugnantem interficiunt; Regem eripiunt. Sed iste casus magnopere perculit regios, ipsum esse cæsum opinantes. Quare ut confirmaret suos, simulque pericula sibi intenta declinaret, paludamentum & arma cum Megacle commutat: illoque in pugna relicto, ad phalangem ordinandam adducendamque pergit. Occurrunt & Romanæ legiones. certatur diu acerrime, eventu adeo dubio, ut memoriæ sit proditum, septies alternante prælii fortuna, modo Romanos hostium, modo Tarentinos Epirotasque Romanorum terga vidisse.

VI. Sed proxime desperationem Pyrrhi res adduxerat Megacelis cædes, quem regiis armis monstratum ex diversa acie fortissimus quisque regis interfecti gloriam affectans impetebat: donec eques nomine Dexter, interempto detractam chlamydem galeamque maximis cum clamoribus ad consulem ferens, fidem patratæ cædis utrique exercitui fecit. Jam



omnia terroris atque consternationis apud Græcos plena erant: fugissentque haud dubie, nisi quamprimum rudo capite obequitans Pyrrhus, *seque vivere & adesse* voce magna testatus, tantundem fiducia Romanis, quantum suo militi formidinis desperationisque demississet. Lævinus adesse tempus ratus, quo ultima remedia experiretur, signum equitibus sustulit, quos in insidiis collocaverat, ut terga hostium incurrerent. At Pyrrhus in hoc agmen elephantos agi jubet, ipsos quoque in ultimum terrorem hostium reservatos.

VII. Id consilium afflixit spes Romanas, eventumque totius pugnae secundum Pyrrhum dedit. nam & homines ipsi vastorum corporum mole, terribilique superstantium armatorum specie stupentes, quodvis potius ingens & formidabile portentum, quam animalium a natura productorum formam videre videbantur: & equi ad conspectum odoremque & stridorem tum primum visarum belluarum exterriti, protinus confusis ordinibus, qua cuique proximum erat, abripiebantur; sessoresque vel excutiebant, vel frustra retinentes secum auferabant in fugam: & in suorum aciem incurrentes omnia trepidatione tumultuque miscebant. Insecutis elephantorum rectoribus, multi fugientium ab iis, qui in turribus belluarum contiterant, vulnerati sunt: plures ab elephantis ipsis confecti obtritique. Sed consule omnia experto, cohærebat utcunque acies; donec immissa Pyrrhi imperio Thesalica ala male resistentes fregit disjecitque.

VIII. Neque dubium habetur, quin eo situ loci, quo tum conclusi tenebantur, cæsi omnes captivi forent, ni præter consuetudinem Pyrrhi, qui hoc imperatorium rebatur, non pertinaciter instare fugientibus, ne alio tempore desperatione salutis acrius resisterent; etiam præceps in vesperam dies regio a persequendo desistere coegisset. Adjuvit etiam fortuna reliquias infelicis exercitus, quod elephantus accepto vulnere conversus, etiam ceteros barritu turbavit. Ea res

§ VI. Front. 2, 4. Plut. Zonar. § VII. Front. 2, 4. Pausan. l. 7. Flor. 1, 18. Plin. 8, 6. Zonar. Plutarch.

morata hostes, spatium fugientibus dedit, quo transmissis annis pervenire in Apuliam possent; ibique urbis ejusdem munitionibus adversus instans periculum tegerentur. Cæsa eo prælio Romanorum sociorumque peditum millia quatuordecim & præterea octingentos septuaginta reperio; ducentos quadraginta sex equites, captos in universum mille octingentos duodecim; in his equites duos & octingentos: amissa signa militaria duo & viginti.

IX. Quo magis miror, auctores qui hæc tam accurate executi sunt, negare numerum ex regio exercitu desideratorum annotatum esse: cum Dionysius scribat, Lævinum amisisse paulo minus millia quindecim; tredecim interiisse ex victoribus: Hieronymus autem Cardianus, æqualis istorum temporum scriptor, de Romano exercitu non plus septem millibus cecidisse tradat; de regio, intra quatuor millia. Sed hoc inter omnes constat, fore ducum militumque suorum victoriam eam Pyrrho constituisse: exceptæque dicuntur voces, *non minus victum se eo prælio, quam victorem discessisse*, ferentis. etiam cum Tarentino Jovi spolia donaque figeret, falsus hoc fertur, inscripto ejus sententiæ titulo, querentibusque sociis respondisse: *næ ego, si iterum se vicero, sine milite revertar in Epirum!* Ipsum quoque Regem hoc prælio grave vulnus accepisse auctorem habeo: sed quoniam alii tale nihil tradiderunt, casusque diversarum pugnarum misceri nonnunquam video; non ausim uni, in silentio plurium & accuratiorum, credere.

X. Magna profecto pertinacia certatum esse hoc etiam argumento fuerit, quod postridie ejus pugnae, cum caesorum corpora Pyrrhus inspiceret, quæ ad humanitatis & clementiæ famam humari jusserrat; Romanos omnes in hostem versos honestis vulneribus oppetiisse cernens, exclamavit: *O quam proclive mihi erat orbis imperio potiri Romanos habenti milites!* Neque cunctatus est eorum, quos in potestate habebat, animos appellatione blanda magnisque

6 VIII. Front. 2, 6. Eutrop. l. 2. Gotsfr. Viterb. Oros. 4, 1.  
 5 IX. Plutarch. Oros. 4, 1. Just. 18, 1, 7.

promissis adoriri, ut apud se stipendia facerent: & abnuere perseverantes nihilo sequius humaniter clementerque habuit; & vinculorum, & omnis, quæ fortunam captivorum comitari solet, contumeliæ expertes. At Romanos prælio tam male acceptos alia mox clades terruit, ut longe impar detrimento, ita majoris aliquanto formidinis & religionis. Nam ad manifestam deorum iram referebatur, quod pabulatores forte dimissos subigo coorta tempestas ita perculerat, ut inter horribilem cœli fragorem cadentibus fulminibus quatuor & triginta interirent, afflati & semimortui relinquerentur duo & viginti: jumentis etiam eodem turbine exstinctis aut debilitatis compluribus.

XI. Pyrrhus interea cum vacua & deserta Romanorum castra cepisset; victoria non segniter usus, promovit copias, vastandisque proximorum quorumque agris, ab amicitia Romanorum permultos populos averdit. Supervenere deinde focii Lucani Samnitesque, quibus leviter castigatis, *quod pugnatum non assuissent*, partem tamen spoliis dedit: eo ipso magnopere lætus & exsultans, *quod præter suas copias Tarentinis tantum auxiliis adjutus, Romanorum ingentem numerum fudisset*. Intento in victoriæ fructum Pyrrho, alia ex parte Lævinus curando faucios, colligendo dispersos, manum rursus haud contemnendam effecerat. & Senatus, quanquam multi culpam acceptæ eladis imputabant consuli, Fabriciusque dixerat, *non sibi Romanos ab Epirotis, sed Lævinum a Pyrrho victum videri*: supplementum ei mittendum censuit.

XII. Cum voce præconis edictum esset, *qui in occisorum locum patriæ navare operam vellent, uti nomina darent*; certatim dantibus, celeriter duarum legionum numerus expletus est. His copiis auctus consul, Pyrrhi vestigia sequendo, quibus poterat exercitum ejus incommodis vexabat: & cum occupandæ Capuæ consilia Regem agitare compelleret; festinanter exercitu ducto, prævenit eum, cunctis-

§ X. Liv. Epit. 13. Eutrop. Flor. 1, 18, 17. Zonar. Dio ap. Vales. Orof. Plutarch. § XI. Just. 18, 1. Zonar. Appian. ap. Eutrop. Liv.

que ad defensionem paratis, ab invadenda urbe deterruit. Pyrrhus Neapolim flexo itinere, atque ibi quoque spe sua frustratus, protinus ad ipsam Romam magnis itineribus Latina via contendit. Jam ab Anagnia & Hernicorum agro, Fregellis obiter expugnatis, Præneste pervenerat, intra vicinum ab Urbe lapidem; sed urbani magistratus simul atque de clade auditum fuerat, novis decretibus ex Senatusconsulto juniores armaverant; aliudque non invalidum auxilium populi Romani fortuna tempore necessario providerat. Consul enim alter Tib. Coruncanius meliore fortuna cum Etruscis congressus, universam gentem novis foederibus obstrinxerat, & ad tutelam patriæ revocante Senatu, nullo alio hoste distractus cum exercitu victore accurrebat.

XIII. Pyrrhus cum Etruscos ad arma retrahere frustra tentavisset, præter urbem suis præsiidiis tutam, duos consulares exercitus, alterum a fronte, alterum a tergo imminere cogitans, in Campaniam regressus est. Ubi Lævinum majoribus sibi copiis, quam ante cladem habuisset, occurrere videns, cum *Hydra Lernæa sibi negotium esse dixit, cujus præcisa capita paulo post, numero etiam aucto, renascerentur*. Quia tamen priori victoriæ confidebat, eduxit copias, & tanquam pugnaturus instruxit. quoque suorum simul alacritatem experiretur, simul perterrefaceret hostem, clamorem tollere milites, ac elephantos ad barritum ciendum incitari jussit. Redditus est a Romanis longe major atque terribilior clamor: unde de animis atrorumque conjectans, abstinendum sibi proelio in præsentia judicavit: & victimarum exta parum lata causatus, exercitum in castra, & inde, magna cum præda & captivorum agmine, Tarentum reduxit.

XIV. Romani, qui durissimo tempore de constantia sua nihil remiserant, sed de totius belli eventu semper amplas spes & orationes magnificas habuerant, præmia virtutis cum maxime celebranda rati, L. Æmilio Barbulæ ob res in con-

§ XII. Zonar. Appian. ap. Fulv. Urs. Flor. 1, 18. Plutarch.  
§ XIII. Eutrop. Flor. 1, 18, 18. Zonar.

fulatu gestas decreverunt triumphum : isque de Tarentinis, Samnitibus, & Sallentinis, qui inter auxilia Tarentinorum fuerant, a. d. VI. Idus Quintileis triumphavit. Sed P. Valerio consuli negotium datum, *ut Setinum in agrum abductis exercitus villi reliquitis, castra muniret, hiememque sub pellibus agere cogeret.* Per eadem tempora cum de captivis in Senatu agitatum esset, *redimere eos placeret?* ista sententia tenuit. credo præcipue movisse animos equitum casum, quos fortiter sustentata pugna donec elephantibus aberant, horum superventu consternati equi sine ulla fessorum culpa cædendos vinciendosque hostibus præbuerant. Missi sunt hujus negotii causa præcipue dignationis legati, P. Cornelius Dolabella, Senonum deleta gente nobilis, C. Fabricius Luscinus, Q. Æmilius Papus, qui biennio ante collegæ in consulatu fuerant. >

XV. Pyrrho a natura magnorum animorum indivisa comes inerat humanitas; sed hanc ambitione auxerat, errore pervulgato ministras imperii virtutes esse putans, cui uni intemperantissime deditus, huc rationes suas omnes referebat. Et quanquam audacia bellicæ artibus nemini sua ætate ducum postponendus esset; omnia tamen prius experiri solebat, quam armis rem permetteret: animosque hostium, ut quisque opportunus erat, metu, cupiditate, voluptate, misericordia, denique conditionum æquitate ac utilitate moliebatur. Igitur nuntiato Roma legatos venire, tot consulares ad majorem certe aliquam rem mitti suspicatus, pacis componendæ mentionem illaturos esse sperabat. Quo igitur & tutior, & honoratior accessus eorum foret, ad ipsos usque fines agri Tarentini Lyconem natione Molossium cum præsidio militum obviam: ipse vero cum ornato equitatu venientibus extra portam occurrit: deductosque perquam honori ve ac hospitaliter, rebus omnibus laute atque liberaliter habuit. Illi quæ ad moderationem animi pertinent præfati, *quanta fortis inconstantia, quam subitæ bellorum vi-*

§ XIV. Appian. Plut. Tabul. Capitol. Front. 4, 1. Dion. 1. 47. Fulv. Cic. in Brut. 34.

*ces essent, neque præsciri futura posse; mandata edunt: se ad recipiendos captivos suos venisse, sive certo in capita pretio redimi, sive cum Tarentinis aliisque permutari pateretur.*

XVI. Pyrrhus nihil magnæ rei sine consilio amicorum statuere consueverat: quo tum quoque convocato, Milo quidam suadebat, ut captivis retentis fortuna sua uteretur, neque bellum nisi perdomitis Romanis omitteret. Longe diversa Cineæ oratio fuit: qui, commemorata Senatus populique Romani constantia, quam sæpe extremis temporibus suis invictum ostendisset, subjecit: *Aliorum fortassis hostium aut mores oderimus, aut contemserimus arma: cum hac gente, o Rex, amicitiam tibi potius quam bellum habendum esse censeo, neque reddi modo captivos, sed etiam donari ex usu tuo fuerit: neque differendum arbitror, quin legatos cum muneribus Romam mittas, qui conditionibus æquis pacem conficiant.*

XVII. Hoc enim illud tempus esse arbitror, quo rem tibi necessariam, si quid judico, etiam cum dignitate facere possis. Nunc enim rebus adhuc prosperis de pace agens & facilius, quæ volueris, impetraveris; & nulla alia causa, quam animi solita magnitudine, pacem obtulisse videberis iis, quos integrum fuisset armis ad servitutem cogere. Et absit quidem omen, tuæque res, sicut cœperunt ire, pergant. Sed tamen homines sumus; & si fortuna verterit, neque tam facile porro negotium erit pacis, neque pari cum decore tractabitur. In hanc sententiam locutis quoque ceteris, & ipse Rex assensus, vocari legatos Romanos jubet. Qui ubi venerunt, hunc in modum egisse fertur: *Res equidem indigna est, quam facitis, Romani! Cum enim amicitia mecum ineunda rationem nullam habeatis, bello captos repetitis; ubi reddidero, iisdem illis adversus me usuri. Quod si igitur revocatis ad meliora & utrisque profutura mentibus, fœdus atque societatem mecum instituitis; vestros & cives universos, & socios, quos cepi, sine pretio recipite: sin vero vobis hostiles animi manent, neque ego pro sano me facturum arbitror, si odia vestra tot fortium virorum manibus instruam.*

& XV. Polyæn. Strateg. 6, 6. Zonar. Val. Max. 5, 1. Hist. miscel. l. Diac. 2, 16. Dio ap. Fulv. Dionys.

*Neque vero tanta mihi rei nummarie difficultas est, ut pecuniis Romanorum indigeam; quos decebat potius, si amici essemus, liberalitate mea locupletari. Simul non spernendi pretii munera legatis dari iussit; plura se & meliora alias durum professus.*

XVIII. Hæc in commune legatis omnibus præsentibus dicta actaque. Ceterum cum solo deinde C. Fabricio longior & accuratior sermo fuit: neque referre piget, quod apud idoneos auctores reperi. Cum itaque remotis arbitris colloquerentur, inter cetera regem ita dixisse postea vulgatum est: *Ego vero cum ceteros Romanos omnes amicos habere expeto; tum præsertim te, C. Fabrici, quem inter ceteros civili militarique virtute præstantissimum esse judico. unum deesse tibi indignor, quod re familiari angustiore utens, debitum magnis viris splendorem tueri minime potes. Sed hanc fortunæ injuriam ego diutius tibi molestam esse non patiar, daboque auri argentique facti & infesti eam copiam, qua ditissimorum quorumque census facile vincas. Hoc enim inprimis loco fortunæque meæ convenire persuasum habeo, eximiorum hominum, qui potius gloriæ quam pecuniæ accumulandæ studuerunt, gravem inopiam consolari: id quidem ego valde pulchrum opus esse reor: neque magnificentie regis vel monumentum illustrius usquam poni, vel augustius diis que gratius donarium suspendi posse. Quare non tam dedisse beneficium putabo, quam accepisse, si meis te copiis adjuvare siveris.*

XIX. Neque tamen id a te petiturus eram, si mihi gloriosæ largitio tantum, tibi vero parum decora fuisset: nunc autem, quia non ad proditionem aut indignum moribus tuis facinus ullum eris; quid est, cur hospitale munusculum, amicissimo animo oblatum, infesto & pertinaci velis aspernari? Ego enim aliud a te desidero nihil, nisi quod a viro optimo patriæque amantissimo fieri possit, immo debeat; ut Senatui a præstanti illa pervicacia ad acquietem & consilia mitiora transducas, quod res est docendo, neque bellum sine maximo vestro & damno & pe-

XVII. Dionys. ap. Fulv. Urs. Appian. ap. Fulv. Urs. Zonar.  
§ XVIII. Dionys. ap. Urs.

riculo geri; neque a me, qui Tarentinis auxilium pollicitus, primo etiam proelio victor discessi, integra fide atque dignitate deferi posse. Neque vero me delectat vobiscum dimicare, quos amicitia mea quam odio digniores arbitror: & multis interea negotiis obortis, quæ præsentiam meam desiderent, in regnum meum reverti mallet. In hoc fidem, quam postulabis, dabo; quod & tu de animo meo securus esse possis, & ceterorum dubitationes tollere, si qui forte negabunt Regibus tuto credi posse propter unius aut alterius vesaniam, qui nullo intellectu honesti, passis atque fœderibus, donec utilia viderentur, stantes, simul atque levitatis pretium apparuit, fidem quam occasionem negligere maluerunt. Pace vero confecta, nihil aut mihi jucundius, aut utilius utrisque fieri possit, quam si mecum in Epirum naviges, primo inter meos loco, & in bello legatus futurus, omnisque fortunæ meæ pariceps. Nam & ego possessionem nullam præfloreem esse puto, quam fortis & fidelis amici: & animo tuo Regiæ fortunæ apparatus, Regionumque negotiorum majestas congruit. Hæc ergo si in commune contulerimus, quæ maxima per homines censentur bona, vicissim alter alterum adjuvantes nullo negotio adipiscemur.

XX. Hic ubi finem dicendi Rex fecisset, post modicum intervallum Fabricius inquit: De virtute quidem, si quid ejus in me belli domive animadverti potuit, mihi supervacaneum est quidquam attingere; quando jam aliis de ea credidisti. neque etiam de paupertate necessum est exponere, quod exigui agelli zuguriolique dominus, non fanore, neque mancipiorum operis, sed laboribus hujus corporis alor. nam & ista referentibus aliis, existimo te accurate didicisse. Si vero me deteriore ob paupertatem conditione, quam Romanorum quemlibet, esse suspicaris; certe, sive ultro, sive alienam secutus opinionem ita conjecisti, mirifice falsus es. Mihi enim contemptis opibus virtutem & officium sectantem nullus unquam miseriæ sensus fuit; neque fortunæ meæ, vel in privatis negotiis, vel in publicis ingemui. quæ enim tandem causa convicium ei facerem? nisi forte crimini dabo, quod in ista paupertate mea, his omnibus, quæ cuilibet animo magno



*excelſeque ſola deſideranda videntur, non modo cum divitiis, ſed etiam præ illis, in patria perſuor.*

XXI. Honoribus enim, qui apud nos ampliffimi ſunt, fungor: bella graviffima rego: ſplendidiffimis adhibeor legationibus: religionum ſanctiffimarum curam gero: vocor in Senatum: de ſumma republica rogor ſententiam: laudant me multi imitanturque hilariter: neque minoris ſio, quam quilibet in civitate noſtra potentiſſimus: videorque ſpecimen & exemplum ad virtutem gloriamque capeſſendam eſſe ceteris; nihil in hæc omnia ſumtus de meo faciens, ſicuti neque aliorum quiſquam. Nam alibi quidem, ubi plerumque privatim opes magnæ, publice vix mediocres ſunt, magiſtratus ex re ſamiliari dignitatem ſplendoremque loci ſui ſiſtunt: noſtra civitas longe diverſis inſtitutis utitur; neque ſortunis privatorum ulla parte gravis eſt. Omnis iſte apparatus, quo noſtri cives, quotquot ad rerum magnarum adminiſtrationem deliguntur, magnifice inſtructi ſunt, præbetur publice, quæ res exæquat omnes, neque pauperrimo alicui quidquam patitur ad tuendum publicum aut ſuum decus deſſe, neque diſtiſſimo ſupereſſe. Quando igitur pauperrimus omnium, tamen locupietiffimo cuique nulla in re bona cedo; quid eſt, quod de fortuna queri debeam? an poſtulandum erat, ut me Regibus patrem ſuaderet, quibus ingentes auri cumulos licet ſecondere?

XXII. Sed hæc quidem ad publicam vitam: in privata vero tantum abeſt, ut mea mihi inopia ſit oneri aut incommodo; ut contra, quoties me cum divitiis iſtis compono, mea ſors incomparabiliter videatur beator: & ego me inter illos plane paucos numerem, quibus, quanti eſſe in vita poteſt, felicitas conrigerit: eoque nomine & mihi plurimum gratulor, & gratias ago paupertati meæ. Cum enim ſupervacua perſequi mihi inreptum & otioſum eſſe videatur; neceſſaria vero agellus recte coleri diſpenſantique ſuppeditet; neſcio quem in uſum de majoribus divitiis debeam eſſe ſollicitus, nam omnem mihi cibum ſames ſuaviſſimum efficit; omnem potum ſitis: ſomnum facilem & tranquilum labore paro: veſtis, ſi frigus arceat, mihi ſe probavit ſitis: in ſupelleſtili, ut quodque ad uſum, cui deſtinatur, in-

zime commodum atque parabile est, ita placet impensius. quare sic quoque sim inivius, si accussem fortunam, quod mihi non majores facultates subministraverit illa, quam natura mea desideret: quæ mihi neque cupiditatem ejus, quod nimium esset, ingenuit; neque profecto dexteritatem parandi.

XXIII. Quare cum ista paupertate mea, & aliis opulentissimis hominibus, & te quoque ipso me copiosiorum esse judico: nam ego tantum habeo, ut plus non desiderem; tu, nisi Epirum, & cetera quæ tenes possidens, inopem te esse crederes, in Italiam trajecisses? sed pulchram facultatem, beneficia hominibus dandi, præstat opulentia! ego per inopiam subvenire queo nemini! Hoc vero non magis me angit, quam quod aliis quoque rebus non supra modum instructus sum: quod neque scientiam præcellentem mihi Deus, neque vaticinandi artem tribuit, quibus prodesse indigentibus possem: neque alia itidem permulta. Eorum vero, quæ in me sunt, si & civitati & amicis copiam facio, & unde quemquam juvare ullo pacto possum, id commune omnibus esse patior; hoc quoque crimine hætenus me vacare posse existimo. Neque vero tibi quidem hæc parva aut contemtibilia vocare licet, qui præ te scias illa videri maxima, adeoque ingenti pecuniæ modo curare paratus es.

XXIV. Quod si vero ad sublevandas necessitates egentium omnino facultates magnæ optanda essent; atque hoc nomine pecuniarum possessio partem aliquam felicitatis faceret; uti vobis quidem regibus videtur: utra mihi via parandarum opum erat melior, ut a te nunc acciperem cum dedecore; an vero ut olim pararem, cum possem honestissimis rationibus? Nam mihi sane ditescendi opportunitates præclaras respublica bene gesta præbuit, cum alias sæpe; tum vero maxime ante hoc quadriennium, quando in Samnitas, Lucanos, Brutiosque consul cum exercitu missus, amplissimas regiones populabundus percucurri: præliis multis victor urbes opulentas vi cepi diritque: unde donatis largiter militibus, redditoque privatis, quod reipublicæ in usus belli mutuum dederant, res tamen superesset quadringentorum talen-

torum, quæ in ærarium publicum intuli. Postquam igitur justas & decoras ex manubiis opes, quæ in promptu erant, aspernatus sum; & exemplo Valerii Publicolæ multorumque aliorum, qui rem Romanam hunc in statum produxerunt, gloriam pecuniis anteposui: nunc a te munera capiam, contenta pulcherrima dîtescendi occasione, pudoris atque periculi plenam amplexus? & illam quidem opulentiam honestos justosque ad usus expendere liberrime & cum voluptate quadam potuissem: nunc vero ne hujus quidem boni ulla futura esset copia.

XXV. Creditæ enim verius quam donatæ pecuniæ censendæ sunt, quæ alieno beneficio obvenerunt, animoque ingenuo & erecto graves incumbunt, donec restitui queant: ut jam per hospitii, vel amicitie, vel benevolentie speciem datæ acceptæque fuerint. Jam vero, quid futurum censes, si vulgata fama (neque enim celari poterit) magistratus, qui morum apud nos præfecturam amplissima cum potestate exercent, quos Censores appellamus, pro jure suo, quo in civium vitas inquirere, & a patriis institutis discedentes multare consueverunt, me publice citatum causam captorum munerum dicere jusserint? Addunt plerique, a Pyrrho, virum virtutis tantæ quantivis bene emi certo, acrius continentiam ejus constantiamque tentatam esse; post alia magnifica promissa, etiam parte regni oblata: neque motum esse Romanum, nisi hactenus, ut se consilii Regii rationem expedire negaret. Si enim malum me virum iudicet, inquit, cur ambis? sin vero bonum; cur corrupis? Adjecisse deinde dicitur, etiam ipsi Pyrrho negotium hoc neque jucundum futurum, neque conducibile, si processisset. suam enim libertatem & amicis Regiis, & ipsi Regi gravem futuram: justitiam autem & abstinentiam si Epirotæ experti forent, relicto Rege ad ipsum transíturos.

XXVI. Quæ omnia, & quod deinceps adjecturus sum, variis ab auctoribus tradita, conquiri exponique non inconveniens nec inutile judicavi; quo virorum, quibus fulta res Romana per durissimos casus ad imperii gloriæque

§ XXIV. Dionys. § XXV. Eutrop. l. 2. Flor. 1, 18, 25. Aucl. de vir. il. c. 35. Zonar. Appian. ap. Fuiv. Ul.

incomparabilem magnitudinem pervenit, animi sensusque noscerentur : claroque sub exemplo facilius deprehenderetur, quibus moribus studere oporteat admirationi futuros homines, majoremque & meliorem transdituros posteris rempublicam, quam a majoribus ipsi acceperant. Igitur his ita dictis auditisque Regem in præsentia quidem quiescere acceperimus : postmodum vero vocari ad se Fabricium iussisse : parato ante ad perterrendum eum elephanto, qui a tergo colloquentium post aulæum adstans, magistris imperio repente diducto aulæo, super Fabricii caput demisit manum, horrendumque fridorem & barritum edidit. Sed vir ingens animi, cum sensim se convertisset, arridens, *Neque heri me aurum tuum pellexit*, inquit, *neque hodie perterrefecit bellua.*

XXVII. Deinde cum admotus cœnæ de Gracis sapientibus differentem audiret Cineam, quibus Epicuri secta placeret, eos voluptatem in arce bonorum ; reipublicæ curam inter præcipua felicitatis impedimenta ponere : similemque vitam agere Deos arbitrari ; nulla rerum humanarum cura, nullo, neque in improbos iræ, neque in bonos favoris affectu, soli otio voluptatique deditos ; exclamavisse Fabricium ferunt : *Dii faxint, isthac sapientia Pyrrho Samnitibusque cordi sit, donec bellum cum populo Romano gerent!* Hi temporum istorum mores fuerunt : hæc magnorum virorum certamina, non opibus & luxuria, sed virtute, consilio, patientia, patriæ caritate excellere. Nec enim subiti impetus, aut ad præsentem usum meditata simulationis istæ voces fuerunt ; sed perpetuo tenore vitæ verborum suorum fidem admirabiles potius nostris temporibus, quam imitabiles viri affirmarunt.

XXVIII. Idem ille Fabricius, cum ejus tota supellex argentea salino uno constaret, & patella, quæ tamen ipsa corneo pediculo sustineretur ; Samnitium legatis pecuniam & supellectilem splendidam dono afferentibus, planas manus ad aures, hinc ad oculos, nares, os, gulam, deinde ad anum usque ventrem deducens, *donec his*, inquit, *inu-*

§ XXVI. Plut. in Pyrrh. c. 43 sq. § XXVII. Cic. in Cat. c. 73. Plut. Val. Max. 4, 3, 6.

*peritare potero, nihil deerit: vos autem pecuniam ad eos, qui hac indigent, reportate.* Denique vitam universam sic exegit, ut in hereditate ejus non esset, unde filiarum dos expediretur: gloriosa paupertate, cum ex ærario publico erogata pecunia Senaturn puderet indotatas pati virgines, quas patrem non puduerat ita relinquere. Sed & ceteri Senatus principes eadem ferme virtute tolerantiaque tum agebant. Ex quibus Q. Fabium Maximum, qui toties in summis imperiis fuerat, qui Censura gestâ noluerat iterum Censor fieri, negans, *ex usu Reipublicæ videri, ut iidem sapius Censores crearentur*; simili & paupertatis & amoris publici testimonio populus Romanus affecit. mortuo enim tantum congestis æris, ut inde filius Q. Gurgès & viscérationem & epulum publice daret.

XXIX. Curius ab eadem altitudine animi Sabinorum munera, quemadmodum Fabricius Samnitica, sprevit. Æmilius Papus in plerisque magistratibus collega Fabricii, Tib. item Coruncanius, aliique præclari viri, ex similitudine morum amicissime inter se conjunctissimeque vixerunt: ut vere mihi temporum illorum speciem amplexus animo videatur poeta, qui *moribus virisque antiquis rem Romanam stetit* prædicavit. His igitur animadversis expensisque rebus, majore componendi cum hac gente belli desiderio Pyrrhus inflammatus, ducentos ex captivis protinus sine pretio restituit: ceteris, si qui ad instantia Saturnalia Romam ad visendos suos proficisci cuperent, ejus rei potestatem fecit; unius Fabricii secutus fidem, qui *reversuros ex ællis se-riis, nisi pax interea convenisset*, sponponderat. Eaque tum & gravitas Senatus, & singulorum fides fuit, ut ad diem a Patribus præstitutam universi Pyrrho se restituerent; postquam obfirmatos suorum animos impellere nequidquam tendissent.

§ XXVIII. Val. Max. 4, 4, 3 & 10. Hygin. ap. Agell. 1, 14. Auct. de Vir. ill. § XXIX. Cic. Leg. Enn. ap. Cic. de Reip. l. 5. Aug. de civ. Dei 2, 21. Just. 18, 1. Plut. in Pyrrh. c. 44. Appian. ap. Urf.

XXX. Rex enim callidus, hunc temporum articulum sibi tenendum arbitratus, dum aspectu carissimorum pignorum mollitos, & cupidine isthæc retinendi incensos animos, ad belli odia deponenda promptiores haberet; legationem mittere Romam statuit, ut iis conditionibus, quas Fabricio præsentī exposuerat, pacis & amicitiae foedera conjungerentur. Petebat autem, *ut iisdem foederibus Tarentini comprehenderentur: ceteri Græcorum Italiam incolentium, liberi, & suis legibus, agerent: Samnitibus, Apulis, Lucanis, Brutiis, quæ erepta a Romano forent, redderentur: Romanæ captivos a Pyrrho sine pretio reciperent.* Erat apud Pyrrhum ea tempestate Cineas, cujus supra quoque facta est mentio; vir cum civilium rerum apprime gnarus, tum animo propositoque honestus: & qui naturæ proclivem indolem eruditione usuque ad efficacem facundiam exercuisset. Hunc eas ob artes carissimum Rex habebat: crebroque prædica-  
bat, *plurium se urbium imperium per eloquentiam Cineæ, quam armis suis adeptum esse.*

XXXI. Romam iste cum legatus venisset; callido consilio moras nectens, priusquam Senatum adiret, munera passim per illustrium domos Pyrrhi nomine misit. Introductus deinde in curiam, cum *Regis virtutem & propensum in Romanos animum multis extollens, de conditionum, quas afferret, æquitate differuisset, magna pars Senatus mota est, ut admittendas esse dubitaret.* Quippe super cetera, *si socios suos oppugnare desinerent, tanta auxilia pollicebatur, ut iis haud difficulter imperium ceteræ Italiæ possent acquirere.* Sed quoniam ob magnitudinem rei, sollicitis patribus, multos in dies extracta deliberatio, pacis futuræ suspensionem rumoreque fecerat; Appius Claudius, ob senectam & cæcitatem abstinere curia olim solitus, confestim in Senatum se deferri lætica iussit; ubi conspectum protinus exceperunt filii generique, honorisque & officii causa circumfusi deduxerunt ad locum dignitati ejus congruentem.

§ XXX. Flor. 1, 18, 14. Just. 18, 2. Appian. Plut. in Pyrrh. c. 27. § XXXI. Zonar. Plut. c. 39. Cic. Phil. 1, 5.

XXXII. Ibi, cum ipsius rei novitate, tum reverentia viri silentibus omnibus, expectantibusque cujus rei causa post longi temporis defuetudinem Senatum ingressus esset; ab incommodo valetudinis exorsus, *sibi quidem hactenus molestam fuisse cæcitatem dixit, nunc autem non modo illa delectari, ne quæ fierent, videret, sed etiam ægre ferre, quod aures nondum obscuruissent, ne tam sæda & Romano nomine indigna audire cogeretur. Quo enim vobis mentes illæ cesserunt? quo reciderunt spiritus? Certe præ vobis ferre solebatis, cum Alexandri Macedonis gloriam, ut invicti Regis, celebrari audiretis; non tam virtuti ejus, quam felicitati, famam istam impu-  
tandam esse: nam si Romana in bella fortuna ipsum impulisset, alium longe eventum futurum fuisse, aliamque de eo apud homines opinionem. At nunc quantum ab ista vestra magnanimitate defeceritis, respicite. Macedonibus superiores vos futuros confidebatis: at nunc Molossos & Chaonas perpetuam Macedonum prædam metuitis.*

XXXIII. *Alexandrum contemnebatis: nunc expavescitis Pyrrhum, ne ipsius quidem Alexandri, sed satellitis ejus, satellitem. qui fugiens potius veteres hostes, quam quærens novos, in Italiam trajecit: quibus copiis ne minimam quidem Macedonia partem retinere potuit; iisdem, si diis placet, imperium Romanis quoque paraturus. Hunc igitur nisi grandi infortunio mactatum ejicimus, certum habeamus, alios quoslibet merito nostri contemtu, tanquam ad paratam prædam, ita in Italiam cupide venturos esse. quid enim aliud de nobis quam de hominibus ignavissimis judicari poterit; si Pyrrhus in amicitiam receptus, etiam præmium referat illatæ nobis ignominia, quod ejus opera factum sit, ut Tarentinis atque Samnitibus ludibrium Romani debeamus. Hic fere sensus fuit orationis, quæ ab ipso statim Appio est edita: qua omnium adeo sunt inflammati animi, ut severissimæ sententiæ auctorem secuti, consensu decernerent, bellum prosequendum esse; Cincamque eodem die Urbe excedere, Pyrrhoque renuntiare, juberent: neque recipi*

*cum in Urbem* (nam & hoc petatum fuerat) *neque priusquam Italiam omiffet, de amicitia & societate agi poffe.*

XXXIV. Paris deinde triftitiæ decretum ex ejuſdem Appii ſententia de captivis factum eſt, eos *neque adverſus Pyrrhum duci, neque adeo conjunctim uſquam haberi Senatui placere; ſed alios alia in præſidia mitti, mutata ignominia ergo militia: ut qui equo meruiſſent, peditum ſtipendia facerent: qui pedites legionarii fuiſſent, ad levem armaturam tranſcriberentur: priores ordines recuperaret nemo, niſi bina hoſtium ſpolia retuliſſet.* Ajunt, legatis cum reſponſo tam atroci re-verſis, miraculo Romanæ conſtantiaæ attonitum Regem, *qualis Urbs ipſa, qualiſque Senatus viſus eſſet,* interrogalle: reſponſumque tuliffe a Cineæ, *Urbem templum ſibi viſam, Senatum vero Regum conſeſſum eſſe.* Poſt hæc demum geſta Fabricium ad Regem legatum veniſſe quidam putant: ſed, præter aliorum auctorum teſtimonia, rerum ipſarum recte animadverſarum ferie erroris haud difficile convincuntur. Pace deſperata, converſi ad bellum animi, ac intenta cura facti utrinque apparatus hiemem ſatis negotioſam habuerunt. x

XXXV. Hæc fuiſſe tempora puto, quibus ferunt Pyrrhum, quo naufragiorum caſus vitarentur, faciliuſque Itali ac Epirotæ ad auxilia mutua commeare poſſent, ab Hydrunte, qua longiſſime in pelagus procurrat Italia, ad Apolloniam ex adverſo ſitum oppidum pontes jacere cogitaviſſe, ſpatio quinquaginta millium: tanto enim intervallo circum eos locos Græciæ Italiæque litora dirimuntur! Idem poſtea molitus eſſe M. Terentius Varro dicitur; cum piratico bello Cn. Magni legatus Siculum Joniumque mare claſſibus obſervaret. Inter hæc Ti. Coruncanius conſul, de Vulſinienſibus & Vulciantibus Etruſcorum populis, a. d. Kal. Februarias triumphavit. Inſignis eo anno Cenſura fuit, tum primum a plebejæ ſtirpis cenſore luſtro condi-

§ XXXIII. Cic. Cat. 6. & Brut. c. 16. Zonar. Liv. Epit. 13. l. 2. § 36. de O. J. § XXXIV. Eutrop. 1. 2. l. 1 § 5 de poſtui. Zonar. Val. Max. 2, 7, 15. Front. 4, 1. Plut. Juſt. 18, 2. Flor. 1, 18, 20. Appian.



to. Censa referuntur civium capita ducenta septuaginta octo millia, ducenta, viginti duo. Principem Senatus per ea tempora Q. Fabium Maximum legi consuevisse constat. hujus filium cognomento Gurgitem censorem tum fuisse conjectura colligitur: Cn. Domitii certum nomen & quia lustrum is condidit, jure plebis amplificato nobilitatum est.

XXXVI. Vere primo Pyrrhus contractis fociorum copiis in Apuliam movit: multaque ibi oppida partim pugnando, partim conditionibus cepit. Adversus quem novi consules P. Sulpicius Saverrio, P. Decius Mus, cum duobus consularibus exercitibus profecti, castra castris opposuerunt prope Asculum Apuliæ urbem, cognominem ei, quæ est in Picentibus. Non erat dubium, quin collatis signis depugnandum foret: ceterum ne per dies aliquam multos hoc fieret, præter torrentem profundum, qui diversos exercitus interfluebat, etiam mutuo metu cunctabantur. Romanos prioris fortuna prælii, & victor Pyrrhus terrebat: Epirotis formidabilis erat Romanorum pervicacia, & alterius consulis fatale hostilibus legionibus nomen. P. enim Decium, patris avique exemplo sua morte victoriam suorum redempturum esse fama vulgaverat: præliorumque, quibus illi ceciderant, eventus, terribiles omnibus Decianæ devotionis minas effecerat.

XXXVII. Eam rem Pyrrhus haudquaquam negligendam ratus, convocatis militibus accurate docuit, *arbitria præliorum penes Tellurem deam, aut inferos, qui carmine illo sollicitarentur, esse non posse: neque tam iniquos credi debere deos, ut in unius hominis vesani gratiam fata exercituum mutent donentve: non præstigiis & superstitionibus, sed pugnando victorias parari: vel ipsis Romanis testibus, qui non sacrificulorum & vatium agmen, sed armatas militum acies hostibus consueverint opponere. Quia tamen ignari rerum plerumque superstitionum inanium ludibriis, quam veris timendi causis, acrius percellantur; hunc quoque metum præventi posse ostendit exposito*

§ XXXV. Zonar. Plin. Appian. in Mithrid. Tab. Capitol. Epit. Liv. 13. Plin. Panvin. in Fastis. § XXXVI. Zonar. Eutrop.

ornatu, quo priores Decii se devovissent: monitisque militibus, *si quis similibus insignibus noscendus occurrisset, ab eo abstinerent vel, vivumque comprehenderent.* sed ipsi quoque Decio nuntiandum curavit, *desineret ineptire inter armatos: neque enim consilium istud successfulurum esse: & si vivus venisset in manus, forte graviora passurum, quam voluisset.*

XXXVIII. Responsum a consulibus est: *se armis satis confidere, neque opus habere tantæ desperationis auxilio. id quo magis scire posset, optionem se dare, ipse transire flumen, (quod inter exercitus medium fuisse diximus) an in sua ripa Romanos exspectare mallet: nam aut reduclis copiis transitum regi tutum relicturos esse; aut, eo recedente, transmissuros: quo integro robore congressi, nulla alia in re, quam suis viribus animisque, spem victoriæ reposuisse demonstrarent.* Pudit Pyrrhum timoris aut dubitationis signum ullum edere: quare posteriore accepta conditione transeundi fluminis potestatem hostibus fecit. Levior jam sua sponte belluarum terror erat, ipsa consuetudine videndi: manusque earum facillime amputari posse, pugnae prioris experimento constabat; qua C. Minucius quartæ legionis primus hastatus uno gladii ictu proboscidem elephanti præciderat. Sed tum alia quoque præsidia excogitaverant tutioris audaciæ. Equi ferreis obducti laminis currum trahebant, & ipsum contis ferro præfixis horrentem: in curru erant collocati milites, qui belluas irruentes missilibus aut igne jacto averterent.

XXXIX. Cum hoc apparatu transgressis flumen legionibus, Pyrrhus ex diverso exercitum instruxit, pro usu, quem iis in rebus maximum, cum singulari quadam ingenii sagacitate, supra ceteros ejus ætatis imperatores excellentem habere credebatur. Animadverso igitur loci genio, qui propter asperitatem soli & enata passim virgulta non nisi pedestrem aciem pateretur, equitatum elephantosque locavit in subsidiis: dextrum cornu suis militibus & Samnitium auxiliaribus copiis firmavit; Bruttios, Luca-

§ XXXVII. Liv. 8, 9. Zonar. § XXXVIII. Plin. 8, 7. Flor. 1, 18. Oros. 4, 1.

nos, Sallentinos, esse iussit in sinistro: Tarentinos, quorum virtuti minus credebat, in mediam aciem recepit. Consulum acies legonarios habebat milites, auxiliis levis armaturæ aptissime intermixtis: parique ingenio & temperamento subsidiorum ordines distinxerant. Equitatus in cornua diffusus, neque impedimento futurus erat pedestri prælio, & si quis casus agendæ rei viam aperuisset, præsto erat. Inter exercitus non animis tantum, sed etiam numero pares (quadraginta utrinque millia fuisse constat) haud segenius, quam debuit, certatum est. ancipiti adhuc victoria prælium nox diremit.

XL. Postera luce Pyrrhus, cum impeditiora loca præstidiis præcepisset, in campum paulo æquiores Romanos descendere coegit. ibi elephantorum aliquis usus fuit: alia parte aciei, qua currus adversum eos parati constiterant, subito inducti, equos hostium, sicuti priore prælio factum fuerat, perterritos averterunt in fugam: peditibus nihil magnopere nocuerunt. Valde diversa istius pugnae fama est. *Secundum Romanos eventum fuisse*, quidam auctores sunt, *etiam casu adjuvante victoriam: cum adversus Apulos impedimenta diripientes, missæ Regis imperio cohortes, ceteris copiis fugientium speciem discessu suo præbuisent, eoque metu & errore facta apud Regios fuga esset.* Quin & cælorum ingens numerus exprimitur: *viginti millia de Pyrrhi exercitu; victorum ad millia quinque desiderata. Regem ipsum brachio pili jactu transmissio graviter vulneratum, cum fugientes retinere nequivisset, postremum fere omnium a satellitibus suis ex acie relatum: signa capta ex hoste tria & quinquaginta, Romana vero undecim amissa esse. Fabricium quoque, legatum alterius consulis, vulnus accepisse.*

XLI. Ex diverso, *parem hujus atque superioris prælii fortunam fuisse*, alii tradiderunt: & *vicinia castrorum defensos Romanos minus quidem sensisse detrimenti; sed tamen confusa*

§ XXXIX. Veget. de re mil. 3, 24. Zonar. Ammian. l. 24. Liv. 35, 14. Plut. Front. 2, 3. § XL. Plut. Zonar. Front. Eutrop. Flor. 1, 18. Oros. 4, 1. Just. 18, 1.

*fuga discessisse, sic quoque sex millibus amissis : de exercitu Pyrrhi tria millia quingentos & quinque cecidisse, idque in commentarios Regios relatum esse, Hieronymus scribit. Atque hæc tanta non varietas modo, sed etiam pugna scriptorum me valde movet, ut iis potius credendum esse judicem, qui dubio eventu pugnatum esse tradiderunt. solet enim, quoties pari fere damno discessum est, utraque pars sibi asserere victoriæ famam : quam deinceps aliorum negligentia, aliorum improbitas temere committit litteris : pessimo facinore, magnaque cum infamia eorum, qui pro veris atque compertis, inani rumore vulgata, aut affectu serviliter corrupta, posteritati prodiderunt.*

XLII. Quare propior vero videtur eorum annalium narratio, qui, *semel tantum ad Asculum pugnatum esse, referunt : & post acerrimam contentionem ac multas utrinque cædes, Sole jam occaso, vulnus Regis & direptorum impedimentorum casum, dirimendæ pugnae locum, licet ægre, fecisse. Tum receptui signum esse datum in utroque exercitu, cum jam utrinque millia circiter quindecim occubuisissent. Atque hoc fuisse tempus, quo Pyrrhus cuidam quasi de victoria gratulanti responderit : si de novo sic vincendi sunt Romani ; periiimus. Affirmant etiam hanc opinionem, quæ secuta sunt. Nam & Pyrrhus Tarentum concessit : & consules hostem non infecuti, copias in hibernis per Apuliæ oppida distribuerunt, cum anni tempus, & ratio belli, potius victoriæ tam illustrem prosequi, alterum facile passum fuisset, altera etiam omnino coegisset. Accedit, quod neque triumphatum ab his consulibus reperio, sed & P. Decium consulem eo prælio se devovisse, seque post patrem & avum pari genere mortis sublato, e continenti genere tertiam victimam reipublicæ præbuisse, multi putant : quod historiis omnibus silentibus ne referendum quidem, nedum refellendum putavissem : nisi magnus auctor M. Tullius Cicero in philosophicis quidem libris, sed loco non uno, posuisset.*

§ XLI. Liv. Epit. 13. Plut. § XLII. Zonar. Cic. Tusc. quæst. 1, 37. & de fin. 2, 19.

XLIII. Pugna ad Asculum, quocunque eventu certata, reliquum anni quietum a bellicis expeditionibus habuit : sed consultationibus & apparatusum cura tempus omne consumtum est. Pyrrhus cum veterum copiarum magnam partem, ducumque & amicorum plerosque perdidisset, in Epirum misit, cum mandatis, ut veniente vere milites & pecuniæ sibi mitterentur. Sed priusquam classis ea instrui posset, novæ spes exortæ consilium Regis mutaverunt. Macedoniam olim Demetrio ademptam Pyrrhus tenuerat, deinde Lyfimachi vi extortam amiserat; hanc iterum novæ occasione aperuisse videbatur Ptolemæi Cerauni casus, qui a Gallis interfectus, dum bellum in Italia gerit Pyrrhus, uti turbatum regni statum, ita vacuum possessionem reliquerat. Ea ratio suasit, ne copiis militaribus Epirus nudaretur : simul ne pateret injuriis Gallorum, vicinam adhuc Macedoniam urentium. Neque tamen eo tum accessit, in Siciliam vocantibus alijs causis, ut postea trademus.

XLIV. Hieme inter has curas circumacta, novi consules ad exercitum venerunt C. Fabricius Luscinus, Q. Æmilius Papus : qui alium quoque consulatum una gesserunt. Hoc audito, Pyrrhus etiam contra eduxit copias, & observare consilia hostium instituit. Cum ita castra utrique locis haud valde distantibus haberent, res evenit ad memoriam celebris, & a plerisque non ita magno dissensu tradita. Timochares quidam Ambraciensis, in amicitia Regis honestum gradum obtinens, ad C. Fabricium consulem fortim accessit, regem, si præmium ejus rei dignum daretur, veneno tollere pollicitus. Id vero se per filios suos facile consecuturum autumabat, quod inter pocillatores Regios illi haberentur. Fabricius, minime delectatus prodicione, rem tamen perscripsit ad Senatum. Senatus legatos ad Pyrrhum misit, Timocharis quidem, qui quomodo-  
cunque Romanis prodesse statuisset, insidias non indicaturos; sed monituros in universum, *uti Rex ageret circumspicius, videretque, quorum hominum, quamque fidelium, ministe-*

riis uteretur. Hæc ita apud Valerium Antiatem leguntur.

XLV. At Claudius Quadrigarius pro Timochare *Niciam* beneficii istius promissorem prodit: neque legatos a Senatu missos, sed a consulibus; litteris quoque consulum recensitis, quibus detecto Niciæ consilio, negant, se dolis aut pecunia pugnatorios; sed virtute & armis: saluumque ab insidiis Regem optare, ajunt, quem suæ victoriæ suorumque triumphorum splendidam sperarent materiam fore. Sunt, qui medicum Regis Fabricium eo de negotio coram aut litteris adiisse, consilisque indicio pœnas dedisse Regi, tradiderint, suspendio necatum. Sed ut hæc dubitationem habere possent, certum est errare, qui medicum a Curio ad Regem remissum esse scripserunt. Ajunt, Pyrrhum hoc tantæ virtutis experimento stupentem exclamasse: *Hic est ille Fabricius, qui difficilius ab itinere justis & honestis, quam a cursu suo Sol averti possit!* statim certe, ne vinci beneficio videretur, captivos, quos habebat, omnes Romanis restituit; Cineamque denuo misit, ad pacem & amicitiam impetrandam.

XLVI. Minime decorum visum est, vel donum ab hoste accipere, vel ob lucrum potius, quam amore virtutis, a facinore abhorruisse videri: gratis igitur ne acciperentur captivi, totidem pro his alii Tarentinorum Samnitiumque missi sunt. Hanc publicam abstinentiam conspectiore mox fama privatorum est secuta gravitas; cum Pyrrhi munera (multa enim & pretiosa utrique sexui Cineas attulerat) non a viris modo omnibus, sed etiam a mulieribus, repudiata sunt. quo quidem tempore, cum aspernantibus, quibus primum oblata fuerant, ad alios aliosque deferrentur; nemo vir mulierve tam aut tenuis aut cupidus inveniri potuit, ut recipiendis Regiis muneribus ostium domus suæ patere vellet. Legatis deinde prius responsum redditum: *donec Italia Pyrrhus excessisset, hostem eum populo Romano fore.* Perplexum hisce Regem, & neque bellum læto animo prosequentem, neque cupientem cum aliqua dignitatis jactura

§ XLIV. Agell. Cic. de off. 3, 22. Val. Max. 6, 5, 1. § XLV. Ammian. 50, 5. Tacit. 2, 88. Plut. Flor. 1, 18. Eutrop.

discedere, extricare visa est Sicilicnsis expeditio, quam post longam & ancipitem deliberationem, tandem statuit fuscipere. Sic enim & Romanum bellum honeste declinari posse sperabat: & imperium insulae locupletissimae occupari: simul vindictam de Carthaginiensibus, ut prior ab ipsis laceffit, sumere cupiebat.

XLVII. Nam illi, suspecto Regis consilio, paulo ante Magonem ducem cum centum viginti navium classe miserant, *adversus externum hostem externis etiam auxiliis populum Romanum adjuvandum esse*, dicittantes: & quanquam illorum opera Romani non sunt usi, Senatu respondente, *se consuevisse talia bella suspicere, quæ suo milite geri possent*; foedus tamen inter utrumque populum quarto renovatum est. Prioribus capitibus additum, *ut sive Romanus populus, sive Pœnus, cum Pyrrho foedus faceret, nominatim exciperetur, ut his populis invicem auxiliari liceret, uter eorum bello peteretur: utque quoties utriusque eorum auxilio opus esset, naves & Carthaginiensibus præberentur: stipendia suis quisque daret: auxilia Punica Romanos mari juvarent; exire navibus invitæ ne cogerentur.*

XLVIII. Quo confecto, per speciem pacis conciliandæ Pyrrhum adierat Mage, speculaturus consilia Regis, quem in Siciliam acciri Carthaginienses audierant; classemque Romanis obtulerant, non tam illorum caritate curaue, quam ut Pyrrhus Italico bello implicatus, res Pœnorum in insula magnis successibus efflorescentes non everteret. Tum quoque fretum, qua in Siciliam trajectus est, magno numero navium observabant, Rhegii quidem obsidendi studium præferentes, sed verius, ut Pyrrho transmittere cupientiam intercluderent. His igitur de causis ad Siciliensia negotia adjecit animum: spes ipsi magnas faciente cum rerum ipsarum statu, tum etiam legationibus Siculorum, quæ aliæ super alias ex insula venientes, *omnium votis expecteum* affirmabant, *tanquam unicum levamen malorum, quibus*

§ XLVI. Front. 4, 4, 1. Appian. Liv. 34, 4. Just. Val. Max. 4, 3, 14. Zonar. § XLVII. Liv. Epit. 13. Polyb. 3, 25.

*miserrima terrarum nunquam acerbius conflata esse videbatur.*

XLIX. Nam post Agathoclis miserabilem magis quam indignum exitum, Mœno quidam, Ægesta Siciliae urbe oriundus, qui & venenum Regi dederat, affectata tyrannide, a Syracusanis Hiceta prætore pulsus, ad Carthaginiensium opes se contulerat. ita bellum gravius, & Syracusanis adversum fuit, per quod tamen privatim opes Hicetae creverunt: qui postea versis in Agrigentinum Phintiam armis, inquietam diu insulam tenuit; donec Thœnionis cuiusdam audacia, principatu, quem nonum jam annum obtinebat, pelleretur. Thœnioni dominationem retinere nitenti exortus est adversarius ex Syracusana nobilitate Sosistratus: diuque certatum inter hos armis est; insulam, quæ Syracusanæ urbis pars est (ipsi *Nasum* vocant) obtinente Thœnione, cum in cetera urbe Sosistratus tyrannidem ageret. Postremo cum utrinque nihil ex his discordiis præter communem interitum imminere cernerent; vocandum esse Pyrrhum consensu decreverunt: qui gener Agathoclis, filio ex Lanassa suscepto, successioni proximus, animoque & viribus ad constituendas res Siciliae suffecturus habebatur.

L. His accedebant Agrigentini Leontinique principes, qui & ipsi suarum urbium, totiusque adeo insulae imperium offerentes, una voce rogabant, *ut quamprimum in Siciliam trajiceret, fessis rebus, & laboranti sub barbarorum armis libertati, præsentia sua succursurus.* Carthaginienses enim, Syracusanorum agris vastatis, ipsam quoque urbem classe centum navium, & pedestri quinquaginta millium exercitu terra marique clauferant. Igitur Pyrrhus non ultra differendum ratus, Cineam, cujus ingenio fideque plurimum uti consueverat, præmittit, cum Siculis civitatibus conditiones legesque foederum & amicitiae compositurum. Ipse socios, discessum ægre ferentes, consolatus, *si a Romanis premerentur, e vicina insula in tempore affuturum esse, novorum etiam sociorum accessione instructiorem*, spondit. Cum

§ XLVIII. Justin. Diod. Ecl. ex lib. 21 & 22. § XLIX. Diod. Liv. 25, 24. Appian.



autem præsidium in urbe Tarentina relicturus esset, ægre passi Tarentini, *ut sibi vel præstaret promissum auxilium iis conditionibus, quibus venisset; aut saltem urbem suam relinqueret liberam*, postulaverunt. Neutra res impetrari potuit; nihil æqui respondente Pyrrho, sed iubente *suum tempus expectari*.

LI. Has inter curas Epirotæ Regis, consulibus bellum adversus ceteros hostes facilius fuit. Res itaque contra Etruscos, Lucanos, Bruttios, & Samnites prospere gestas hoc tempore lego. Cum Etruscis minus fuisse certaminum apparet, quod ex eo bello triumphatum non est: neque cum universa gente, sed cum una aut altera civitate, pugnatum esse puto, quæ a Samnitibus discessu Pyrrhi se nudari sentientibus, acrius sollicitatæ, posita nuper adversus Romanos arma resumserint. Ceteris in populis, uti major aliquanto belli moles; ita victoria illustrior fuit. C. Fabricius consul, profecto, ut conjectura est, in Etruscum bellum collega, quod Epirotis cessantibus unus consularis exercitus sufficere videretur; Lucanos, Bruttios, Tarentinos, Samnitesque cecidit: civitates aliquot, in quibus & Heraclæam, adstrinxit fœderibus: deque his populis omnibus ante diem Idus Decembres triumphavit.

LII. Comitiiis deinde peractis, consules in annum sequentem designati sunt P. Cornelius Rufinus iterum, C. Junius Brutus iterum. Cum Rufino nobiles etiam alii petierant; sed hic ut fieret, effecit Fabricii favor: qui tempora Reipublicæ habens in consilio, patriæ salutem privatis inimiciis anteponebat. Nam ex dissimilitudine morum similtas inter hos fuerat, cum Fabricius egregie firmus adversum pecuniam, una communis boni cura duceretur: Rufinus opum cupidior, multa privati quæstus studio consuleret ageretque. Verumtamen cum cetera industrier & bonus imperator esset, competitoribus haudquaquam pari armorum peritia & usu præditis Fabricius

§ L. Plut. Diod. Appian. § LI. Liv. Epit. 13. Eutrop. l. 2. Cic. pro Balbo c. 22. Tab. Capitol.

præferendum esse judicaverat. Ferunt, cum ei gratias deinde Rufinus ageret, *quod se homo inimicus consulem fecisset, bello præsertim magno & gravi*, respondisse: *non esse mirandum, si compilari, quam venire, maluerit*. Magna enim bellorum moles in Italia supererat; & Pyrrho in Sicilia (erat enim jam transgressus) omnia sibi prona reperiente, haud abs re metuebatur, ne paulo post auctis accessione nobilis insulæ viribus, ad bellum Romanum gravior hostis reverteretur.

§ LII. Quintil. 12, 1. Dio ap. Vales. Cic. de orat. 2, 66. Agell. 4, 8.

JOANNIS FREINSHEMII  
SUPPLEMENTORUM  
LIVIANORUM

LIBER IV.

IN LOCUM LIB. XIV LIVIANI.

EPI T O M E

LIBRI DECIMI QUARTI.

*Pyrrhus in Siciliam trajecit. Cum inter alia prodigia fulmine dejectum esset in Capitolio Jovis signum, caput ejus per aruspices inventum est. Curius Dentatus, cum delectum haberet, ejus, qui citatus non responderat, bona primus vendidit. Pyrrhum iterum ex Sicilia in Italiam reversum vicit, & Italia expulit. Fabricius censor P. Cornelium Rufinum consularem senatu movit, quod is decem pondo argenti fasti haberet. Lustrum a censoribus condito, censa sunt capita civium ducenta septuaginta unum millia, ducenta viginti quatuor. Cum Ptolemæo Ægypti rege societas juncta est. Sextilia virgo Vestalis, damnata incesti, viva defossa est. Coloniae deductæ sunt Posidonia & Cossa. Carthaginensium classis auxilio Tarentinis venit: quo facto ab iis fœdus violatum est. Res præterea contra Lucanos, Samnites, & Bruttios feliciter gestas, & Pyrrhi regis mortem continet.*

I. **D**UM hæc in Italia geruntur, Pyrrhus exercitu & elephantis in naves impositis, ex Tarentino portu in Sici-

liam trajecit : postquam biennium, & menses præterea quatuor, in Italia fuisset. Deductus a Threnione, qui cum navibus occurrerat, maximaque Siculorum alacritate exceptus est, oppida sua, copias, pecunias, naves, certatim tradentium. Ideoque Græcarum urbium omnium imperio brevi potitus, etiam Punicam ditionem universam armis obtinuit : una excepta urbe Lilybætana, quam opportunitate situs adjuti Carthaginienses, nequidquam oppugnante Pyrrho, retinebant. Unde non absque causa spes ingentes animo complexus, relictis maximo filiorum patriis opibus, ex duobus reliquis, Regem alterum Italiæ, alterum Sici-liæ constituere agitabat.

II. Erat omnino Regis istius ea tempestate magna fama, magnæque virtutes : & Siculi per annos sane multos externa simul ac civilia bella, & nocentius utrisque malum tyrannidem passi, vel mediocrem aliquem Principem grantibus animis laturi videbantur. Sed tamen ipse paulo post ad exigendas ab invitis pecunias, & potentiorum cædes versus, odium immane concitavit : etiam accedentibus cupiditatibus & arrogantia ministrorum, quorum ei vitia non minus ubivis, quam sua nocuerunt. Adeo post primam illam & præcipuam curam, ut ipsi quam optimi sint, nulla aut dignior aut salubrior esse Regibus sollicitudo potest, quam ut amicos ex virtute deligant : quando inter privatos ob suam quisque culpam exosus est ; principibus etiam aliena peccata imputantur. Sed hæc postea secuta sunt. Tum vero calentibus adhuc studiis, primum a Taurominitanorum principe Tyndarione ( nam ea parte insulæ primum appulerat ) mox a Catanensæ populo maximis honoribus acceptus cultusque, cum pedestri exercitu Syracusas versus processit. Classem haud procul litoribus circumduci jussit, paratam instructamque : nec enim citra prælii discrimen aditum ad Syracusanam urbem daturæ Carthaginiensium naves videbantur.

§ I. Liv. Epit. 14. Appian. Diod. Ecl. Just. 23, 2. § II. Plut. Dionys.

III. Sed evenerat, ut paulo ante hoc tempus triginta na-  
ves Punicæ alios ob ufus a claffe difcederent; quæ quia non-  
dum reverterant, cum reliquis aleam belli tentare Pœnorum  
imperator recufabat. Igitur nemine prohibente ingreffus,  
Thœnionē & Sofiftrato tradentibus, pecuniam publicam, na-  
ves tectas centum viginti, apertas viginti, tela, machinas,  
ceterumque belli apparatus accipit. Hoc agenti fuperveniunt  
a Leontinis legati, quorum princeps Heraclidas urbem fuam  
Regi, prætereaque copias, peditum millia quatuor, equites  
quingentos offerebat. Neque feignius aliis ab urbibus occur-  
fum eft, quodam veluti torrente fortunæ. Pyrrhus humani-  
ter exceptos habitosque, conciliata omnium voluntate, fuam  
quemque in civitatem remisit; ampliores jam animo fpes  
agitans, & fi deftinata porro ita fluerent, etiam in Africam  
transiturus.

IV. At fociis ejus in Italia haud perinde lætæ res erant:  
quos abfente Rege & robore exercitus, adverfus infeltio-  
res quotidie Romanos, Milo cum parte copiarum Tarenti  
relictus, non fatis tutabatur. Haftenus tamen profuit, ut  
Tarentinis ad tempus dilatis ambo confules in Samnium  
figna converterent. Samnites cum agros fuos uri, caftella  
expugnari, totam belli molem in fe verfam, feque a fo-  
ciis derelictos effe cernerent; animis ac viribus impares,  
defertis oppidis atque vicis, in montes excelfos & arduos,  
cum uxoribus fuis liberisque, ac cariffimis rerum, quas in-  
ter tumultum & trepidationem avehere potuerant, fe re-  
ceperunt. Apud Romanos præter æmulationem ducum,  
etiam ex rebus proſperis & metu hoſtium, negligentia  
orta erat, (perpetua felicitatis comes.) Ea cauſa & damni  
aliquid, & aliquanto plus ignominie attulit. Quippe milites  
per abrupta & invia contentim repentes, loco adjutus  
Samnis pepulit fuditque: multi faxis telifve obruti, aut in  
præcipitia deturbati, interierunt: alii cum neque receptus  
copia, neque pugnandi facultas eſſet, vivi capti ſunt.

V. Hic caſus ducibus ad diſjungendas iterum copias in-

§ III. Dionyf. Diod. Ecl. 1. 22. Plut. § IV. Zonar.

*T. Livii Vol. III,*

K

citamento fuit : cum in collegam infelicis cœpti collata culpa, se quisque, si solus fuisset, melius atque prosperius rem gesturum fuisse prædicaret. C. Junius cum suis legionibus in Samnio mansit. P. Cornelius in Lucanos & Bruttios convertit impetum. Ibi terrorem cladisque belli populationibus agrorum & villarum incendiis circumferenti, majoris aliquanto rei tentandæ occasio nata est. In extrema Italiæ ora, qua Orientem versus & Jonium mare Lacinii promontorii cornu protenditur, Croton est, veteri fama, & tum quoque non poenitendis opibus, inclyta. Mediam iis temporibus interfluebat Ælarus, juxta quem frequentia utrinque ædificia murus duodecim millia passuum in circuitu patens ambibat. Hanc aperta obsidione cingere non ausus consul, proditione occupaturum confidebat : quod a compluribus Romanæ factionis hominibus spes ei facta erat, posse urbem præsidio externo destitutam, studiis & auxilio eorum, quibus Pyrrhi dominatio gravis esse cœpisset, recipi, si copias mature muris admovisset.

VI. Sed per eosdem forte dies, sive metu hostilis in vicinia exercitus, sive jam proditione, quæ plerumque tegi diu non potest, suspecta, Crotonienses præsidium a Milone acciverant : veneratque Nicomacho duce Lucanorum valida manus, quæ ignarum rei consulem, nulloque periculi metu confidentius ad mœnia sgressum, eruptione subito facta, non sine cæde vulneribusque multorum rejecit. Rufinus acceptum temeritatis detrimentum consilio correcturus, rumorem adversi certaminis ultro adauget ; quoque majori perculsus esse timore videatur, cœpto se desistere simulat, colligi farcinas jubet, ut quamprimum discessurus. In urbem, ut castris tam propinquis necessum erat, cito hæc nuntiantur : præter probabilem rei causam, juvatur eo quoque credulitas, quod verum hoc esse cupiebant. cum jam sponte hanc in partem inclinantibus animis, captivus quidam spe libertatis atque præmiorum inductus a consule supervenit ; tanquam inter festinationem discedentium, occasione captata, custodiam effugisset.

§ V. Ovid. Met. 15. Liv. 24, 3. Zonar. § VI. Front. Strat. 3, 6.

VII. Ille *Cornelium Rufinum*, quod ad *Crotonis* oppugnationem parum haberet roboris, *Locros* pergere narrat, accitum & quibusdam urbem illam prodere pollicitis. Adest paulo post & alter, qui de prioribus eadem; ceterum, jam iter ingressos esse Romanos, asserit. simul conspiciuntur eminus signa & agmen incedentium via, quæ Locros ducit. Eo dolo captus *Nicomachus*, per compendia viarum celeriter cum suis accurrit Locros, ut eam quoque urbem defensus. Quod ubi per occultos nuntios *Rufinus* cito comperit, converso itinere, *Crotonem* regressus, quanto consilio ac prius meliore, tanto etiam eventu feliciore usus est, diligentiamque ejus non modo securitas hostium, sed etiam fortunæ favor juvit. densa enim nebula opportune texit accedentem, priusque propemodum intra mœnia fuit victor exercitus, quam reversum *Crotoniatæ* didicissent. Atque hujus victoriæ per se satis magna lætitia, ut ferme neutram in partem fortuna tenet modum, aliis subinde rebus haud minus lætis cumulata est.

VIII. *Nicomachus* enim, intellecto se in errorem inemendabilem incidisse, dum incertus consilii *Tarentum* redit, exceptus a *Rufino* magnam suorum partem amisit, & cum reliquis vix in tutum elapsus est; cum unam urbem defendisse non contentus, duas perdidisset. Nam & *Locri* successu isto animati, præsidio *Pyrri* præfectoque, quorum injurias diutius perpeti nequibant, trucidatis, ad amicitiam Romanorum se contulerunt. Rebus ad hunc modum procedentibus, non ideo in tantum ceciderant animi *Samniti* ceterorumque populorum, quin super insitam pervicaciam, spe quoque *Pyrri* Regis, & nuntiatis ejus in *Sicilia* successibus, ad omnia, quæ fors ferebat, perpetenda sustentarentur.

IX. *Pyrrius* enim (ut hujus etiam extra *Italiam* gesta; quod eorum temporibus locisque, ad hæc negotiis ipsis cum Romanis rebus conjunctum est, exponantur) rebus apud *Syracusanos* *Leontinosque* constitutis, circa eadem

tempora cum exercitu Agrigentum profectus, in ipso adhuc itinere occurrentibus nuntiis, ejectum ex urbe praesidium Punicum acceperat, & Agrigentinos ipsi se suaque omnia dedere paratos esse. Neque promissis abfuit fides. Venjenti Sosistratus, qui & Syracusas tradiderat, & urbem, & egregiae juventutis octo peditum millia, octingentos equites adjungit, copias Epiroticis; quas Pyrrhus adduxerat, nihilo deteriores. Oppida praeterea triginta, quibus imperabat Sosistratus, eodem auctore se Regis arbitrio permiserunt. His ita gestis misit Syracusas, qui telorum omnis generis copiam, & machinas, quarum in obsidionibus urbium usus esse posset, subveherent. Nam ad urbes Puni juris oppugnandas animum adjecerat, parato jam exercitu triginta millium, praeter equites mille quingentos, & quos in Siciliam trajecerat, elephantos.

X. Prima ex his in potestatem venit Heraclea, ubi Carthaginensium praesidium fuerat: exhinc Azonas cepit. statimque secuti fortunam Selinuntii primum, mox Halicyæ & Ægestani, deficiendo a Carthaginensium amicitia, compluribus etiam aliis in eo tractu oppidis idem audendi exemplum praebuerunt. Erycinos autem, & auxiliorum numerosa manu, & munitionibus loci fidentes, summa vi expugnare statuit. Instructo igitur exercitu, armatus ipse, ad mœnia procedens, votum Herculi vovit, si dignum genere suo locoque bellatorem eo die se Græcis ostendisset. Postquam signum oppugnandi datum, crebroque missilium jactu propugnatores dimoti locum admovendis muro scalis fecerunt; primus omnium Rex enifus, adversus concurrentes undique hostes insigne certamen edidit: alios umbone deturbans, alios cædens gladio; magnitudine vero animi roborisque cunctos perterrefaciens. Neque magnifica tantum hæc ei pugna, sed etiam omni ex parte felix fuit: sine ullo suo vulnere, magna gloria parta, etiam urbem ipsam eodem impetu cepit: animatis non minus exemplo Regis ceteris, quam sollicitis pericu-



lo; & utramque ob causam summa contentione pugnantibus. Sacrificavit deinde Herculi, voti reus; ludosque varii generis magnifico apparatu per complures dies edidit.

XI. Hoc quoque anno Romæ de Lucanis atque Brutiis ante diem Nonas Januarias triumphatum esse reperio. sed C. Junio triumphum illum adscribi miror; cum in his populis res Rufinus gesserit, duasque nobiles civitates receperit: quem etiam alios apud auctores triumphalem virum nominari video. Civitate ob Pyrrhi progressus haudquaquam secura, novi quoque terrores ex prodigiis & morborum lue accesserunt. Eædi maxime ominis habitum est, quod Jovis Capitolini signum fulmine tactum, caputque avulsum non nisi aruspicum arte curaque reperiri potuit. Graviore non jam metu, sed clade urbem affecit pestilentia, pecudes hominesque communi strage corripuens, sed præcipue gravidarum abortibus formidabilis; cum nulli propemodum jam aut partus humani, aut foetus animalium ederentur incolumes; iraque Deorum omne viventium genus interitum esse crederetur.

XII. Ea vis mali maxime insignem Q. Fabii Maximi Gurgitis alterum consulatum effecit, in quo collegam habuit C. Genucium Clepsinam. Neque tamen a bello Samnitico Lucanoque cessatum est. magnasque clades hostibus illatas duo certa sunt argumenta, quod eodem anno Q. Fabius de Samnitibus, Lucanis, Brutiis, triumphavit Quirinalibus: quodque ii populi miserunt ad Pyrrhum litteras & oratores, *actum de se, nisi subveniretur, neque vim Romanam ulterius suslineri posse, extremamque necessitatem deditione præveniendam esse*, testatos. Ea res, & quod senescencibus jam hominum studiis, aut ob injurias quasdam in contrarium versis, in Sicilia res ei duriores esse cœperant, permovit Pyrrhum, ut insula relicta copias in Italiam reportaret. Quod ejus consilium, & rerum inde secularum series, quo plenius nosceretur; paulo plura de rebus interrim ab eo gestis referenda putavi.

§ X. Plut. in Pyrrh. c. 49. Diod. § XI. Elin. 16, 6 & 33. 11. Liv. Epir. 14. Oros. 4. 3. Aug. de civ. l. 1. c. 2, 17. § XII. Zonar. Justin. Plut.

XIII. Post occupatam igitur Erycem, præsidiumque loco impositum, ad Æginorum urbem profectus est, comodo ad Panormitanum portum situ, & munitionibus insignem. Ibi sponte oppidanorum receptus ad ipsam Panormum castra movit, cui ab argumento portus amplissimi pulcherrimique nomen est inditum. Hac quoque per vim occupata, cum insuper locum, qui Epieircte vocatur, inter Panormum & Erycem in monte amœno, sed arduis accessibus, situm cepisset; universa jam provincia Carthaginiensium potiebatur, excepto Lilybæo. Hanc autem urbem non ita pridem Pœni condiderant, ut Motyensis ea sedes foret, quorum oppidum Dionysius Tyrannus bello Carthaginiensi diruerat. Cum igitur ex omni, quod in Sicilia habuerant, imperio spes suas unum istum in locum conclusas viderent Pœni; apparatus ad obsidionem a Pyrrho fieri sentientes, majoribus eam viribus defendere decreverunt.

XIV. Introducto igitur non spernendo robore militum, comineatuque copioso, ad hæc magna vi machinarum ac telorum (cujus rei facultas ipsis ampla erat, quod in potestate mare haberent) ad oppidum undique permuniendum magna cura se contulerunt. Præcipue, qua terra patebat aditus, crebræ turres excitatæ sunt, lataque fossa facta: celerius opere procedente, quod majore sui parte structum in cautibus marinis oppidum, toto illo spatio manu facta munimenta nulla desiderabat. Missis interea legatis, quamquam ad bellum magnos apparatus fecerant, magnasque copias, cum aliunde, tum etiam ex Italia, mercede conduxerant; *si pax æquis conditionibus impetrari posset, pecuniam & classem pollicebantur.* Pecuniæ mentionem non admisit Pyrrhus, urbes, quas occupaverat, retinere cupiens; de Lilybæo tamen concessurus videbatur. Sed amici Regis, civitatumque Sicularum principes, metu Carthaginiensium vacaturam esse insulam negantes, donec illi tantum valentes classibus Lilybæum, tanquam scalas quasdam ad exscensionem faciendam paratas tenerent; perpulerunt, ut unam esse respon-

deret *amicitiæ conditionem, si universa Sicilia cedentes, utriusque imperii terminum esse mare paterentur.*

XV. Ita spe pacis discussa, protinus ad urbem signa movit; neque procul muris castra metatus, manipulis ita dispositis, ut defelli a recentibus per vices exciperentur, oppugnationem orsus est. Sed Lilybæani, cum & numero propugnatorum, & machinarum apparatu juvantur, locum tenuerunt. Tantam enim catapultarum scorpionumque vim Carthaginienſes invexerant, ut murorum ambitus capiendis omnibus minime sufficeret. Cum igitur cujusque generis missilium velut imber quidam in Regios spargere-tur, multique passim caderent aut fauciarentur, incoꝑtum omiserunt. Machinas deinde & ipse fabricare instituit, præ-ter eas, quæ Syraculis advehebantur: & effossis subter hu-mum cuniculis, omnes obsidionum tentavit artes. Cum au-tem animose resistantibus Pœnis toto fere bimœstii nequid-quam se fatigasset, videretque, donec apertus a mari ob-fessis aditus exitusque foret, expugnari Lilybæum non posse: obsidione soluta aliam in partem convertit im-petum.

XVI. Quippe adversus Mamertinos freti accolæ Græcæ: quædam civitates fidem regis implorabant, super alias gra-ves & crebras injurias etiam tributum pendere coactæ. Pyr-rhus igitur exercitu propere ducto, cum iis in locis quos-dam Mamertinorum ad exigenda vectigalia missos compre-hendisset, necavissetque: prælio cum occurrentibus facto discessit superior; ac multa eorum præsidia expugnavit di-ruitque. Et hætenus quidem rebus præclarissime gestis, exi-miam sibi potentiam gloriamque Rex paraverat; præter alias virtutes etiam eximia humanitate amorem singulorum, flu-dia civitatum, non adeptus magis, quam meritis. Sed fe-licitatem tantam, & quam existimare fundatissimam po-tuisses, momento fere dissipatam, præter levitatem inge-niorum, quæ istis populis nunquam defuit, & amicorum intemperiem, ipsius maxime Regis culpa traditur: qui ad-

versis egregius, secundis rebus, ut inter has ferme inferiores humanæ mentes sunt, in superbiam efferebatur.

XVII. Cum igitur, ut ante diximus, ad efficienda cœpta classem sibi necessariam esse duceret, naves autem haberet multas, sed parum instructas a fociis navalibus; remigibus acerbe conquirendis valde offendit civitates: repente mutatus, & ex priori lenitate ad superba imperia, minasque, & postremo supplicia, præceps. Sed hæc tamen, quia communis boni specie tegebantur, utcunque tolerabant: postquam autem eos ipsos, quorum beneficio maxime Siciliam obtinuerat, interimi videre; non paulatim, neque mora interposita, sed subito averfis animis, multi populi ab ejus amicitia desciscientes, ut cuique opportunum erat, alii Pœnis, alii Mamertinis se applicaverunt. Adeo nimirum crudelitas, etiam cum sola est, semper gravis, penitus fit intolerabilis, postquam adversus bene meritos exercita, propriis odiis etiam ingrati perfidique animi detestationem adjunxit.

XVIII. Hanc autem in necessitatem vi cuncta tractandi se maxime videtur induisse, dum pravis suorum cupiditatibus consiliisque nimis obsequitur. his enim opes, amicis aut necessariis Agathoclis ademptas, dono dabat; nihilo quam fuerant illi melioribus: magistratus urbium præcipuos satellitibus aut centurionibus suis committebat, neque ex institutis aut moribus civitatum, neque in legitimum tempus, sed quomodo & quoad ipsi placuisset. Lites atque controversias publicorumque negotiorum administrationem omnem ad se traxerat, pleraque familiaribus committens, quos habebat avaritia luxuriaque detestabiles, qui cogen-dis per flagitium, perdendisque pecuniis pariter intenti, dum libidini suæ satisfacerent, jus injuriamque in promiscuo habebant. Irritatis ob hæc animis, mussare primum homines, mox palam queri: *cur igitur prioris status pœnituisset, si nunc etiam toleranda eadem forent? frustra vocatum receptumque Pyrrhum, si studeat æmulari mores, quos puniturus ad-*

*verisset. neque acriorem ullius injuriæ sensum esse, quam cujus auctor haberetur idem ille, qui vindex esse debuisset.*

XIX. Jamque multi haud obscure studium novarum rerum præ se ferebant; cum ille ad pessima consiliorum conversus, augere causas offensionum, quam tollere, maluit: quasi, quod per injustitiam peccatum fuerat, emendari sævitia posset. Interea Carthaginienſes, animadverso regem propriis viribus haud sane validum, quotidie minore apud Siculos affectu haberi, erecti in spem recuperandæ provinciæ, novum exercitum miserant: passimque transfugientibus, qui Pyrrhi sævitiam metuebant, negotium Epirotis magnum exhibebant. Pyrrhus per causam Punici belli, præfidiis in urbes introductis, splendidissimum quemque falso prodicionis crimine oneratos necare instituit: his de medio sublatis, multitudinem facilius in officio mansuram esse ratus. Postremo Thœnionem & Sosistratum corripit, totius insulæ longe principes, quorum præcipuis studiis imperio Siciliæ potitum fuisse ostendimus. Sed Thœnio quidem interfectus est: Sosistratus ad hostes effugit, non minus auctoritatis opisque collaturus ad ejiciendum Sicilia Regem, quam ad imponendum confirmandumque contulerat. ✕

XX. Tum igitur certatim plerisque ad Carthaginienſes deficientibus urbibus, nonnullis ad Mamertinos; res Epirotarum ex florentissimis angustæ malæque redigi cœperunt. In hoc statu rerum non ingrata Regi sociorum Italicorum legatio venit: quæ, *ceteris omnibus amissis, vix paucas urbes hostem ægre a mœnibus submovere*, quæstæ, honestum discedere cupienti prætextum præbuit, ut partibus laborantibus auxilio futurus, non ejectus a Carthaginienſibus, in Italiam reverti voluisse videretur. Abiturus, cum opes insulæ situmque, & hominum animos secreta cogitatione expendere, dixisse fertur: *O amici, qualem Romanis atque Carthaginienſibus palæstram relinquimus!* haud vano præſagio: quod paulo post longa inter hos bella, tot utrinque submersæ classes, tot acies cæcæ, satis superque impleverunt. Ceterum

hostium animis cum fortuna crescentibus, neque tutus ex Sicilia discessus Pyrrho, neque in Italiam appellenti tranquillum ad Tarentinos iter fuit.

XXI. In ipso freto trajicientem adorti Carthaginienſes, cum Epirotæ nulla ferme maritimarum rerum experientia, hominibus exercitatissimis pares esse non possent; septuaginta naves depreſſerunt, ceteras reddiderunt inutiles. Ita cum duodecim navibus ex adverſo prælio in Italiam effugit, qui navibus tectis amplius centum, & longe adhuc majori onerariarum actuariarumque numero curſum inſtituerat. Sed undique collecto quod militum ex adverſo prælio litora tenere potuerat, ſtatim ita robuſtam effecit manum, ut Rhegii ſubito impetu expugnandi ſpem conciperet. Sed reſectus a Campanis Rhegium tenentibus, mox in periculum haud contemnendum incidit. Cum enim per loca cæca & ſaltibus impedita duceret, coorti ex inſidiis hoſtes turbaverunt noviffimum agmen, multosque milites cum duobus elephantis peremerunt.

XXII. Erat neque genere bellatorum, neque numero ſpernenda manus. Decem haud minus millia hominum in armis exercitatorum, Mamertini plerique: hi enim Rheginorum amicitia & cognatione conſili, intellecto Pyrrhum in Italiam reverti conſtituiſſe, fretum priores tranſjece- rant, & ſpe prædæ in opportunis ad ſubitam irruptionem locis confederant. In eo certamine cum pro ſolita audacia Pyrrhus ante prima ſigna pugnaret; in capite vulnus accepit. Ad quod obligandum cum ex acie pauliſper ſe- ceſſiſſet, quidam hoſtium magnitudine corporis & armorum cultu conſpicuus longe ante alios procurrens increpavit eum elata voce, juſſitque *prodire, ſi viveret*. Ibi Pyrrhus ardens ira, viſuque & manante per faciem cruore terribilis, impetum in provocatorem, fruſtra retinentibus ſuis, vertit: occupatumque illata in caput plaga proſternit. Memoriae proditum eſt, eam gladii temperiem, eamque vim ferientis fuiſſe, ut inſimum ad corpus vulnere continuato,

§ XX. Juſtin. Plut. Appian. Pauſan. § XXI. Appian. Plut. Zonar.

partibus utrinque dilabentibus, medium hominem eodem ictu dissecaret. Ejus spectaculi foeda novitate perculsi hostes, & ut majorem communi hominum forte virum re-veriti, pugnam omiserunt.

XXIII. Pyrrhus hac molestia solutus, non ideo lætior agebat. Quod enim pars impedimentorum isto prælio amissa erat, & opes ex Siciliae spoliis partas prioris cum Pæno pugnae casus interceperat; in magna rei nummaria difficultate, cum poscentibus stipendia militibus non esset unde præberentur, dicatos Proserpinæ thesauros spoliare coactus est. Fanum illud apud Locrenses opinione sanctitatis celeberrimum iis temporibus fuit: quam civitatem cum Pyrrhus animatis præsentia sua Regiæ factionis hominibus recepisset; multa in Locrenses foeda facinora edidit, cupidius & latius, quam interfecti prædii postulasset ultio, cædibus & rapinis in miseros grassatus. Postquam autem nihil supererat, quod conferre homines vellent possentve, manus ad sacram pecuniam extendere coepit, pessimis amicorum, qui plerumque nocentissimi cujusque consilii auctores fuerant, cupiditatem ejus inflammantibus.

XXIV. Erant autem hi Evogoras Theodori filius, Balacerque Nicandro, & Dinarchus Nicia genitus. Hi non suaditores modo fuerunt Pyrrho, necessitati omnia cedere prædicantes; sed ministerium quoque suum sacrilegio præbuerunt: ingenti pondere auri, quod multos per annos subterraneis in specubus asservatum fuerat, cruto. Lætus ille, *religione intempestiva nihil ineptius, opesque paratas non accipere dementis esse*, dictitans, impositam navibus prædam Tarentum avehi jussit: ipse terra est profectus. Ceterum facinus ei suum non turpius coepto, quam infelicius eventum fuit. Subita tempestas adorta classem, ventis sub noctem mutantibus, qui ferentes hactenus fuerant, naves in tenebris circumactas partim in fretum expulit. Sed quæ sacram pecuniam vehebant, quassatæ laceratæque undis irrupentibus, cum ipsis hominibus interierunt: pecuniam autem

reliquis ex naufragio tabulis hærentem, postridie quam exportata fuerat, in vicina fano litora fluctus retulerunt.

XXV. Re intellecta, thesaurum omnem diligenter conquisitum referri ad pristinas sedes jussit; pacem numinis, ut putabat, hoc facto impetraturus. Neque tamen ideo melioribus deinceps fatis usus est; omnes ejus conatus, etiam quibus consilium & virtus non abfuisset, eludente fortuna. Quam ille rem & postea constanter ad læsi numinis iram referebat, uti Proxenus historiæ scriptor, atque ipse in commentariis suis Pyrrhus memorat: & recenti adhuc malo, cum Proserpinæ sacrificans, multis hostiis litare non posset; exarsit adeo, ut cunctos infelicitis consilii auctores ac ministros, quique facinus istud aggressuro vel leviter confenserant, de medio tolleret. Atque hi quidem dignum moribus factisque suis exitum habuerunt: Pyrrhus autem institutum profecutus, quieto deinceps itinere Tarentum pervenit.

XXVI. Romani, cum majorem in modum urgeret pestilentia, Pyrrhique in Italiam reditu belli timor crevisset, nihil adversus ista vel humani præsidii, vel divini intentatum reliquerunt. Vetus erat opinio, pestilentiam clavo ab dictatore fixo sedari posse: eam spem tum quoque tentatam, clavique pangendi causa dictatorem dictum esse P. Cornelium Rufinum, haudquaquam improbabilis conjectura est: cum & mali magnitudo ad omnia quærenda remedia stimulare mentes posset; & Rufinum anno sequenti a censoribus notatum fuisse constet, postquam bis consul & dictator fuisset: neque dictaturæ ejus vel certior inveniatur memoria, vel convenientior locus. Et adversus morbos quidem, ut potuit, provisum est: armorum cura majorem industriam contentionemque, præcipue ob difficultatem delectuum, postulabat. Nam præter diuturnitatem belli, etiam longo jam tempore infesta lues tædium rerum

§ XXIV. Dio & Dionys. ap. Vales. Suidas in ἀβυσσος. Appian. Diodor. Liv. 7, 3. § XXV. Val. Max. 4, 1, 1. Suidas in παρ-  
αιτησάμενος. Dionys. Appian. Plut. in Pyrrh. c. 53.



omnium hominibus injecerat : citatique juniores militiam mira obstinatione detrectabant. Sed pervicaciam istam severitas & constantia M. Curii Dentati secundum consulis fregit.

XXVII. Is enim, L. Cornelio Lentulo collega, magistratum jam iniverat. Cum igitur in Capitolio delectum haberet Curius, respondente nullo, vocabula tribuum omnium in urnam conjici, cumque Pollia tribus exiisset, quod ex ea nomen primum forte eductum erat, citari jussit. tacere perseverantis bona primum, deinde cum graviter de consulis injuria questus tribunos appellasset, ipsum quoque vendidit : *nihil opus esse reipublicæ eo cive, qui nesciret parere*, præfatus. neque tribuni auxilio fuerunt : & postea quoque salubris exempli judicata res in consuetudinem transiit ; ut delectu rite acto, qui miles factus non esset, in servitutem venderetur. Hoc terrore ceteri adaacti ad nomina promptius danda : conscriptisque legionibus, quæ decretæ erant, in hosticum ambo consules moverunt : Lentulus in Lucaniam irruit ; Samnitas adortus est Curius. Excitus ad ejus rei famam Pyrrhus, lustrato Tarenti exercitu suo, peditem ferme viginti millia, tria equitum recensuit.

XXVIII. Cum his, & delecta Tarentinorum juventute, Samnium ingressus, Samnitas dicto minus audientes habuit ; tardiusque ad eum auxilia & infrequentius venire, animis non ob cladium modo magnitudinem fessis, sed etiam exulceratis, eo quod istarum causam Pyrrho imputabant, tam tristia non passuri, nisi proditis discessu suo Italicis fociis, expeditionem Siculam ille suscepisset. Verumtamen sic quoque magnis instructus copiis, partem eorum in Lucaniam, ad destinandum alterum consulem misit ; ipse Man. Curium oppugnare aggressus est, facilem sibi reliquam victoriam fore ratus, si hunc superavisset. Romanus autem, gnarus phalangi Macedonicæ, si explicari possit, nullam aciem parem esse, locis impeditis se tue-

§ XXVI. Pigh. in annal. Rom. Varro in Sat. *Γέρωντος διδου-  
σκάλου*. § XXVII. Val. Max. 6, 3, 4. Liv. Epit. 14. Cic. pro A.  
Cec. cap. 34. Plut. in Pyrrh. c. 54.

batur : & quoniam ex Lucania ventura sperabat auxilia, simul etiam auspicia & exta parum læta erant, copiam pugnandi minime faciebat.

XXIX. Tanto vehementius cupiebat configere Pyrrhus, priusquam duo consulares exercitus conjungerentur. Igitur assumtis ex omni exercitu promptissimis quibusque, præter aliquot elephantos, noctu, quo falleret hostem, ad castra Romanorum statuit accedere. Dum autem ad iter & oppugnationem futuram omnia apparantur, ipse in somnum lapsus majorem sibi dentium partem excidere, & ex ore copiosum erumpere sanguinem imaginatus est. Eo visu perplexus, abstinere in id tempus rebus gerendis decreverat; sed amicis obtestantibus, *ne occasionem forte non redituram elabi pateretur*, signum ad proficiscendum dari jussit. Circa Maleventum urbem (hoc enim tum adhuc nomine erat) montosa, & silvestria loca sunt : quæ deinde paulatim æquioribus clivis demissa postremo, in planitiem late patentem definunt, qui *Taurasini campi* appellantur. Itaque Pyrrhus ex inferioribus locis per objectos colles & saltus instituto itinere, cum lumina defecissent, erroribus & ignorantia locorum tardatus, luce jam orta ex castris Romanis conspici cœpit.

XXX. Commotis inopinato hostis adventu animis, quia tamen dubium haberi non poterat, quin pugnandum foret, extaque victimarum lætiora fuerant, consul celeriter ex castris progressus, primos quosque hostium divulsos a suis & incompósitos adoritur, pellitque. Hi in suos incurrentes totum agmen turbavere; cæsusque est militum haud exiguus numerus, & nonnulli elephantum a suis relictum venerunt in potestatem victoris. Hic successus animavit Curium, ut insistendum fortunæ putaret, & cum universis copiis ad pugnam instructis paratisque in campum se demitteret. Neque Epirense moram fecere. Concursum est utrinque ferociter, sed quod priore certamine Romanus supe-

§ XXVIII. Front. Strat. 2, 2. § XXIX. Dionys. ap. Vales. Cluv. Ital. aëriq. 4. S. Flut.

rior fuerat, plus etiam in præfens animorum atque spei attulerat. Cedentibus Epirotis, iterum a belluis subsidium petiit Pyrrhus, alteroque suo cornu fugiente, vicissim in altero Romanos ad præsidia sua pedem referre coegit.

XXXI. Firmam ibi stationem iturus in pugnam consul constituerat: hanc igitur recentibus viribus excipere prælium, & elephantos amoliri jubet. Adversus hæc animantia promptam atque facilem opem usus monstraverat: ignique magis quam ferro averti posse superiores docuerant pugnae. Parati igitur erant malleoli, stupa & pice multa obducti, quos incensos ardentisque in terga & turres belluarum jaculabantur: ii, sive cuti elephantorum, sive ligno turrium infedissent, uncis præacutis infixi hærebant. Cum igitur hi, & una varii generis missilia ex superiore loco confertim jacerentur, elephanti partim terrore flammæ, partim dolore vulnerum in furorem acti, cum amplius a magistris regi nequirent, in suorum aciem retrocesserunt, omnia, quo impetum verterant, trepidatione & clade miscentes. Narrant initium stragis ab elephanto pullo ortum, qui telo ictus in capite, cum stridorem querulum edidisset, matrem primum ad notam vocem exsiliens, deinde hac etiam tumultum augente, ceteras belluas omnes turbaverit averteritque.

XXXII. Magna ea pugna & numero cæforum, & victoriæ fructu fuit. Tum enim debellatum est cum Pyrrho, neque ceteri deinceps Itali diu, neque post Italiam, aliæ nationes Regesque restiterunt. Triplo majorem ea pugna numerum in regiis partibus dimicasse tradunt. Octoginta enim peditum, sex equitum millia fuisse: ex his qui plurimum, sex & triginta millia; qui minimum, sex & viginti cæsa memorant: captos mille trecentos, cum elephantis octo. Pyrrhus cum paucis equitibus Tarentum effugit. Capta ejus castra admirationi fuisse dicuntur, & in posterum usui. Antiquitus enim & Romani & alii populi castra passim per corpora cohortium constituere, mapaliorum in

morem, solebant: primus totum exercitum Pyrrhus dimensis rite spatiiis sub eodem vallo continuisse fertur: atque illo exemplo adjutos Romanos; additis, quæ ex usu viderentur, ad metationem castrorum, quam sequentibus temporibus perfectissimam habuere, pervenisse.

XXXIII. Hic annus republica belli præclare feliciter, quæ gesta, domesticis quoque rebus, & notabili severitate disciplinæ urbanæ illustris fuit. Q. Fabricius Luscinus, Q. Æmilius Papus, concordem censuram exercuerunt. multis equi publici ademti sunt; quidam etiam in Senatu legendo præteriti. Sed maxime insignis ad memoriam P. Cornelii Rufini nota fuit. Bis consul & dictator fuerat, rebusque magnis bello gestis triumphaverat. Hunc igitur Senatu moverunt censores, causamque isti animadversioni subscripserunt, *quod eum comperissent argenti facti cænæ gratia pondo decem habere*. Isque casus non hominis modo, sed familiæ, ad longum deinde tempus fuit: nec ante Sullam dictatorem quisquam ex ea summis honoribus usus est. Tanta temporibus istis parsimonia, tantusque in eadem civitate postea luxus fuit, ut quæ supellex apud posteros contemptissimæ vilitatis argumentum futura erat, eadem a prioribus pro intolerabili luxuria damnaretur. Censu perfecto lustrum conditum est: censa civium capita ducenta septuaginta unum millia, ducenta, viginti quatuor.

XXXIV. In exitu anni consul uterque triumphantes Capitolium inveci sunt. Prior Curius: cujus & triumphus cum fama rerum, & lætitia successus, tum etiam splendore pompæ illustrior fuit. Nam ad eam diem ex vicinis & pauperibus populis in apparatu triumphi nihil ferme nisi arma fracta, aut carpenta Gallica; in præda, nili greges & armenta ducta fuerant; tum vero & varietate gentium, quarum captivi ante currum ducebantur, & spoliolum pulchritudine ac magnificentia, celebris species fuit: cum Epirotæ, Thesiali, Macedones, Apuli, Lucani, Bruttii, vineli ante currum

§ XXXII. Dionys. ap. Vales. Eutrop. l. 2. Front. Strat. 4. 1.  
§ XXXIII. Zonar. Liv. Epit. 14. Agell. 4. 8. Plut. Val. Max. 2, 9, 4. Fasti Capitol.

agerentur: præferrentur autem tabulæ pictæ, signa nobilium artificum, aurum, purpura, ceteræque transmarinæ elegantiae, & Tarentini luxus instrumenta. Sed præcipui miraculi gaudiique spectaculum elephantum fuisse. Cum ipsis turribus suis quatuor (nam reliqui ex vulneribus interierant) tum primum Romæ visi sunt: vulgus a nomine animalis, quod hactenus maximum noverat, & loci, ubi primum conspexerat, boves *Lucas* vocitabat.

XXXV. Alterius consulis paucos post dies obscurior triumphus fuit. Neque tamen illi poenitendæ res fuerunt. Samnites & Lucanos vicerat; oppida multa ceperat, sed comparatione Curianæ gloriæ, horum splendor æstimationeque decreſcebat. Inter eos, qui virtutis ergo donati sunt, Ser. Cornelio Merendæ auream coronam ex præda dedit, ob Samniticum quoddam oppidum, ejus maxime opera captum. Romanis ad hunc modum victoriæ suæ lætitia fruentibus, longe dispar animorum habitus apud hostes erat. Ii jam olim imperio Pyrrhi minime læti, post infelicem pugnam, animis timore atque indignatione plenis, nihil quietum agitabant. Rex ipse dudum Romani belli pertæsus, & nunc desperata penitus victoria, nihil nisi rationem tutius honestiusque discedendi meditabatur. Sed dissimulato interea consilio, hortabatur socios, *ne ob unum adversum prælium conciderent animis: non plus eos cladis postrema hac pugna accepisse, quam prima intulissent: neque ideo Romanos ad pacem etiam bonis conditionibus permoveri potuisse. horum constantiam si ipsi quoque æmularentur, seque fortunæ venturi servarent, omnia commodius habitura; superesse vires ad hæc diuturno bello suffecturas. In Græcia multos potentes amicos se habere, a quibus certa auxilia expectare possit.*

XXXVI. Neque hæc incredibiliter fingeantur: cum & antea, præsertim a Ptolemæo, qui Macedoniæ tum præerat, luculenter adjutus fuisset: & in magna existimatione apud Græcos Libarosque esset; aliisque beneficiorum memoria,

§ XXXIV. Flor. 1, 18. Senec. de brev. vitæ cap. 13. Eutrop. Plinius. § XXXV. Capit. Marmor. Plin. Just

aliis metu devinctis, ab Ætolorum gente temporibus istis potentissima, ipsisque Macedonibus, præterea Illyriorum regulis coleretur. Ceterum hæc ita jactabat, magis ut desciscere parantes socios in fide retineret, donec aperto ad navigandum mari regnum repetere posset; quam quod aut bellum in Italia continuare vellet; aut magnam spem in transmarinis auxiliis haberet. Dimissis tamen circum Asiæ Macedoniæque Reges legatis, ab aliis pecuniam, ab aliis auxilia, ab Antigono, qui Macedoniam tenebat, utrumque postulabat. Hac spe utcunque retenta sociorum voluntate, cum interea dissimulanter omnia paravisset ad discessum, legati cum litteris ab Antigono redierunt. Convocatis igitur suorum Italorumque principibus, non quidem quas acceperat litteras recitavit, sed fictitias alias, quibus paulo post ab Antigono auxilia magna affutura esse continebatur. †

XXXVII. Hoc actu non sociis modo delusis, sed etiam Romanis, qui propinquo loco præsidium agitabant; consecuta nocte citra ullum impedimentum vela fecit, Cerauniosque montes (Epiri id promontorium est) tenuit. Sed quo minori turpitudine deseruisse bellum videretur, fidesque hominibus fieret, perfectis quibus evocatus esset rebus reversurum, Milonem ad custodiam arcis Tarentinæ reliquit; eique, ut non modo spe præmiorum, sed etiam paris exitii metu in fide maneret, sellam dedit, cujus lora erant ex Nicæ pelle, quem compertis in caput suum insidiis occiderat. Huic igitur addito præsidio militum, cum ceteris copiis, octo peditum millia, quingenti equites erant, sexto quam exiverat anno, patrium in regnum reversus est. Interea Romæ cum comitia centuriata haberentur, Pyrrhusque bellum instauraturus putaretur, M'. Curium consulem placuit; quod unus ille adversus Regem optime gesta re, ad reliqua quoque belli plus auctoritatis & fortunæ allaturus videretur. Ex patriciis Ser. Cornelius Merenda factus est, eum quoque provchente recenti gloriâ, & com-

§ XXXVI. Dio ap. Vales. Pausan. l. i. Just. 23, 2. Polyæn. Strat. 6, 6.

commendatione gentilis fui, sub quo priore anno militaverat.

XXXVIII. His consulibus in Lucanos, Samnitesque & Bruttios conversa belli moles est. qui cum locis potius quam armis se defenderent, nihil rei ad reliquarum exemplum memorabilis geri potuit. Neque tamen imminuta inde Curii gloria est, sic quoque judicantibus omnibus, Regem acerrimum, non modo cladem acceptam, sed etiam ducem adversus se denuo venturum Curium, exhorruisse. Confecti itaque belli hujus, fugatique ex Italia Pyrrhi penes illum laus atque fama permansit. Anno, qui tertium Curii consulatum secutus est, primum ab Alexandrinis Regibus legati cum muneribus Romam venerunt; in C. Fabii Dorsonis, C. Claudii Caninae magistratu. Ptolemæus cognomento Philadelphus, audita Pyrrhi fuga, gratulatum misit, petitumque, *ut populi Romani socius & amicus haberetur*. Lætum id honorificumque Patribus visum, quod amicitia Romana ultro a tam potentibus tamque longinquis Regibus ambiretur. igitur comiter acceptis habitisque legatis, societatem cum Ptolemæo jungi placuit: simul delecti ex illustribus, qui confirmandæ ejus, reddendique officii gratia legatione ad regem fungerentur, Q. Fabius Gurges ex consularibus, & cum eo C. & Numerius Fabii Pictores, Quintusque Ogulnius.

XXXIX. His profectis, adversus Italicos populos, qui arma adiuuc necessitate & desperatione retinebant, a consulibus feliciter dimicatum est. Majores alterius res fuisse visas, triumphus C. Claudii Caninae argumento est, quem de Lucanis, Samnitibus, Bruttiis, in magistratu suo duxit Quirinalibus. Sed rerum foris prosperarum lætitiā nonnihil turbavit Sextilia, quæ Vestalis virgo cum esset. incesti comperta, temeratis religionibus, infensos civitati deos effecisse credebatur. Sed piaculis & sacris placata deū ira, sacerdosque verso in noxium caput supplicio, ad portam Collinam viva defossa est. Iisdem consulibus coloniæ deductæ sunt,

6 XXXVII. Zonar. Plut. in Pyrrh. c. 59. 6 XXXVIII. Liv. Epit. 14. Eutrop. l. 2. Zonar. Euseb. 2. 1729. Dio ap. Urs. Val. Max. 4, 3, 9.

Cossa in Volscientibus, & in Lucania Pæstum, quæ Græcis Posidonia vocatur. Eam Lucani Sybaritis ademérant: ab his recens in ditionem populi Romani pervenerat. Illustrior anni sequentis memoria est, qui finem belli non adversum Samnitas modo ceterosque, sed etiam cum Tarentinis attulit.

XL. L. Papirius Cursor, Sp. Carvilius secundum consules, Samnites Bruttiosque & Lucanum cum Tarentino populo provincias nacti, expectationem hominum (nam in spem hoc anno finiendi belli par istud consulum studiose delectum fuerat) consiliis factisque magnificis expleverunt. Et Samnites quidem a Carvilio perdomiti, primum atque septuagesimum post annum, quam decertari cœperat, meliori quam antea fide conditiones pacis a Romanis impositas accepere. L. Papirius Bruttios & Lucanos magnis claudibus subactos ad pacem petendam compulit. Ut tamen in uno multorum finitimorum populorum bello, terminis quoque regionum ipsarum permixtis, etiam Papirio cum Samnitibus, Carvilio cum Brutiis Lucanisque, & utrique cum Tarentinis res fuit. Nec enim modo copiæ Tarentinorum susce fugatæque; sed ipsa quoque civitas in fidem accepta est. Quod negotium, quia præter victoriam ex nobilissima urbe, Pyrrhi Regis mortem, & Carthaginiensium calliditatem, & prima æmulationum inter Pœnos Romanosque initia continet, paulo accuratius explicandum est.

XLI. Pyrrhus ante biennium ex Italia sic abnavigaverat, ut, relicto in urbe Tarentina præsidio, spem reditus sui faceret. ea paulo post novo Regis ictus in Macedonia successu non parum aucta, Italorum animos adversus præsentia damna sustentaverat. Vir enim ardentis animi cum diu quiescere non posset, Antigono, quod in Italia belligerantem nullis auxiliis juvisset, bellum intulerat, eumque prælio victum universo prope regno ejecerat. Unde Romanis

§ XXXIX. Marm. Capitol. Liv. Epit. Oros. 4. 2. Vell. 1. 14. Plin. 3. 5. Strab. 1. 5. § XL. Liv. 24, 9. id. 31, 31. ejusd. Epit. Zonar. Pausan. 1. 1. Plat. in Pyrrh. c. 57.



quoque continuus per ea tempora metus fuit, ne auctioribus copiis regressus in Italiam, majus priore bellum excitaret. Sed inopinata mors Regis spes metusque omnium subito incidit atque fustulit. Pyrrhus enim, ut erat potentiae in immensum augendae insatiabiliter appetens, per causam reducendi in regnum Spartæ Cleonymi, qui cum Areo dissidebat, Peloponnesum ingressus, ad illam etiam occupandam adjecit animum. Et Lacedæmonios quidem, licet urbe frustra oppugnata, magnis affecit incommodis.

XLII. Sed Argis interea, cum adversæ factiones duæ essent, principes earum Aristippus Antigonum, Aristias Pyrrhum ad opprimendos inimicos advocat. nam & Antigonus, contra communem hostem Laconibus auxilio futurus, in Peloponnesum venerat. Ita diversis portis, sub eandem noctem, utriusque Regis copiae in Argivam urbem recipiuntur. Pyrrhus cognito urgeri suos, urbem & ipse ingressus, cum die jam oriente lupum & taurum ex ære, certantium inter se habitu, vidisset, imminentis fati indicio exhortuit. Oraculum enim erat vetus, fatalem Æacidæ locum fore, ubi taurum cum lupo dimicantem spectavisset. Igitur retrahere copias, & ex urbe recedere cogitabat. Sed occurrentes cum Heleao Pyrrhi filio subsidiarii milites elephantique, clauserant exitum: hisque in urbem irrumperere, illis exire nitentibus, cum hostes etiam acriter insisterent cendenti turbæ, & in angustiis viarum spatiis Argivi, Macedones, Epirotæ, quique cum Areo venerant Spartani Cretesque, ad hæc elephantum quidam truderent inter se truderenturque; omnia trepidatione & tumultu miscebantur.

XLIII. Dum inter hæc Pyrrhus ubique consiliis, clamoribus, manu, servare suos, arcere hostes, satagit; a juvene quodam Argivo lancea leviter vulneratus est. Matrem hic habebat anum pauperulam, quæ cum aliis mulieribus ex tecto domus prælium spectans, cum Pyrrhum in auctorem vulneris sui toto impetu ferri videret, periculo filii attenta, protinus tegulam corripuit, ac utraque manu libra-

tam in caput Regis demisit. Tam inhonorus & miserabilis exitus Pyrrho fuit, quo majorem animi robore, solertia consiliorum, scientia rei militaris, multisque præterea corporis ingeniique bonis, ætas illa non tulit. Sed fructum laboris operumque suorum, & ornamenta virtutum, ambitione corrumpit, felicius futurus, si suis rebus contentus; potentissimus autem omnium, si quam in quærendis opibus industrius fuit, tam in retinendis circumspèctus esse potuisset.

XLIV. Hæc igitur postquam in Italia sunt audita, pro variis hominum studiis, lætitia luctuque civitates affecere. Sed alii quidem populi, qui suæ spontis erant, pacem amicitiamque Romanorum, quibus poterant conditionibus, redimebant: Tarentinum, ne suis consiliis uteretur, præsidium Epirotarum & præfectus arcis Milò vetabat. Inter quos res paulatim ex levioribus injuriis atque contumeliis in apertas inimicitias processerat. Itaque maximis in difficultatibus constituti Tarentini, cum extra mœnia Romanos hostes, intus Epirotas haberent; missis legatis auxilium a Carthaginensibus petiverunt. Pœni, qui Siciliæ magnam partem tenerent, & maritima Italiæ loca sibi, quam Romanis, accedere mallerent; specie ad ejiciendum Milonem, ceterum si Tarento potirentur, etiam adversus Romanos tuituri, cum instructa classe promte accurrerunt. Cum inter hæc etiam L. Papirius consul advenisset, undique clausa Tarentus erat, Romanis a terra urbem simul arcemque, Pœnis eandem arcem a mari obsidentibus.

XLV. In hoc statu rerum, cum haud minor Romano cura esset, ne Carthaginenses arcem caperent, quam ne a se non caperetur, omnes victoriæ rationes subtiliter indagans, Milonem per idoneos internuntios tentat, *si Tarentum ejus opera obtinuisset, ipsum popularesque cum rebus suis incolumes dimissurum esse*, pollicitus. Milo nihil ex presentibus videns potius, cum Tarentinis agit, *ut junctis con-*

§ XLIII. Strabo l. 8. Ovid. Dionys. ap. Vales. Just. 25, 4 & 5. § XLIV. Zonar. Oros. 4, 3. Liv. Epit. 14.

*filiis de communi salute deliberarent* : sensimque persuadet, *ut se legatum ad L. Papirium mitterent, de conditionibus ex omnium utilitate ferendis diligenter acturum*. Ut homines tædio curarum periculorumque fessi lubenter assensu sunt, ad consulem identidem profectus, quocum fallaciam istam composuerat, luculentas plerumque conditiones, & spem non pœnitendæ pacis certam referebat. Ea credulitas, si quid in animis Tarentinorum diligentæ ac curæ superfuerat, securitate fiduciaque resolvit : occasionemque Miloni præbuit, qua non arx modo, sed etiam urbs ipsa Romanis traderetur.

XLVI. Carthaginienfes hoc eventu minime læti, sed *amicos Romanorum se ferentes, neque aliam ob causam, quam ad expellendum Milonem venisse*, discesserunt. Auctores habeo, Pœnos a Romanis monitos, *si Tarentinæ rei se immiscerent, contra fœdera facturos videri*, non modo denuntiationem hanc insuper habuisse, verum etiam in acie Tarentina contra Romanos auxilia Punica stetisse : qua ex offensa maxime bellum, quod adversum Carthaginienfes in Sicilia gestum est, eruperit. quanquam Pœni perjurio culpam tegere volentes, *nihil ab se dolo malo factum esse*, juravissent. Ego sicut non abnuerim, vel inter ipsos duces tale quid agi potuisse; dum Romanus Pœni præsentiam ægre patitur, Pœnus instituto suo quam potest causam prætexit; vel populos ipsos publice isthæc disputavisse : ita veriores belli mox exorti causas alias fuisse existimo; quod neque statim bellatum est, & postea natum in Sicilia bellum, ob Mamertinos præcipue, manentibus adhuc Punicis fœderibus, exarlit. Aucto ad hunc modum imperio, redeuntes Romam consules a gratulantibus excepti, magno omnium favore, magnaque sua gloria triumpharunt.

XLVII. Inter hæc Q. Fabius Gurges & ceteri, qui missi Alexandriam fuerant, in Senatu legationem renuntiarunt : *Omni se genere hospitalitatis ac benevolentia acceptos habitos*

§ XLV. Front. Strat. 3, 3. § XLVI. Zonar. Oros. Liv. Epi. Gotof. Viterb. Paul. Diac. hist. misc. 2, 23.

que: munera venientibus magnifica missa: majora etiam data discedentibus. Sed priora quidem illa modeste recusari, magis ex dignitate abstinentiaque Romana visum esse: cetera, quæ omnino recipienda fuissent, a se prius quam aliarum rerum quidquam agerent, in ærarium populi Romani delata esse. Sed & Alexandria, cum ad solennes epulas invitatis, more apud Reges usitatio, coronæ aureæ missæ essent, eas ominis causa acceptas, noctu statuis Regis imposuisse. Senatus & successu legationis, & gravitate legatorum mire lætus, gratiis actis, quod sua continentia mores Romanos externis quoque nationibus venerabiles reddidissent, restitui munera, quæ in ærarium detulerant, præcepit. Continua populus, ita demum republicam optime gestum iri, dictitans, si ditescendi ex publicis negotiis infame studium tolleretur, idem scivit: quæstoribusque pecuniam eam, uti jussu erant, promte restituentibus, digni hoc abstinentiæ fructu homines, pari gloria & recusarunt Ægyptias opes, & receperunt. Q. Fabium, qui caput legationis ejus fuerat, hoc quoque nomine prælatum tot egregiis viris existimo, ut a Censoribus M. Curio, L. Papirio Princeps senatus legeretur: cum nobilitate domus, & paternis meritis, simul consulatibus duobus totidemque triumphis, nulli jam honori impar videretur.

XLVIII. Iisdem consulibus M. Curius censor Anienis amnis aquam in Urbem ducendam locavit. ex manubiis hostium. Ex quibus adeo privatim ditari noluit, ut aliquando, cum a malevolis interversæ pecuniæ argueretur, gutto ligneo, quo ad sacrificia uti consueverat, in medium prolato, juraverit, *se nihil præterea de præda hostili suam in domum intulisse*. Vir profecto tum rerum gestarum magnitudine, tum etiam aliarum virtutum illustribus experimentis meritis, ut quædam ejus insigniora dicta factaque, modico excursu annotentur. Neque vero indignum, aut historiæ condendæ officio alienum judico ea referri, per quæ homines in republica versaturi, haud fane minus quam consiliis

§ XLVII. Marm. Capitol. Just. 18, 2. Val. Max. 4, 4, 9. Tacit. 1, 57. Zonar. Front. de aquæduct. Plin. 7, 14.

operibusque militaribus, ad felicitatem ex virtute petendam instruantur. Bello Sabino cum tantum prædæ fuisset, ut tum primum Romanos gustum divitiarum cepisse scriptor historiae Fabius autumat, Curius nihil ex tam opulenta victoria, præter conscientiam famamque, sibi vindicans, in pristina paupertate duritieque mansit: etiam publicæ continentiae magister idem idoneus, & severus custos.

XLIX. Agri enim captivi parte maxima publicata, privatis haud amplius quaterna dena jugera viritim divisit; ipse, cum senatus majorem ei portionem assignaret, eodem quem ceteris dederat agri modo contentus fuit, *malum esse civem* dictitans, *cui non idem, quod aliis, satis esse posset*. Hæc deinde in Sabinis villa Curiana fuit, in qua forte rapa torrentem victi nuper Samnites cum adivissent, ingensque pondus auri afferrent dono; *ego hæc, inquit, in filiis meis esse malo, & aurum habentibus imperare*. Cui villæ cum vicina prædia senior Cato possideret, eo ventitabat crebro, tenuemque casam, & rusculum, quod vir tantus post tres triumphos manibus suis foderat, cum recordatione vitæ abstinentissime actæ contemplatus, animum ad parem constantiam, antiquæ simplicitatis & virtutis æmulatione componebat. Et profecto viris haud aliis opus fuit ad imperii futuri tam firma ponenda fundamenta, quæ & impositam molem perferre possent, & non exteris modo concutientibus resisterent, sed ipsis quoque domesticis vitiis ægre vixque convellerentur.

§ XLVIII. Auſt. de Vir. ill. c. 30. Strab. l. 5. § XLIX. Plut. in Apophth. Front. Strat. 4. 3. Plin. 18. 3. Auſt. de Vir. ill. Cic. in Catone. Plut. in Cat. maj.

---

JOANNIS FREINSHEMII  
SUPPLEMENTORUM  
LIVIANORUM  
LIBER V.

IN LOCUM LIB. XV LIVIANI.

---

EPITOME  
LIBRI DECIMI QUINTI.

*Victis Tarentinis pax & libertas data est. Legio Campana, quæ Rhegium occupaverat, obsessa, deditione facta, securi percussa est. Cum legatos Apolloniatium ad senatum missos quidam juvenes pulsassent, dediti sunt Apolloniatibus. Picenibus victis pax data est. Colonia deducta, Ariminum in Piceno, Beneventum in Samnio. Tunc primum populus Romanus argento uti cepit. Umbri & Sallentini victi in deditionem accepti sunt. Quæstorum numerus ampliatus est, ut essent octo.*

I. **S**UPERATIS post multa certamina validissimis hostibus, partaque per Italiam pace, supererat ea deliberatio Patribus, quemadmodum victoria bene uterentur. Multari parte finium omnes, qui arma contra tulerant, populos placuit: severiore adversum Tarentinos vindicta, quanto intemperantius offenderant. arma navesque tradere iussis,

muri quoque diruti sunt, tributumque civitati impositum: pax modo cum libertate concessa. Nihil deinde visum antiquius, quam perfidiam puniri legionis, quæ Rheginis dolo circumventis, oppidum eorum decimum jam annum pro suo possidebat. Hi cum ante providissent, Romanis rebus quotidie lætioribus, suum scelus inultum non fore, quidquid ad communiendam urbem, viresque defensionis parandas pertinebat, sollicitè administraverant: non ignari, quod fraude vique partam esset, nisi iisdem illis artibus diu retineri non posse. Præter insitam ferociam freti erant amicitia Mamertinorum; successuque adversus Carthaginenses, deinde Pyrrhum, quo urbis suæ animorumque fortitudinem experti fuerant, hostibus ab obsidendi consilio cito depulsis. Itaque in tantum creverant rebellium & desertorum animi, ut Crotonem prodentibus quibusdam capere ausi, præsidium Romanum trucidare, urbem diruere sustingerint.

II. Igitur L. Genucio, qui cum C. Quinctio consulatum eo anno gerebat, mandata est ultio: compulsisque intra mœnia perduellibus urbs obsessa. Sed illis suas & Mamertinorum vires non instrenue opponentibus, cum incommoda quædam passus consul etiam rerum necessariarum penuria laboraret, ab Hierone, qui Syracusis principatum obtinebat, frumento & milite adjutus est. Hic enim Mamertinis insensus, etiam socios eorum Rhegium tenentes oderat: incrementis quoque Romanorum, ut eorum animos ad usum sequentium temporum beneficiis occuparet, movebatur. Sic ad extremum ad deditionem urbe coacta, Mamertinos certis conditionibus adstrictos dimisit consul, perfugas & latrones, quorum multi Rhegium, velut ad asylum concurrerant, affecit supplicio: legionarios autem milites abduxit Romam, ut de ipsis Senatus statueret.

III. Magnum inde publicæ severitatis exemplum sequitur. Senatus primum *omnes, qui adducti a consule fuerant, in*

§ I. Zonar. Liv. Epit. 15. Polyb. 1, 7. Oros. 4, 3. § II. Zonar. Liv. Epit. 15.

*carcerem cœni jussit : ut inde ad supplicium capitis promerentur.* Deinde, cum intercessisset Senatusconsulto tribunus plebis M. Fulvius Flaccus, denuntians, *ne in capita civium Romanorum adversus leges & morem majorum animadverteretur*; constantia Patrum tribunitii clamores sprete sunt: suppliciumque de nocentibus sumtum. Ne tamen invidia facti tam acerbi, plebisque mœstitia gravior foret, si tanta hominum multitudo eodem tempore interficeretur; singulis diebus quinquaginta ducti sunt, quos virgis caesos securi percusserunt. Senatus etiam corpora sepeliri, mortemque cuiusquam eorum lugeri vetuit. Decius Jubellius, qui ad eam usque diem oculis suis superstes vixerat, ut majore cum dolore moreretur, in carcere manus sibi attulit. Plures auctores secutus legionem totam, hominum millia quatuor Romæ in foro securi percussa rotuli.

IV. Sed verius puto, quod a Polybio traditur, *ex ea legione vivos in potestatem venisse admodum trecentos; reliquum numerum, dum urbs capitur, ferociter repugnando cædi maluisse, non ignaris omnibus, post delicta tam enormia, nihil ex deditione aliud, quam plures cruciatus, mortemque graviore cum ignominia conjunctam expectari posse.* Urbs Rhegina prioribus incolis, quod eorum usquam reperiri conquirique poterat, cum libertate legibusque suis, reddita est. Hoc justitiæ fideique documentum Romanæ civitatis existimationem largiter auxit: neque minus amoris eo factò, quam per arma metus, apud Italicos vicinosque populos quæsitum. C. deinde Genucii, Cn. Cornelii consulatus bellum cum Sarsinaribus habuit. Umbrorum ea gens Apenninum incolentium, quibus causis in arma fuerit acta, quaque spe formidabili jam Romanorum potentiæ se opposuerit; silentibus scriptorum reliquiis, divinare non potui. Totius etiam belli series penitus intercidit, nihilque ad nos ex veterum istarum memoria pervenit, nisi quod a Cn. Cornelio de Sarsinatibus triumphatum est.

§ III. Val. Max. 7. 2. 15. Front. 4. 1. Appian. ap. Vales. § IV. Liv. 28, 28 & 31. 31. Polyb. 1, 17 & 2, 16.



V. Asperissimam his consulibus hiemem fuisse Romæ traditur; ut arbores emortuo succo aruerint, Tiberis densa glacie concreverit, jumenta & pecudes inopia pabuli contabuerint. tantaque fuit inclementia cœli, ut in foro Romano nives horrendæ altitudinis per dies quadraginta continuos duraverint. Res inusitata, ut fit, a multis prodigii loco habita, vehementi terrore hominum animos percussit: intentiore statim metu, cum Q. Ogulnio Gallo, C. Fabio Pictore magistratum ingressis multa cernerentur ostentia, multa nuntiarentur. Romæ enim ædes Salutis, & pars muri sub eodem loco, de cœlo tacta. Lupi tres ante lucem Urbem ingressi semesum cadaver intulerunt, membratimque laceratum, in foro, ipsi strepitu hominum exterriti, reliquerunt. Formiis mœnia fulmine sæpius icta disjectaque nuntiabantur: & in agro Caleno diducta repente terra flammam erupisse alutam, quæ triduo toto flagrans quinque agri jugera usque in cinerem exusserit, ut non modo fruges eo loco cunctæ, sed etiam arbores radicitus emorerentur. Plus ea res timoris Romæ, quam calamitatis attulit. Nihil enim magnopere consecutum est, nisi quod bellum a Picentibus ortum, annoque sequente confectum, eam quoque regionem Romanæ ditioni adjecit.

VI. Interea in Urbe signandi argenti primum initium fuit, auctis jam successu rerum opibus, cum ad eam diem æs tantummodo Romæ in promiscuo pecuniæ usu fuisset. tum autem denarii quinarique ex argento cusi, qui pro libris totidem æris essent; alique minores, qui dupondio & semisse cum æstimarentur, ex re sunt sestertii appellati. *Moneta* dicta, quod in aede Junonis Capitolina cuderetur. Cognomen enim illud inditum Junoni fuerat, quod bello Pyrrhi & Tarentino consulentes de pecuniarum inopia Romanos monuisset, *pecuniam non defore, justitiam & arma colentibus*. Consules Q. Gallus, C. Fabius ad comprehendendum Lollium Samnitum profecti sunt: qui cum obses Romæ

fuiſſet, clam elapſus, caſtello quodam occupato faciebat. latrocinia : populariumque animos vix adhuc certa pace compoſitos, ad defectionem incitabat.

VII. Atque is quidem cum collectitia & maximam partem inermi turba non diu reſtitit; in Caricinis (ea quoque Samnii pars eſt, Frentanis propior) laboris periculique pluſculum fuit. Dum locus munitus, qui prædarum Lollio receptaculum fuerat, expugnatur; ancipiti caſu, ex ſpe magna in timorem, ex timore ad victoriam ſubito ventum eſt. Inducti quidam ex propugnatoribus impunitatis pacto, nocte ſublucſtri Romanos intra mœnia receperunt. Concurrentibus ad tumultum oppidanis, cum manus conſeri cœpiſſet, magna vis nivis repente cœlo delapſa conſpectum eripuit præliantibus. Ea res Caricinis adverſus locorum ignaros ita profuit, ut maximo in diſcrimine Romana ſigna verſarentur: jamque prope aberat, ut cogerentur referre pedem, quod inter tenebras fieri citra magnum detrimentum nequibat; cum ſubito, ceſſante nivium caſu, reddita luna eſt; cæcoque metu liberatis proutum ad victoriam iter virtute partum. Eæ turbæ impedimento videntur fuiſſe, ne Picentes iis conſulibus perdomarentur.

VIII. Inſequente autem anno P. Sempronius Sophus, Appius Claudius Cæci F. Craſſus conſulatu inito bellum illud aggreſſi, rem ex ſententia confecere. Sub eadem iſta tempora in Piceno, qui ager Senonum Gallorum fuerat, Ariminum colonis occupari placuit; Maleventum in Samnio: ſed nomine, quod ominoſum eſſe videbatur, mutato, *Beneventum* colonia dicta eſt. Sabinis, qui ante aliquot annos accepti in civitatem fuerant, tum ſuffragii quoque jus datum. In Umbria res etiam a Claudio geſtæ, Camarinumque oppidum captum: incolæ ſub corona venditi. ſed quia parum liquida fide geſtum ab imperatore bellum videbatur, utilitatem populus Romanus juſtitiæ poſthabuit: *conquiſtiſque Camertes redimi ab emtoribus, receptiſque in civita-*

§ VI. Liv. Epit. 15. Zonar. Plin. 33, 3. Suid. in Μόνητος.  
§ VII. Ptolem. Zonar.

tem locum ad habitandum in Aventino colle assignari, & prædia sua restitui, jussit.

IX. At Picentinæ victoriæ majus gaudium fuit: resque digna visa, quæ denariis argenteis nuper cudi cœptis impressa, & pluribus statim innotesceret, & ad memoriam servaretur posteritatis. Nummos Picum repræsentantes, Saturni filium (nam is gentis auctor creditur) & ab alia parte dextram a magistratu Romano porrectam supplicanti, ex senatusconsulto cudendos curavit Q. Cædicius Quinti filius. Et certe luculentam ea gente pacata virium accessionem factam vel inde constare potest, quod trecenta sexaginta Picentium millia in fidem populi Romani venisse traduntur. Eo bello triumphum consules meruerunt duxeruntque: insigniore tamen P. Sempronii gloria, quod adversus validiores hostium copias, periculoque & contentione majore certaverat. Res enim prodigiosa tum accidit, ut instructa utrinque acie, sub ipsum committendi prælii tempus, terra subito moveret.

X. Sed consul apta temporis oratione territos militum animos confirmavit: *haud minus hostes religione non necessaria perturbatos dictitans, ejusque victoriam fore, qui excusso inani metu adversarium sui non bene compotem prior invassisset.* Templo deinde Telluri deæ voto, si populo Romano victoriam dedisset, impetum in hostes fecit. Neque hi segnius exceperere certamen, cædesque tam atrox fuit, ut etiam victoris exercitus pars minor evasisse dicatur. Ab hoc prælio, cum alia Picentium oppida, tum caput gentis Asculum, situ merisque tutissimus locus, Sempronio se dediderunt. Hujus deinceps exemplo Picentium omne nomen imperata facere pollicitum, a Senatu pacem obtinuit. Jam Italia tota, qua Siculum Joniumque mare spectat, perdomita, soli restabant Sallentini, qui ad extremas Italiæ oras colunt, qua mare superum Jonio committitur. ad hos igitur a Picentibus

§ VIII. Eutrop. l. 2. Vell. 1, 14. Liv. Epit. 15. Val. Max. 6, 5, 1. Pigh. in ann. 485. § IX. Plin. 33, 3. Col. triumph. Eutrop. l. 2.

bellum, veluti contagione quadam pervasit, iisque M. Attilio Regulo, L. Julio Libone consulibus indictum est. Crimini datum, quod Pyrrhum ex Epiro venientem, portibus oppidisque suis recepissent.

XI. Ceterum commoditas portus Brundusini, qui eodem vento spirante & dimittere naves potest, & accipere, facilisque inde in Illyricum & Epirum trajectus, quodque opportunius videbatur ipsis Italiæ finibus imperium terminare, veriores belli causæ putabantur. Triumpharunt ex his ambo consules una die, quæ fuit octava Kalend. Februar. Fulvis acie Sallentinis, nobilissimum eo tractu oppidum Brundusinum ceperant: aliaque prospere gesserant: adjuti, ut ferebant, a Pale pastorum dea, quæ *præmium victoriæ* petiisse ultro dicitur, *ut ædes sibi Romæ dedicaretur*. Majori parte Sallentinorum ab his subacta, victoriam sequentis anni consules absolverunt. Numerius Fabius C. F. M. N. & D. Junius D. F. D. nepos Pera fuere. Ab his Umbri simul atque Sallentini in deditionem accepti.

XII. Sic universa jam Italia perpacata, qua maribus & anime Pado finitur, e vestigio per insulas propinquas, & adsitam Jonio Adriaticoque pelago continentem, aliorum spe, aliorum formidine celebrari Romana magnitudo coëpta est. Nam quibus studium erat per injurias vicinorum crescendo, suis consiliis impedimentum a Romano metuebant: aliis ex diverso præsidium istud adversus impotentiam adversariorum, tanquam divinitus oblatum amplexantibus. Primi omnium Apolloniæ missis Romam legatis in amicitiam recipi petierunt. Urbs illa sexaginta stadiis a mari recedit, a Corinthiis & Corcyræis condita, commodumque portum habet, qua proximus in Græciam a Brundisio trajectus est. Illyricæ Macedonicæque circum gentes colunt: igitur inter potentes & cupidos libertatem suam ægre tuebatur. Ab Senatu non tam civitatis ejus opes, quæ tenues

§ X. Front. Strat. 1, 12. Flor. 1, 19 & 20. Oros. 4, 4. Strab. l. 6. Liv. Epit. Eutrop. §. XI. Æn. l. 6. Zonar. Column. triumph. Flor. 1, 20. Liv. Epit.

erant, quam spem futuri, & apertam ad majora occasionem reputante, perquam humaniter accepta est legatio. quo gravior mox vindicta fuit in quosdam ordinis Senatorii juvenes, qui legatos orta contentione pulsaverant.

XIII. Q. enim Fabium neque magistratus dignitas, adilitatem enim gerebat, neque generis amplitudo tutata est, quin Apolloniatis ob eam noxam dederetur. Deditus est etiam Cn. Apronius itidem ædilis, ejusdemque culpæ reus. *Hos igitur per feciales legatis Apolloniatarum tradi, quæstoremque cum his Brundisium ire* Senatus censuit, *ne quid in itinere legatis a deditorum propinquis amicisve noceretur.* Magnum sane fidei publicæ documentum; sed non inferius prudentiæ: cum enim opinione justitiæ nationum exterarum animos ad amicitiam suam attrahere desiderarent; magnopere intererat, injurias eorum, qui primi ad societatem jungendam venissent, quam accuratissime vindicari. neque enim quidquam destinatis eorum tam inimicum fieri potuisset, quam si commissum esset, ut & Apolloniatis facti sui, & alios exempli pœniteret. Atque ab hac utilitate receptum, constanterque secutis etiam temporibus servatum est, ut qui legatos civitatis liberæ pulsavissent, iis, quorum erant legati, dederentur. Ceterum Apolloniatis deditis in suum oppidum adductis, plus se commodi ex humanitate, quam ex vindicta, consecuturos prudenter arbitrati, domum incolumes remiserunt.

XIV. Hoc anno ab utroque consule, bini sunt triumphi ducti. D. Junius ante diem quintum Kal. Octobres, Numerius Fabius ante diem tertium Nonas ejusdem mensis de Sarfinatibus Umbrorum populo triumpharunt: iterum Kalend. Febr. Fabius, Nonis Junius, de Sallentinis & Messapiorum gente, quæ Sallentinos accolas auxiliis juverat. Is finis eo tempore bellorum Italicorum fuit. Nam quod anno sequente, Q. Fabio Gargite tertium, L. Mamiliio Vitulo consulibus, ad Volsinios gestum est, non cum justis

§ XII. Strab. l. 7. Liv. Epit. § XIII. Dionys. ap. Vales. Zonar. Val. Max. 6, 6, 5. l. 17. ff. de leg.

T. Liv. Vol. III.

M

hostibus bellum, sed adversum scelestâ servitia pro sociis ultio fuit. Etruscorum gens opulentissima Volſinii fidem populi Romani contra servos quondam suos implorabat. Uſi enim inepto conſilio, ſive quod ſuperioribus bellis attritas vires ita recreari poſſe ſperabant; ſive deliciis ipſi diffuentes, armorum laborem fugiebant: ſervis libertate & civitate donatis, ea permiſerunt. Inde communicatis etiam honoribus in Senatum legi, magiſtratusque fieri cœperunt.

XV. Ita brevi oppreſſis veteribus civibus, translataque in ſe republica, datam a dominis libertatem adverſus ipſos inſolentiſſime exercuerunt. Matronas honeſtas virginesque per vim conſuprari: maritis parentibuſque de injuria conquerentibus pro vindictâ legum, contumelias & ludibria rependi: arbitrio petulantiffimorum nebulonum rapi, trahi, vexari omnia, Volſiniis jam in morem venerat. Neve prætereatur inſigne monumentum, quem ad finem ſervilium animorum belluina impudentia poſſit procedere, ſi naſta potentiam fuerit; lege lata ſanxerunt, *uti libertinis in patronorum filias ac uxores ſupri juſ eſſet: floremque virginis ingenuo nupturæ primum aliquis ex ſuo ordine delibaret.* Volſinienſes igitur veteres, cum neque ferre diutius miſerias iſtas, neque propulſare viribus ſuis poſſent; conſilio clam inter ſe habito, legatos Romam mittere decreverunt. Ii ſecretis precibus impetrato, *uti privatis in adibus Senatus cogeretur:* perniciem enim ſibi, ſi res emanafſet, impendentem proſpiciebant: oratione flebili calamitates urbis ſuæ expoſuerunt. qua moti Patres, opem miſeris ad recuperanda priſtina jura promiſerunt.

XVI. Sed hæc cum acta ſecreto putarentur, iis, qui fuerant accuſati, per Samnitum quendam indicata ſunt. Is, cum in ædibus, ubi Senatus convenerat, hoſpes domini ægrotaret, per oblivionem eo in loco relictus exceperat dicta, prodideratque. Quæſtiones igitur de legatis Roma reverſis habitæ ſunt; compertoque negotio, & ipſi & prin-

cipes alii civitatis crudeliter interfecti. Eo justior inferendi belli causa visa : missusque cum exercitu Q. Fabius Cos. occurrere ausos in fugam vertit, magnumque fugientium numerum cecidit : ceteros, qui intra munimenta se receperant, acris operibus oppugnare instituit. Sed illis non segniter resistentibus, cum levia, ut solet, certamina crebro fierent, consul, dum incautius inter tela versatur, vulnus accepit, & in ejus deinde curatione decessit. Obfessi, casu eo cognito, eruptionem summis viribus fecere, sperantes, exercitum interitu ducis turbatum, si subito invaderetur, a mœnibus submoveri posse.

XVII. Verumtamen eventus prælii contra dedit : excepti ferociter a militibus Romanis, & in urbem iterum cum clade compulsi sunt. Huic ego pugnae Decium Murem præfuisse crediderim : hic enim legatus esse Fabio, & post necem ejus, donec successor veniret, bellum administrare potuit. atque inde esse reor, quod apud negligentiores historicos, Volsinienfis belli cœpti finitque titulus Decio Muri adscriptus est. Censores eo anno creati Cn. Cornelius L. F. Cn. N. Blasio, & C. Marcius, qui cum antea quoque censuram gessisset, in hoc honore Censorinus appellatus est. Memorabilis hujus Marcii moderatio fuit, qui accepta potestate, quam non ambiverat, populum ad concionem vocatum gravissima oratione increpuit, *quod magistratum illum bis eidem mandavisset, ejus tempora, non aliam ob causam, quam quia nimia potestas ejus esset, coarctanda sibi majores judicassent.* Inde profecta lex est, qua cautum, *ne quis Censor iterum fieret.*

XVIII. Eodem anno Quæstorum numerus ampliatum est. Quatuor hactenus suffecerant : urbani duo : totidem ad bellum exeuntibus consulis adjungebantur. Sed proximis aliquot annis, aucta majorem in modum republica, vectigalibusque ac portoriis multis accedentibus, duplicari numerum istum necesse fuit. Appius deinde Claudius, qui

§ XVI. Jul. Obseq. de prodig. c. 27. § XVII. Auct. de Vir. ill. c. 36. Marm. Capitol. Valer. Max. 4, 1, 3.

in magistratu Caudex cognominatus est, & M. Fulvius Flaccus consules sequuntur: annus cœpto primum adversus Pœnos in Sicilia bello memorabilis. Tum enim inter duas potentissimas civitates inimiciæ primum erupere, quæ multos post annos, illatasque & acceptas horrendas clades, non nisi alterius excidio finiri potuerunt. Sed prius de Carthagine quædam altius repetenda sunt, quam ad bellorum istorum expositionem accedamus. erunt enim his in rebus enarrandis multa intellectu judicatuque difficiliora, nisi primum origo urbis & incrementa cognoscantur.

§ XVIII. Plut. in Coriolan. c. 1. Liv. Epit. 15. Tacit. 11, 12, 6. Agell. 17, 12.

---



JOANNIS FREINSHEMII  
SUPPLEMENTORUM  
LIVIANORUM

LIBER VI.

IN LOCUM LIB. XVI LIVIANI.

EPITOME

LIBRI DECIMI SEXTI.

*Origo Carthaginensium & primordia urbis eorum referuntur : contra quos & Hieronem regem Syracusanorum auxilium Mamertinis ferendum censuit Senatus ; cum de ea re inter suadentes , ut id fieret , dissuadentesque contentio fuisset. Transgressis tum primum mare equitibus Romanis , adversus Hieronem sæpius bene pugnatum. Petenti pax data est. Lustrum a censoribus conditum est. censa sunt civium capita ducenta nonaginta duo millia , ducenta viginti quatuor. D. Junius Brutus munus gladiatorium in honorem defuncti patris edidit primus. Colonia Æternia deducta est. Res præterea contra Pænos & Volsinios prospere gestas continet.*

I. **C**ARTHAGINEM a Tyriis Phœnicibus conditam esse , præter veteris historiæ fidem , etiam perpetua civitatum istarum , donec floruerunt , amicitia ; præterea linguæ nunc quoque manentis manifesta similitudine , certum atque constatum est. Ex ea gente ferunt Eüsam , quæ & Dido cognoc-

minata est, filiam Agenoris Belo geniti, quod Pygmalionem iisdem parentibus ortum, ob injustam mariti sui Sichæi cædem odisset, patria profugam, eum Africæ sinum, peninsulamque in qua post condita Carthago fuit, tenuisse: parvis admodum rei tantæ initiis, ac potentiæ, quæ deinceps consecuta est, spem nullam ostendantibus. Quippe non plus terræ ab incolis emisse Elisa creditur, quam corio bovis amplecti posset: hoc in tenuissima lora dissecto majus aliquanto spatium, quam venditores intelligebant peti, comprehendit; arcique struendæ suffecit locus, quam ex eo *Byrsam* appellatam putant. Inde multis, commerciorum gratia cum advenis colendorum, sedes juxta statuentibus, cum jam instar civitatis effectum esset; Afrique mansuetos homines & divites secum retinere cuperent: facile assensu sunt venientibus ab Utica legatis, qui *suo exemplo* (nam & Utica colonia Tyriorum erat) *ad condendam iis locis urbem* hortabantur. Ita convenit, ut Afri sedem oppidi Phœnicibus concederent; hi annum eo nomine vectigal penderent Afri.

II. Operi perfecto Elisa lingua sua nomen imposuit *Carthadas*, quod urbem novam significat; Græci Carchedona, Romani aberrante, ut fit, pronuntiatione Carthaginem vocaverunt. Ea cum & vicinos faventes, & populum industrium, & quod maximum est, sapientem reginam haberet; admirandis incrementis brevi convaluit. Hæc ante Romanam urbem conditam anno circiter septuagesimo acta videntur: nam inter auctores, ut in re tam antiqua, parum convenit. Sed Elisæ quemadmodum vita casuum varietate nobili, sic etiam memoranda mors fuit. Jarbas Africanæ cuiusdam gentis regulus nuptias ejus ambibat, ni assequeretur, bellum minitans. Sed illa castitate insigni, & mariti prioris amore, nuptias averfabatur: bellum rebus adhuc nascentibus & teneris exitiosum fore intelligebat. Igitur tempore ad deliberandum sumto, quasi tandem vicisset ani-

§ I. Just. 18, 5. Appian. Lybic. Strab. l. 17. Liv. 34, 61. Vell. 1, 2, 6.

num, & ad nuptias Africanas adduxisset; in extrema tum urbis parte *rogum exstrui* jussit, *priusquam novum matrimonium ingrederetur*, *Sichæo suo inferias daturam* præferens. tum hostiis multis immolatis, ad ultimum ipsa conscendit pyram, & gladio, quem secum attulerat, sibi mortem consecravit; caritate viri & civium propriæ incolumitatis curam superante. Retulerunt Carthaginienses quam potuere gratiam: & admiratione virtutum ejus, donec respublica salva fuit, pro dea venerati sunt. ædes in loco, ubi vitam exuerat, structa: ipsa *Dido* (sic sermone suo viraginem Pœni vocant) appellata.

III. Cum deinde nemo unus successione regni post Elisam dignus haberetur, mixta optimatum & populi potestate gubernari civitas cœpit. Regia tamen appellatio manebat, sed ii Lacedæmoniis regibus similes erant; nisi quod nulli certæ domui addictus honos, ut quisque nobilium divitiis & virtute ceteros anteibat, mandabatur. Hi foris bellorum administrationem habebant; unde *Prætores* atque *Dictatores* a Romanis, potestatem eorum cum sua republica comparantibus, appellari solent: domi principes consilii publici erant: cum eo de negotiis civitatis statuebant: de majoribus rebus referebatur ad populum; ejus judicium in dissensu Regum atque Senatorum valebat. eidem jus erat etiam adversus placita Regibus & consilio sciscendi, si forte contra rempublicam esse (id autem licebat cuivis coarguere) viderentur. Quæ nimia populi potestas, cum assentatorum studiis, ut fieri amat, in immensum augetur, sequentibus temporibus Carthaginiensium rebus vehementer nocuit: in Senatu porro Seniores triginta quasi sanctius consilium erat: & horum in ordine universo plurima vis. Decoris publici disciplinæque custodiam censoria potestate Præfectus morum exercebat.

§ II. Cato ap. Solin. Bernegg. ad Just. 18, 6, 9. Sil. Ital. l. 1. Sciv. in Virg. *Æn.* 1. v. 344. § III. Arist. *Polit.* 2, 11. Bongars. ad Just. 22, 7. Polyb. 6, 49. Liv. 39, 6. Corn. Nep. in *Hamile.* c. 3.

IV. Successu temporum, majoribus jam populi Carthaginienſis opibus, plures ad bellum imperatores deligi cœperunt. Ex quibus præcipuæ virtutis & felicitatis Mago, cum duos filios, ſuis artibus inſtructos reliquiſſet, atque eandem illi quoque numeroſiori jam ſoboli veluti per manus traderent, evenit, ut ejus familiæ nimia potentia novis remediis coercenda videretur: creatique centumviri, penes quos de iſſis quoque ducibus judicia forent: formidabilis poteſtas, vel amplitudine juris, vel diuturnitate temporis, perpetui enim erant; cum jam Reges ipſi non in perpetuum, neque longum adeo ad tempus, ſed annui crearentur: quos domi frequentius *Suffetes*, id eſt, judices nominabant, conſulibus Romanorum ſimiles. Sed centumviros inſolentius ſe gerentes lex Hannibalis in ordinem coegit, ſancito, *ut in ſingulos annos judices legerentur, ne quis biennium continuum judex eſſet.*

V. Sacra maxime Tyro advecta colebant; quædam etiam poſt aſſumta. Junonis cultus præcipuus: neque levis *Æſculapii*, cui magnificum templum in ipſa urbe ſtruxerunt. Apollinis etiam locuples ædes fuit, laminis aureis tecta, cum celebri ſimulacro, quod exciſa Carthagine Romani avectum, juxta circum maximum collocaverunt. Ad Herculem vero Tyrium quotannis magna cura delectam navem, cum decimis annuorum proventuum, aut partarum bello manubiarum, mittebant. Ab iſſidem conditoribus ſuis, alium etiam ritum horrendæ religionis hauſerant, ut Saturno, quem ipſi *Belum* vocant, quotannis victima humana facerent: cujus immanitatis reliquiæ ne cum ipſa quidem urbe tolli penitus abolerique potuerunt. Ceteros civitatis mores plerumque commerciorum utilitas moderabatur: quibus gens natura & majorum inſtituto deditiſſima, prudens imprudens omnes ſuas rationes conſiliaque accommodabat.

§ IV. Juſt. Corn. Nepos. Liv. 30, 7. & 32, 32. § V. Virg. l. 1. Strab. l. 17. Appian. in Punicis. Plutarch. in Flamin. cap. 1. Polyb. legat. 114, 3. Diœd. 20, 14. Juſt. 18, 7. Hieron. in Ha. c. 4. Plin. 39, 5, 37.

VI. Hinc inevitabili malo, divitiarum admiratio honosque comitia corripit magistratum; virtutem pecuniæ subiectam debilitavit; populum inflammavit opum cupiditate, fraudumque & mendaciorum servili consuetudine infecit; remque publicam harum rerum se studio totam tradere compulit. Inde enim processit, ut neque fidei multum in Punicis foederibus, & virium publicarum longe maxima pars in classibus esset; pedestris militia, robur atque firmamentum omnis imperii, nullo equestris aut modico in honore usuque: quoties tera bellandum, mercenariis copiis res gereretur; quarum neque caritas ulla in rempublicam, & fides venalis, & discordia molesta, & conspiratio terribilis esset: adeo capitali errore, ut non alius hostis, ante ultimum excidium, rem Punicam tam prope ad extremam desperationem adduxerit. Neque minor ex ea malorum seges, quod qui in magistratibus & in curationibus erant, mutua dissimulatione peculatum impune exercebant: ut sic quoque minus mirandum esse videatur, si bello inter has civitates exorto, superiores Romani fuerunt; quorum Senatores duris temporibus suam pecuniam in publicum conferebant, cum Carthaginenses rempublicam haberent quæstui.

VII. Sed hæc vitia cum ipsa urbe adoleverunt: quare primum quidem ut infirma & modica, non ægre tolerabantur: post aliquandiu sustinere potuit imperii magnitudo, & quidam singulari virtute duces, quorum maxime opera quidquid felicitatis Carthago habuit, comparatum stabilitumque comperio. Sed ab initio quidem adversus Afros vectigal pro solo urbis reposcentes dimicatum est: idque jus non nisi repetentibus bellum extortum. inde prolatum etiam imperium: Africæque pars cultissima sub ditionem populi Carthaginensis redacta. In Sardiniam autem, deinde Siciliam, ut trajiceretur, maris opportunitas & illius insulæ rudis ad resistendum barbaries, hujus ob discordias perpetuas potentiorum injuriis exposita pulchri-

§ VI. Cic. contra Rull. c. 35. Polyb. 1, 65, 67 & 6, 49. Liv. 33, 32.

tudo invitavit. In Corsicam ex Sardinia facilis transitus, & insulæ non opulentissimæ promptior occupatio fuit. At in Sicilia diutissime varia fortuna dimicatum est: maximasque & victorias ex iis bellis, & clades, Pœni retulerunt.

VIII. Hamilcar quidem, Hannonis F. cum trecenta hominum millia in Siciliam deportasset, a Gelone victus, interiiit. qua calamitate perculsi Carthaginienses abstinere Sicilia, donec ab Ægestanis, quos Selinuntii premebant, exorati, Hannibalem Hamilcaris filio Gescone natum emisserunt. Is Selinunte ac Himera excisis, magnam iterum potentiam Pœnis in Sicilia comparavit. Imilco Leptinem Dionysii majoris fratrem ducemque in Siculo mari vicit, navesque cepit aut depressit centum, virorum interfecit plusquam viginti millia: multas Siciliæ civitates obtinuit, partem quoque Syracusarum cepit: sed orta repente pestilentia, toto ferme absumto exercitu, cum paucis eum Carthaginem redire compulit. Neque tamen spem Siciliæ occupandæ abjecerunt Pœni, sed paucis post annis cum alia classe Hannonem adversus Dionysium bellare jusserunt. Postea Magonem ab Iceta vocatum, & in ipsa jam Syracusana urbe castra cum peditum sexaginta millibus habentem, Timoleon ejecit. Mox Hannibalem & Hamilcarem septuaginta millia militum adducentes idem Timoleon pugna magna vicit, castrisque exiit.

IX. Sed haud temere velocior iis ullo bello majorve conversio fortunæ, quam adversus Agathoclem fuit: qui victus in Sicilia, obsessus Syracusis, nulla evidente spe salutis, ultro transduxit in Africam bellum, Carthaginiensesque multis præliis victos, descendentibus passim Libybus, in maximum periculum metumque conjecit: domum deinde reversus, Sicilia tota expulit, donec mors regis, & ex ea turbæ, spem iterum occasionemque repetendæ possessionis aperuerunt. Exinde, ut diximus, vario Marte cum Pyrrho bellavere, ad extremum superiores. Interim

§ VII. Just. 4, 3 & 19, 2. Herod. 1, 165. § VIII. Diod. 13, 43 & 14, 60. Just. 20, 5. Plut. in Timoleon. c. 24 & 30.

etiam in Hispania civitates quædam stipendiariæ factæ, cum Gaditanis opem adversus accolæ petentibus, cognato populo (nam & Gades Tyrii condiderant) auxilium Carthagine missum, vicinas aliquot Hispaniæ regiones Punici juris fecit.

X. Is ferme Carthaginis status erat, quo tempore bellum adversus Romanos sumere. Siciliam vero, qua Punice ditioni subiecta non erat, majori ex parte Syracusani, & Rex eorum Hiero possidebat: reliqua Mamertinorum armis tenebantur. Ii donec Romanorum, qui Rhegium occupaverant, societate uti potuere, sua defendisse non contenti, etiam Punicos Syracusanosque fines incurfabant: denique oppida Siciliæ multa, quo vastationem agrorum, & alia incommoda redimerent, vectigal pendere coegerunt. Sed expugnata urbe Rhegina, defectoribusque supplicio affectis, nudati hoc subsidio Mamertini priores opes tueri nequiverunt: & amissis ferme, quæ extra Messanam tenuerant, de urbe ipsa cum Hierone Syracusano dimicabant. De quo Rege, quoniam ipse quoque temporibus eisdem hostis populi Romani, mox per annos sane multos socius & amicus fidelissimus, & ingens ad res constituendas momentum fuit; paulo copiosius exponendum puto. Nam & in eo rara felicitas, & magna virtus, & prudentiæ vis eximia fuit: eaque tempestate Syracusanorum opes & floruerunt cum Hierone, & conciderunt.

XI. Hic igitur nullo neque divitiarum, neque gloriæ a maioribus relicte, neque alio aliquo tali præsidio adjutus, omnem fortunam suam sibi debuit: non ut plerique ad magnam potentiam ex tenui loco criminationibus meliorum, aut nec fugave adversantium provectus; sed modestia & in parandis opibus, & in habendis, singulari recte conjiciens, nullum esse regnum stabilius, quam quod ita exercetur, ut magis hoc timeant amittere, quibus imperatur, quam qui imperat. Itaque cum annos quatuor & quinquaginta præ-

§ IX. Just. 22, § & 23, 4. Curtius 4, 4. § X. Polyb. 1, 8 & 10.

fuiſſet, idque iis temporibus, quibus collifæ duæ potentiſſimæ civitates de principatu terrarum ſumma contentione pugnabant, ipſe nullo foris bello, ſi primos annos excipias, nullis domi infidiis petitis, nonagenario major, cum ad eam ætatem, certo temperantiæ argumento, ſenſus integros corpusque firmum pertuliſſet, obiit: non ſuis modo carus, ſed etiam apud Romanos pariter Græcoſque magna fama.~

XII. Quem & principatum deponere ſæpe volentem cives ſui publice prohibuerunt: & filius Gelon, qui natus annos plus quinquaginta ante Hieronem deceſſit, rara inter mortales moderatione, regno quam patre carere perpetuo maluit, eumque ad extremum uſque vitæ tempus conſtanti fide atque pietate percoluit. Is igitur Hieron ab Hierocle genitore, qui ſtirpem ſuam ad Gelonem veterem Siciliæ tyrannum referebat, expoſitus eſt: quod virum nobilem ſuſceptam ex ancilla prolem pudebat tollere. Sed omni humana ope deſtitutum apes, in os jacentis ingeſto melle, per complures dies aluerunt. Eo prodigio, reſponſiſque aruſpicum, qui regiam puero potentiam portendi confirmabant, permotus Hierocles, infantem recolligit, agnoſcit, & in ſpem futuræ magnitudinis diligenter inſtituendum curat, tum igitur inter æquales diſcenti, a lupo in turba puerorum repente conſpecto tabulam ablatam eſſe ajunt: & mox militiæ tirocinium auſpicanti aquilam in clypeo, noctuam in haſta conſediſſe. Conſilii viriumque indicium id fuiſſe creditum eſt, ſummique, ob regiam alitem, faſtigii.

XIII. Sed certiora ſigna mox ipſe dedit, forma & robore corporis eximio: verum ingenii, temperantiæ, comitatis, juſtitiae, moderationis nomine clarior atque illuſtrior. Sæpe in acie, ſæpe adverſum provocantes ſingulari certamine congreſſus, ſemper victor, a Pyrrho multis militaribus donis virtutis cauſa donatus eſt. Cujus poſtea ex

§ XI. Liv. 24, 44. Polyb. 1. 7. ap. Valeſ. § XII. Juſt. 44, 5. Jo. Sarisb. c. 13.



genere Gelon, Hieronis filius, Nereidem in matrimonio habuit. Pyrrho ex Sicilia fugato, cum inter Syracusanum exercitum & urbanos, solenni temporum istorum morbo, iterum orta esset dissensio, in castris circa Merganam Artemidorus & Hiero militaribus suffragiis duces creati, consiliis Hieronis, & amicorum ejus opera, clam intronissis militibus urbem in potestatem redegerunt. Ibi Hiero excellum se virum & quancunque imperii capacem ostendit. Nam ex diversis partibus occidit aut ejecit neminem; sed clementia, moderamine, rectisque consiliis ita composuit motus, ut non minoribus studiis eorum, adversus quos venerat, quam a quibus adductus fuerat, prætor Syracusis crearetur.

XIV. Hic vero reipublicæ curam ut suæ toto animo complexus, cum a longo jam tempore vitium istud in Sicilia inolevisse cerneret, ut quoties magistratus copias eduxissent, vel in exercitu turbaretur aliquid; vel domi novarum rerum motus orirentur: circumspicere aliquem cœpit, cui res urbanas tuto crederet, si quando ipse ad bellum exire cogeretur. Uxorem igitur duxit filiam Leptinis, qui magna inter cives auctoritate, vir etiam cumprimis honestus fideique tenax habebatur. Ita provisus domesticis rebus, adversus mercenariorum insolentiam, remedium necessarium magis, quam usquequaque laudabile, commentus est. Nam educto contra Mamertinos exercitu, cum illi juxta Centuripas occurrissent, aciem ad Cyamosorum anuum hoc dolo instruxit, ut inter cives mercenariosque intervallo relicto, hos committere prælium juberet, tanquam ipse cum urbanis signis alia parte impeditum & districtum hostem invasurus. Ita conductitii majore Mamertinorum numero circumventi cadunt: ipse, dum horum cæde distinentur hostes, otiose tutoque Syracusanas copias in urbem reducit.

XV. Ad hunc modum repurgato, quidquid in exercitu ægrum, & ad seditiones pronum fuerat, urbanum militem studiose exercet: novas mercenariorum copias conducit:

atque ita benevolentia multorum comparata, remoto audacissimo quoque, reliquis adversus armatum & intentum mutire non ausis, principatum arbitrato suo administrat. Interea Mamertini recenti victoria ferociore, contemptim atque temere Syracusanorum fines populabantur. Adversus hos Hiero jam civibus & militi fidens, incunctanter egressus, ad ipsam hostium urbem, dimissis passim globis fere vacuum, castra posuit. Cujus intellecto discrimine Mamertini ad ferendam suis opem expedito cum agmine impigre accurrerunt. Hiero motis ex agro Mamertino castris Mylas urbem, & in ea milites mille quingentos capit: inde castellis aliquot aliis raptim potitus, Ameselum procedit, medio inter Agyrium & Centuripas loco situm. Id quoque, licet munitionibus & praesidio firmum esset, expugnatum diruit: praesidiarios in fidem acceptos sibi militare cogit: agrum Ameselanum Centuripinis Agyrinisque dividit.

XVI. Hoc successu rerum alacrior denuo in fines Mamertinorum irruit; Alesum oppidum deditione capit: Abacatinos atque Tyndaritas ipsorum voluntate adjungit. Sic ab utroque mari proximis Messanae urbibus Hieroni parentibus (nam ad Etruscum mare Tyndaritani habitant; Siculum Tauromenii accolunt, & ipsi Syracusanorum eo tempore focii) Mamertini in arctum coacti, Cio quodam praetore copias opponunt hosti, ad Longanum amnem in Mylaeo campo castra habenti. Pugna commissa, cum dubio Marte certaretur; subito in latera Mamertinorum recens impacta cohors, haud dubiam Hieroni victoriam tradidit. Nam ante proelium Hiero ducentos Messeniorum exules, fortitudine & Mamertinorum odio praestantes viros, additis de suo exercitu delectorum quadringentis, *vicinum collem*, cui *Thorax* nomen est, *circumire, hostemque incautum improviso incursum turbare* jussit. Ii mandata gnaviter executi effecerunt, ut universus Mamertinorum exercitus interneccione caederetur.

XVII. Cios, re desperata, jam nihil aliud quam mortem

mereri manu cupiens, multis vulneribus affectus capitur, & in hostium castra deductus, fidem extorum aruspicumque prædictionem, alio quam speraverat eventu, comprobabat. Nam ante pugnam immolanti vates inspectis extis promiserant, *fore ut in castris hostilibus pernoctaret*. Id ille in spem victoriæ trahens, sero se ambigua prædictionis interpretatione deceptum agnovit. Hac ægritudine confectus, cum postridie inter equos captivos eum videret, quo filius in prælio usus fuerat, hunc etiam occubuisse conjectans, fasciis fomentisque vulnerum revulsis spiritum indignantem effudit. Mamertinos clade comperta desperantes, jamque victori cum insulis supplicum occursuros, ex inopinato fortuna servavit.

XVIII. Forte sub idem tempus Hannibal Carthaginensium prætor, in Liparæorum agebat insulis, quæ Siciliae adjacent. Is audita Hieronis victoria, metuens, ne Mamertinis penitus excisis Syracusana potentia Carthagini gravis & intoleranda fieret, specie gratulantis ad Hieronem ocius venit; eumque moratus ne statim ad Messanam duceret, urbem ingressus est prior, Mamertinosque deditionem facere volentes non modo verbis ad spem retinendæ libertatis revocavit, sed etiam præsidium suorum militum introduxit. Hiero astutia Pœni se delusum intelligens, cum ad obsidionem jam difficiliorem futuram haud satis paratus esset, Syracusas rediit: exceptusque magna omnium lætitia, & ab universis copiis Rex acclamatus, postea quoque nomen istud civium externorumque consensu retinuit. Hierone digresso, Mamertini, cum fiduciam paulisper resumissent, de rebus præsentibus deliberantes, duas in factiones scindebantur. Alii *non esse dubitandum* autumabant, *quin Carthaginensium tutelæ se permitterent*: cum hoc non modo plures ob causas conducibile, sed etiam, admissa jam præsidio, necessitati proximum videretur.

XIX. Contra dicebatur: *non minus insensos Mamertinis Pœnos, quam Hieronem fuisse*: neque dubitandum, *quin illi non*

*benevolentia, sed cupidine dominandi Messanam defendere statuerint: a multis jam aetatibus eos imperium affectare Siciliae, non exercituum, non classium damno, ne suarum quidem rerum metu & Africis bellis, ab improba spe deterritos. His igitur si se committant, classem validam, & ipsius Siciliae pleramque partem jam obtinentibus, sine exceptione ulla servituros esse. Minime igitur expedire vocari auxilio Carthaginienses, populum impotentem, infidum, graviusque jugum impositurum, quam a Syracusanis timuissent. Præsidium Punicum, si eo tantum consilio venisset, ne in manus Hieronis Mamertina civitas incideret; re jam perfecta dimitti bona cum gratia posse: si quæ vero clandestina subesset molitio; etiam intentiore studio ancipitis amicitiae fallacias præveniri oportere. Romanos igitur potius implorarent, armis invictos, fide præstantes, neque causam retinendæ sub sua ditione Messanæ, neque facultatem habituros: quibus in Sicilia ne vestigium quidem soli, neque navalium rerum ullus usus, aut adeo cura esset.*

XX. *Hos satis habituros, si Carthaginiensibus & Hieroni Messana urbe tanquam obice quodam & freno cupiditatis obiecta, securam ab his Italiam retinere possint. Perseverarent igitur Romanorum potius fidem, quam cujusquam alterius gentis, experiri: neque honeste ipsos & parum opportune priora consilia mutatueros esse, missis jam legatis, & auxilii spe impetrata. Quippe ante postremum cum Hierone prælium, diffidere jam rebus suis incipientes Mamertini, Romanorum opem, uti consanguineorum, imploraverant: & consulibus belli gerendi cupiditate plebem incitantibus, populus auxilium ferri Mamertinis jussit, sed Senatus auctor fieri pudore cunctabatur. Qui enim modo suos ob Rhegium per scelus captum severo supplicio affecerant, ii, si jam Mamertinis pari perfidia Messana potitis opitularentur, destrui videbant gloriam justitiæ ac fidei, quam priore facto late quæsisissent. Ceterum clade Mamertinorum mox audita, cum jam dubium esse non posset, quin, relictæ a Romanis, Pœnorum opes respecturi essent, prævaluit sententia juvandos esse censentium. nam & in Senatu plures eodem inclinare*

cœperant, prospicientes, ni fieret, Messanam statim, & paulo post ceteram Siciliam totam Carthaginiensium fore. quod si evenisset, populum Romanum cum Pœro de Italiæ possessione certaturum.

XXI. Nam istud periculum inevitabile, tum cupiditas imperii potentibus insita, tum ipse locorum situs efficiebat. Quippe Italiam a Liguribus & Venetis inter duo maria longo tractu procedentem, qua Bruttiorum ager est, a contactu Siciliæ tenuē fretum dividit. Neque dubitatur, continentes olim has regiones fuisse: mox intercurentibus aquis diveritas; sive humilia ea parte loca mare acceperunt; sive major aliqua vis terræ motus aut incumbentium undarum, angustias Isthmi perripuit. a quo eventu *Rhegium* nominatum putant: tali enim aliquo vocabulo quæ rupta sunt, a Græcis appellantur. Itaque primos Siciliæ cultores ex Italia venisse credibile est; etiam ipso nomine cōfirmante conjecturam. Messanam enim ex adverso litoris Italici sitam civitatem Opici condidisse traduntur: quam quia in sinu falcis reserente figuram est posita, *Siciliam* credo appellaverunt; quod advenientes postea Græci *Zanclem* sunt interpretati, utraque illa voce diversos apud populos falcem significante. Inde, ut solet, toti insulæ hæc appellatio hæsit, ut ipsa quoque & Zancle, & a pluribus Sicilia vocaretur.

XXII. Insula vero ista cum magnitudine, tum etiam fertilitate, omnes, quæ in mediterraneo mari sunt, longe antecellit: olei, vini, frumenti optimi supra fidem ferax: populo frequens, multisque & maximis urbibus ad miraculum exulta: portuum autem situsque totius commoditate vix alius magnum imperium constituere cupientibus, æque idoneus locus est. Nam Italiæ conjuncta ex diversa parte Africam respicit; alio ex latere Sardiniam: ab Oriente Peloponnesum & Græciam Jonio mari discretas habet: quaquaversum navigatione brevi, & ad emittendas accipien-

§ XX. Zonar. Polyb. 1, 9. §. XXI. Sallust. fragm. Cassiod. Var. 12, 14. Casaub. in Strab. Macrobian. Strab. 1. 6.

dasque classes facillima. Neque dubium est, cupiditatem hac insula potiundi, quam eodem tempore & Romanus populus & Carthaginiensis affectabat, causam bello dedisse, licet alia dicerentur. Nam Romani *Tarentinos contra fœdus adjutos* arguebant: Poeni *societatem cum Hierone, ut adversus se initam*, criminabantur.

XXIII. Ceterum eo jam potentiae civitas utraque pervenerat, ut evitari non potuerit, quin aliquando quacunque de causa colliderentur. Quemadmodum enim arbores non magno intervallo confitæ, aliquam quidem diu non impediunt invicem magnopere; auctæ vero, alimentum atque succum mutuo intercipiunt; cum grandiores fieri cœpere, radicibus & ramis commissæ atteruntur: ita surgentibus imperiis vix per naturam diutius fida manere potest concordia, quam donec, extrito quod medium fuerat, conjunctis jam finibus concurrentia urgeant inter se trudentque; neque priorem intra modum standi impetrabili voluntate; neque libero, nisi remotis obliſtentibus, ad majorem amplitudinem procursu. Accedebat ad has causas in utraque civitate magna plebis & potentia, & suscipiendi bellum cupiditas. Nam in Carthaginiensi republica vulgus valebat plurimum: quod auctis civitatis opibus, variis & ipsum commodis locupletari solitum, quæstus dulcedine bella ex bellis feri non invitum patiebatur.

XXIV. Neque multum diversa conditio Romanæ multitudinis erat; quæ damna rei familiaris, superiori bello illata, Siculis divitiis facile reparari posse sperans, pro jure nuper Patribus extorto, sententiam bellum suadentium plebiscito confirmavit. Quo armatus consul Appius, cum alioqui, victis antiquæ sectæ viris, major Senatus pars assensu esset, sine mora C. Claudium tribunum militum cum paucis navibus præmittens, *observare occasionem, & si qua obvenisset, in Siciliam transire*, jussit. Ille cum Rhegium venisset, in casum dare triremes non ausus, quod longe ma-

§ XXII. Died. Ecl. l. 23. Flor. 2, 2. L. Ampel. c. 46. Zonar.  
§ XXIII. Arist. Polit. 2, 11.

jori Pœnorum classe fectum obsidebatur, piscatoria navi conscensa Messanam vectus est. ibi cum Mamertinis, ita ut præfens usus postulabat, collocutus; cum Pœnis reclamantibus parum proficeret, infecto negotio rediit. Sed paulo post cognito Messanæ discordiam esse, multis Romanos advocandos esse negantibus, magna parte Carthaginiense præsidium haudquaquam æquis oculis adspiciente, rursus transmissio freto, cum alia temporis apta disseruit; tum hoc maxime interjecit, *se non nisi ad liberandam civitatem venisse: hoc ubi perfecisset, e vestigio discessurum esse.* ✕

XXV. Cum ad hæc Pœni responderent, *non esse Romanis laborem ullum suscipiendum in liberanda civitate, quæ sui juris esset: jam beneficio Carthaginiensium provisum, ne Mamertini servire Syracusanis cogerentur: faceretur igitur Romanus; aut si quam aliam justam haberet causam, cur esset Messanæ, exponeret.* negavit Claudius liberam videri civitatem, in qua præsidium alienæ gentis, non sponte oppidanorum ageret. Ad ea cum responderet nemo, Pœnis præ superbia, Mamertinis metu tacentibus, vir vafer & promptus, apparet, inquit, *ex hoc ipso silentio vestro, Carthaginiensium causam injustam, & Mamertinos libertatis avidos esse: nam ni ita foret, & illi de jure suo differere non gravarentur, & isti, nulla, si cum Carthaginiensibus sentirent, dissimulandi causa, palam & aperte institutum illorum approbarent.* Ad hæc verba fremitu Mamertinorum orto, multisque orationem illam ut veram & intimis sensibus suis congruentem laudantibus, factis in præsentia promotum esse putans Romanus, quod habitus tamen animorum exploravisset, Rhegium regressus est.

XXVI. Neque multo post adornatis quas habebat triremibus, tentavit transitum. Sed Pœnorum præfectis & multitudine navium, & in maritimis rebus solertia longè inferior, ad hæc fluctuum illorum violentia, quos orta subito tempestas præter solitum exasperaverat, repulsus, amissus

§ XXIV. Zonar. Polyb. 1, 11. Liv. Epit. 16. Aucl. de Vir. ill. c. 37.

sis aliquot triremibus, ceteris ægre servatis, in portum, unde exierat, rediit. Neque deterritus hoc incommodo, ut meliori alia opportunitate fortunam iterum experiri posset, naves reficiebat: cum ab Hannone (is Mamertino præsidio fretique custodiæ præerat) venerunt nuntii, quidquid triremium hominumve superiore certamine Pœni ceperant, adducentes. Cupiens enim fœderum ruptorum infamiam Romanis impingere, consilium hoc amplexus erat Hanno, questusque, *posse Carthaginensibus freti per vim tentatam navigationem esse*, ad pacem & fœdera majori deinceps cura servanda provocabat. sed audito, Claudium nullas conditiones admittere, nisi Messana præsidium deduceretur; fretique trajectionem iterum moliri; exclamavit, *se vero non esse passurum, ut Romani vel manus in isto mari abluerent.*

XXVII. Neque tamen prohibere potuit, quin Claudius observata freti natura, captatoque tempore cum refluxum ejus etiam ortus commode ventus adjuvaret, priusquam occurri posset, Siciliam teneret. Ibi Mamertinorum in portu repertorum coacta concione, persuasit, *ut Hannonem advocarent, tanquam de præsentis negotio cum eo deliberaturi.* Hanno enim, oppidanorum discordibus animis parum confusus, arcem cum suis occupaverat: neque concioni Mamertinorum se audebat credere. tamen veritus, ne hoc ipsum querelas eorum accenderet, si diffidere videretur, & per suam absentiam se Romanis prothus adjungerent; in colloquium venit. quo per disceptationes & jurgia diu extracto, ad ultimum injectæ a Romanis Hannoni manus sunt, isque in carcerem conditus, Mamertinis factum comprobantibus. Ita partim dolo, partim terrore circumventus, cum alia condicio nulla esset, arce Mamertinis reddita, præsidium deducere coactus est.

XXVIII. Pœni re comperta supra modum exacerbati, cum alioqui duces suos ob mala consilia quantumvis prospero eventu punire solerent, simul stultitiam Hannonis, simul ignaviam accusantes, in crucem miserum sustulerunt:



& continuo navales terrestresque copias Messaniam pergere præceperunt; alio Hannone, qui Hannibalis erat filius, ad res gerendas in Siciliam missò. Ille coactis ad Lilybæum copiis Selinuntem progressus, castrisque ibi factis, pedestrem exercitum reliquit: ipse processit Agrigentum, & arce communita, populum Carthaginiensibus amicum, ad societatem armorum contra Romanos impulit. Hinc in castra reversum reppererunt ab Hierone legati, qui & ipse Romanorum in Siciliam transitu minime lætus, hoc maxime opportunum tempus judicabat, quo conjunctis Punicis viribus, & ipsi & Messaniam obtinentes barbari penitus ex insula exterminarentur.

XXIX. Itaque colloquio cum Carthaginiensi duce habito, cum utrique Messanæ occupandæ spe excidissent, facile adversus Romanum, utrorumque pari damno supervenientem, societatem instituerunt, ut Messanam communiter obsiderent; neque quenquam in Sicilia, nisi aut Syracusani, aut Punici juris esse paterentur. Ita Pœnus imperator, præmissò caduceatore, qui Romanos, *si Carthaginiensium amici esse vellent, relinquere Messanam, & intra præstitutum diem excedere Sicilia* juberet; totis viribus adversus Mamerminos movit. Naves circa Pelorum stationem agere jussit: pedester exercitus ad Cubilia, (*Eunas* Græci vocant) haud procul urbe Messana dislitum locum, castra communivit. Venit & ex pacto cum Syracusano milite Hiero, & ab altera urbis parte, circum montem Chalcidicum nomine, confedit. Ita urbs undique circumdata, neque terra neque mari commeatum aut auxilia accipere tuto poterat.

XXX. Sub idem tempus cum Punicus caduceator nihil a Messana pacati retulisset; Carthaginienses partim ira, partim diffidentia permoti, omnes qui apud ipsos militabant Italici generis conductitios crudeliter occiderunt. Quæ postquam Romæ comperta sunt, e vestigio cum valido exercitu profectus consul Appius Rhægium venit: inde præ-

§ XXVIII. Val. Max. 2, 7, 1. Polyb. 10 & 11. Diod. Ecl. 1. 22. § XXIX. Diod. Ecl. 1. 21 & 23. Zonæ. Polyb.

missis, qui cum Pœnis & Hierone de obsidione solvenda agerent, ipse fretum acri custodia septum sciens, sollicitus intentusque rationem minore cum periculo trajiciundi circumspiciebat. Legati consulis neque a Pœnis amicum responsum retulerunt, & ab Hierone accurata oratione sunt increpiti, qui, commemoratis in populum Romanum officiis suis, *Ambigo*, inquit, *meamne vicem doleam magis, an vestram, Romani. Nam ego quidem amicos aliquanto quam existimaveram deteriores; vos autem opinionem justitiæ ac fidei, qua apud omnes clari eratis, amisistis. Adversus Mamertinos nulla vobis unquam societas aut amicitia fuit: fœdera cum Pœnis olim, mecum etiam nuper icistis.*

XXXI. *Hæc in gratiam aliorum nihil ad vos attinentium dissolvere cupientes, potestis dicere, qua vel injuria nostra, vel merito Mamertinorum hoc faciatis? sed quia Carthaginensibus quod pro se dicant, non deerit; illorum omiſſa causa, quæ me tangunt unum, in præsentia memorabo. Mamertini, boni populares vestri, cum apud Syracusanos, uti non ignoratis, stipendia fecissent, ut in Italiam redirent dimissi, Messinæ, postquam a miseris & credulis Messeniis tanquam amici & socii recepti sunt, facinus post hominum memoriam longe fœdissimum ediderunt; interemit noctu hospitibus suis, eorumque bonis, uxoribus, liberis, & urbe ipsa in potestate retenta. Quod nisi vos ipsi etiam eodem, quo ceteri mortales omnes, sensu nefandum & intolerabile scelus esse judicavissetis, profecto in iis, qui Mamertinorum imitatione idem in Rheginos ausi sunt, illud ipsum tam severe non fuissetis vindicaturi.*

XXXII. *Qua igitur indignitate vos moti pœnas ab nefariis hominibus repetendas esse putavistis, eadem & ego moveor, ne Mamertinos impunitos pati possim: præsertim cum postea quoque Latrocinii per universam Siciliam exercendis, primi sceleris memoriam novis subinde facinoribus propemodum obruerint. Nam, ut alia taceam, Camerina Gelaque urbes ab his excisæ, cum in fide Syracusanorum essent, satis mihi graves causæ videntur, cur hominum importunissimorum nefariam audaciam justo pioque bello prosequamur. Quod si vero tuendos vobis esse, propterea*

*simulatis, quod eadem in Italia nati, quodammodo consanguinei vestri videantur: quanto justius fuit Rhegiensibus Italis parci, qui cives vestri fuerunt? Qua in urbe recuperanda cum ego vos auxiliis & comiteatu juvarem, divinare debui futurum ut aliquando me non leviores ob causas Messinam obsidentem prohiberetis? sed quid ego multis ago, Romani? nam profecto si penes vos aliqua adhuc fidei sumæque cura, si quis honesti intellectus, si denique pudor superest; dubitare non debeo, quin me tam iusta tenentem arma vestris viribus adjuturi potius, quam impedituri sitis. sin vero hæc vobis levia videri cœperunt; eventus quidem armorum incertus est: sed hoc longe certissimum, omnes ubique mortales apertissime cognituros esse, non ulla juris aut æqui specie, non ob acceptas injurias, quod ne ipsi quidem audetis prætexere, nulla etiam Mamertinorum misericordia, sed sola ambitione & nobilis insula vestro imperio adjungendæ improba cupidine, Romanos ad bellum nobis inferendum incitari.*

XXXIII. Cum renuntiata ista essent, Appius olim animadverso, excubantibus in trajectu validis classibus, sine manifesto periculo transfretari non posse; consilium init calliditatis & astutiæ plenum. placere sibi negat, *Hieronem ab Romanis alienari: neque adversus ipsum decretum bellum esse; neque injussu populi suscipi posse.* die igitur prædicta socios navales præsto esse jubet, ac navigia ad cursum instructa haberi, tanquam domum abnavigaturus. Sciebat autem, multos ex Syracusanis atque etiam Punicis castris milites, per speciem negotiatorum, Rhegino in portu verfari, per quos famam illam celeriter ad eos, quibus maxime persuasum hoc cuperet, perventuram esse judicabat. Sic igitur accidit, ut providerat. quippe cum die claro navibus conscensis juxta litus Italicum vela facere cœpisset; Carthaginienes, quibus freti claudendi negotium datum fuerat, re statim per suos nuntiata, nullum jam hostilis transgressus periculum esse reliquum existimantes, tran-

fitum incustoditum dimifere, quo quemque ferebat animus dilapfi.

XXXIV. Conful, qui futurum hoc conjectaverat, converfo fub noctem curfu, cum omni claffe, nemine per tenebras venientem obfervante, netlum prohibente, in Siciliam vectus eft. Audax id cœptum & periculofæ aleæ plenum fuit: cum ignarus maris exercitus per freta, etiamfi hoftis & tenebræ abeffent, fuo ingenio metuenda, cum rudibus & imperite fabricatis navigiis noctu rueret; dignaque res vifa, quæ etiam novi cognominis monumento pofteris innotefceret. Quod enim caudicariis navibus multis in tranfvehendo milite ufus effet, admiratione facti *Caudicem* iftius ævi fimplicitas appellavit. Haftenus enim rerum maritimarum adeo nullus Romanis ufus fuerat, ut ad hoc tanti momenti negotium, neque tectam navem, neque longam, ne lembum quidem unum haberent, fed triremibus, quas Tarentini Locrique cum Eleatis & Neapolitanis commodato dederant, & actuariolis, quæ quinquaginta remorum effent, uterentur.

XXV. Ceterum Appius, cum forte non longe ab eo loco, ubi castra erant Syracufanorum, appuliffet; cohortatus fuos, *certamque victoriam* oftentans, *fi tale nihil fufpicantes opprimerent*, protinus ad hoftium oppugnanda castra pergit. Hiero fubito tumultu excitus, & ipfe contra educit copias pro tempore inſtructas. fit aliquamdiu certamen acre; pelluntur Romani equites: fed legionibus fortiffime præliantibus vincitur Hiero, feque cum fuis trepidus intra vallum recipit. Appius ſpoliari corporibus hoftium juffis, Meffanani intrat, Mamertinosque præſentia ſua ex timore magno recreatos ſpei melioris implet. Hiero victum ſe videns, priuſquam vidiffet hoſtem (ſicut ipſe poſtea confefſus eſt) fretique tranſitum a Carthaginienſibus proditum ſuſpicatus, cum ambigua mente multa ſecum agitaret, de ſumma rerum vereri cœpit: proximæque noctis ſilentio co-

pias eduxit castris, & contento itinere Syracusas refugit.

XXXVI. Eo submoto Appius, cum terrore victoriæ recentis ad Pœnos quoque debellandos uti vellet, militibus, ut cibum tempori capiant, imperat. deinde albescente jam die progressus, castra Pœnorum oppugnare instituit. Erant hæc loco satis tuto posita, & natura manuque diligenter permunita. hinc mare, inde profundæ paludes, in peninsulæ ferme speciem ambibant. inter has angustum spatium, quo uno adiri poterat, ductus adversum irrupturos murus obsepiebat. Hic ubi vim fecissent Romani milites, neque locorum simul iniquitatem, & propugnantium multitudinem vincere possent, nullis maxime, sicut in urbium oppugnatione solet, rem gerentibus Pœnis, irritò incepto desistere coacti recesserunt. Sæpe in bellis meliori fortunæ locum fors durior, & adversi ab initio casus fecere: dum his affecti, consiliis animisque majoribus acceptum detrimentum sarcire student; hostes felicitatis opinione blanda fascinati, neque satis adversum fortuita providentes, in temeritatem auferuntur.

XXXVII. Quod illo tempore Carthaginensibus usu venit. Qui repulsi hostem non contenti, tanquam fugientem eruptione ex castris facta prosequabantur: suæ virtuti non munitioni locorum Romanos celsisse existimantes. Itaque postquam ex angustiis, quibus defensi fuerant, processere, mutata cum loco fortuna prælii, magnusque eorum numerus cæsus est: reliqui ad castra, pars, ut cuique maxime promptum erat, in urbes circumjectas diffugere, neque deinceps, quamdiu Messanæ Claudius fuit, castris suis excedere sunt ausi. Consul etiam cum natura loci & difficultate situs iterato pugnare minime consultum arbitratus, cum tempus ibi frustra terere videret; præsidio Messanæ relicto in Syracusanorum fociorumque fines impressionem fecit: iisque impune vastatis, tantum concepit fiduciæ, ut jam ad ipsas Syracusas exercitum auderet admovere. Varia ibi fortuna certatum est; semel etiam consul magno in periculo fuit:

circumventusque foret, nisi mature capto consilio misisset ad Hieronem, quasi de conditionibus pacis acturus. Misit & ille certum hominem ex amicis. cum hoc cœpto colloquio, & de industria producto, sensim ex iniquo loco se subtraxit in tutum.

XXXVIII. Syracusani quoque secuti, sermones de pace cum diversis Romanis instituerunt, conventumque foret, ni Hiero auctor fieri noluiisset. His rebus gerendis major anni pars consumpta. tum Messanam rediit consul, & inde cohortibus aliquot relictis ad tuendos Mamertinos, cum ceteris Rhegium trajecit: mox Romam decessit ad triumphum; quem de Pœnis & Rege Siciliae Hierone, quod primus ille de transmarinis populis ageretur, magna omnium gratulatione duxit. Hoc initium Romanis tentandi maria, & hic successus cœptorum in Sicilia fuit. Ceterum & ista & sequentium temporum gesta scriptorum ambitione corrupta sunt, cum eorum præcipui, Philinus Agrigentinus, & ex Romanis Fabius Pictor, dum ille Carthaginiensium gloriæ, hic domesticæ nimium studet, officium & fidem insuper habuerunt.

XXXIX. Quorum levitatem merito Polybius arguit. quippe cum etiam privatorum minimis in causis falso testimonio circumvenire quemlibet execrabile crimen habeatur; quanto foedior perfidia conditor historiæ principum atque populorum acta corrumpere censendus est? cui neque mortalium commodorum quidquam, neque spiritus ipse pulchra veritate debebat esse antiquior, tanto minori spe veniæ, quod ne prætextum quidem mentiendi allegare idoneum ullum potest; cui, si libere, quæ vera sciebat, quacunque de causa non licuisset tradere, tacere certe licuisset. Porro, dum in Sicilia Claudius Hieronem & Pœnos vincit, obsidionem Volfiniensium ad exitum deduxit alter consul M. Fulvius, qui homines adversus vim desperatione validos, inopia rerum necessariarum & fame domuit. Facta

§ XXXVII. Polyb. 20. Zonar. § XXXVIII. Silius l. 6. Eutrop. l. 2. Polyb.

deditione, ingratum illud & insolens libertinorum vulgus cum cruciatu interemtum est: urbs etiam ipsa diruta: reliqui Volsinienſium, & quod fervorum fidem atque reverentiam erga dominos non exuerat, in attributas alibi fedes migraverunt. hoc quoque bellum dignum triumpho viſum est: eumque conſul a. d. Kalendas Novembres tanquam de Volsinienſibus egit.

XL. Iiſdem conſulibus a Cn. Cornelio, C. Marcio cenſoribus luſtrum conditum: cenſa ſunt civium capita ducenta nonaginta duo millia, ducenta, viginti quatuor: numerus ſane magnus & propemodum incredibilis, tot bellorum a primis ferme Urbis initiis nunquam ceſſantium continua detrimenta, tot ex peſtilentia morbiſque ſæviſſimis non minores bellicis ſtrages, congitanſi. Ceterum aliis aliſque ſubinde populis in civitatem recipiendis, quod inſtitutum a Romuli ſapientia proſectum poſteri conſtanter tenuerunt, inviſta nulliſque cladibus ſuperabilis effecta eſt Reſpublica; quam nec a Pyrrho data damna, neque naufragia frequentia primo Punico bello, neque ſecundo Traſimenus & Cannæ potuerunt affligere, quin ex incommodis ſuis identidem alacrior ferociorque reſurgeret.

XLI. At in Græcia Lacedæmonii militari laude & ipſi percelebres, neque impares Romanæ virtuti, quoniam arcebant peregrinos, nec imperium, quod pepererant, diu, neque libertatem ſuam ſemper tueri potuerunt. Sed cum Leuctrica pugna mille non amplius Spartiatæ cecidiſſent, protinus potentia civitatis corruit: iterum ad Sellasiam, Lacedæmoniorum ſex ferme deſideratis millibus, itatim amiſſa libertas eſt. Achæi vero, ejuſdem Peloponneſi incolæ, vicinos omnes æquo jure complexi, pulcherrimam conſtituerunt rempublicam, & manſuram, niſi Romanam potentiam, tum etiam longe lateque imperantem, inſania paucorum in perniciem ſuam patriæque provocafſet. Atqui tam diverſus eventus inſtituta tam diſſimilia neceſſario ſecutus

§ XXXIX. Liv. Epit. 16. Zonar. 6 XL. Capitol. Column. Suidas in *Περικλείου ὁμιλίαις*. Tacit. 11, 24.

est. Sicut enim naturæ congruit, corpus quod justum ad modum salubri cibo reficitur, robustius & longioris ævi esse, quam si ingenito contentum succo extra se natum alimentum omne aspernaretur: ita florentiores fuere civitates, quæ suum efficere noverunt, quidquid usquam egregii erat, quam quæ inepta quadam arrogantia habentes despiciatui, quod in sua gleba natum non esset, semetipsas multis bonisque potentiæ quærendæ tuendæve adjutoribus spoliarunt.

XLII. Idem annus rei sane crudeli, sed mox intemperantissime usurpatæ, initium attulit, ut sanguis humanus, in gratiam levissimi cujusque spectatoris affatim fusus, voluptas publica fieret. Barbari moris auctores M. & D. Junii Bruti, nescio qua pietate defuncti patris cineres honoraturi, gladiatorium munus ediderunt, magno favore civitatis. Sed hanc humanitatis injuriam ulta pestilentia est, quæ per istum & sequentem annum atrocissime sæviit. Ob quam, cum Sibyllinos libros adiri placuisset, ira deum immissam esse, repertum. Ergo religiones profecto parum caste haberi suspicione orta, Pontifices diligentius observando, & inquirendo, plurima sacella fanaque a privatis occupata esse invenerunt; & Capparoniam ex Vestalibus incesti crimine teneri. Sed illa, dum rea peragitur, suspendio prævenit supplicium: in corruptorem ejus consciosque fervos legibus animadversum est. Loca sacra ex privatorum temeritate priscis usibus vindicata.

XLIII. Sic exsoluta religionibus civitate Patres animum rursus ad reipublicæ curam retulerunt; & quoniam Etruria jam pacata, nihil in Italia reliqui motus erat, ambos anni novi consules in Siciliam cum legionibus transgredi placuit. Fuerunt hi M. Valerius M. F. M. N. Maximus, qui in hoc honore Messalla appellatus est, & M. Otacilius C. F. M. N. Crassus. Ab his transportatas prospere copias eadem in rebus gerendis profecuta felicitas est. Cum

§ XLI. Dionys. 2, 17. Plut. in Agesil. c. 49. Idem in Cleo. c. 41. Just. 1. 34. § XLII. Liv. Epit. Val. Max. 4, 2, 7. Oros. 4, 5. Aug. de civ. Dei, 3, 17.



enim Adranitarum urbe post brevem obsidionem per vim capta, Centuripinos circumfiderent, venerunt ab Alæsinis legati oppidum suum dedentes. Inde consules diversas insulæ partes obeundo, modo divisis, modo junctis exercitibus, ut res & ratio suadebat, Pœnis Syracusanisque, quoties congregi erant ausi, profligatis, terrorem famamque late spargere: tantaque fortunam sequentium felicitas, tantusque impetus fuit, ut paulo post oppida haud minus septem & sexaginta numerarentur, quæ Romanæ fidei se permiserant: quo in numero Tauromenitani quoque & Catinenfes fuere.

XLIV. Unde consules imperatis, quæ volebant, auxiliis quotidie validiores, ad ipsas jam Syracusas castra ponere sunt ausi, obsidionem urbis meditantes. Quibus rebus animadversis Hiero, cum suis atque Carthaginiensium viribus diffidere cœpisset, præterea plus apud Romanos esse fidei crederet, amicitiam & ipse cum Romanis inire constituit: legatosque cum mandatis de pace componenda ad consules misit. Neque Romanis displicebat Hieronem a societate Punica disjungere; maxime ut res annonaria suis legionibus expeditior esset. Nam Carthaginiensibus mare obtinentibus ex Italia transvehi commeatus nequibant; & ab ea re prioris anni consul plus propemodum, quam ab hostibus, incommodi molestiæque perfererat. Hierone vero adjuncto, Syracusanum regnum, abundanti frugum copia, res necessarias Romanis affatim erat præbiturum.

XLV. Itaque legibus his transactum: ut *Hiero quæ de Romanis sociisve eorum loca, quosque homines cepisset, sine pretio restitueret: argenti que talenta centum penderet. Ipse tuto imperaret Syracusis, ceterisque Syracusani juris urbibus.* ex quibus erant præcipuæ Acraë, Leontium, Megara, Elorus, Netini, Tauromenium. Legatis deinde ab Hierone Romam venientibus, eadem condiciones ratæ fuerunt, pacemque cum eo Rege servandam & Senatus censuit; & post paucos

6 XLIII. Tabul. Rom. Diod. Ecl. I. 23. Zonar. 6 XLIV. Europ. I. 2. Diod. Polyb. I, 16. Pausan. I. 6. Diod. Ecl. I. 23.

dies Cn. Atilio Calatino populum rogante, populus jussit. Hoc fœdus in annos quindecim pactum, deinceps perpetuo mansit: Hierone magnitudinem Romanam ita colente comiter, hisque vicissim illius studium tam benigne prolixæque remunerantibus, ut neutros eorum societatis institutæ pœniteret. Syracusanæ pacis audita fama, Hannibal Pœnus, qui Hieronem obsidione liberaturus cum navalibus copiis jam Xiphoniam accesserat, majori quam venerat festinatione recessit.

XLVI. Romani cum jam Hierone quoque socio & commilitone uterentur, non diu morati, Carthaginienfis ditioris oppida complura subegerunt. Et ab Adranone quidem, vico munito, Macellaque, post multorum dierum obsidionem discesserunt irriti: ceterum Segestanos, occiso Pœnorum præsidio, ad se ultro desciscentes, receperunt. Præter alia, cognationis necessitudine se Romanis fratribus favere dictitabant, originem suam & ipsi ad Æneam ex Trojanæ incendio profugum referentes. Neque multo post Alienæi Romanis accesserunt; ad Hilarum vero, Tyritum, & Ascelum, vi & machinis opus fuit; eoque severius in victos consultum. Quo terrore Tyndaritani, proximos se periculo, & auxilia longe esse cernentes, cum ipsi quoque de tradenda Romanis urbe consultarent, a Pœnis prohibiti sunt. nam illi ex rebus ipsis conjectura capta, quid ageretur, primores civitatis obsidum loco Lilybæum avexerunt: etiam frumento, vino, ceterarumque rerum apparatu asportato.

XLVII. His temporibus Otacilii Crassi consulis utilis & conveniens Romanæ disciplinæ severitas fuit. qui milites ab Hannibale turpi pacto incolumitatis sub jugum missos, extra vallum tendere jussit, ut hostium incursionibus exposciti, neque alibi quam in virtute spem habentes, confirmarentur animis, armisque potius quam loco se tueri di-

§ XLV. Zonar. Polyb. 1, 16. Diod. Ecl. 1. 24. Casaub. in Polyb. Tabul. Messan. Diod. § XLVI. Diod. Zonar. Cic. Verr. 4, 33.

ſcerent. Poſt hæc & alia non majoris momenti geſta, cum hiems immineret, præſidiis per opportuna loca diſpoſitis, conſules, reliquo exercitu in Italiam reportato, Romam redierunt. Ibi M. Valerio, cujus eo bello felicior & utilior opera fuerat, triumphus decretus, quem ante diem XVI Kalendas Apriles de Pœnis & Rege Siculorum Hierone duxit. Prætervectum inter ſpolia horologium eſſe ideo annotatum eſt, quia res ad eam diem incomperta Romæ fuerat. id Catina recepta deportatum, deinde in publico ſecundum Roſtra, in columna Valerius ſtatuit. Idemque tabulam, in qua prælium, quo Pœnos & Hieronem vicerat, depictum fuit, in latere Curiæ Hoſtiliæ propoſuit; quod ante eum fecit nemo, poſtea plerique.

XLVIII. Meſſallæ cognomen huic Valerio ab urbe Meſſana inditum fuiſſe conſtat: ſed miror, ab ea capta hæſiſſe, non contemnendis auctoribus credi; cum potius ideo impoſitum ipſæ res evidenter arguant, quod Meſſanam a Pœnis & Hierone diſceſſu Appii Claudii acrius infeſtatam, illis ſubmotis, hoc reconciliato, liberaſſet. Inter hæc cum adhuc peſtilentia vexaret Urbem, dictatorem clavi figendi cauſa dici placuit. Dictus eſt Cn. Fulvius Cn. F. Cn. N. Maximus Centumalus: is magiſtrum equitum Q. Marcium Q. F. Q. N. Philippum dixit. Eodem anno Æſernia colonia deducta eſt: cum ſuperiore Firmum deducta eſſet, & ut quidam volunt, Caſtrum. L. deinde Poſtunius L. F. L. N. Megellus, Q. Mamilius Q. F. M. N. Vitulus conſules facti. Sicilia provincia utrique data; legiones vero due tantum decretæ: ſufficere viſæ, poſtquam in ſocietatem accepto Hierone levius bellum factum erat; & rem frumentariam facilius expediri poſſe rebantur, ſi minor exercitus mitteretur.

XLIX. Conſules, trajectis in Siciliam legionibus, ſociorumque contractis auxiliis, minores ſibi res præternittendas

§ XLVII. Front. Strat. 4, 1. Zonar. Faſti Capitol. Varro ap. Plin. 7, 60. Varro ap. Macrobi. Saturn. § XLVIII. Marm. Capit. Liv. Epit. 17. Vell. 2, 14. Polyb. 1, 17.

rati, ad urbem Agrigentinam totis viribus obsidendam animum adjecerunt. Eam rebus omnibus Pœni largissime instruxerant, belli arcem habituri. Quippe cum Hieronem ab amicitia sua defecisse, Romanos contra non perfuntorie rerum Sicularum curam capeffere cernerent; diligentiore ad bellum apparatu opus esse rati, primum quidem præsentium virium majorem partem in Sardiniam miserunt, quæ Italiæ litoribus infidiaretur, ut hoc metu Sicilia Romanos abstraherent; aut certe minoribus, quam voluissent, copiis rem ibi gerere cogerent. Mox Romanis ad sua tuenda, Siciliamque novo cum exercitu repetendam pariter sufficientibus, spe ista falsi, ex Liguribus Gallisque mortales multos, sed plures adhuc ex Hispania mercede conductos, simul rerum ad victum necessariorum magnam copiam, Agrigentum miserunt: ibi horreum annonæ, receptum exercituum suorum esse volentes, loco, & opportunitate situs, & magnitudine oppidi, præ ceteris quæ in Sicilia possiderent, his usibus accommodato.

L. Circum hanc igitur urbem tota belli mole contracta, consules, Pœnis intra munitiones compulsis, ad unum inde milliare castra locant. Erant tum in agris maturæ fruges, & quia diuturnam fore obsidionem apparebat, milites studio demetendi colligendique frumenti, longius & incautius, quam hoste tam propinquo par esset, vagabantur. Neque Carthaginienfes imperite aut segniter occasione usi, magnam intulissent cladem, nisi tantundem virtute restitissent Romani milites, quantum negligentia perdiderant. Cum enim frumentatores subitum hostis impetum sustinere non potuissent, Pœni ad ipsa castra Romana perrexerunt, divisoque agmine quidam vallum rescindere parabant; alii cum statione pro castris locata prælium conserebant. Tunc igitur, sicut alias sæpe, militiæ leges & incorruptus disciplinæ rigor, rem ancipitem & exitio Romani exercitus casuram, erexit.

LI. Quod enim quacunq; de causa stationem deferuisse

capitale apud Romanos est; excubitores nihil in fuga spei repositum esse gnari, quanquam numero longe superarentur, pugnam præsentissimis animis sustinere, multis quidem suorum amissis, sed hostium interfectis pluribus: donec armari cohortes laborantibusque succurrere potuerunt. Ita & hic pulsi hostes, & qui vallum jam prope ceperant circumventi. magna ibi cædes fuit. ceteros ad urbem usque Romani persecuti sunt. Ea res in posterum & timidiores ad erumpendum hostes, & cautiores Romanos ad frumentandum fecit. Inde cum segnior esse cœpisset contentio, rarius, nec nisi ad levia certamina, excurrentibus Pœnis, dividi copias placuit, & duabus urbis partibus, hinc ad Æsculapii fanum, inde via, quæ Heracleam ducit, castra statui. hæc fossis utrinque permunita: qua urbem spectabant, adversum eruptiones; foris, quo tutiora contra invasuros essent, iterque subsidiorum in urbem introducendorum præcluderetur.

LII. Medium inter duo castra spatium, frequentibus præfidiis stationibusque septum est. In his omnibus multum juvabantur opera Siculorum, qui recens in fidem venerant: quorum jam una cum Romanis centum millia facta erant. Ab iisdem commeatus Erbesum usque subvehebantur: ab eo deinceps oppido (non aberat autem longe) ipsi Romani sua in castra deportabant. Ita fiebat, ut affatim esset magna rerum necessariarum copia. Hoc in statu ad menses ferme quinque hæsit obsidio: cum neutris insigne ad victoriam momentum adeptis (præter leves enim velitationes tentatum nihil fuerat) res Punicæ deteriore loco esse cœperunt. Quia enim ingens hominum multitudo, haud minus quinquaginta millia bellatorum, tanto jam tempore idem intra oppidum conclusa, annonam fere omnem absumfisset; sperari vero subvectio nulla posset, aditus omnes Romanis sollicite custodientibus; propugnatorum animi tam præsentibus malis, quam expectatione instantium haud mediocriter angebantur.

LIII. Igitur Hannibale Gisgonis filio, (nam hic rebus

*T. Liv. Vol. III.*

O

Carthaginiensibus Agrigenti præerat, ) crebris nuntiis opem adversus famem & pericula poscente; cum militibus, qui postea contracti fuerant, elephantisque, Hanno senior in Siciliam transmittitur. Peditum erant millia quinquaginta, sex equitum, sexaginta elephantum. Cum his copiis Lilybæum vectus, inde versus Heracleam movit: statimque venerunt ad eum, qui deditionem Erbesi pollicerentur. Horum opera Erbesio potius, unde hæctenus ad castra Romana deferri commeatus consueverat, rem haud minimi momenti perfecisse videbatur, cum exclusos omni propemodum facultate necessariarum rerum Romanos haud levius urgeret, quam ab his Agrigentini premebantur. Jamque de obsidione solvenda deliberatum erat non semel, nihilque propius factum, quam ut negotium istud pro desperato abjiceretur; nisi Rex Syracusanus omnes tentando vias nonnihil frumenti ceterarumque rerum furtim submittens, præsentem inopiam modico subinde levamento recreasset.

LIV. Hanno cum Romanos & penuria, & morbis, qui sequi famem solent, graviter affectos, suas contra copias viribus integris agere perpenderet; propius ad Romanos accedere, præliique, si facultas daretur, fortunam experiri statuit. Elephantis igitur quinquaginta ceteroque toto exercitu assumtis, Heraclea profectus, Numidicum equitatum præmittit, qui hostium castris obequitans, eliceret Romanos equites, & in præparatas insidias deduceret. Numidis, uti mandatum erat, ad castra consulum contentim provolantibus, erumpunt Romani, propelluntque resistentes primo, deinde solutis ordinibus via, qua venire Hannonem sciebant, refugientes, contento cursu persequuntur. Igitur quanto longius abripi se passi fuerant, tanto difficiliorem ad sua munimenta receptum habuerunt; multique eorum, cum & recentes occurrissent copiae, & qui paulo ante fugerant undique circumfunderentur, desiderati sunt.

LV. Hoc eventu magis etiam ad spem summæ victoriæ confirmatus Hanno, collem quendam, Torum nomine,

mille quingentis passibus a Romanorum castris distantem, infedit. Serius tamen aliquanto, quam inter exercitus tam propinquos sperari potuisset, commissa pugna est; modo Romanis, modo Pœnis unius prælii fortunæ spes universas committere formidantibus. Donec igitur pugnandi avidior Hanno fuit, Romani castris suis se tenuerunt: quod numero, & alacritate, ipsi detrimento equitum suorum percussi & mœrentes, vincerentur. Postquam autem dubitatione sua fociorum animos languescere, hostes in spem erigi, duriusque sibi bellum cum inopia, quam cum Pœnis futurum arbitrati, certamen detrectare desierunt; Hanno vicissim tergiversari cœpit, & omnia metuere.

LVI. Duo menses sic exacti, ut præter levia prælia, quæ fiebant quotidie, nihil majoris rei gereretur. Ad extremum frequentibus Hannibalis precibus motus, qui & nuntios mittebat assidue, & facibus accensis signa crebra edebat famem amplius obsessis tolerari non posse, multosque ea peste coactos ad hostem transfugere; dimicationi moram ulterius nullam asserre decrevit: eodem tempore Hannibale quoque cum suis eruptionem ex urbe facturo. Quæ cum animadvertissent consules, intra sua se castra quieti tenuerunt. eo ferocius Hanno aciem instructam ostentare, & ubi nemo contra exit, sub ipsa Romanorum munimenta sugredi, ad pugnam audacter provocare, cunctantibus timorem & ignaviam objicere: illi hostem levibus præliis a vallo repulisse contenti, neque contra manentes struebant aciem, neque recedentes insequiebantur. Hoc ubi per aliquot continuos dies factum, Pœnisque jam persuasum esset, nihil ultra ausurum Romanum; L. Postumius consul contentum hostium in suam occasionem solerter vertit. Instructis enim silentio copiis omnibus, intraque vallum retentis, accedentem pro more Pœnum cum paucis submovens, a prima luce ad horam dici sextam velitando detinuit. tum demum recipientibus se hostibus productas ex castris legiones immisit.

LVII. Hanno, quanquam contra opinionem suam pugnandum sibi videret, intrepide congressus in serum diei ambiguum certamen extraxit. Sed Romanos curatis bene corporibus, ad pugnam præparatos, æstus, sitis, labor, non æque fatigabat: Carthaginiensis autem acies ante commissum prælium inedia & stando fessa, quanto longius protraheretur dimicatio, fatiscantibus corporibus minus ad resistendum virium habebat. Postremo conductitius miles, qui in prima fronte pugnabat, diutius sustinere laborem non potuit; neque solum ipse cessit loco, sed in elephantorum agmen, & alios a tergo stantes ordines trepida fuga se inferens, turbavit totam aciem, hostique acriter incumbenti terga dare coegit. Eadem felicitate tum quoque ab alia parte gesta res: Hannibalque, cum eruptione pugnasset, majore suo quam hostium detrimento in urbem compulsus est. Capta Carthaginiensium castra sunt: elephantum vulnerati tres, cæsi triginta, undecim in manus Romanorum venire: similis & hominum fortuna fuit. de tanto exercitu pauci cum ipso duce Heracleam evaserunt.

LVIII. At qui in urbe clausi erant, rebus plane desperatis, nullam salutis viam sibi relictam esse videntes, maximis terroribus affligebantur: cum Hannibal optimi, ut in fortuna mala, consilii auctor, animadverso, Romanos & labore certaminis defatigatos, & lætitia bene gestæ rei solutiores, negligentius solito excubias agere, circa tertiam vigiliam cum mercenariis exit oppido: & cratibus, quas hunc ad usum ante paratas stramento compleverant, in fossas injectis, transgressus, aliquantum itineris præcipit, donec Romani luce jam oriente quid actum esset sentientes, partem extremi agminis deprehenderunt; Hannibal cum reliquis in tuta loca pervenit. At Agrigentini, desertos a Pœnis se videntes, multos eorum, qui in urbe remanserant, sive per iram, sive ut a victore gratiam inituri, concidere. Nec ideo minus direptum est oppidum: homines, amplius



quinque & viginti millia liberorum capitum, in servitutem venditi.

LIX. Hoc maxime modo captum a Romanis Agrigentum est, septimum intra mensem, quam obsideri cœperat, magna cum utilitate gloriaque populi Romani, sed multa quoque sanguinis impensa: quippe supra triginta hominum millia de consulum exercitu, Siculorumque auxiliis, inter istam obsidionem varia peste perierunt. Qua de causa, simul quia nihil jam magnæ rei ob hiemem propinquam suscipi poterat, Messanam redierunt. Anno deinde proximo cum imperio iverunt in Siciliam L. Valerius M. F. M. N. Flaccus, & T. Otacilius C. F. M. N. Crassus, consules; prioribus ducibus ad spem triumphi Romam digressis. Carthaginienses quidem classe tanquam ad vastandam Italiam missa, novos consules a Siciliæ cura distingere cupiverant; sed ii constitutis circum litora globis militum, qui prædones arcerent, nihilominus in insulam transjecerunt. Tunc quoque multa Siculorum oppida in fidem recepta, recenti cladis Agrigentinae exemplo & metu: neque obsistentibus Prænis, quos super prælium adversum etiam seditiones mercenariorum militum angebant: Gallis præcipue ob mensium aliquot stipendia non soluta tumultuantibus. Ad quos puniendos fraudem ejusmodi commentus est Hanno.

LX. Sermone blando mitigatos *modicum ad tempus quiescere jubet: sibi esse certam & propinquam oppidi cujusdam locupletis occupandi spem ostendit: ex ejus præda cumulate Gallis etiam pro solutionis mora satisfactum iri confirmat.* Ita sedatis illis, adeoque gratias agentibus, opportuno tempore, cum dispensatore suo, quem habebat fidelissimum, agit, *ut specie transfugæ, tanquam rationibus interversis ad Otacilium consulem pergeret, indicaretque, nocte proxima Gallorum millia quatuor, ad urbem Entellinam proditorum opera recipiendam venturos, locatis insidiis circumveniri posse.* Consul rem non spernendam arbitratus, licet transfugæ non omnino

§ LVIII. Polyb. Zonar. Diodor. Oros. 4, 7. § LIX. Diodor. Eutrop. 1, 2. Zonar. Polyb. Front. Strat. 3, 16.

confideret, mittit delectam militum manum. veniunt & Galli ab Hannone decepti. Confurgentibus ad hos excipiendos Romanis oritur prælium atrox, in quo Galli omnes interfecti, cum inulti noluiſſent occumbere, duplex Hannoni gaudium præbuerunt, conductitiorum insolentiam, cum hostium haud exiguo detrimento, non incallide vindicanti.

LXI. Romæ interim de aqua Anienis in urbem deducenda Minucius prætor in Senatu retulit. Opus illud ex manubiis cenſor M. Curius locaverat. ſed variis exortis impediementis, res nonum in annum prolata, tum retrahabatur. Creatique duumviri Curius & Fulvius Flaccus: ſed Curio quintum intra diem defuncto, gloria deductæ aquæ penes unum Fulvium fuit. Sub id tempus Hamilcar in Siciliam Hannonis ſucceſſor Carthagine venit. Hannonem namque, ex mala pugna domum redeuntem, ignominioſe exceperant Pœni, mulctatumque ſex millibus aureorum præfectura dimoverant. Eum Hamilcarem patrem Hannibalis, qui ſequens bellum Punicum adverſus Romanos duxit, fuiſſe, quidam ſimilitudine nominum decepti non recte tradiderunt. nam genitor Hannibalis Hamilcar extremis ejus belli temporibus in Siciliam cum imperio adoleſcens venit; ſed celebritas ejus effecit, ut alterius ignotioris Hamilcaris acta, Barcæ Hamilcari, omnium qui hoc nomine fuerunt nobiliſſimo, adſcriberentur. Succeſſor igitur Hannonis Hamilcar, pedestri utique exercitu Romanos longe ſuperiores eſſe cernens, mediterraneas quidem urbes nullas audebat aggredi, neque ex locis montioſis & arduis in plana deſcendere; ſed claſſe validus, qua haud dubie maris imperium tenebat, ea parte virium haud ſegniter utebatur, miſſoque iterum Hannibale ad vaſtandam Italiæ oram, ipſe Sicula litora circumvectus, pleraque maritima loca, quæ Romanis ſeſe adjunxerant, facile recuperavit. Qua re fiebat, ut Romanis loca præ-

cul a mari remota, Pœnis litoralia & occupantibus facile, & tuentibus, æquo utrinque momento spes metusque librarentur, neque facile penes utrum populum totius belli victoria esset futura, judicari posset.

§ LXI. Front. de Aquæd. Diodor. Zonar. Cic. de off. Corn. Nepos Hamilc. c. 1. Polyb. 1, 20.

JOANNIS FREINSHEMII  
 SUPPLEMENTORUM  
 LIVIANORUM  
 LIBER VII.  
 IN LOCUM LIB. XVII LIVIANI.

---

EPITOME  
 LIBRI DECIMI SEPTIMI.

*Cn. Cornelius consul, a classe Punica circumventus, & per fraudem velut in colloquium evocatus, captus est. C. Duilius consul adversus classem Pænorum prospere pugnavit, primusque omnium Romanorum ducum navalis victoriæ duxit triumphum. ob quam causam ei perpetuus honos habitus est, ut revertenti a cœna, tibicine canente, funale præferretur. L. Cornelius consul in Sardinia contra Sardos, & Corsos, & Hannonem Pænorum ducem feliciter pugnavit. Atilius Calatinus consul, cum in locum iniquum, a Pœnis circumfessum, temere duxisset exercitum, M. Calpurnii tribuni militum virtute & opera evasit: qui, cum trecentis militibus eruptione facta, hostes in se converterat. Hannibal dux Pænorum victa classe, cui præfuerat, a militibus suis in crucem sublatus est. Atilius Regulus consul, victis navali prælio Pœnis, in Africam trajecit.*

I. **Q**UARTUS jam belli Carthaginiensis annus exierat, neque poenitebat virtutis aut fortunæ Romanos: præliis enim omnibus, quotiescunque congressi cum Syracusanis, aut cum Pœnis fuerant, victores discesserant: opulentas urbes oppugnando ceperant: aliae conditionibus in potestatem venerant: sed quando bellum in insula gerebatur, neque commeatus, neque supplementa, cum opus esset, submitti poterant: & naves Carthaginiensium liberis & improvisis appulsibus non modo Siculas urbes ad mare positas ex tuto vexabant; sed etiam Italiæ oram subinde vastantes, & detrimentum imperio Romanorum, & ignominiam famæ inferbant; cum interim Africa indemnitas, & periculorum malorumque omnium hostilium exfors haberetur. Itaque re diligenter deliberata Senatui Populoque Romano placuit, ut classe comparta, non terra tantum, uti cœperat, dimicaretur cum Pœnis, sed etiam maritimæ alæ fortuna tentaretur.

II. Hæc prima Romanæ urbi de navalibus rebus seria cogitatio fuit: quam haud minus forti felicique opera complevit, ac animo consilioque fidenti susceperat; ut non immerito judicaretur, orbis imperium genti Romanæ deberi, cui adversus exercitatissimum in re nautica populum classibus bellare volenti, nec ad rem aggrediundam audacia, nec ad regendam sollertia, nec ad perficiendam constantia defuisset. Cum enim ad eam diem Romani adeo maritimam militiam non attigissent, ut neque viros, qui navale prælium viderent, neque naves ullas bellicas, ne fabricandarum quidem artifices idoneos haberent, maxima fiducia tantum opus aggressi, brevissimo tempore & navigare cœperunt, & dimicarunt maritima pugna, & homines a multis ætatibus rerum earum peritissimos superaverunt. Cura classis fabricandæ mandata Cn. Cornelio L. F. Cn. N. Scipioni Africæ, & C. Duilio M. F. M. N. qui consulatum recens iniverant.

III. Navis erat una quinquereinis, quam Claudius, quo tempore freti transitum meditabatur, cupidine pugnandi propius ad litus perlatam, locisque vadosis & brevibus impeditam pedestri manu ceperat: hujus ad exemplum classis exædificari consules jussere, tantoque studio institerunt operi, ut sexagesimum intra diem, quam cæsa materia fuerat, classis centum sexaginta navium in ancoris staret. Sed nec ingenio minore quam industria consules expeditionem istam maturarunt. cum enim neque imperitos remiges in prælii discrimen adducere consultum putarent; neque exercendis iis tempus rerum gerendarum coarctare vellent; commenti sunt rem uti prima specie ridiculam, ita usu eventumque prolixè commendabilem: ut interea, dum naves compinguntur, futuri remiges in litore sedentes officia sua docerentur. Iisdem enim ordinibus dispositi, quos in ipsis navibus servaturi mox erant, hortatore in media turba collocato, ad illius vocem & præcepta, movere & impellere remos, iterumque quiescere, haud aliter, quam navigantes solent, jubebantur. Hac imaginaria exercitatione tantum profectum est, ut postquam paratis jam navibus paucos dies in ipso opere industriam suam probavissent, jam confidere ipsis auderent consules, suamque & legionum salutem credere.

IV. Provincias deinde cum fortirentur, C. Duilio terrestre in Sicilia bellum, Cn. Cornelio classis evenit. Qui assumtis navibus septemdecim Messanam progressus, quo in adventum classis, quam sequi, ut primum posset, jussu ferat, necessaria præpararet; priusquam ad fretum illa accederet, in manus hostium incidit. Factum id Boodis astutia, quem Hannibal Punicæ classis imperator legatum habebat, & credulitate consulis, qui Liparæis quibusdam ab hoste subornatis fidem habens, Liparæ urbis per proditorem occupandæ spem temere conceperat. Ibi circumventus a Punicis navibus, conferere tamen manus, & pugnando salutem quærere cogitabat: nisi Boodes altera fraude

ipsum & tribunos militum, quali de conditionibus cum Pœno locuturos, suam in triremem pellexisset. venientibus injectæ sunt catenæ: quo terrore cum ceteri sine certamine se tradidissent; Boodes navibus omnibus potitus captivos Carthaginem misit.

V. Simile mox Pœni ducis peccatum fuit, eoque majoris opprobrii, quod neque Romani consulis incogitantiam recenti exemplo ad cautionem profuisset. Didicerat Romanam classem, juxta litus Italicum vela facientem, ad fretum tendere, neque procul abesse jam posse. volens igitur eam ex propinquo considerare, ut numerum navium, & quæ in novo instituto Romanis agilitas & habitudo esset, accurate cognosceret, cum navibus quinquaginta proficiscitur: securus futuri, & classe, ut in cursu tuto solet, navigiis temere permixtis, parum composita. Igitur in flexu cujusdam promontorii cum in Romanam classem ordine commodo navigantem subito illatus esset; ante victus, quam ad pugnam parare se potuisset, amissa meliori parte navium, postquam ipse quoque ad extremum periculi venisset, cum ceteris vix effugit.

VI. Victrix classis, cognito Cornelii casu, simul ad C. Duilium misit nuntios, qui suum adventum ei significarent; simul ad prælium se parabat, quod ceteras Carthaginensium naves propinquis locis agere compererat. ibi dum sollicitis animis incommoda suarum navium considerant, easque rudi opere constructas, a Punicis velocitate longe superari reputant; venit cuidam in mentem machinæ ad comprehendendas hostium naves tenendasque utilis, quam postmodum *corvus* vocaverunt. ejus hæc forma fuit. Tingnum erat rectum teres, quatuor ulnas longum, crassitie dodrantali, trochleam in summo habens: huic in prora navis defixo aptabatur scala sex ulnas lata, longa pedes quatuor, composita ex transversis tabulis, quas impacti clavi ferrei firmiter continebant: in ea machina foramen

§ IV. Zonar. Polyb. 1, 21. Liv. Epit. 17. Florus. 2, 2. Orof.  
§ V. Polyb.

relictum erat oblongum, quo tigno inducta complecteretur illud, eique cohæreret, per spatium ulnarum quatuor, quanta ipsius tigni longitudo erat.

VII. Scalæ vero reliqua pars & tigno non inserta, quæ ulnarum erat duarum, quibusdam velut articulis ita dependebat, ut facile attolli demittique posset: in extremo scalæ validum affixum erat ferrum, pistilli forma, præacutum, quod in capite annulum habebat, ex quo funis alligatus per trochileam tigni, in ipsam navis proram demittebatur. Tum quoties voluissent attracto fune erigebatur scala, remisso ruebat: quidquid comprehendisset infesto ferrei stili acumine defigens & vinciens. Inter hæc C. Duilius consul pedestri exercitu tribunis tradito, ad naves venit: intellectoque Mylaiten regionem ab hoste vastari, cum universa classe ad eam oram proficiscitur. Grata res Carthaginensibus fuit, qui adversum mediterraneos homines & rei nauticæ imperitissimos, certam sibi victoriam pollicebantur: ipsi quoque documento futuri, nullum unquam hostem ita contemni oportere, ut quidquam de cavendi diligentia & disciplina remittatur. X

VIII. Dux classis Hannibal, is qui copias ex Agrigento eduxerat, septireme vehebatur, quæ fuerat regis Pyrrhi: hunc reliquæ naves sequebantur, non tanquam ad prælium, per aciem & distinctos ordines; sed ut cuique pronum erat, hostium contemtu properantes: ac postquam propius fuggressi suspensos ex proris adversæ partis minantesque corvos viderunt; rei novitatem admirati paulisper hæsere. tandem ferocissimo quoque imperitorum hominum rude commentum deridente, primæ quæque naves concitato impetu invaduntur. Tum vero demissi repente corvi, ut in quamlibet inciderunt, ita perforato tabulato hærentes invitam retinebant: milites autem Romani, siquidem fors tulerat ut ex lateribus naves connecterentur, omni ex parte in hostiles insiliebant: quoties autem proræ tantum commissæ essent, per ipsum tignum annexumque pontem armati bini tran-



libant, tanto expeditius, quod utroque a latere scalæ lorica genu tenus alta, tutiorem incessum gradumque firmiorera præstabat: primi enim quique projectis ante se scutis frontem adversus hostium tela protegebant; pone sequentes sua scuta loricae utrinque applicabant; sic etiam lateribus defensis, navem adversam collato gradu oppugnabant. fiebatque pugna non rostrorum, sed ensium virorumque cominus, & statariæ similis.

IX. Unde Romano, qui robore præstabat, adversum homines leviter armatos, naviumque potius agilitate quam manibus confisos, facilis victoria fuit: celeriterque sunt expugnatae naves Punicae triginta: in quibus & prætoria septiremis capta est. Hannibal tamen, cum ex navi, quæ jam capiebatur, in scapham saltu se demisisset, captivitatem evasit. rapideque misso Carthaginem amico, qui famam cladis præveniret, imminens ob rem male gestam supplicium astu declinavit. Is enim curiam ingressus, quasi re adhuc integra consilium a Senatu petiit, *congregiendumne cum Romana classe videretur?* omnibus succlamantibus, *ne dubitandum quidem, aut differendum fuisse: Fecit*, inquit, & *visus est*. Ita non audentibus incusare factum, cujus, antequam fieret, auctores esse pro se quisque voluissent, capitis pœna liberatus est imperator, præfectura navium adempta.

X. Ceterum post fugam ducis e proelio reliquæ Carthaginensium naves (supererat autem pars multo maxima) impedito consilio, quid faciendum esset, ambigebant: pudebat excedere pugna, nullo tum accepto incommodo, ne hoste quidem urgente: rursus Romanas naves aggredi corvorum metu cunctabantur: ad postremum undique circumvecti, & nauticas artes omnes experti, ubi omni ex parte opponi sibi rostra & objici formidabiles illas machinas vident; desperata victoria discessere. Mersæ traduntur eo proelio naves Punicae quatuordecim, captae una & triginta, cum septem hominum millibus, postquam pugnan-

§ VIII. Flor. Front. :trat. 2, 3. Polyb. § IX. Val. Max. 7, 3, 7. Zonar. Auct. de Vir. ill.

do tria millia periissent. Hoc eventu C. Duilio consule adversus Pœnos juxta Liparæorum insulas certatum est: unde magnus Romanis etiam prædæ fructus, sed longe amplissimus gloriæ famæque fuit. Consul assumpto terrestri exercitu Segestam profectus, urbem a Pœnis ad extremum spei adauctam, periculo exemit: inde Macellam pugnando cepit, Hamilcare nusquam occurrere auso: confirmatisque civitatum amicarum animis, ætate jam circumacta, Romam rediit.

XI. Cujus discessu res Punicæ rursus efflorescere cœperunt. Primum enim ab obsidione Mutistrati, post septimum mensem multis suorum desideratis, discesserunt Romani: deinde cum inter ipsos & auxiliares dissensione orta, seorsim a legionibus inter Paropum & Thermas castra metati focii essent; illorum vecordia utendum ratus Hamilcar, improvise irruptione supra millia quatuor occidit: neque multum abfuit, quin totus Romanorum exercitus eadem clade involveretur. Tum igitur multa iterum oppida, partim expugnata sunt ab Hannibale, partim proditione capta. Quæ licet Romæ haudquaquam lætis auribus acciperentur, levia tamen damna præ gaudio navalis victoriæ reputabantur. Cum enim hætenus Romana virtus terrestribus bellis invictam se præstitisset, non abs re latabantur isto proelio maritimarum quoque virium non contemnendam opinionem quæsitam esse. unde ad spem totius belli mirifice confirmatis animis, auctorem decoris inusitati novis etiam honoribus dignum judicaverunt.

XII. Primus itaque Duilius navalem triumphum de Siculis & classe Punica egit Kalendis Intercalaribus: tulitque civitas, quod honore isto non contentus, alium sibi nullo exemplo privatus fuit, ut a cœna redeunti tibicinis inter cantum funale præluceret. Columna quoque rostrata Senatusconsulto posita in foro est, ex Pario marmore candido, quæ merfarum captarumque navium numerum, &

§ X. Eutrop. l. 2. Oros. Florus 1, 2. Zonar. Polyb. § XI. Diod. Ecl. l. 23. Eutrop. l. 2.

summam pondusque pecuniæ captæ complexa, adhuc visitur, sed exitis vetustate vocabulis pluribus: auri tamen nummos captos esse ter mille septingentos, argenteorum supra centum millia, æris gravis vicies septies centena millia pondo, satis agnoscitur. Triumpho peracto comitia C. Duilius habuit, L. Cornelius L. F. Cn. N. Scipio, C. Aquilius M. F. C. N. Florus consules facti. Provincias consulares Senatus decrevit Siciliam, & classem. Cui classis obvenisset, ei in Sardiniam & Corsicam transjicere, si e republica videretur, permissum. Hæc fors Cn. Cornelio cum evenisset, instructa classe profectus est.

XIII. Hæc prima Romanorum in Sardiniam & Corsicam expeditio fuit. Insulæ sunt locis ita conjunctæ, ut eadem videri possint: cœli tamen solique natura, & quod sequitur, hominum ingenio, multum dissimili. Sardiniam, ut imaginem humani vestigii referentem, *Ichnusum* veteres, itemque *Sandaliotin* dixerunt. *Inde Sardum Hercule Libyco genitum* ajunt *frequentatæ ab se insulæ nomen, quo hodie noscitur, imposuisse*. Græcos etiam ad ea loca venisse cum Aristæo fabulis antiquis decantatum est; itemque post Iliacæ bella, Trojanos. Terra neque spatium soli maximis ejusdem maris insularum, neque bonitate fertilissimis multum cedit. parens optima pecudum, frumenti optimi feracissima, metallorumque, sed præsertim argenti, dives. Cœlo tamen haud æque salubri utitur, laudemque fecunditatis apud externos pestilentioris aeris infamia corrumpit: per æstatem enim morbosæ est, & in locis fertilioribus, magis.

XIV. Herbam præterea producit vehementis veneni apiastro per similem, quæ in cibo sumpta mentem adimit, nervisque violenter attractis labia distorquet in ridentium speciem; exitiali succo, nisi post vomitum lac aut aqua multa copiose bibatur: ita vis istius mali præsens diluitur;

§ XII. Tacit. 2, 49. Colum. Triumph. Cic. Cat. c. 13. Liv. Epit. 17. Plin. 3, 4, 5. Silius in fine l. 6. Pigh. Annal. § XIII. Sall. hist. 2, 1. Plin. 3. Silius l. 2. Sall. fragm. Pausan. Athen. hist. 22, 16, 34. Sol. c. 10.

ceteris deinde incommodis ea medentur, quæ in convulsionibus nervorum usui sunt. Etiam minimum animalculum per imprudentiam superfedentibus mortiferum est. *Solpugam* vocant, formicarum genus, tanto periculosioris malitiæ, quod & latet facile propter exiguitatem, & ab ignaris naturæ ejus, etiam animadversum non timetur. Sardi, variis ex barbaris mixta natio, cum ingenio suo permittitur, libentius latrocinio quam agricultura victitant: pelta & brevi ense armantur: thoraces ex pelle musmonum confuunt; arietes ita vocant, quos insula gignit, non latam ut alii, sed pro ea pilum caprorum more gestantes. Urbium celeberrima Caralis est, Africam spectans, & inde condita, cum pulcherrimo portu.

XV. Corsica nec amplitudine nec opibus Sardinia comparanda, tertium tamen inter has insulas magnitudinis locum obtinere creditur. nomen a Corsia, muliere quadam, accepisse incolæ tradunt; cujus ab armento taurus in hanc insulam ex Liguria transjecerit. Græcis *Cyrnus* vocatur. Montosa est & aspera, & plerisque locis penitus invia: quare populum etiam terræ suæ similem alit, nullo humano cultu feris propemodum ipsis intractabiliorem. Capri in servitutem vix mansuescunt: sed aut impatientia laboris & jugi vitam exuunt; aut contumacia & stupiditate molesti sunt heris. Mel in insula copiosum est, sed anari saporis, quale sit ex flore buxi, quam Corsica multam & crassissimam profert. Idem tamen saluberrimum putatur; & sunt qui longævos in Corsica homines fieri opinentur, quod mel istud suum in continuo usu habeant. Oppida nec magna nec frequentia populo, sed tamen supra triginta numerantur: ex quibus facile principes sunt Aleria, Phocænsium Colonia; & Etruscorum Nicæa. Hic quoque grave cælum est, & præterea importuosum mare.

XVI. Cum his igitur gentibus diu Carthaginienfes bella

§ XIV. Mela 2, 7. Strab. l. 5. Plin. 16, 16. Math. in Diosc. 6, 14. Plin. 20, 1. Lucan. 9. 837. Claud. de bell. Gild. § XV. Sall. hist. 2, 1. Strab. l. 5. Lycus ap. Athen. l. 2. Plin. 29, 4. Mart. Capella. Diod. 5, 3.

gestere, & utriusque insulæ dominatione, præter inaccessa loca potiti sunt. Sed quia facilius erat rudes & feros homines vincere, quam domare; tum alia, quibus eos continerent, excogitarunt, tum etiam quo res vitæ necessarias ex Africa petere cogerentur, quidquid ubivis frugum fructuumve erat, corruperant, etiam supplicio mortis indigenis proposito, si quis tale quid ferere aut plantare instituisset: donec longa consuetudine facti mitiores imperium æquioribus animis pati didicerunt. Has ad insulas navigationem eo tempore L. Cornelius consul instituit. & prius quidem in Corsica urbem expugnavit Aleriam: quo facto ceteras facile & citra laborem aut periculum adjunxit. Inde Sardiniam petenti classis occurrit hostium: quam aggressus consul, antequam ad manus ventum esset, in fugam conjecit.

XVII. Mox ad Olbiam profectus, cum in portu multas Carthaginiensium naves stare vidisset, neque se satis a pedestri robore instructum ad oppugnationem urbis situ & defensorum multitudine validæ crederet, omisso in præsens negotio, domum ad plures milites assumendos abnavigavit. Per idem tempus servills in urbe motus inter ipsa initia feliciter compressus, magna rempublicam sollicitudine simul affecit, & liberavit. Ad classem instruendam ex gentibus recens devictis navales focii frequentes cgebantur: eorumque tum ad quatuor millia Romæ convenerant, Samnites plerique. ii, quod a mari abhorrent, conditionem suam secretis sermonibus miserati, eo usque exarserunt, ut urbem incendere atque diripere agitaverint. jamque ad tria servorum millia in eandem sententiam pertraxerant, quotidie fumente vires conspiratione, cum Erius Potilius præfectus auxiliorum prudenti consilio periculum omne discussit.

XVIII. Simulato enim ejusdem factionis studio, machi-

§ XVI. Senec. consolat. ad Helv. c. 8. Arist. *περὶ θαυμασίων ἀκουσμάτων*. Freinsh. ad Flor. 2, 2, 16. Zonar. § XVII. Oros. 4, 7.

nationes eorum omnes exacte perdidit : genus, numerum, nomina singulorum, qui in ea conjuratione essent, cognovit : loca, tempora, quibus ausuri quodque forent, exploravit. Nihil jam deerat ei, quo minus rem ad Senatum deferret, præter facultatem Curiam adeundi; nam voluntas supererat: sed, Samnitibus nusquam incommitatum sinentibus, perficere institutum nequibat; donec excogitato dolo persuasit eis, *uti, quo die Senatus haberetur, in forum agminatim progressi, fraudem sibi in dimetiendo frumento factam esse vociferarentur: inde nascituram occasionem dicens aut exsequendi consilii sui, aut certe speculandi, quid adversus subitos ejusmodi motus animi consiliique Patribus esset.* quoque plus fidei faceret, ipse processit una, neque comitem modo se tumultus ejus, sed principem ducemque præbuit. Unde vocatus ad Senatum, conspirationis occultæ periculum commentique sui causas exposuit.

XIX. Patres, dissimulata facti conscientia, miserunt qui turbam illam blandis verbis delinitam domos abscedere juberent: *daturos operam Patres, ut injuria, quæ facta diceretur, sublata, juris sui cuique copia fieret.* Ita conjurati, latere adhuc consilium suum existimantes, digressi sunt: nocte vero proxima suos quisque fervos, quos indicio Potilii sceleris esse participes cognoverant, vinxit: Samnitium quoque plerique in hospitibus suis comprehensi. Nescio, an hæc cura, an vero aliud negotiorum aut valetudinis impedimentum C. Florum tenuerit, ne citius in Siciliam proficisceretur: in qua Hamilcar post proximam victoriam res Carthaginensium magnis profectibus restituebat. Quippe Camarina & Enna proditione receptis, Drepanum, ubi portus egregius erat, commutavit, & in oppidi formam auxit, transductis illuc Erycinis, quorum urbem, ne Romanis usui foret, præter templum Veneris, everterat. Multa deinceps alia loca dolo aut armis in potestatem redegerat, totaque Sicilia potiturus videbatur, nisi Florus, ob res itas ne sub hiemem quidem insulam relinquere ausus, obstitisset.

XX. Facilius alteri consuli bellum cum Sardis & Carthaginensibus ad Olbiam fuit. Quo reversus cum auctioribus copiis, Hannonem invenit, quem Hannibale remoto Carthaginenses rebus maritimis praefecerant. Pugna vehementi facta, Hanno fortissime dimicans, cum vinci suos videret, in confertissimos hostes irruens interfectus est, secutaque oppidi deditio. Consul victoriæ famam etiam humanitatis adversus hostem insigni documento decoravit. Nam e tabernaculo suo corpus Hannonis efferendum curavit, amplasque ipsi fecit exsequias, cessantibus post mortem odiis, virtutem etiam in hoste honorandam esse recte judicans. Inde recentis victoriæ terrorem exolescere non passus, multas & alias Sardiniae urbes cepit, consilio doloque virtutem adjuvans.

XXI. Solebat enim noctu appulsa litori classe, delectos ex cohortibus haud procul oppidis, quæ adoriri constituerat, exponere: qui locum insidiis opportunum occupantes expectabant, donec ad ipsas urbes fuggressus consul oppidanos in arma compulsos, simulatione fugæ longius a mœnibus eliciisset: tum illi advenientes cursu, vacuas defensoribus urbes capiebant. eo astu complures in potestatem venire: tantumque vincendo processum est, ut neque in Corsica, neque in Sardinia Pœnorum exercitus consistere possent. Qua de causa minime dubitatum est, quin Romam reverso triumphus amplissimus decerneretur. Triumphavit de Pœnis & Sardinia & Corsica ante diem V Idus Martias, cum magnam ex insulis istis prædam, & multa millia captivorum adduxisset. At in Sicilia C. Florus Proconsule Mutistratum obsidebat, locum munitum, & semel iterumque frustra tentatum.

XXII. Ne tum quidem prius expugnari potuit, quam novus consul A. Atilius A. F. C. N. Calatinus veniret. huic enim Sicilia provincia, collegæ ejus C. Sulpicio Q. F. Q. N. Paterculo classis evenerat. Ii, quod Panormi Carthagi-

§ XX. Val. Max. 5, 1, 2. Silius 1. 6. Front. 3, 9. § XXI. Flor. 2, 2. Fasti Capitol. Eutrop. 1. 2. Zonar.

nienſium hiberna erant, cum omnibus copiis eo profeſti acie inſtructa fecere pugnandi copiam hoſtibus. Sed nemine contra prodeunte, Hippanam petierunt: quæ urbs ex itinere oppugnata ſtatimque capta eſt. Inde Mutiſtratum perrexit Atilius, quam acriter deſenſam ad extremum fatigati lamentis mulierum atque puerorum propugnatores deſeruerunt. Ita præſidio Carthaginienſium noctu digreſſo, prima luce portas oppidani aperuerunt. Sed Romani, malorum quæ in obſidione pertulerant nimium memores, obvios ſine discrimine ſexus ætatiſve cædebant: donec A. Atilius proclamari juſſit, *prædam & homines capientium fore*. Tum demum crudelitatem avaritia vicit; ſervatique Mutiſtratenſium reliqui ſub corona venierunt: urbs direpta eſt & diruta.

XXIII. Camarinam inde ductus exercitus, ob regionem parum diligenter exploratam, maximum in diſcrimen incidit. Pœnus enim imperator obviam profeſtus loca ſuperiora prior occupaverat: Romanæſque copias in vallem iniquam temere demiſſas circumſidebat. Certum ante oculos omnium exitium, & Caudinæ cladis imago verſabatur: niſi conſilium & virtus M. Calpurnii Flaminiæ, qui tribunus militum eodem in exercitu agebat, rebus pæne deſperatis ſubveniſſet. Nam is P. Decii ſecutus exemplum, qui tribunus militum idem in Samnio fecerat, aſſumtis militibus trecentis ad tumultum quendam occupandum ivit: nulla ſpe evadendi, ſed amore laudis & ſervandi exercitus cupiditate ipſe militesque ejus accenſi. Ferunt, cum eo duceret, ita ſuos allocutum eſſe: *moriæmur, milites, & morte noſtra eripiamus ex obſidione circumventas legiones*. Atque ita factum eſt. hoſtibus enim in hos converſis, dum acerrima pugna quantumvis multos morituri detinent, conſul evolvere ſeſe locis infeſtis potuit: Carthaginienſes interfectis, qui ſe objecerant, nihil in detectis jam inſidiis ponentes ſpei diſceſſerunt.

§ XXII. Diodor. Zonar. § XXIII. Zonar. Agell. 3, 7. Front. Strat. 4, 5, 10. Liv. Epit. 17. Liv. 7, 34 & 22, 60. Flor. Oref. 4, 8.



XXIV. Itaque Calpurnii miraculo proxima fortuna fuit. Qui repertus inter suorum hostiumque cadaverum cumulos, cum solus omnium adhuc spiraret, sublatus atque diligenti cura reffectus, cum inter multa vulnera letale nullum accepisset, diu postea fortem fidelemque operam Reipublicæ præstitit, magnoque terrori hostibus fuit. Qui si apud Græcos tantum virtutis specimen edidisset, neque præmiorum, neque monumentorum fatis potuisset decerni. nunc homini Romano tanti facinoris merces corona ex gramine fuit: memoria vero facti adeo negligens, ut vix de nomine fortissimi viri constet. eundem enim *Calpurnium Flamman* plerique, sed M. Cato Q. *Cædicium*, Claudius Quædrigarius *Laberium* vocatum esse, tradiderunt. Ceterum emerfus ex his angustiis consul, cum & error pudorem, & periculum vigilantiam acuisset, majoribus iterum viribus & intentiore cura oppugnare urbem aggressus, postquam sine machinis parum proficiebat, ab Hierone petitas accepit. Earum violentiæ cessit murus, redactosque in potestatem Camarinenses majori ex parte sub hasta consul vendidit.

XXV. Tum ad Ennam itum: ea quoque proditione recepta: præsidarii partim a Romanis in oppidum admissis interfecti sunt, alii fuga dilapsi ad suarum partem loca se receperunt. Sittanæ possessionem non dolus sed virtus dedit: magna vi pulsus, qui defenderant, & urbe expugnata. Neque moram fecerunt minora quædam in ea Siciliæ parte oppida, quin protinus missis legatis consuli se traderent. Qui præsidiis per commoda loca dispositis, in Agrigentinum agrum signa promovit, ibique Camicum castellum opera proditorum recepit. Unde perculsi, qui Erbesum tenebant, oppido relicto fugerunt. Sic Erbesus quoque ad Romanos rediit. Hoc successu consul animatus, & quod Liparæorum haud paucos sibi favere putabat, ad illorum urbem admovit exercitum. Ibi non pro cetera felicitate res processit. Hamilcar enim, Romani ducis consilio sagaciter

§ XXIV. Auſt. de Vir. ill. c. 39. M. Cato ap. Agell. Plin. 22, 6. Front. Strat. 4, 5, 10. Agell. 3, 7. Diodor. Polyb.

deprehenso, Liparam clam intraverat, intentusque tempus bene gerendæ rei exspectabat. Quod Romanus cum ignoraret, audacius & incautius subiens muros, repentina Pœnorum eruptione turbatur. vulnerati sunt in eo conflictu permulti, cæsorū quoque non exiguus numerus fuit.

XXVI. Interea C. Sulpicius consul in Sardinia cum Pœnis aliquoties prospere dimicavit: tantumque hinc accessit animi, ut Africam versus vela facere auderet. Id vero minime ferendum esse Carthaginienses arbitrati, Hannibalem, qui ex Sicula fuga Carthagine adhuc agebat, iterum navibus suis præponunt, multisque & præstantissimis præfectorum navalium adjunctis, *classē hostilem a patriis litoribus repellere* jubent. Solvit is quidem ut pugnaturus: ceterum, quo minus concurreretur, intercessit tempestas; quæ utrisque gravis incumbens, ad loca tranquilliora submovit invitos. Sardinia tamen portus ambo duces tenuerunt. Ibi cum in ancoris haberent naves, Sulpicius, quo Pœnum in apertum mare perliceret, quosdam subornat, qui transfugarum specie persuaderent Hannibali, *Romanos iterum in Africam navigare*. Deceptus ille hoc vaframento, celeriter educta classe, in consulem idoneo loco præstolantem imparatus incidit: multæque naves Punicæ depressæ sunt, priusquam scire possent, quid ageretur; cum insidias consulis tempestatis favor & opportune orta caligo texisset.

XXVII. Tandem re intellecta reliquæ repetiverunt portum, aut in litus se ejecerunt; ibi profugientibus remigibus pleræque inanes captæ sunt. Hannibal enim, desperato teneri portum posse, in oppidum Sulcos se contulerat: ubi seditione orta comprehensus a Carthaginiensibus, qui eodem ex pugna confugerant, quod *ejus temeritatem & stultitiam cladis suæ causam fuisse* dicerent, crucique affixus periit. Sed hæc victoria Romanis paulo post detrimenti nonnullius causa fuit. cum enim sublato classis Punicæ metu in vastatione agrorum contentius & securius versarentur, improvise Pœ-

§ XXV. Polyb. 1, 24. Diodor. Flor. 2, 2. Zonar. § XXVI. Oros. Zonar.

norum Sardorumque incurſu, Hannone quodam duce, fuſi ſunt. Cenſuram hoc anno C. Duilius geſſit, Janique templum apud forum olitorium ſtruxit. Triumphi dehinc duo ſpectati: prior C. Aquillii Flori proconſule de Pœnis a. d. IV Nonas Octobres; alter C. Sulpicii conſulis de Pœnis & Sardis, a. d. III Nonas.

XXVIII. Cum deinde C. Atilius M. F. M. N. Regulus, & Cn. Cornelius L. F. Cn. N. Blaſio iterum conſules eſſent, ſacra quædam procurandis prodigiis fieri ſolita Senatus faciunda cenſuit; quod in Albano monte, lociſque aliis pluribus, atque adeo in Urbe ipſa, lapides frequentes grandinis inſtar deciderant. Latinas ferias inſtaurari, cauſaque earum dictatorem dici viſum eſt. Q. Ogulnius L. F. A. N. Gallus dictator, M. Lætorius M. F. M. N. Plancianus magiſter equitum fuerunt. C. Atilius, qui claſſi præerat, ad Tyndaridem Siciliæ cum appuliſſet, claſſem Punicam ordine parum compoſito præternavigantem conſpicatus, ejus oppugnandæ conſilium ſubito cepit. Juſſiſque ſequi ceteris navibus, ipſe cum decem, quæ primæ parari potuerunt, evolat; & ad Pœnos jam longius evectos ſumma velorum remorumque contentione pergit.

XXIX. Hamilcar in ea claſſe vehebatur, non contemnendus imperator: qui paucas ſibi naves inſtare videns, alias portu vix egreſſas eſſe, magnam partem etiamnum in ancoris hærare, converſo curſu C. Atilium ejusque naves tota claſſe circumvenit. deprimuntur celeriter naves novem, impari adverſum tanto plures certamine nequidquam omnia expertæ. Prætoria tamen meliori, quam ceteræ fuerant, remigio inſtructa, fociiſque navalibus præſentia conſulis animatis, vi perrupit, ſalutemque invenit. jam enim aderant Romanorum aliæ naves, quarum ſuperventu mutatur fortuna pugnæ, merguntur Punicæ naves octo, capiuntur cum ipſis remigibus decem: reliquæ ad Liparæorum inſulas intendunt curſum. Hæc mari geſta. terreſtrium copia-

§ XXVII. Zonar. Polyb. Liv. Epit. 17. Marm. Capitol. Tacit. Annal. 2, 49. § XXVIII. Zonar. Fragm. Capitol. Polyb.

rum segnius bellum fuit, urbe Lipara sine successu oppugnata. sed in apertorum locorum vastationem defæviit hostilis ira; eademque calamitas etiam Meliten insulam haud longe distitam comprehendit. Ob hæc gesta C. Atilius consul triumphum navalem de Pœnis egit. Eodem anno etiam A. Atilius Proconsule ex Sicilia de Pœnis triumphavit a. d. XIV Kalendas Februarias. lætæque tum Romanis res erant, qui non terrestribus modo præliis, sed etiam maritimis superiores, non jam de Sicilia annexisque insulis, quarum imperium fatis sibi certum esse putabant, sed de Africa invadenda, bellicque terrore Carthaginis ipsius portis impingendo, incipiebant consultare. ✕

§ XXIX. Polyb. Zonar. Orosc. Colum. Capitol. Auct. de Vir. ill. c. 39.

---

# JOANNIS FREINSHEMII SUPPLEMENTORUM LIVIANORUM

## LIBER VIII.

IN LOCUM LIB. XVIII LIVIANI.

---

## EPITOME

### LIBRI DECIMI OCTAVI.

*Atilius Regulus Cos. in Africa serpentem portentosæ magnitudinis cum maxima militum clade occidit, & cum aliquot præliis adversus Carthaginienses pugnasset, successorque ei a senatu prospere bellum gerenti non mitteretur, id ipsum per litteras ad senatum missas questus est. in quibus inter causas petendi successoris erat, quod agellus ejus a mercenariis desertus esset. Quærente deinde fortuna, ut magnum utriusque casus exemplum in Regulo proderetur, arcesso a Carthaginiensibus Xanthippo Lacedæmoniorum ducce, victus prælio, & captus est. Res deinde a ducibus Romanis omnibus terra marique prospere gestas deformavere naufragia classium. Ti. Coruncanius primus ex plebe pontifex maximus creatus est. P. Sempronius Sophus, M. Valerius Maximus censores, cum senatum legissent, tredecim senatu moverunt. lustrum condiderunt, quo censæ sunt civium capita CCXCVII millia, DCCXCVII. Regulus missus a Carthaginiensibus ad senatum, ut de pace, & si eam non posset impetrare, de captivis commutandis ageret, & jure-*

*jurando adstrictus rediturum se Carthaginem, si commutari captivos non placuisset; utrumque negandi auctor senatui fuit: & cum fide custodita reversus esset, supplicio a Carthaginienfibus de eo sumto, periit.*

I. **C**ONSULATUM deinde L. Manlius A. F. P. N. vulgo Longus inivit, & Q. Cædicius Q. F. Q. N. cui in magistratu mortuo suffectus est M. Atilius M. F. L. N. Regulus, qui semel consul fuerat. Hoc anno demum Africa, quæ hactenus cladium hostilium exfors egerat, sentire bellum cœpit, Romanis in eam ingressis, postquam Carthaginienfium classem magna pugna vicissent. Quæ, uti gesta sint, ipsiusque Reguli utramque fortunam, & indignum viri virtute exitum, hoc libro exponemus. Anno superiore cum C. Atilio consule Carthaginienfes ita prælio navali contenderent, ut quanquam ipsi pluribus amissis navibus pugna priores excessissent, tamen quia Romanas etiam aliquot submerferant, se non inferiores fuisse interpretarentur: Romani contra eventum eum pro victoria haud dubia computabant. Ita fiebat, ut spe & fiducia pari populus uterque studium maritimarum rerum per æmulationem summam prosequeretur.

II. Igitur & consules in Africam transferre bellum jussi, cum trecentarum triginta navium classe Messanam appulsi; atque inde litus Siciliæ dextrum legentes præter Pachynum ad recipiendas pedestres copias, tum castra circa Ecnomum collem habentes, pergebant: & sub idem tempus Hamilcar imperator Pœnorum, & præfectus classis Hanno, trecentarum sexaginta navium duces, Carthagine Lilybæum, & inde Heracleam Minoam transgressi. eo in portu stationem agitabant, consilia Romanorum observantes, & si versus Africam instituere cursum auderent, prohibitori. Quod edocti consules ad utrumque casum studiose cuncta comparant, ut sive navalis prælii tentandæ spes forent, sive alicubi exscensionem fieri oporteret, consilium in ex-

pedito haberent. Itaque pugnacissimis quibusque militum in naves impositis, quatuor classes, tanquam ejusdem universæ partes totidem, faciunt. legionem primam in prima classe, duas sequentes ordine suo constituunt: in quarta collocant triarios.

III. Has copias ita disponunt, ut singulis navibus trecenti remiges, milites vero centeni viceni vehantur: ita numerus hominum in universa classe ad millia centum quadraginta accedebat. Hunc numerum aliquanto superabant Pœni, plus centum quinquaginta millibus hominum adducentes. Et militum quidem genus præ suis parvi faciebant consules: major ea deliberatio erat, cum in alto mari pugnandum fore appareret, ubi celeritas navium & gubernatorum artes plurimum valent, quo ordine adversus istud discrimen aptissime componi acies posset. postremo rationem instruendæ classis talem ineunt. Hexeres duas, quibus consules ipsi vehebantur, pariter in fronte statuunt: utrique harum hinc primam inde secundam classẽ longæ & simplici serie annectunt, ita collocatis navibus, ut omnium proræ foras obversæ essent: hexeresque propemodum conjunctæ irent, proximæ his longius inter se digrederentur: atque ita deinceps spatium inter duas oppositas naves relictum cum ipsis ordinibus cresceret.

IV. Sic minimo inter primas naves, maximo inter postremas intervallo, cum ex duabus istis classibus forma cuneatæ aciei effecta esset, tertiam deinde legionem admove-runt: quæ simplici navium ordine spatium istud inter priores duas apertum prætexens, triquetram totius aciei faciem exhiberet. Pone hanc, a tergo tertiæ classis, hippagines funibus tractoriis ad naves tertianorum pertingentibus remulco trahebantur. Postremi omnium triarii navibus unam in seriem, sed semicircularem exporrectis ita priores ambibant, ut ab utroque cornu prominerent. Ita totum corpus fronte cava, postremis partibus solidis, rostri navalis similitudinem præferebat: non minus ad sustinendam

impressionem firmum, quam ad inferendam habile. Sed Carthaginienſium duces Romanæ claffis adventu per exploratores cognito, cum urbem ſuam aditu facilem, imbelles vulgus, accolæ leves & ad mutandam fidem pronos cogitarent; obviam ire decernunt, omnia prius experiri certi, quam tutum in Africam curſum Romanis navibus permetterent.

V. Igitur ſuos paucis cohortati, *ut memores non de præſentibus modo, ſed omnibus, quos domi quiſque cariffimos haberent, pugnandum eſſe, obſtantiſ & alacribus animis prælium capeſſerent*, naves conſcendunt & bonaque cum ſpe ſua & navalium ſociorum ex portu evehuntur. Neque longe Romana claffis aberat: itaque haud procul Heraclea pari utrinque robore concurritur. Pœni duces inter ſe ita comparaverant, ut in dextro cornu Hanno curaret (erat autem idem ille, qui apud Agrigentum infeliciter pugnaverat) ceteris præeſſet Hamilcar, naves autem ſuas animadverſa Romanorum acie quadripartito & ipſi diviſerant. Harum quæ totius aciei ſiniſtra erat in figuram arcus ſinuata, terram verſus inclinabat & ceteræ ſimplicibus ordinibus extenſæ, proriſ navium in hoſtem verſis. ex his dextrum cornu, in quo roſtratarum & quinquerenium celerrimæ erant, Hanno verſus altum mare quantum poterat exporrexerat, ſi pugna aliunde commiſſa eſſet, circumdaturus hoſtem.

VI. Neque diu morati conſules in medias Pœnorum naves cum duabus claffibus ſuis ſe intulerunt. Hamilcar, quo Romanorum aciem diſtraheret, ſuis præceperat, ut commiſſa pugna fugam continuo capeſſerent. Quod cum factum eſſet, Romanique cedentes avidè perſequerentur; illis quidem ob celeritatem navium innoxia fuga fuit; at Romanorum acies, uti voluerat. Hamilcar prævideratque, diſcuſſa eſt, triariis & tertia claſſe ſuo adhuc loco ſe tenentibus. Quod ubi perfectum eſſe vidit, ſubito dat e navi ſua ſignum, ut converſis proriſ pugnam cum inſequentibus incant: certatur ambiguo Marte, Pœniſ velocitate & peritiâ



nauticae rei, Romanis robore militum, longe superioribus. Itaque quamdiu navium potius quam hominum pugna esse potuit, Punica res haud dubie meliori loco erat: sed quoties corvorum jactu colligatis navibus cominus pugnari coeperat, penes Romanum erat certa victoria; cum miles manu fidens, & in conspectu consulum pugnans, insignitiore opera virtutem suam his approbare contenderet.

VII. Dum in ea parte sic dimicatur, Hanno cum dextro cornu, quod hactenus immotum habuerat, in triariorum naves invehens a mari fecit impetum, magnasque in angustias reductis molestum omnino negotium exhibuit. Eodem ferme tempore sinistra quoque Carthaginensium acies, mutata priore forma, & æquata fronte rostris infestis tertiam Romanorum classem, quæ hippagines remulco traherat, invadit. Romani dimissis funibus ad resistendum se parant: hic quoque fortiter configitur. Ita tribus locis, totidem navalia prœlia, magno intervallō divisa nascuntur. Cum ita satis diu dubia victoria certatum esset, tandem evenit, quod necessum est, ubi simul pluribus locis æquali virium robore pugnatur, ut quæ pars prima pulsa fuit, totius certaminis victoriam daret. Cum enim Hamilcar vim hostium ulterius ferre non posset, ipsius fuga ceteras etiam Punicae classis partes statim profligavit.

VIII. Nam ex consulibus L. Manlio in captivis navibus conquirendis, & ad suas alligandis occupato, M. Regulus commissum alibi certamen videns auxilium suis ferre festinavit, assumtis secundæ classis navibus, quotquot ex priore pugna integræ illæ sæque evaserant. Celeriter opem istam sentire triarii, receptisque animis, quos prope ad extremum periculum adducti desponderant, strenue dimicare cum adversariis coeperunt. Hanno cum & hos acrius resistere sibi, & a tergo se premi videret a recentibus, velis in altum datis imminens exitum prævenire studuit. Cum inter hæc L. Manlius quoque, tertiam Romanorum classem a Carthaginensium sinistro cornu ad terram urgeri conspiciatus, cur-

sum eo intendisset, supervenit & M. Regulus, qui jam hippagines & triarios in tuto locaverat, ita subito facies rerum vertitur, claudunturque & cinguntur, qui paulo ante Romanos circumdederant. quos equidem in arctum constitutos & velut obfessos olim pessumdederissent, nisi metu eorum accedere veriti, spatium dedissent consulibus, ut & suos eriperent incolumes, & Carthaginiensibus subito accursu circumfusi, naves quinquaginta cum vectoribus omnibus, velut indagine caperent: paucae reliquae juxta litus ipsum se subducentes effugere.

IX. Fuit hoc praelium cum varietate casuum, & contentione pugnandi, tum etiam amissarum utrinque navium multitudine inter pauca memorandum. Tres & sexaginta Pœnorum naves captæ; supra triginta depressæ sunt: victores quatuor & viginti naves amiserunt fluctibus haustas; at in potestatem hostium nulla pervenit. Post hanc victoriam Messanam reversi paucos dies navibus hominibusque reficiendis, & ampliori commeatui parando dederunt. Inter quos Hamilcar, cum Africam ab Romanis adiri vehementer nollet, prohibere vero vi & armis non posset, ad dolos se contulit; missoque ad eos per causam petendæ pacis Hannone tempus extrahere sategit, donec copiae, quas Carthagine sibi mitti sperabat, advenissent.

X. Hanno cum ad consules accessisset, audiretque voces *idem in illum statuendum esse clamitantium, quod quinto ante anno in Cn. Cornelium Asinam consulem Pœni designavissent*; astuto responso periculum intentatum elusit: *hoc vero, inquit, si feceritis, jam nihilo eritis Afriis meliores.* statimque consules excepere sermonem, tacere jussis, qui vincendum dixerant, convenientisque Romanæ gentis gravitate vox audita est: *Isto te metu, Hanno, fides civitatis nostræ liberat.* De pace, quia neque Pœnus serio agebat, consulesque victoriam quam pacem malebant, frustra agitatum est. Africanam igitur expeditionem diutius differri non placuit. Neque Pœni duces oblitere, quanquam inter se constituis-

sent, quietum iter hosti non concedere, sed diversis ex partibus carpere morarique. Ceterum Hannone ad præmunendam Carthaginem festinante, Hamilcar nihil movere ausus, Heracleæ se continuit: naves Romanæ & ab hostibus & a tempestate pacatum iter habuerunt.

XI. Neque defuerant, qui longinquam navigationem, & hostile litus, ipsumque Africæ nomen exhorrescerent; ante ceteros imperium detrectante tribuno militum Manio: sed adversus hunc ita exarsit Regulus, ut virgas securimque minitaretur, ni paruisset. ita demum præstitum est obsequium consuli, formidinemque navigandi propior & major metus expulit. Hermæum promontorio nomen est, quod a sinu Carthaginis in mare Siculum late procurrit: eam oram primæ Romanorum naves tenuerunt. ibi paulisper expectato, donec tota classis convenisset, litus Africæ prætervecti consules ad Clupeam urbem pervenere. hic legiones expositæ sunt, navibusque in portum subductis, vallum ac fossa, quo tutiores essent, circumdata: urbs, quia deditionem abnuebat, obsessâ, statimque metu civium sive dedita sive deserta (nam utrumque traditur) in potestatem Romanorum concessit.

XII. At Carthaginienſes, quanquam fane dura & infueta paterentur, tamen gratulabantur sibi, quod aliquanto mitiora formidatis accidissent. Metuerant enim audito pugnae navalis exitu, ne protinus ad ipsam Carthaginem victores copiae ducerentur. Itaque nonnihil ex priore metu respirantes in contrahendas copias urbemque & suburbanam regionem tuendam intenti erant. Consules interea missis Romanam nuntiis, qui & res hæcenus gestas docerent, & de instantibus sententiam Patrum exquirent, Clupeam muniunt, ut ea sede belli uterentur: præsidioque ad urbis & agri custodiam imposito, cum ceteris omnibus copiis longius progressi, cultillimam regionem, utpote quæ post Agathoclis tempora ferrum hostilem non viderat, perpo-

§ X. Val. Max. 6, 6. Zonar. Polyb. §. XI. Flor. 2, 2. Polyb. Zonar.

pulantur : villas magnificas multas destruunt : magnam quadripedum prædam, hominum præterea supra viginti millia abducunt, nemine prohibere auso. oppida quoque multa vi aut deditione capiunt : in his perfugarum aliquem numerum deprehendunt, magnamque vim captorum proximis bellis civium Romanorum liberant : quos inter & Cn. Cornelium fuisse crediderim, qui proximo post biennio consul iterum factus est.

XIII. Dum hæc aguntur, qui Romam a consulibus missi fuerant, cum mandatis Senatus revertuntur. jubebatur autem alter eorum in Africa manere cum ea parte virum, quam retineri ex republica judicassent ; alter ceteram classem & copias Romam reducere. Sic imminente jam hieme, mansit M. Regulus cum quindecim ferme peditum millibus, equitibus quingentis, & navibus quadraginta : classem reliquam mancipiis & præda onustam L. Manlius Siciliæ litora tuto prætervectus in Urbem reportavit. Septem & viginti millia captivorum ab hoc Romam deducta reperio : navalemque de Pœnis decretum ei triumphum esse. Post hæc Ser. Fulvius M. F. M. N. Pætinus Nobilior, & M. Æmilius M. F. L. N. Paullus consules facti. His Sicilia & classis provinciæ decretæ : Regulum res in Africa prosperrime gerentem ex medio cursu victoriarum revocari non placuit ; jussusque Proconsule bellum in Africa administrare.

XIV. Id Senatusconsultum nemo accepit ægrius, quam idem ille, cujus in honorem factum fuerat. Igitur litteris ad Senatum missis ea de re questus est, interque causas petendi successoris posuit, *villici sui morte* (is agellum heri, quem habebat in Pupinia, jugerum septem coluerat) *mercenarium occasionem natum, amoto inde instrumento discessisse. quare necessariam esse præsentiam suam, ne rure deserto non esset, unde uxor liberique sui alerentur.* Decrevitque Senatus, ut ager M. Reguli publice coleretur, res amissæ redimerentur, uxori liberisque ejus alimenta præberentur. Li tum

mores fuere. Sed ego, quoties hæc atque talia lego tradove, temperare non possum, quin cum animo meo recogitem, quanto sit virtuti firmitior a laude, quam ex pecunia merces. quippe tam multis post ætatibus gloria M. Reguli manet: aliorum opes cum dominis, & sæpe ante ipsos perierunt. ✕

XV. Carthaginienſes interea duobus domi conſtitutis ducibus Afdrubale Hannonis F. & Boſtare, tertium etiam Hamilcarem ex Sicilia accivere, qui cum peditum quinque millibus, equitibus quingentis Heraclea Carthaginem propere venit. Hi communicato inter ſe conſilio ſtatuerunt, *non manibus, ut ad eam diem factum fuerat, continendum exercitum; neque Romanos impune quidvis agere ſinendos eſſe.* ſic animis ad bellum gerendum incitatis exercitus educitur. Interea M. Regulus proxima quæque ſubigendo in loca pervenerat, per quæ flumen Bagrada labitur: ad quod caſtra habentes Romanos improvifa peſtis & damno non mediocri, & terrore adhuc majore perculit. Magnitudinis enim portentofæ ſerpens aquatum profectos milites invaſit; terriſque & nequidquam repugnantibus multos ingentis oris hiatu forbuit: alios ſpirarum voluminibus & caudæ verbere obrivit: nonnullos ipſo peſtilentis halitus afflatu exanimavit: tantumque negotii M. Regulo faceſſere potuit, ut totis viribus cum eo de poſſeſſione annis fuerit dimicandum.

XVI. Quod ubi cum jactura militum fiebat, neque vin- ci aut vulnerari draco poterat, duriffima ſquamarum lorica, quidquid telorum ingereretur, facile repellente; confugiendum ad machinas, advectiſque balliſtis & catapultis velut arx quædam munita, dejiciendus hoſtis fuit. Poſt aliquot jactus in vanum emiſſos ingens faxum ſpina dorſi perfracta, vigorem impetumque formidabilis monſtri reſolvit. Sic quoque difficulter confectum eſt, tanto cum horrore legionum & cohortium, ut *ſe oppugnare Carthaginem,*

§ XIV. Liv. Epit. 18. Front. Strat. 4, 33. Val. Max. 1, 8, 19. Senec. ad Helv. Dio ap. Valeſ. Polyb. § XV. Zonar. Flor. 2, 2. Liv. Epit. Val. Max. 4, 4, 6. Oroſ. 4, 8. Tubero ap. Agell. 6, 3.

*quam alteram talem bestiam, malle faterentur.* Neque diutius ibi morari castra potuerunt, quin tabo infectas aquas, & omnem circa regionem foetore jacentis pestifero afflatam fugerent: non sine rubore aliquo humanæ superbiæ, quæ non raro viribus suis nihil negatum esse, stolide putat. Exercitum certe Romanum, imperatorem M. Regulo, terra marique victorem unus anguis & vivus exercuit, & interfectus submovit. Quare nec puduit Proconsulem, hujus etiam hostis spolia Romam mittere, timorisque sui magnitudinem & victoriæ gaudium publico monumento fateri. Corium enim belluæ detractum in Urbem devehendum curavit: quod centum viginti pedes longum fuisse dicitur: & in templo quodam suspensum, ad Numantini usque belli tempora duravisse.

XVII. Motis a Bagra da castris, versus urbem Adin exercitum duxit consul, obiter expugnatis vastatisque oppidis & castellis, quæ in itinere occurrerant. Ad Adin vero, quam capere majoris erat operæ, vineis machinisque adhibitis iusta instituta est obsidio. Ad quam prohibendam Pœni duces cum celeriter accurrissent, in colle quodam castris quidem Romanis imminente, sed impedito silvofoque, confederunt. M. Regulus ingenio fitus & genere copiarum hostilium æstimato, cum illis peditem suo nequitiam comparandum, sed in elephantis & equitibus spei plurimum esse videret, ceterum eam virium partem in aperto campo formidabilem futuram, iniquitate locorum excludi, inutilemque reddi; stultitia hostium sapienter usus, priusquam errorem suum animadvertere ac corrigere possent, in suis castris eos oppugnare statuit. Quapropter hortatus milites, & cetera, quæ suggerebat ratio, diligenter exsecutus, nondum certa luce castris egreditur, aciemque in adversum collem, ubi Carthaginensium erant castra, erigit.

XVIII. Pœnos ipsa primo Romanorum audacia territabat, quod numero pauciores ex inferiore loco tantas copias

§ XVI. Plin. 8, 4. Oros. Silius 1. 6. Val. Max. Zonar. Polyb.  
§ XVII. Zonar. Polyb.

in munimentis suis aggrediebantur : deinde major inde tumultus fuit, quod equites & elephanti, unde plurimum auxilii speravissent, non modo nullam utilitatem, sed ultro perturbationem & impedimentum, afferebant. Ipsum quoque tempus augebat trepidationem, quod inopinantes & magnam partem adhuc sopitos Romanus invaserat. Itaque multi suis in cubilibus trucidati sunt : alios trepida fuga palantes, & quo se reciperent nescios, insidiæ secundum vias collocatæ exceperunt. Mercenariis tamen Pœnorum Hispanis Gallisque raptim instructis, & extra vallum alacriter certantibus, in ancipiti aliquamdiu victoria fuit, fugiente jam legione prima. totusque Romanorum exercitus impulsus foret, ni cohortes, alia ex parte circumgredi jussæ, hostem cedentibus instantem opportune a tergo aggressæ forent. tum etiam qui paulo ante locum deseruerant, recolligi, & ad repetendam pugnam animari potuere. Sic utrinque impetitus hostis, cum aliquamdiu fortissime restitisset, cedere coactus est.

XIX. Quod ubi fieri Carthaginienses videre, continuo se ejiciunt castris, & contento studio fugiunt. Et elephantis quidem equitibusque, postquam planiora loca attingere, facilis & tutus receptus fuit : peditatum paulo longius persecuti victores, ad castra diripienda redierunt. Hac pugna Pœnorum septemdecim millia caesa, quinque capta referuntur, cum elephantis duodeviginti. Eventus hujus prælii non modo totam circa regionem, sed etiam longius diffitos populos Romanis conciliavit, diebusque non ita multis oppida circiter octoginta in fidem venere. Unde Pœnos in magnas angustias redactos propemodum exanimavit capiti a Regulo Tunetis nuntium, urbis tam munitæ, & quæ ad duodecimum a Carthagine lapidem posita, ne occultum quidem hostibus lineret esse, quidquid ibi fieret, tum ad ipsam urbem, tum ad mare propinquum patente prospectu.

XX. Neque solum Romani belli terror circumsteterat,

§ XVIII. Zonar. Polyb. § XIX. Oros. 4, 9. Eutrop. 1, 2. Zonar. Liv. 30, 9.

sed Numidæ quoque veteribus odiis, occasione nova stimu-  
lanti arma moverant; vastandoque & urendo Punicos agros  
plus etiam terroris & cladis, quam Romanus hostis, infere-  
bant. & in urbem undique confugientes rustici non con-  
sternationem modo maximam, sed jam famem quoque fa-  
ciebant: absumente magnam annonæ vim tanta mortalium  
multitudine, & reliquam adhuc copiam avaritia domino-  
rum occultante, qui ex calamitate publica quæstum au-  
cupantes, cum ipsa rerum necessariarum penuria pretium  
earundem auctum iri quotidie sperabant. Unde factum est,  
ut pronis auribus legatio M. Reguli acciperetur, qui belli  
confecti titulum ambiens, timensque, ne quis Roma suc-  
cessor missus eum interciperet, Pœnos ad pacem hortabatur.

XXI. Itaque missi sunt ad eum quidam ex principibus:  
sed cum a M. Regulo, qui se certam in manu habere vic-  
toriam putabat, intolerabiles conditiones ferri viderent,  
infecto negotio discesserunt. *Sicilia enim & Sardinia tota  
cedere, Romanis captivos gratis reddere, suos pecunia redi-  
mere, belli sumtus omnes restituere, prætereaque vœstigal annuum  
pendere, jubebantur. His alia, neque minus molesta, adde-  
bantur: ut eosdem cum Populo Romano hostes amicosque ha-  
berent: ne navibus longis, præterquam una uterentur: Roma-  
nos autem, quotiescunque significatum esset, triremibus instructis  
quingenta juvarent.* Obstupefactis ad hæc legatis, & ut  
mitiora imperaret orantibus; vincendum, aut vincentibus ob-  
temperandum esse, respondit. Quibus in urbem relatis exacer-  
bati Pœni, quanquam rebus admodum accisis uterentur,  
omnia tamen prius pati decreverunt, quam eas admittere  
conditiones, quas nihil aliud nisi captivitatem civitatis suæ  
servitutemque esse arbitrabantur. In eo statu rerum naves,  
quæ ad conducendum militem in Græciam missæ fuerant,  
collecta mercenariorum haud exigua manu redierunt.

XXII. In his Xanthippus quidam erat genere Lacedæ-  
monius, qui patriæ disciplinæ, quam edoctus a pueritia  
excellenter fuerat, usum rei militaris haud inferiorem adjun-



xerat. Ille rebus, quæ eousque gestæ erant, intellectis, & reliquo Punicarum copiarum, elephantorum, equitum apparatu cognito, non dubitavit jactare palam, *Carthaginienses non a Romanis, sed a semetipsis victos esse, per imperitiam ducum, qui viribus suis uti nescivissent.* Hoc sermone celeriter vulgato, vocatus a magistratibus Xanthippus, rationes sententiæ suæ promit tam evidentes, ut prope manibus contrectari possint: *in faciundis itineribus, in castris ponendis, in præliis committendis, loca prorsus incommoda deligi consuevisse, docet. si suum consilium audiant, non incolumitatem modo, sed etiam victoriam* promittit. Probant hanc sententiam cum ceteri civitatis principes, tum ipsi duces: & laudabili modestia patriæ saluti suam existimationem posthabentes, homini peregrino deferendum imperium exercitus sui consentiunt consciscuntque. Xanthippus accepta potestate quotidie milites ex urbe educens, campestribus exercitiis ad servandos permutandosve ordines, ducumque jussa celeriter exsequenda adsuëfacit: copias hanc disciplinam cum priore comparantes admiratione sui, fiduciaque melioris deinde successus implet: tota civitas recreata ex rebus fere desperatis ad expectationem futuri erigitur.

XXIII. Hanc alacritatem omnium ubi duces vident, animo & ipsi recepto in hostem iterum ducere constituunt: suosque uti tempus postulabat adhortati, cum duodecim fere millibus peditum, quatuor equitum, & elephantis non multo paucioribus centum adversus Romanos progrediuntur. Romanos unum illud movebat, quod instituto priore mutato Pœnos, vitatis editioribus asperisque locis, per plana camporum videbant incedere: sed perpetua felicitate in superbiam elati, vinci solitas copias ductoremque Græculum despiciebant. Neque Regulus intactus erat hoc fortunæ obsequentis blando veneno. igitur cum se maternas Pœnorum vires, cum pedestres fregisse, oppida ferme ducenta, hominum ad ducenta millia cepisse, urbemque ipsam Punicam variis incommodis laborantem cogi ad dedi-

tionem posse reputaret; pacem tolerabili conditione petentibus negavit, scripsitque Romam, *portas Carthagini a se metu obsignatas teneri*. Ita magnos etiam animos sapius in secundis rebus moderatio, quam in adversis constantia, deferuit.

XXIV. Ceterum Pœnis castra loco æquo habentibus, M. Regulus, cui in peditatu plus roboris, eoque montosa & ardua loca sectanda erant, nihil referre virtutis putans, ubi dimicaret, non timuit & ipse campo se credere, etiam ad majorem ostentationem fiduciæ. fluvio, qui medius fuerat, transmissio: passuumque fere mille ducentorum intervallo ab hoste constitit. Xanthippus Romani ducis imprudentiam conspicatus, *hoc illud tempus esse, quo promissa sua Carthaginiensibus exsolveret*, testabatur. quod enim Romanos ex itineris labore defatigatos, qualibus optavisset locis, nactus erat: suam fore victoriam non dubitabat. tempus etiam opportunissimum ad pugnam videbatur; quod præcipiti jam in vesperam die, Afris locorum gnaris, sive vincerentur, effugium per noctem facilius erat futurum; sive vincerent, nihil ad victoriam persequendam impedimenti. Consultantibus ergo Pœnis, quid agendum esset, *deorum hominumque fidem* invocans, *ne tam præclaram occasionem perderent*, ad prælium capeffendum omnes impulit, eo facilius, quod ipsi milites Xanthippi nomen inclamantes, insolita alacritate hostem ultro poscebant.

XXV. Summa igitur rei Spartano permissa, educit ille exercitum, instruitque hoc modo: Phalanx Carthaginiensium, in qua robur erat peditatus, in subsidiis constituitur: huic, spatio relicto conveniente, prætexuntur elephanti, simplici serie latitudinem phalangis exæquant. in utroque cornu expediti cum equitibus, post hos in dextro, mercenariorum gravis armatura collocatur. Acie sic ordinata velitis imperat, uti telis emissis se recipiant in apertos ad hunc usum suorum ordines: & hoste jam a validioribus

§ XXIII. Zonar. Auſt. de Vir. ill. c. 40. § XXIV. Zonar. Ap-  
pianus. Polyb.

excepto, rursus crumperent a cornibus, Romanorumque cum adversa phalange pugnantium latera repente incurfarent. Regulus contra copiis ex more instructis, cum elephantos in prima Pœnorum acie stantes conspexisset, consilium celeriter capit: leviter armatos in frontem adducit, in subsidiis locat densos legionum ordines, equites in cornua diffunduntur. sic acies in altitudinem firma, sed multo quam fuerat angustior.

XXVI. Ita cum & ab elephantis & ab equitibus hostium periculum esset; adversus belluarum quidem irruptionem recte provisum, sed in locis patentibus spatium equitatus hostium datum, ut circumfundi contractis ordinibus posset. Proelium ab elephantis cœpit, quos in adversum agmen agi Xanthippus iussit, confestimque Romani clamore sublato arma pullantes contulerunt gradum. Ab equitibus etiam utrinque in cornibus pugna commissa. sed longe hic minore Romanorum numero, cum sustineri vis hostium non posset, cito fuga facta est. At e peditibus qui sinistri adstiterant, sive elephantorum occursum vitaturi, sive faciliorem sperantes de mercenariis victoriam, horum in aciem irruunt, versosque in fugam ad vallum usque castrorum hostilium persequuntur.

XXVII. Non æque facile reliquis adversus elephantos certamen fuit: quorum intolerabili mole dissipabantur ordines, proterebantur armati, agmina tota tanquam ruina sternebantur. Sustinebat tamen incumbentes ipsa aciei densitas, aliisque alii substituti ordines: donec simul locis omnibus laborari cœptum: dum extremi quique ab equitibus circumventi; priores, quotquot jam elephantorum aciem perruperant, ab integra & instructa phalange hostium, & assultantibus utrinque velitibus excepti, passim trucidantur. Neque minus cædis in ipsa fuga fuit. per aperta loca & plana effusos elephantum Numidaeque equites immissi straverunt. M. Regulus cum militibus fere quingentis vivus in manus hostium venit. ex toto exercitu non amplius duo.

millia hominum, qui mercenarios loco pepulerant, festinato abitu Clupeam incolumes præter spem evaserunt. Romanorum fociorumque millia circiter triginta sunt interfecta. De Punico exercitu ceciderunt non multi, præter octingentos ex mercenariorum agmine, quod adversus finistrum hostis cornu dimicaverat.

XXVIII. Tanta re perfecta, cum exercitus spoliis caesorum, & imperatore Romanorum capto superbus Carthaginem reverteretur; obviam effusa urbanorum multitudo; alii in vicis aut domibus consistentes incredibili cum voluptate, spectaculo, quale paulo ante vix optare ausi essent, fruebantur: vix tantæ felicitatis vel gaudium, vel etiam fidem capientibus animis. Qui enim modo proxime in desperationem adducti non regionem tantum suam, sed urbem ipsam, aras, focos amittere timuerant: ii tantam rerum commutationem subito factam esse, quanquam viderent, vix audebant credere. Sed maxime in ipsos duces intenti omnium oculi animique erant: cum modo Xanthippum, modo Regulum intuentes, hujus æstimatione magnitudinem sui imperatoris metirentur extollerentque: *quantum illum esse virum oporteret, qui ducem acerrimum, fortunatum bellatorem, victorem superbum, hostem implacabilem, terrorem pestemque magnæ Carthaginis, exercitu florentissimo, existimatione amplissima, libertate denique ipsa tam facile tamque celeriter exuisset?*

XXIX. Augebat admirationem habitus viri, quod sub exiguis membris, aspectuque non nimis decoro, ingentem virtutem occultaverat. Quibus ex rebus multum Xanthippo gloriæ, sed nec minus invidiæ nascebatur. Quo in monstro profligando non minore prudentia, quam in bello conficiendo usus, quanquam diuturnus ipsi factorum suorum fructus Carthagine deberetur, relinquere spes ancipites & insidiarum plenas, & ante mutationem animorum aut fortunæ domum regredi, statuit. Hoc enim plerumque ingenio homines agunt, ut patriæ studium in ore, priva-

§ XXVII. Polyb. Front. Strat. 2, 2. Flor. 2, 2. Eutrop. § XXVIII. Diod. l. 23. ap. Valef.

tum in animo magis habeant : igitur quamdiu quidem honores & divitias incolumi civitate quærere tuerique possunt, amorem illius ardentissimum præferunt : ubi periculum est, ne ad alios ob magnam virtutem & eximia merita hæc concedant, longe malunt decesse, qui publicæ rei prosint, quam esse, qui obsint suæ.

XXX. Donec autem alios æquiparare posse putant, occultius atque remissius invident ; cum vero longissime relictæ, comparatione propinqua se premi sentiunt, opesque & magistratus, quos ipsi sitiebant, penes alios esse : quod virtute desperarunt, per calumniam & criminationes meliorum consequi student. Ita fit, ut optimo cuique plures inimici sint, pluresque insidiæ struantur : sed adversum has homini indigenæ in propinquis & amicis suis præsidium est : peregrinus hoc auxilio destitutus, malitiam degenerum animorum acuit ipsa facilitate nocendi, quod insidiantibus magis expositus, vel everti citra maximum laborem potest, vel citra periculum offendi. Xanthippum igitur hæc sagacissime perpendisse, quæ secuta sunt, evidenter affirmarunt. *Abnavigantem enim per quosdam a Carthaginiensibus immixtos submersum serunt, post acceptum beneficium illius auctorem gravatis exosisque, quo extincto famam etiam peregrina virtute servatæ civitatis exspiraturam crediderint.*

XXXI. Alii de fato Xanthippi non eadem ; sed *Furtivam* tamen perfidiam arguunt. *datam enim discessuro navem* & rimarum plenam, *sed ad speciem firmitudinis recens pericula*. ceterum virum nequaquam decipientibus facilem, animadversa fraude, dissimulanter aliud navigium conscendisse, ereptumque periculo esse. Non minoris perfidiæ, sed ob numerum peremptorum crudelitatis odio superior, iisdem temporibus perpetrata res traditur. Mercenarios enim ob navatam insigniter operam præmia paulo tumultuosius efflagitantes, in naves imposuerunt, facta spe alio quodam loco tributum ipsis iri, quod peterent. Sed a præfectis navium, qui-

bus id negotii datum clam fuerat, in deserta quadam insula expositi relictique, cum omnis humanæ opis egenos, sine alimentis, sine navibus, neque manere fames, neque abire pelagus sineret, fœdo horrendoque genere mortis, extabuerunt.

XXXII. Apud alios auctores facinus hoc ad superiora tempora referri reperio, quibus Syracusani bellum cum Pœnis habuere: nomenque mansisse infami deinceps insulæ, ut Ostodes (ossuariam possemus dicere) vocaretur. Ea post Liparam, occidentem versus in alto mari sita est. Quæ facta quomodocunque aut quocunque tempore evenerint, a cetera Pœnorum immanitate nihil abhorrens habent. Neque igitur mirandum est, qui in socios adiutoresque suos hoc animo fuerunt, si adversum hostes iidem se gesserunt inclementius. Quanquam profecto ceteros captivorum fatis tolerabiliter habuisse feruntur: quod & ipsi multos ex suis in potestate Romanorum esse sciebant, quos permutatione instituta cupiebant recipere.

XXXIII. Sed adversus M. Regulum neque abscondere iram, neque moderari potueré, quin omnibus modis vexarent virum angerentque. cibum enim præbebant, non qui vel voluptatis aliquid afferre sensibus, vel vigoris corpori posset; sed qui tenuissima refectio spiritum infelicis ad producendas ejus misérias detineret: at acerbiores erant contumeliæ perpetuæ, inter quas consueverant creberrime elephantum aliquem adducere, cujus barritu exterritus, & invisa specie tortus, nec animo nec corpore posset requiescere. postremo ita maceratum exagitatumque in carcerem publicum conjecerunt. Quæ postquam audita sunt Romæ, non dolore modo ingenti, sed etiam metu, civitatem perculerunt. Timebatur enim, ne Carthaginienfes acerbitate calamitatum suarum, & victoriæ fiducia stimulati, reddere vicem hostibus, & quid malorum perpessa Carthago foret, Romanæ urbi persensiscendum dare cuperent, auderentque.

XXXIV. Quare consulibus mandavit Senatus, *ut Italiam*

quam possent diligentissime munirent praesidiis; ipsi cum navibus quamplurimis Siciliam, inde, si videretur, Africam adeuntes, Pœnos ab Italia petenda propiore metu dislincerent. Ceterum Carthaginiensibus antiquior cura fuit civitates a Romanis occupatas recipere, Afros, qui a se ad hostes desciverant, mulctare, in rebellione persistentes ad obsequium armis cogere. Sed Clupea quidem ab Romanis strenue defensa est: in Numidia, aliisque populis Africæ, magnum magis bellum, quam difficilis victoria fuit. Interea cum in Italia validam adornari classem comperissent, omiſſa quam obsederant Utica, naves veteres reficere, novas exædificare, ad prohibendos Africo litore Romanos omnia studiose parare cœperunt. At consules incredibili diligentia tantum effecerant, ut æstatis initio naves jam trecentas quinquaginta instructas ornatasque haberent. Quibuscum in Siciliam profecti, postquam ibi satis tuta omnia, nihilque mali, præterquam quod in expectatione & metu fuerat, reperissent; praesidiis ubi maxime opus erat relictis, cum cetero exercitu protinus Africam versus contenderunt.

XXXV. Sed tempestate Cossuram delati, (inter Africam & Siciliam, qua Lilybæum promontorium est, posita est insula) vastatis agris, & urbe ejusdem nominis capta, praesidium imposuerunt. Inde ad Hermæum promontorium perrexerunt, quod medio inter Carthaginensem & Clupeam situ, alterum Carthaginiensis sinus cornu claudit. Eo loco cum Pœnorum naves occurrissent, acrique certamine duas inter classes dimicaretur, auxilio venire suis a Clupea Romani, momentumque hoc, paribus eoque rebus, ad victoriam fuit. Pœni naves quatuor supra centum submersas, triginta captas ab hostibus, militum ad millia quindecim amiserunt: ex Romanis mille centum periere milites, cum navibus novem. Tum Uticam profecta classis, expositusque miles juxta ipsam civitatem castra munivit: venerunt eodem Carthaginienses copiae, quas Hannones duo ducebant: ita pedestri quoque prælio res gesta, deteriore Pœnorum fortuna,

qui hic quoque circiter millia militum novem perdiderunt.

XXXVI. Capti sunt inter hos aliquot viri nobiles, servatique a consulibus, ut per hos M. Regulus, & qui cum eo similem casum subierant, redimerentur. Deliberatum inde est de præsentibus: magnaque spes fuerat Africam retineri posse. verumtamen regione quaquaversum vastata, cum famines timeretur, abduci Romanos, qui Clupeam tutati fuerant, Siciliamque repeti placuit. Avecta est una ingens praeda, quam in urbem Clupeam M. Reguli rebus adhuc prosperis comportatam victoriæ recentes cumulaverant. Perventum erat in Siciliam tuta navigatione, nimiumque felices fuissent consules, si felicitati suæ modum statuere didicissent.

XXXVII. Sed quia, dum in Italiam revchuntur, eadem opera quasdam urbes Siciliae maritimas recipi posse putabant, nequidquam obtestantibus navium gubernatoribus, *ne inter Orionis & Canis exortum, quæ infestissima navigantibus sunt sidera, obversum Africæ litus, intutum & importuosum præterveherentur*, tantam tempestate cladem perpeffi sunt, ut vix aliud in hoc genere proditum sit exemplum illustrius. denique de navibus trecentis sexaginta quatuor, vix octoginta, onerum jactura facta, fervari potuerunt. hippaginum quoque, ceterorumque variæ formæ navigiorum numerus haud minor periit: ut ita cadaveribus hominum animaliumque, & fractis navium tabulis, a Camarinensium ora, ubi pestis illa classem invaserat, Pachynum usque litus omne compleretur. Tam dura in forte non leve solatium afflictis humanitas Hieronis regis attulit: qui benigne exceptos, vestibus, cibo, naviumque armamentis adjuvando, Messanam usque deduxit incolumes.

XXXVIII. Sed Carthaginienfes hoc fortunæ beneficio non segniter usi, Cossuram insulam urbemque receperunt: & sine mora in Siciliam transjicientes, Agrigentum duce Carthalone circumfessum, quia non subveniebatur, exci-

§ XXXV. Strab. l. 17. Eutropius. Oros. Polyb. Zonar. § XXXVI. Polyb. 1, 36. Eutrop. § XXXVII. Eutrop. Diod. Polyb.



derunt, dirueruntque. multi hic mortales interfecti capti-  
ve: ceteri, quibus per mediterranea loca in ditionem Syra-  
cusanorum effugium fuit, in vico juxta fanum Jovis, Olym-  
pium vocant, confedere. Neque longe aberant a spe to-  
tius insulæ recuperandæ Pœnorum duces, nisi audito Ro-  
manorum in reparanda classe studio, confirmati socii forti-  
bus animis præsentem metum tolerassent. Tanta enim di-  
ligentia huc incubuerant consules, ut vix credibili cele-  
ritate, intra unum trimestre naves novæ centum viginti  
compingerentur. Cum his Cn. Cornelius L. F. C. N. Sci-  
pio Asina, & A. Atilius A. F. C. N. Calatinus iterum consu-  
les, impositis ex novo delectu strenuis militibus, primo  
quoque tempore solvere jussi. ✕

XXXIX. Magnum inconstantis fortunæ documentum  
Cn. iste Cornelius fuit: utili ad fortiter tolerandas adversi-  
tates exemplo. quippe cum septimo ante anno consul in-  
fidiis Pœnorum circumventus, captivitatem, vincula, car-  
cerem, quidquid in humanis rebus aut sordidissimum, aut  
miserrimum habetur, pertulisset; non cetera modo suæ  
dignitatis ornamenta, sed etiam ipsum illud consulare fa-  
stigium, fascesque non sponte relictos, tanto majore gau-  
dio recepit, quanto acerbior casu perdiderat. Consules  
Messanam transgressi, assumtis quas ibi repererant navibus,  
(eæ superioris ferme naufragii reliquæ erant) cum navibus  
ducentis quinquaginta ad ostium amnis Himæræ accesser-  
unt, oppidumque Cephalœdium ad duodevicesimum inde  
milliare in eodem litore situm, prodentibus quibusdam re-  
ceperunt. A Drepano, nam illuc cursum flexerant, cum  
neque statim potiri loco potuissent, & obsidionem agitan-  
tibus Carthalo suppetias urbi veniret, propolito frustrati  
recesserunt.

XL. Nec ideo segniores ad audendum facti, majorem  
aliquanto rem feliciter confecere. Panorum enim directo  
cursu, Punicæ ditionis principem urbem, & occupato por-

§ XXXVIII. Zonar. Diodor. Polyb. § XXXIX. Val. Max. 6,  
9, 11. Polyb. Diodor. Cluv. Sicil. ant. 2, 4.

tu, juxta ipsos oppidi muros fecerunt exscensionem, recusantesque deditionem Panormitanos fossa valloque circumdare instituerunt. Favebat labori natura regionis, materiem copiosam arboribus passim enatis subministrans. Itaque cito perfectis operibus, cum oppugnationem strenue urgerent, machinarum ope turrim ad mare sitam dejecerunt: milesque per ruinas irrumpens multa cum hostium cæde urbem exteriorem, quæ nova dicebatur, expugnavit. Neque vetus urbs diu morata est: cum enim magna in eam multitudo confugiens, plus ex urbe nova terroris quam commeatus intulisset; brevi dejectis periculi cogitatione animis, & fame jam imminente, legati venerunt ad consules, corporibus exceptis omnia dedituri. Non acceperunt consules, gnari res obsessis angustas esse, nisi pretio statuto redimerentur. Pactæ sunt in capita minæ duæ: redempta capitum millia quatuordecim. cetera multitudo, millia ferme tredecim, cum reliqua præda venierunt.

XLI. Clara ea victoria fuit, magnæque & subitæ utilitatis. multa enim ejus oræ oppida, quædam etiam longius distita, Pœnorum ejectis præsidiis, societatem Romanam complexa sunt; principio ab Jetinis orto, secutisque statim Soluntinis, Petrinis, Tyndaritanis, aliisque. Rebus ita gestis præsidioque Panormi relicto Messanam consules, deinde Romam redierunt. Pœni abeuntibus insidiati, naves aliquot onerarias, cum pecunia quam vehebant, abstraxere. Romæ deinde continui triumphi duo spectati. Duxerunt prioris anni consules, prorogato imperio, de Cossurenribus & Pœnis, navalem utrumque. Prior Ser. Fulvius a. d. XIII Kal. Febr. triumphavit: M. Æmilius postridie. Annus, quem ab Urbe condita quingentesimum numerant, Africanam expeditionem habuit, sed inanem & sine fructu. Cn. Servilius Cn. F. Cn. N. Cæpio, C. Sempronius Ti. F. Ti. N. Blæsus consules in Siciliam trajecere. ubi tentato frustra Lilybæo, in Africam direxere cursum, ducentis sexaginta navibus instructi. Litus hi legentes Africæ, multique lo-

cis exscensionem facientes, oppida multa ceperunt, prædaque magna potiti sunt.

XLII. Majoris tamen rei nihil geri potuit, quod commodissimorum quorumque locorum aditu prohiberentur, occurrentibus ubique Pœnis, qui minus jam impedimentorum & plus animi habebant, receptis, quæ M. Regulus tenuerat, punitisque defectoribus. Hamilcar enim Numidiam Mauritaniamque pervagatus, tractum eum omnem perpacerat, imperatis pœnæ loco mille talentis argenti, & viginti millibus boum, punitisque principibus, qui favisse Romanis arguebantur, quorum ad millia tria patibulo affixi sunt. Neque tamen hostium occurfus, quam ignorantia locorum, & cæcæ sub aquis insidiæ, formidabilior Romanæ classi fuit. Subvectos ad Meningem, Lotophagorum insulam, quæ minori Syrti vicina est, recedente maris æstu vadosa loca tenuere: donec jactura levatas naves, & extrema omnia metuentes, præter spem reversi fluctus explicuerunt.

XLIII. Ita non impune pestem evidentissimam elapsi, & loca tam infesta horrentes, sine mora fugientium in speciem vela fecerunt: ignari non minus ipsis superesse periculum, quod adirent, quam quod evitaerant. Et Panormum quidem redeuntibus innoxium iter fuit. Ceterum Italiam petituros, dum Palinuri promontorium flectunt, quod a Lucanis montibus in mare procurrat, magna tempestatis vis adorta, longas naves supra centum sexaginta, cum hippaginibus & onerariis multis, profundo merfit. Quare continuis hoc genus cladibus mœsta civitate, cum imperium maris ipsæ etiam undæ ipsique venti Romano negare viderentur, decrevere Patres, ne amplius sexaginta navium classis, ad præsidium Italiæ, commeatusque exercitui, qui in Sicilia esset, subvehendos haberetur. Alteri tamen consulum C. Sempronio calamitas ista non obstitit, quin triumphum de Pœnis ageret Kalendis Aprilibus, decimo post

§ XLI. Polyb. Zonar. Marm. Capitol. § XLII. Zonar. Oros. 4, 9. Appian, ap. Urs. Polyb.

die quam de iisdem Cn. Cornelius Procos. triumphasset.

XLIV. Censores eo anno Romæ fuerunt: sed mortuo in magistratu L. Postumio L. F. L. N. Megello, qui idem præturam tum gesserat, etiam D. Junius D. F. D. N. Pera, censura se abdicavit. Æstate vero proxima C. Aurelius L. F. C. N. Cotta, P. Servilius C. F. Cn. N. Geminus, consules, in Siciliam profecti, inter alia quædam oppida, etiam Himeram fluvio, cui adjacet, cognominem obsidione receperunt; sed vacuum incolis, quos noctu Carthaginenses eduxerant. Juvit tamen loci non ignobilis possessio, quæque deleta sic esset ignominia, quam Romani nuper ad eam urbem incurrerant, occupandarum Thermarum (nam & hoc ejusdem urbis nomen celebratur) certa spe per militarem avaritiam excidendo. Quidam enim ex captivis, cui Thermis custodia portæ cujusdam commissæ fuerat, ut proditione urbis libertatem redimeret pactus dimissusque, hora constituta missis ad recipiendam urbem militibus portam aperuerat. Horum præcipui cum ingressi essent, prædæque potioem partem avertere cuperent, *portam obsideri* jubent, *neminique præterea suorum aditum dari*. Quod ubi factum est, Thermitanique strepitu exciti ad arma concurrerunt, neque resistere ob paucitatem suam, neque adjuvari a suis, quos arcuerant, valentes, dignum stultitia sua exitum fecere, ad unum omnes interfecti.

XLV. Thermis Himerensibus in potestatem redactis, C. Aurelius consul, Liparam, quæ jam aliquoties a prioribus ducibus tentata irritò conatu fuerat, obsidere cogitans, ex Romanis copiis, quæ per universam Siciliam erant, plurimos fortissimosque milites delegit: eosque, acceptis ab Hierone navibus, in Liparæorum insulam trajecit. Unde cum ad auspicia repetenda Messanam rediturus esset, P. Aurelium Pecuniolam agnatum suum (apud alios Q. Cassium tribunum militum lego) obsidioni præfecit, opera tueri diligenter, de cetero abstinere pugna jussim. Sed is post-

§ XLIII. Solin. c. 30. Diodor. Zonar. Eutrop. Polyb. Fasti Capitol. § XLIV. Polyb. Diodor. Orosius.

habito consulis mandato, suæ gloriæ cessurum ratus, si per absentiam illius capta Lipara foret, ad oppugnandum moenia duxit; non impunita temeritate. nam neque expugnare urbem potuit, & multis amissis, eruptione in recedentem facta, aggere præterea incenso, castra ægre tutatus est. Sed reditu C. Aurelii cum mutata fortuna esset, magna hominum cædes in urbe capta est edita: deinde ad tribuni poenas itum, quem adempto militiæ gradu, virgis cædi consul, & stipendia inter gregarios pedites facere coegit; memorabili severitate, cujus & alia quædam exempla in eodem illo consulatu C. Aurelius edidit.

XLVI. Recepta Lipara, Timasithei, qui locis istis quondam præfuerat, posteris datum, ut immunes a tributis & vectigalibus essent. adeo ne tempore quidem intercideret sinebat gratissimus populus veteris beneficii memoriam, quod Timasitheus craterem aureum Delphico Apollini dono a Romanis missum, quem piratæ Liparæi ceperant, legatosque, qui eum deferebant, salvos & in Græciam & deinde Romam reducendos curaverat. Erctam deinde, castellum munitissimum, Romani cum peditum quadraginta millibus, & equitibus mille obsidere aggressi, neque capere potuerunt, neque cum Pœnis ausi sunt collatis signis configere. Nam ex M. Reguli casu tantus elephantorum terror Romanas legiones incesserat, ut ex eo tempore præliorum aleam fugerent. Sæpe in Lilybætano agro, sæpe in Selinuntio instructis adversum hostes ordinibus steterunt, vix aliquando passuum sexcentorum intervallo diremti: sed neque pro solita prius alacritate prælium incipere, neque omnino in plana se demittere tutum rati, loca ardua & inaccessibleia sectabantur.

XLVII. Unde Carthaginienfes majorem in modum confirmati, cum & pedestri exercitu jam confiderent, & mari quoque majores a tempestate Romanis, quam ex adversis præliis sibi accidisse clades judicarent, etiam decreto Se-

§ XLV. Zonar. Front. Strat. 2, 7, 4. § XLVI. Liv. 8, 28. Diodor. Polyb.

natus, de classe omittenda, cognito: recipi Siciliam posse speraverunt, si novæ eo terrestres maritimæque vires mit-  
terentur. Sed maxime pecuniarum inopia premebat: im-  
pensis belli tam diuturni omnes & olim reconditas, & quæ  
quotidie cogeantur, opes haurientibus. Ergo legatis ad  
Ptolemæum Ægypti regem, quocum amicitia ipsis erat,  
missis, duo millia talenta pecuniæ mutue petiverunt. Rex,  
qui Romanos, & ipsos amicos sociosque suos, offendere  
nollet, pacis auctorem atque pararium utrisque sese obtu-  
lit. Sed re frustra tentata, petitionem suam Pœnis dene-  
gavit, *amicos adversum hostes, non adversum alios amicos sibi  
adjuvandos videri præfatus*. Sub ea tempora Romæ Tib. Co-  
runcanus primus ex plebe Pontifex Max. factus est.

XLVIII. Censores is quoque annus habuit, quod munia  
magistratus ejus, altero censore mortuo, altéro abdicante,  
peragi anno superiore non potuerant. M. Valerius M. F.  
M. N. Maximus Messalla, P. Sempronius P. F. P. N. So-  
phus lustrum septimum atque tricesimum condiderunt. eo  
censa sunt capita civium ducenta nonaginta septem millia,  
septingenta nonaginta septem. Tristis hæc & severa censura  
fuit: in Senatu recensendo, tredecim moti: juvenes qua-  
dringenti ademptis equis publicis ærarii facti. hoc quidem  
C. Aurelii consulis querela effecerat, coram censoribus ar-  
guentis, *quod in Sicilia, cum necessitas postularet, ad opus  
jussu accedere, imperium detrectavissent*. Consul ne hac quidem  
îpretæ disciplinæ ultione contentus, etiam apud Patres ob-  
tinuit, ne eis emerita jam stipendia solverentur. Neque  
minus, ut illa fuerunt tempora, ob vigorem disciplinæ in-  
intente custoditum, quam ob res gestas, decretum ei trium-  
phum opinor, quem de Pœnis & Siculis a. d. Idus Apri-  
les egit.

XLIX. Proximus deinde annus plus minarum, quam  
eventuum habuit. nam ex magnis utrinque apparatibus cum  
mutuo metu tenerentur, altas nullo majore negotio me-

§ XLVII. Zonar. Appian. ap. Fulv. Liv. Epit. 18. § XLVIII.  
Tab. Rom. Val. Max. 2, 9, 7. Front. Strat. 4, 1.

moranda transiit. L. Cæcilius L. F. C. N. Metellus, C. Furius C. F. C. N. Pacilus, consules, legionibus in Siciliam deportatis, neque laceraverunt ipsi hostem magnopere, nec ab eo lacerati sunt, quanquam novus Pœnorum imperator Asdrubal cum ducentis navibus, elephantis centum quadraginta, peditumque & equitum millibus viginti recens advenisset. Ea res Senatum denuo de classe paranda consultare coegit: quippe trahendo in longum bello rempublicam exhauriri sumtibus, neque post M. Reguli cladem suis legionibus pristinum vigorem mansisse; & ut terra prosperrime res succederet, tamen prohiberi Sicilia Pœnos non posse, donec imperium maris penes illos esset, haud obscure videbant. Ergo rursus ad priora consilia revoluti, victoriæ spem in navibus habere, illasque summa cura reficere, aut ædificare cœperunt.

L. Interea cum L. Metello Panormi relicto, C. Furius ex Sicilia domum reversus comitia consularia habuisset, C. Atilius M. F. M. N. Regulus, L. Manlius A. F. P. N. Vulso, facti: uterque iterum. His mandata classis instruendæ conscribendorumque sociorum navalium cura; L. Metello prorogatum imperium, isque proconsole bellum in Sicilia administrare iussus. Asdrubal alterum ex Romanis ducibus, cum dimidia parte virium abivisse cernens, secumque reputans jam a longo tempore, quanquam instructæ ex adverso acies essent, Romanos metu cunctatos fuisse; cum jam neque voces suorum, qui segnitiam ejus increpabant, diutius ferre posset; omnibus cum copiis Lilybæo egressus, difficili per Selinuntiorum fines itinere, Panormitanum agrum attigit, ibique castra metatus est. Forte Panormi cum exercitu reliquo Procos. agebat, ut æstate jam adulta, locis ad demetendas fruges condendasque præsidio esset.

LI. Hic audito hostium speculatores occultos Panormi degere, universos, qui in urbe essent, procedere in concio-

§ XLIX. Col. Capitol. Orof. 4, 9. Polyb. Eutrop. § L. Porphyro. 1, 39. Diod. Zonar.

nem iussit. deinde præcipiens, ut sese mutuo prehenderent; rogando ignotiorem quemque, *quis esset, aut cujus rei causa Panormi ageretur*, exploratores apprehendit. Ex quibus ubi didicit, quid apud hostes ageretur, animadverso plus temeritatis quam consilii in expeditione Pœnorum esse, quo magis ad ineptam fiduciam incautos proliceret, simulavit metum, & intra munimenta urbis se continuit. Ferocior ergo factus Asdrubal, promotis castris agrum Panormitanum vastat, urit, fruges corrumpit, ad ipsos usque urbis muros populationem profert. neque moveri hoc vel damno, vel pudore, proconsul: ratus, si paululum sustinuisset, utrumvis in Pœnos cum ingenti fœnore derivatum iri. maxime vero ut flumen Orethum, quod meridiem versus urbem præterlabitur, transirent hostes, expectabat. hoc enim si factum esset, præmeditatam expeditamque victoriæ viam habere rebatur. Id ut assequeretur, cum rebus ceteris in speciem timide administratis, tum propugnatores in muris raros collocando, & animum suorum & numerum ab hoste despicere cupiebat.

LII. Hoc consilium, cum & Prætor hostium audacia sua, & improvise casu fors juvisset, ex sententia proconsulis cessit. Nec enim defuit Asdrubal tum copias pedestres, tum equitatum & elephantos omnes transducere, positus juxta muros oppidi castris, tanto cum contentu confessæ, ut putabant, hostium formidinis, ut neque vallo sibi neque fossa opus esse judicantes, nullis defensa munimentis tentoria figerent. Eo cum lixæ mercatoresque ingentem annonam plurimumque vini convexissent, mercenarii Carthaginienſium avide hausto mero, clamoribus dissonis, tumultuque & strepitu, qualis ebrietatem sequi solet, omnia complevere. Tum vero tempestivum proconsuli visum, emissis expeditis hostes ad pugnam prolicere, processitque res ita feliciter, ut aliis aliisque subinde prorumpentibus, tandem totus Asdrubalis exercitus e castris educeretur. †

§ LI. Polyb. Fazellus de reb. Sic. 2, 4. Front. Strat. 3, 17.  
§ LII. Diod. Polyb.



LIII. Ibi L. Cæcilius proconsul partem velitum ante fossam urbis disponit. his imperat, *siquidem elephantum propius suggesti essent, densa in eos tela conijciant: si urgeantur ipsi, refugiant in fossas, atque rursus inde conentur.* sordidos opifices & forenses turbas comportare missilia jubet, & extra muros projicere, ne copia horum velitibus desit: sagittarios in muris locat; ipse cum cohortibus gravioris armaturæ intra portam, dextro hostium cornu obversam, instructus paratusque consistit. Interea qui prælium commiserunt, modo multitudine hostium pressi, servatis ordinibus referebant pedem, modo recentibus suorum auxiliis confirmati, quæ proconsul identidem submittebat laborantibus, pugnam sustinebant: cum rectores elephantorum æmulatione incensi, quo ipsi potius, quam Asdrubal, auctores victoriæ fuisse viderentur, concitatis belluis proturbant adversarios: & ad urbem se recipientibus incaute instantes, ad ipsam usque fossam progrediuntur.

LIV. Ibi vero, cum & a mœnibus sagittarum nimbus rueret, & a recentibus, qui ante fossam steterant, hastæ velites confestim jacerentur, confecti vulneribus elephantum sævire, conversique quo dolor & ira ferebat, incumbere suis, proterere obvios, perturbare & dissolvere ordines armatorum cœpere. quo animadverso proconsul *hoc illud esse tempus provise diu victoriæ* clamitans, aperta porta prorumpit: neque difficile certamen instructis & compositis adversus trepidantes & turbatos fuit: magna cædes pugnantium, magna fugientium facta, casu quodam, qui præsidium afflictis asserre debuerat, ultro calamitatem augente. Quippe sub idem illud tempus Punica classis comparuit: ad quam, veluti salutis unicum spem, cum trepida multitudo metuque cæca promiscue rueret, multi invicem aut ab elephantis conculcati sunt; alii a persequentibus interempti: magnus etiam numerus inter natandum, aut dum naves tumultuose conscenduntur excussus, in mari periit.

LV. Neque vel ad ea tempora, vel deinceps ulla pe-

pulo Romano inter tot res prosperas victoria clarior cessit; qua & ad priorem fiduciam erecti sunt animi, & tantus hosti metus incussus, ut non modo spem in posterum pedestris militiæ, quamdiu id bellum fuit, sed etiam cogitationem deponeret. Viginti millia Carthaginiensium eo proelio cæsa referuntur: elephanti sex & viginti statim, ceteri postea omnes capti. proconsul enim efferatas palantesque belluas ab ignaris haud facile adduci posse cogitans, præconis voce *incolumitatem & libertatem captivis* promiserat, *quorum opera comprehensi elephanti esse videntur*. Ita primum captis mansuetioribus sibi que notis, ceteros horum ope haud difficulter adduxerunt. L. Metellus omnes Romam misit, haud indigno quod memoretur invento per fretum transportatos.

LVI. Quod enim naves ad eam rem idoneas nullas habebat, doliis coactis multis vinctisque, ita ut inter bina quæque dolia tignum unum immissum, neque collidi inter sese, neque divelli sineret; rates compactæ sunt, quæ deinde tabulato contratæ, materia terraque ingesta, & lateribus undique præseptis in stabuli formam ingressas intrepide belluas, sine sensu navigationis, cujus valde impatientes sunt, in Rhegino litore exposuerunt. Asdrubal ex clade Lilybæum evasit, sed Carthagine damnatus absens, cumque rediisset, comprehensus & supplicio affectus est. Inter ea Pœni cæsos exercitus suos, abactos elephantos, totam Siciliam præter Lilybæum & Drepanum amissum, Romanosque iterum classe confecta, mari terraque validos esse reputantes, ad pacis consilia se retulerunt: gratanter accepturi, si lenioribus paulo conditionibus transigi posset.

LVII. Quæ res cum eos M. Reguli, legumque pacis ab ipso quondam dictarum admonuisset, in eam cogitationem venerunt, ut per illum ipsum maxime crederent, vel pacem, vel quod secundum pacem gratissimum erant habituri, permutationem captivorum impetrari posse. Neque

§ LV. Flor. 2, 2. Oros. 3, 9. Zonar. Front. Strat. 2, 5. § LVI. Plin. 8, 6. Zonar. Oros.

dubitabant, quin promississimam operam in eo negotio vel sua causa navaturus esset. *quem enim tanta duritie animi cogitari posse, quin exire miserias carceris, revivere carissima pignora, frui libertate, patria, dignitate, honoribus cupiat? Esse M. Regulo uxorem Romæ, esse liberos: propinquos ejus affinesque in Senatu & magistratibus, fratrem etiam patruelem consulari imperio agere: ipsum Senatui populoque Romano & ob res prosperas carissimum, & ob adversas miserabilem esse: sive se amaret, sive a suis amaretur; neminem neque agendæ causæ diligentiorum patronum, neque impetrandæ gratiosiorum fore.* Non abnuvit ille, nulla spe aut cupiditate suæ utilitatis, ut postea apparuit, sed ut Senatum ad publica tuenda commoda præfens auctor efficacius permoveret. Ita Carthaginien- sium legatis additus cum ad urbem venisset, ingredi, quamvis rogatus a Romanis, noluit: *hostium legatis ex disciplina patria Senatum extra urbem dari causatus.*

LVIII. Coactis ergo Patribus, inter legatos Carthaginien- sium verba fecit, *se quoque, ut qui jure belli servus Pœnorum esset, mandata dominorum attulisse, maxime quidem bellum uti finiretur conditionibus, quibus utrique populo visum esset: sin vero, ut saltem captivorum esset permutatio.* Digressos mox le- gatos & ipse secutus est, neque deliberationi Senatus hoc ipsum instanti petentis prius interesse voluit, quam Car- thaginien- ses assentirentur. tum assedit tacitus, donec ro- gatus sententiam, *Patres, inquit, conscripti, ego tamen Ro- manus sum! & corpus quidem, ut fortuna voluit, penes hostes est; animus fortunæ non subiectus, qui fuit, manet. quare huic po- tius obsecutus, quem meum esse reor, quam corpori, quod alie- num est, neque captivos permutandi, neque incundo patris auctor sum. Bello manente captivos reddi, prorsus est inutile: nam illi pro me uno duces multos, pro sen- adolescentes repetunt; in quibus esse novi, quos non spernatis: finire vero bellum, nisi lu- culentissimis conditionibus, aut universa victoria, cum indignum esset sapientia vestra, tum rei Romanæ damnosissimum.*

§ LVII. Zonar. Appian. ap. Urf. § LVIII. Dio. ap. Urf. Liv. Epit. 18. Zonar. Silius l. 6.

LIX. Scio, vobis etiam in gerendo bello difficilia multa accidere. neque enim res magnæ citra magnum laborem magnosque sumtus confieri possunt: sed si Carthaginiensium fortunam contuleritis, omnia, quæ momentum ad victoriam faciunt, penes vos meliora sunt. Magna pugna superati sumus semel, sive culpa ista mea, sive fortuna fuit: sed exercitus eorum toties cecidimus, & animos mea clade rursus erectos victoria Panormitana infra priorem desperationem dejecit afflixitque. Siciliam excepta una alteraque urbe amiserunt. in ceteris insulis res ipsorum malæ sunt. Classem habetis, cui Punica non optet occurrere: hac quoque parte belli perpetuo superiores. neque accepta tempestatibus damna tantum vobis virium detraxerunt, quantum adjecerunt cautionis. Pecuniæ fortassis par utròbique inopia: sed obsequen-  
tiores tamen vobis Itali, quam Afri Pœnis, quos cum amassent nunquam, nuper etiam impensius odisse didicerunt. Qui enim nulladum tam atroci injuria læsi certatim ad me defecerunt, eos post vastatam a prioribus dominis regionem, abacta armenta, extortas pecunias, interfectos principes, quid aliud expectare creditis, quam ut novus exercitus hinc in Africam veniat?

LX. Quod vero delectus vobis facilis & copiosus est, miles bonus, concors, lingua, moribus, sacris, civitate, cognatione junctus, id tantum esse reor, ut hac una re ancipitem facere possietis Carthaginiensibus totius belli victoriam, si ceteris omnibus vinceremini. Quid enim adversus ejusmodi copias momenti sit in mercenaria manu? & tamen si quod erat, sua crudelitate jam aboleverunt Pœni; sibi que non minus difficilem effecerunt peregrini militis conducendi rationem, quam conducti custodiam. Xanthippus, cui forte Carthago debet, quidquid ab eo tempore potuit amittere, tam ingrate perfideque tractatus, documento erit aliis, ne temere locent operam ei populo, qui maxima merita non nisi maximis injuriis novit remunerari. vulgus etiam barbarorum, stolidum & venale genus, nihilominus absterrebit in sui generis homines sapius exercita sævitia, cum modo carnificum aut commilitonum manu perempti, modo in desertis infidis expositi, pro stipendiis emeritis, ne simplicem quidem mortem, & humani moris supplicia pertulerunt. Habetis P. C. ra-

ziones meæ sententiæ, qua neque pacem Carthaginiensibus dandam, neque commutationem captivorum recipiendam censeo.

LXI. Non displicebat consilium Senatui, si auctore salvo accipi posset, sed hujus eo magis miserebantur, quo ipse, ut reipublicæ consulere, magis se neglexerat: apparebatque huc inclinari, ut qualibet conditione vir animi tam generosi patriæ redderetur. jamque voces jactabantur dicentium, *postquam ad suos postliminio revertisset, suo jam jure manere in civitate, aut retineri posse.* Pontifex etiam Maximus affirmabat, *si remansisset in civitate, citra perjurium facturum videri.* cum ille spiritu vultuque, quem etiam iste Senatus stupefceret, *Quin, ait, dubitationem istam semel tollitis, Romani, sequiminique sententiam meam, & audetis me contemnere? Frustra tenditis obtinere, quod neque jucundum vobis, neque utile patriæ, neque mihi honestum sit futurum. Fortasse dum nova res esset, alucres, & gratantes vobiscum me versari videretis: sed simulatque primi istius gaudii brevis impetus evanisset, odiosiores me vobis redderet reditus mei turpitudine, quam absentia mea desiderandum effecisset.*

LXII. Mihi quidem certum est in ea civitate non degere, ubi post servitutem Africanam civis honesti dignitatem tueri non potero: & si maxime vellem, prohiberet fides, prohiberet jurisjurandi sacer horror, numinumque veneratio, quorum invocationem & reditus mei ad Pænos pignus feci, & si pejerem, pænæ non a me tantum, sed etiam a vobis populoque Romano repetendæ vindicem timeo. Sunt enim profecto aliquid dii, neque perjuriis aut contemptu hominum impune violentur. Si quis vero posse me religione exsolvi autumat: esse prodita libris auguralibus hujuscemodi piacula: carimoniis & victimis perfidiam ac perjurium rite procurari: cum ego meminisse velim, majorem esse majestatem numinum, quam ut pejerando læsa quibuslibet hominum invenis placetur: neque rationi consentaneum, ut macula peccatis hominum contracta, pecorum boumve sanguine ablui credantur.

LXIII. Ad me quod attinet, scio mihi Carthagine paratos esse cruciatus magnos, exquisita tormenta. Sed his omnibus

X  
 tristius esse puto fidem fallere. Hoc enim mihi profecto noceret: illa magis ad ea, quæ circa M. Atilium sunt, quam ad ipsum referuntur. Nolite calamitosum existimare; quisque ferre calamitatem potest. Servitutem, contentum, dolorem, inediam, vigilias, cum mala nunquam putaverim, post tanti temporis assuetudinem etiam molesta credere desii. Tolerabilia enim esse, tolerando didici: quod si supra quam ab homine ferri possint, intendantur, non ab illa tantum, sed ab omni miseria me cita mors liberabit. Nihil igitur timendum esse viro mortem non timenti, quam etiam occupare licet; & fecissem, nisi viri esset, vincere potius dolorem, quam effugere. Sed hæc pauca & confusa ideo dixi, ut vos neque dimoveri me posse a sententia sciretis; neque vicem meam velut hominis infelicitis & calamitosi misereremini: mihi vero mei consilii tota ratio facilis & constans est. nam ut Carthaginem revertar, id mihi debet esse curæ: quid passurus ibi sim, erit diis. Ajunt etiam, quo efficacius moveret dubitantes, confirmasse, priusquam Carthagine dimissus esset, sibi venenum Purica fraude datum, quod lenta peste spiritus vitales exedens, facta permutatione restitutum suis consumeret.

LXIV. Horribilem vero in hoc viro virtutis constantiam, qui, dum ab honesto non discederet, contumelias, cruciatus, mortem, quidquid denique abominantur homines, majori prope contentione secutus est, quam alii vitaverant: utili mortalibus documento, eas tantum animas quibusvis terroribus pares, honestique propositi ad extremum tenaces esse, quæ nobilitatis suæ sensum habent, seque non ad hanc modo vitam natas esse meminerunt. Nec enim acerbitates tantas M. Regulus sponte pertulisset, nisi aut pulchris factis ingentia post mortem fore præmia, aut sceleratis ingentes pœnas, credidisset. Igitur in sententiam M. Reguli facto Senatusconsulto, cum mœstos & iratos dominos ipse vultu semper eodem sequeretur, repulsæque dolorem appareret in suaforem ejus crudeliter vindicatum iri, moti quidam sunt, ut vel nolentem retineri juberent. uxore

præterea Reguli Marcia, communibusque liberis, omnia fletu planctuque complentibus, dixerunt consules, *neque manentem dedituros esse; neque discedentem moraturos.*

LXV. Sic ille, recusato etiam conjugis colloquio, parvorumque filiorum complexu osculisque vitatis, Carthaginem relictus, atrocissimis suppliciis vexatum corpus exiit. Palpebris enim relictis aliquamdiu in loco plane tenebrioso habuerunt: deinde cum sol esset ardentissimus, repente eductum intueri cælum coegerunt. postremo conjectum in arcam ligneam, quam ad solem obverterant, clavis introrsum versis horrentem, atque ita angustam, ut erectus perpetuo manere cogeretur; dum fessum corpus, quocunque inclinaret, ferreis stimulis confoditur, cruciatu & vigiliis interemerunt. Hic M. Atilii Reguli fuit exitus, ipsa quoque vita, licet maximam per gloriam diu acta, clarior & illustrior. Fuit vir moribus integerrimis, animo infractus; consilio non spernendus; in quo nihil accusare neque sua neque sequentia tempora potuerunt, nisi quod fortunam secundam infirmius tulisse visus est, repudiatisque Pœnorum precibus causa fuisse, cur multis deinde annis bellum maneret, ingenti cum civitatis utriusque detrimento.

LXVI. Ceterum M. Regulus peccatum istud aliis virtutibus, sed maxime mortis admirabili constantia, delevit; calamitate sic perlata fortunatior, quam si evitare imminentem potuisset. Audito sine Reguli, & barbara Pœnorum feritate, Senatus nobilissimos captivorum Marciae liberisque dedit. quos illi conclusos in armario muricibus præfixo, pari ac Regulus interierat supplicio excruciare constituerunt, alimentis etiam per dies continuos quinque non præbitis. intra quod tempus Hostas Pœnus morore famæque extabuit. Hamilcar vero firmior, etiam alios quinque dies cum cadavere Hostaris inclusus, ciboque tantum ad vitam cum miseria prorogandam dato duravit: donec.

§ LXIV. Silius l. 6. Zonar. Dio ap. Urf. Horat. car. 3, 5. Appian. Punic. § LXV. Val. Max. 3, 1. Tubero ap. Agell. 6, 4. Auct. de Vir. ill. c. 46. Aug. de civ. Dei 1, 15. Cic. de off. 3, 27.

cognito quid fieret, magistratuum imperio sævitia coercita est; injunctumque, ut Bostaris cineribus in patriam remissis reliqui captivorum mitius haberentur: morum utriusque civitatis memorabili discrimine; cum altera nec inique læsa, nec impune læsura, virtutem, quam venerari debuerat, diris suppliciis exstingueret: altera justissimæ vindictæ poneret modum, non quem poscebat irritatus dolor, sed quem reverentia humanitatis, & decora claris imperiis moderatio commendabat.

§ LXVI. Diod. l. 24. ap. Valef. Zonar. Tudit. ap. Agell. 6, 4.

---



# JOANNIS FREINSHEMII SUPPLEMENTORUM LIVIANORUM

## LIBER IX.

IN LOCUM LIB. XIX LIVIANI.

---

## EPITOME

### LIBRI DECIMI NONI.

*Cæcilius Metellus, rebus adversus Pænos prospere gestis speciosissimum egit triumphum, XIII ducibus hostium & CXX elephantis in eo ductis. Claudius Pulcher consul, contra auspicia profectus, jussis mergi pullis, qui cibari volebant, infelicitè adversus Carthaginenses classe pugnavit; & revocatus a senatu, jussusque dictatorem dicere, Claudium Gliciam dixit, fortis ultimæ hominem: qui, coactus abdicare se magistratu, postea ludos prætextatus spectavit. Atilius Calatinus primus dictator extra Italiam exercitum duxit. Cum Pænis captivorum commutatio facta est. Colonia deductæ sunt, Fregensæ, in agro Salentino Brundisium. Lustrum a censoribus conditum est. censa sunt civium capita CCLI millia, CCXXII. Claudia, soror P. Claudii, qui contemptis auspiciis male pugnaverat, a ludis revertens, cum turba premeretur, dixit: Utinam frater meus viveret, iterumque classem duceret! ob eam causam multa ei dicta est. Duo prætores tum primum creati sunt. Cæcilius Metellus Pont. Max. A. Postumium*

*consulem, quoniam idem & flamen Martialis erat, cum is ad bellum gerendum proficisci vellet, in Urbe tenuit; nec passus est a sacris recedere. Rebus adversus Pœnos a pluribus ducibus prospere gestis, summam victoriæ C. Lutatius consul, victa ad Ægates insulas classē Pœnorum, imposuit. Petentibus Carthaginiensibus pax data est. Cum templum Vestæ arderet, Cæcilius Metellus Pont. Max. ex incendio sacra rapuit. Duæ tribus adjectæ sunt, Velina & Quirina. Falisci cum rebellassent, sexto die perdomiti, in deditionem venerunt.*

**I.** **P**ROFECTIS ab Urbe Carthaginiensium legatis, consules Senatusconsulto exercitum in Siciliam deportare iussi, cupide paruerunt, & ira in hostes accensi ob M. Regulum, & æmulatione speque ex L. Metelli proconsule victoriâ. Nec enim confecti negotii magnitudinem damno tantum Carthaginiensis populi metiebantur, quod amisso exercitu, tantoque numero elephantorū, ad reliqua belli factus esset infirmior; sed haud minus eo, quod prospera cum belluis pugna Romani milites animum ex priorē formidine receperant: spesque incesserat, finiri bellum posse, ni occasione defuissent. Igitur classē navium ducentarum coacta consules ambo cum legionibus quatuor Panormum appulerunt: assumtisque reliquis ibi copiis navibusque, præter eas, quæ custodiæ locorum necessariæ videbantur, cum rostratis ducentis quadraginta, cercuris vero (sic vocant navium quoddam breviorum genus) sexaginta, & aliis cujusque modi navigiis plurimis Lilybæum veniunt: ibique consilio habito aggredi urbem constituunt.

**II.** Hæc est illa Lilybætani oppidi nobilis obsidio, quæ per solidum decennium, ab ejus belli anno quarto decimo tracta, non expugnatione urbis, aut deditione ab obsessis facta, sed universi belli eventu finem accepit. Cum enim Pœni Romanique intelligerent, quantum in ea urbe momentum utrique foret, vel ad Africæ præsidium, vel ad impe-

rum Siciliæ, summis utrinque viribus & oppugnata & defensa est. Urbem deinde Romanam ex mœrore, quem M. Reguli casus attulerat, refecit L. Metelli triumphus: non visu modo & memoria rerum prosperrimarum, sed etiam adversus inhumanam gentem vindictæ dulcedine. Triumphavit de Pœnis proconsule a. d. VII Idus Septembres. Ducti sunt ante currum duces hostium tredecim, & ingens elephantorum agmen, viginti supra centum. sunt & qui plures numerent. Hi deinde producti sunt, cum ludi fierent, & hastis præpilatis per totum circum ab operis acti, quo contemnere disceret belluas populus, quas vehementissime timuerat. Interfectos esse jaculis Verrius Flaccus auctor est, cum neque uti iis placuisset: neque donari regibus tantam accessionem virium, ex usu reipublicæ videretur.

III. Eodem anno magna vilitas annonæ Romæ fuit: assibus singulis farris modios fuisse; itemque vini congios, ficique siccæ pondo triginta, olei pondo decem, carnis pondo duodecim traditur: cum plus ubivis earum rerum esset, quam pecuniæ, cujus inter belli tam diuturni sumtus magna jam penuria esse cœperat. Dum hæc Romæ geruntur, in Sicilia Lilybæum summis viribus oppugnabant consules, neque minore pertinacia animorum ab inclusis resistebatur. Prima vis admota est turri, quæ præ aliis longissime versus Libycum mare procurrebat. Hac dejecta, ad proximam quamque promota sunt opera, donec sex omnino turres procubuerunt. tum ad ceteras quatiendas fossæ compleri cœptæ, ut machinæ transduci admoverique possent. quanquam magnus erat labor, quippe latitudo fossæ sexaginta cubitos, altitudo quadraginta æquabat, tamen impigre cœptus promotusque est.

IV. Contra hæc Carthaginienses interius aperta fossa, egestam humum amoliebantur: sed cum multitudine ma-

§ II. Col. Triumph. Liv. Epit. 19. Dionys. l. 2. L. Pitt. ap. Plin. 6, 8. M. Varro ap. Plin. 18, 3. § III. Polyb. l. 42. Zonar. Diad. l. 24.

teriam apportantium nihilominus agger crederet, fossæque complanarentur, relicto isto consilio murum alium interioreni extruxerunt : indefesso ad omnia Himilcone, qui præter urbanam multitudinem, mercenariorum decem milibus instructus, vim omnem dolumque hostium sagacitate, vigilantia, constantiaque eludebat. Ille nihil neque remissum apud suos, neque tutum apud hostes patiebatur; operibus opera, cuniculis cuniculos, armis arma opponebat: inter hæc sæpe eruptionibus pugnatum, adeo nonnunquam ferociter, ut haud pauciores, quam iusta pugna cadere solent, tumultuariis istis certaminibus desiderarentur. Inter quæ, Romanis muros suffodientibus, quo subrutis fundamentis conciderent, Himilco ex adverso cuniculos agi iussit, ubi Romanos terram egerere animadverterat. His deinde protinus apertis armatos immisit, qui nudos & operi intentos subito aggressi, multos interemerunt; neque pauciores, dum opem suis laturi ad muros accurrunt, sarmentis in fossam coniectis, deinde incensis, concremarunt.

V. Gliscebant tamen in animis obsessorum pavor atque consternatio, qua abusi duces quidam mercenariorum, *stipendia sibi non ex fide soluta* prætexentes, de prodenda Romanis urbe consilia iniverunt: minime dubitantes, quin suos quisque milites facile illecturus esset ad probanda, quæ agerentur. Itaque nocte quadam clam ex oppido ad castra Romanorum elapsi, statum urbis obsellæ, & quid ipsi pararent, exposuerunt. Agebat tum inter mercenarios, qui Lilybæi erant, Alexon quidam, Achæus genere, vir neque militarium artium rudis, & eximius fide. Is, animadverso proditorum consilio, rem ad Himilconem continuo deferit. Himilco, ut in magno & instanti metu nihil conatus, duces mercenariorum, quot eorum adhuc Lilybæi erant, convocat: quid a quibus tentetur exponit, eosque graviter inculcat: hortatur præsentibus, *ne temeritatis & perfidiæ alienæ participes esse velint: in fide perseverantibus integræ apud Carthaginienses omnia, stipendium certum, præmia magna fore:*

*proditionis infami crimine se commaculantes, & diis & hominibus adversis acturos esse. Simul pecuniæ quantum cogere istam inter trepidationem potuerat, dividit: de gregariorum stipendiis, ut quam maturime solvantur, sibi curæ futurum esse spondet.*

VI. Magna vis orationis est in tempore adhibitæ, præsertim si gravitate morum fides sermoni concilietur: assensu certe sunt universi, operamque suam ad continendos in officio milites alacriter obtulerunt. Himilco laudatos & ampliori spe incensos *ire concessim ad suos quemque jubet, operamque dare, ut in fide atque potestate sint*: mittit una Hannibalem, filium ejus Hannibalis, qui in Sardinia perierat, & Achæum Alexonem: illum ad Gallos, quibus ex veteri commilitio notus & acceptus erat: Alexonem ad ceteros varii generis mercenarios, omnibus ex æquo carum gratumque. Hi fidem suam interponentes, *rata fore quæ Himilco promississet*, negotium adeo ex sententia perfecere, ut paulo post reversos ad mœnia proditores non modo averfarentur omnes, sed etiam conviciis telisque ultro arcerent.

VII. Et hi quidem ad consules re infecta regressi, muneribus tamen quibusdam & agris in Sicilia donati sunt. Ceterum Pœnorum res improvise malo prope desperationem adductas, eo tempore fides Alexonis sustentavit: qui prius fervatis itidem Agrigentinis, quibus simili quodam scelere mercenarii Syracusanorum insidiati fuerant, jure suo memoriam laudemque in historia meruit. Creverunt deinde obsessis animi adventu novorum auxiliorum. Carthaginenses enim, licet ignari omnium, quæ Lilybæi gesta essent, res non segnibus consiliis indigere judicabant. Igitur Adherbali rei maritimæ præfecto negotium dederant, ut classe comparata militem, annonam & pecuniam Lilybæum introduceret. Ab hoc missus Hamilcaris filius Hannibal, ab Ægusis, quas vocant, insulis ventum opportunum nactus, recta fronte Lilybætanum portum petit, instructos in navibus habens milites, &, si quis obliteret, vi perrup-

trus. Jam ab obsidionis principio portus aditum obstruxerant Romani, demissis in fundum maris cercuris quindecim, quos ad hunc usum lapidibus oneraverant.

VIII. Igitur partim hostis celeritate deprehenſi, partim metuentes, ne ventorum vi convulsi & ipsi in portum & intuta navigantibus loca raperentur, advenientibus hostibus occurrere neglexerunt. Et Hannibal portum tuto tenuit, copiisque (decem erant millia militum) expositis, magna cum letitia Lilybatanorum, in urbem acceptus est. Romani, cum ingressum hostium impedire non potuissent, de cetero consultabant, quemadmodum opera sua tutarentur, quæ tanta multitudine novorum militum recepta Himilconem profecto oppugnaturum esse videbant. Neque fessilit eos opinio. Pœnus enim aliorum recentibus viribus, aliorum refectis adventu sociorum animis usus, veteres novasque copias in concionem vocat; spe victoriæ ac præmiorum ad faciendam eruptionem impellit; dispositisque, ut res poscebat, manipulis, sub primam lucem opera Romanorum pluribus locis aggreditur.

IX. Erant & apud hos provisa cuncta, quaque plurimum periculi metuebatur, firmæ stationes oppositæ: cum his itaque confestim acre certamen contrahitur. cadunt utrinque multi, cum & magna animorum contentione, & numero pugnantium non contemnendo res gereretur, haud paucioribus viginti millibus urbe egressis, & majore aliquanto multitudine obsidentium. Quippe consules contractis ex amica Sicilia auxiliis plusquam centum millia hominum effecerant: ex quibus ad expediendos commeatus aliasque necessitates dimissis ceteris, ad obsidionem urbis millia ferme sexaginta adducta. Sed cum ex omni parte vehementer dimicaretur, maxima circa machinas erat contentio: quas alii ut corrumperent, alii ut defenderent, non magis suæ quam hostis vitæ parcebant. Jacebat ingens agmen occisorum in ea statione, quam tuendam ab initio ceperant: augebat clamorem præliantium & terrificam discriminis faciem

alia turba, quæ facibus tædisque armata, per pericula, per cædes suas alienasque ad incendenda opera ruebat: propiusque factum est nihil, quam ut perviciæ hostium miles Romanus cederet, machinæque defendi nequirent. Sed Himilco multos suorum occumbere cernens, Romanos autem de ardore propugnandi nihil remittere, signum receptui dedit, pugnaque prior excessit. neque Romani insisterunt, contenti servatis operibus, quæ propemodum pro amissis jam habuerant.

X. Proxima nocte Hannibal, clam hostibus, dum fessi ex prælio ejus abitum observare negligunt, navibus, quibuscum venerat, Drepanum ad Adherbalem vectus est: abductis una equitibus, quos in locis impeditis ad nullam rem obsessis utiles, alibi bonam operam navare posse recte judicaverat. Hi enim a Drepano sæpe excurrentes, intuta faciebant itinera, rerumque necessariarum subvectionem difficilem, multosque pabulatorum, longius a castris vagantium, excipiebant, sociosque Romanorum omni cladum genere vexantes, consulum rationes non mediocriter conturbabant. Neque mari tutas iis res Adherbal esse patiebatur, qui modo Siculis modo Italicis litoribus improvisus incidens, nihil quo nocere Romanis posset, inausum intentatumque relinquebat. Ita factum, ut magna in castris nata inopia (nec enim præter carnes pecudum quid uam ferme cibi supererat) magna pars fame, plures etiam morbis, ut solet, obortis morerentur.

¶ I. Hunc ad modum cum aliquot hominum millia deficiat essent, alterum ex consulibus ad comitia Romam ducere, suasque legiones deportare placuit, quo remanentibus in obsidione expeditior annonæ ratio foret. Iterum deinde, majori conatu terra lapidibusque aggressis, aditum portus se, aggressi sunt, validis trabibus decussatim compactis aggerem communientes, quæ ferreis ancoris revinctæ, totius operis compagem firmiore nexu continerent. Sed propter maris altitudinem, ob quam inter descendendum

convellebatur, quidquid injectum erat, ingens & inutilis labor fuit: nam oborto vehementiore ventorum flatu, undisque intumefcentibus, perfracta omnia ac direpta sunt. Cum tamen ipsa operis fama clausum aliquamdiu portum tenuisset; anxios ea res Pœnorum animos, vehementerque sollicitos habuit; neque enim ulla in promptu erat ratio, qua cognoscere statum suorum possent, neque quisquam audebat operam suam ad inspiciendas Lilybætanorum res polliceri: donec Hannibal quidam, cognomento Rhodius, vir ex illustribus, se ingressurum urbem, & postquam omnia coram perlustrasset, ex fide renuntiaturum recipit.

XII. Ei promisso gratia prius major apud Pœnos, quam fides fuit: quippe præter moles in mari jactas, aditum portus a Romanis navibus ad ancoras stantibus custodiri sciebant. Sed ille privata, quam habebat, adornata navi, ad insularum, quæ Lilybæo præjacent, unam, hinc deinde cum postridie ventum ferentem nactus esset, circa quartam horam diei, palam, inspectantibus universis hostium copiis, hominibusque fiduciam stupentibus, portum inVectus est. At Romanus consul, ut regredientem interciperet, selectas ex omni numero naves decem per noctem instrui jubet: eas ab utroque latere portus, quam proxime ad ipsum ejus ostium constituit. Hannibal celeritate navis suæ confusus clara luce procedit: expectabant eum intenti paratique Romani, simulque conatu quanto poterant, in eum ferebantur. Sed ille velocitate tantum vincebat, ut effugisse non contentus, ultro illuderet, modo adnavigans, modo circumvectus, quasi ad pugnam hostes provocaret.

XIII. Hac audacia cum sæpius uteretur, multum rebus Punicis adjumenti contulit, quod & obsessorum animi nuntiis suorum mirifice recreabantur: & quæ postulabat usus Carthagini mature cognosci poterant, & contumeliosa istius hominis temeritas Romanos molestia & pudore vexabat. Juvabatur autem peritia maxime locorum, quod in palustri illa cœnosaque eluvie, per quam Lilybæum aditur, cer-



tum fidumque navibus iter accurate observaverat. quoties enim ab alto veniens in conspectu habere urbem cœperat, ita obvertebat navem, ut puppis Italiam respiceret, ex prora turris Lilybætana, quæ mari imminebat, ita cerne-  
retur, ut omnium Africam versus sitarum turrium conspec-  
tum tegeret: quæ una tutissima est via pleno cursu por-  
tum perentibus nautis. Jamque plures esse cœperant, quæ  
audacia & felicitate Hannibalis incitati Lilybæum commea-  
rent: donec casu quodam quadriremis celeritatis eximiæ  
comprehenderetur.

XIV. Licet enim aliis partibus moles a Romanis jactas  
venti ac undæ raptavissent; uno tamen loco, ubi minus  
profundum mare fuerat, constiterunt. Ei dorso impacta  
navis cum obhæssisset, capta a Romanis, optimoque milite &  
remigio instructa, etiam Hannibali exitium attulit. Quippe  
noctu forte ingressus urbem, cum in reditu palam solvis-  
set, quadrirememque istam ad omnes suæ navis motus simi-  
liter occurrentem videret, animadverso statim periculo fu-  
gere, & cum hoc frustra esset, repugnare conatus, in va-  
lidiorum potestatem venit. Romani hac quoque nave po-  
titi, parique modo ad observandum portus aditum usi,  
ne quæ deinceps naves Lilybæum penetrare possent, facile  
prohibuerunt. Acrior inde vis obsidentium esse cœpit: ador-  
tique munimenta Romani, quæ mari vicina erant, omne  
defensorum agmen ad tuenda loca, quæ oppugnabantur, per-  
traxere. Sic via facta reliquis copiis, quæ ex diversa parte  
occasione huic infidiabantur, ut murum exteriorem cape-  
rent: quanquam id frustra fuit. quippe dux Pœnus cum de-  
lectis suorum tempestive accurrens, multa cum cæde te-  
nentes locum Romanos rejecit.

XV. Alia deinde major fortuna spem obsessis universæ  
victoriæ dedit. Forte ventorum ingens vis exorta fuerat,  
adeo veluti data opera Romanorum incumbens machinis,  
ut & vineas quateret, & ipsas turres in capitibus earum  
structas convelleret. Non sefellit ea res oppidanos, deo-

rumque munere oblatam sibi opportunitatem credidere; qua toties frustra tentatis operibus ignem injicerent. Itaque tripartito agmine erumpunt, faces, & quæ alendo igni paraverant, immittunt. eratque per se facilis ad concipiendam flammam materia machinarum, quam diu ante cæsam sol & æstus arefecerant. Neque segniter ad opem ferendam concurrerant Romani: sed impar certamen erat, cum alii machinis jam incensis ad tela certius validiusque conjicienda luce ignium & tempestatibus impetu juvarentur; aliis haud minus ab his causis impeditenti periculique, quam ab hostili ferro, esset. quippe flatus vehemens & Romanis prorsus adversus, fumum, favillam, flammam in ora oculosque hominum provolvebat: telaque ab hostibus missa majori violentia deferebat in obnoxios, cum interim Romanorum ictus incerti & invalidi, nec dirigi per caliginem possent; & vehementia resantis venti frangerentur.

XVI. Ita factum, ut omnes Romanorum vineæ, petraræ, arietes, & quidquid operum vel agendis cuniculis, vel verberando muro paratum fuerat, eodem incendio absumerentur. Tum vero spes omnis potiundi per vim Lilybæi excidit: desertaque obsidio foret, ni Hiero, magna iterum frumenti copia submissa, uti maneretur evicisset. Ita omisso oppugnandi consilio, castrisque ex omni parte communitis, tempori & casui rem permittere decreverunt. Obsessi quoque resecta murorum parte, quæ ceciderat, majores in posterum ad tolerandam obsidionem animos habuerunt. Hæc nequaquam lætis aut securis animis Romæ audita: neque tamen dubitabatur, quin bello accepta detrimenta bello farcienda essent: adeoque hæc sententia penitus infixæ mentibus fuit, ut quidam senator in ipsa curia occisus esse memoretur, quod verba de pace fecisset. Magni deinde apparatus facti, inter quos remigum (nam hujus generis jactura ingens facta erat) millia decem ex novo delectu in Siciliam missa.

XVII. Consules jam erant P. Clodius Ap. F. C. N. Pul-

cher, L. Junius C. F. C. N. Pullus. Clodium illum nepotem Cæci fuisse, falso a quibusdam traditum est. Is cum in Sicilia venisset, accepto qui ad Lilybaeum erat exercitu, milites in concionem convocat, prioris anni consules acriter reprehendit, *quod per ignaviam & delicias, obsessis quam obsidentibus similiores tempus ad Lilybaeum sine ullo profectu, nec sine magna Romani nominis ignominia damnoque trivissent.* Erat enim vir asper & acerbus, & qui violentia ingenii, fastuque ob nobilitatem suam, prolaberetur ad facta dictaque vix sanæ mentis homini convenientia. Idem in puniendo sævus & immitis nullum delictum venia, levissimum quodque nimia severitate prosequabatur; cum interim ipse in rebus maximis, non misere tantum, sed etiam prorsus amenter impingeret. Nam & consilium priorum ducum, quod acerbe vituperaverat, imitatus est, ut ad portum obstruendum moles in mare jaceret: & quod capitalioris amentie fuit, temere Drepanum aggressus, non minus sua imprudentia, quam Adherbalis virtute, florentissimam classem perdidit.

XVIII. Persuaserat sibi ceterisque, hostem ignarum supplementi, quod Romana classis accepisset, imparatum Drepani deprehendi posse. nihil enim crediturum minus, quam audaciam & vires Romanis esse, ultro hostem mari lacessendi. Sic delectis navibus optimis ducentis & viginti, impositoque remige, & fortissimo quoque ex legionibus, nam ut ad certam prædam, minimeque longum laborem (Drepanum enim Lilybaeo abest millia passuum non amplius quindecim) certatim sese offerebant; circa tertiam vigiliam silentio solvit, cursu per noctem prospero, & hostes fallente. Lux orta, primis jam navibus a Drepano haud procul conspectis, ad miraculum insolitæ rei excitavit Adherbalem, neque dubitare poterat, quin hostis adesset. Duarum rerum erat proposita optio, ut aut confestim prælio congredieretur; aut aditu hosti concessio, cingi se obsiderique sineret. quod postremum, cum haud minus flagi-

tii quam molestiæ discriminisque plenum videretur, averfatus, socios navales subito in litore coegit: mercenarios autem milites voce præconis in concionem advocatos brevi sed efficaci oratione monuit, quanta spes esset prælium promte capeffentibus: quantus, si illud réfugiffent, ex obfidiione merus.

XIX. Alacriter succlamantibus omnibus, Adherbal collaudatos naves sine mora conscendere jubet, prætoriamque (hac ipse vehebatur) oculis & remigio fequi. Hæc ubi præcepta dedit, primus ipse altum petit, sub ipsas portui impendentes petras egressus, cum eodem tempore ex adverfo latere Romanæ naves portui intrarent. P. Clodius, non uti speraverat territo hoste præliumque detrectante, sed ad defensionem sui strenue converfo, perturbatus ipse, naves fuas propere revocat, in aperto mari structurus aciem. Sed illæ nullo ordine, ut unaquæque præcurrerat, aliæ intra portum jam penetraverant, aliæ petebant aditum; quædam in ipsis faucibus verfabantur. inde factum, ut dum magno nisu retrocedere omnes tendunt, aliæ in alias incurrentes turbarent mutuo, remosque invicem detergerent; donec ut potuerunt evolutæ portuque egressæ, quoniam spatium temporis nullum supererat, continuo juxta litus ipsum in ordinem aciei adffitere.

XX. Ipse consul, qui prius agmen coegerat, tum converfo cursu ante omnes evectus sinistro claffis suæ lateri se applicuit. At Pœnus interea lævum hostilis aciei cornu prætervectus, cum navibus rostratis quinque, tot enim secum habebat, Romanis obvertere frontem cœpit, altum patensque mare a tergo habens. simul alios fuorum, ut quisque advenerat, adjungere se iusto intervallo prioribus navibus jubet, & postquam omnes eadem serie directæ sunt, servatis ordinibus in hostem movet. Jamque sublatum utrinque ex prætoria pugnæ signum erat, cum omni ex parte acriter concurritur, parî primo spe, sed subinde meliøre Carthaginiensium fortuna. Quanquam enim numero

navium vincebantur, armatis tantum nonaginta, longe tamen rebus aliis superiores erant. nam & navibus melioribus, & exercitatissimo remige utebantur: locum autem pugnae fortiti erant commodissimum, ut quoties urgerentur, liberum in mare receptum haberent, velocitate sua ex facili vel elufuri hostem instantem, vel etiam si longius prosequeretur, circumventuri. Romanis contra ad litus appressis in arcto omnia: non procurrere libero impetu, non inhibere tuto poterant: sed quoties urgente hoste retrocedebant, aut puppe in fabulo deficiente hærebant, aut impacti litoribus periclitabantur.

XXI. Ita cum neque perrumpere hostium ordinem, & rursus a tergo invadere possent, ob tarditatem navium, remigumque imperitiam; neque ob angustias locorum, intra quæ conclusi erant, laborantibus suis opem a puppi ferre, impune a Carthaginienfibus vexabantur. Ad has difficultates accesserat & alia desperationis ex religione causa: iraque deorum se premi rebantur ob temeritatem consulis, qui contra auspicia pugnare sustinisset, ad neglectum religionum etiam contumelia addita. Pullos enim, quoniam non pascebantur, in mare præcipitari jussit, *ut biberent, quando esse nollent*: ea res, tanquam invitis iratisque diis præliantes, ad omnia seigniores timidioreque fecerat. Sed ipsi cladis auctori, cum cetera perdidisset, ad se conferendum, nec ingenium, nec audacia defuit. Quippe cum naves suas passim deprimi capique videret, assumtis triginta, quæ proximæ constiterant, inter litus & hostilem classem elapsus est: & quo tutior ad Lilybatanum exercitum receptus foret (præternaviganda enim Pœnorum erant præsidia) naves in speciem victricium ornari jussit.

XXII. Ita Pœnis victoriam penes consulem fuisse, reliquasque naves ejus mox secuturas putantibus, non modo tutus ei reditus, sed etiam hostibus terribilis, Lilybaeum

6 XX. Diod. 24, 1. Polyb. 1, 51. 6 XXI. Eutrop. 1. 2. Cic. de Nat. Deor. 2, 3. Flor. 2, 2. Val. Max. 1, 4, 5. Suet. Tib. c. 3. Front. Strat. 2, 13. Polyb. 1, 51.

fuit. relictas a consule naves tres & nonaginta cepit hostis una cum propugnatoribus & remige, præter eos, qui navibus magna vi in litus impactis, ejecerunt se in terram, fugeruntque. Sed & in ipso prælio magnus navium numerus depressus est: nam plures ducentis Lilybæo P. Clodius advexerat. Tanta victoria minimo impendio Carthaginiensibus stetit. *non modo navem, sed ne hominum quidem ullum interiisse, vulneratos oppido paucos, traditur: cum de Romana classe octo millia hominum cæsa, capta millia viginti referantur.* Sub idem tempus etiam a Panormo naves frumento onustas rapuere Pœni, Drepanumque avexere, & vicissim ex agro Drepanitano commeatus Lilybæum importantes, omni genere bonorum obsessos large refecerunt.

XXIII. Neque hic substitit ejus anni fortuna, quin alio quoque magno incommodo mactaret Romanos, nec possessione modo maris, sed etiam spe potiundi depelleret. Alter enim consul L. Junius, cum onerariis multis, quibus annonam ad exercitum deferret, rostratisque sexaginta ex Italia profectus, ubi Messanam appulit, obviam aliarum navium multitudinem habuit, quæ tum ab exercitu, tum aliis Siciliæ partibus eo convenerant. His assumtis, & classe facta navium longarum CXX, onerariarum prope DCCC, Syracusas provehitur. Quo postquam venit, quæstoribus partem navium Lilybæum ducendam tradit: ipse substitit Syraculis, expectans eos, qui Messana proficiscentem consequi non potuerant, simul annonam cogens, quam ex locis mediterraneis focii subvehebant. Interim Adherbal missis Carthaginiensibus, hominibusque captivis, fortuna gloriaque ad res gerendas incitante, Carthagini, qui suas septuaginta naves cum totidem ferme onerariis ex Africa adduxerat, triginta alias addidit, misitque hominem ad naves Romanorum, quæ in portu ad Lilybæum stabant, abstrahendas, aut corrumpendas.

XXIV. Il' sub primam lucem magno terrore invehctus, cum aliis navium manus, aliis ignem injiceret, & in Ro-

manos ad defensionem navium accurrentes, præfectus urbis Himilco mercenarios eruptionem facere jussisset, magna in castris trepidatio fuit. ad extremum Carthalo contractis non ita multis, abreptis quinque, Heraeam versus cursum direxit. his locis excubanti, ne quis Romanorum impune Lilybæum navigaret, nuntiatur, navium omnis generis classem haud pœnitendam adventare. Jam ille præfectos alios ad se pertrahendo naves bonas ad centum viginti effecerat: confusus igitur viribus, & superiore victoria, confestim egreditur portu, venientibusque occurrit. Juxta Geloum litus in conspectum classes venerunt: sed Romani quæstores impar certamen veriti, ad Phintiadem, quod in amicitia Romanorum erat oppidum, deflexerunt. Portus ad Phintiadem nullus est: tantum procurrentes in mare petrae stationem navibus haud usquequaque incommodam præbent.

XXV. Hic exscensione facta Romani hostium adventum instructi expectabant, catapultis atque ballistis ex oppido advectis, & pro litore ad tutelam navium dispositis. Carthaginensibus initio consilium fuerat obsidendi hostem, quem putabant metu perculsum statim refugiturum in oppidum esse, navesque ad prædam relicturum. Sed ubi Romanis gnaviter se defendentibus, certamen periculi plenum experiebantur, prætereaque loco multa habenti incommoda parum fidebant, destiterunt: paucisque navibus ex earum numero, quæ commeatum vehebant, abductis, ad Halycum fluvium, qui haud procul inde aberat, discesserunt: ibi dum faucios reñciunt, hostium abitum ex commodo suo observaturi. Alii scriptores, credo Philinum secuti, *haudquaquam levi damno defunctos esse Romanos*, volunt: sed primo statim aspectu hostium percussos quæstores, dum Phintiadem cursu petunt, onerarias naves, aliasque præter bellicas, deseruisse. in ipso vero prælio rotunda Romanorum navigia quinquaginta, longas vero naves sexaginta depressas, tredecim ita percussas quassatasque, ut deinceps usui esse nequiverint.

XXVI. Non longo post tempore, Pœnis adhuc statio-

nem ad Halycum amnem habentibus, L. Junius Cos. rebus, quarum gratia Syraculis subliterat, perfectis, præter Pachynum promontorium, vela Lilybæum versus faciens, a speculatoribus Carthalonis conspectus est. Carthalo, re nuntiata, quanta potest celeritate obviam consuli proficiscitur, ignaro eorum, quæ ad Phintiadem gesta essent: quo longissime a quæstorum classe cum illo dimicaret, neque juvari ille facile a suis posset. Consul eminus visa Pœnorum classe, cum neque configere auderet, neque hostem instantem effugere posset, juxta Camarinam in locum asperum & importuosum naves adigit; metum hunc vincente alio majore metu, ne aliter universus exercitus in potestatem hostium deveniret. Carthalo eadem loca intrare non ausus, ad promontorium quoddam stationi locum capit, ita situm, ut inde pariter in utramque Romanorum classem intentus esse posset.

XXVII. Neque multo post ventis violenter flantibus; cum ingentis tempestatis signa Carthaginensium gubernatores rerum istarum periti vidissent, Carthaloni persuaserunt, uti relicta, quam ceperat, statione, Pachynum flecteret. ita nec sine magno labore vim tempestatis Punica classis effugit. at Romanorum utraque classis inter saxa cautesque deprehensa funditus interiit, uti ne tabula quidem ulla ullius usus ex naufragio reliqua fuisse credatur; duabus exceptis navibus, quibus postea consul, reliquos ex ea clade milites remigesque secum ducens, Lilybæum pervenit. Hoc naufragio naves, quæ annonam portabant, omnes, longas supra centum periisse traditum. exercitus tamen servata pars est, multis in vicina litora enatantibus ejectisve. At Senatus, qui paulo ante P. Clodium consulem ob rem male gestam ex Sicilia revocaverat, cum insuper tristis de Juniana clade nuntius advenisset, in classe quidem spem habere desit: ceterum ad bellum terrestri Marte prosequendum, animum consiliumque strenue advertit.

§ XXVI. Polyb. Diod. § XXVII. Oros. 4, 10. Polyb. Dicæ. Eutrop. l. 2. Liv. Epit. 19.



XXVIII. Et Lilybæi quidem obsidionem solvi non est visum: sed datum idoneis hominibus negotium, ut necessaria exercitui iusto tempore subveherentur. Spem faciebat, quod uti mari Pœnus, ita Romanus terra plus poterat, totamque ferme Siciliam ditione aut fœderibus complectebatur. Sed neque consules ejus anni placebant: neque consulari imperio, quod isti contentu religionum profanassent (nam & L. Junius contra auspicia navigasse dicebatur) res putabatur feliciter geri posse. Igitur ad rem novam & inusitatam ventum, uti dictator diceretur, qui in Siciliam iret; cum ad eam diem extra Italiam nemo ea potestate præditus exercitum duxisset. Mira eo tempore & prope incredibilis P. Clodii consulis insolentia fuit. jussus a Senatu dictatorem dicere, tanquam parum in patriam deliquisset tantæ cladis auctor, nisi dignitatem etiam imperii contumelia & derisu macularet, M. Claudium Glyciam dixit, scribam aut viatorem suum.

XXIX. Tum vero coorta merito in eum indignatione omnium, coactus abdicare, ac in populi judicium adductus est. Condemnatum auctores, quos Cicero vidit, retulere; sed apud alios annotatum est, *illum haud dubia jam populi voluntate, casu ereptum esse eminenti damnationi, cum subito coortus imber comitia diremisset: tum enim velut questionem interpellantibus diis, aliam deinceps institui non placuisse*. Ceterum Glycias, quod ultimæ fortis hominem in maximo imperio conspici pudor civitatis non ferebat, coactus abdicare, ludos tamen postea prætexatus spectavit. In ejus locum dictator creatus est A. Atilius A. F. C. N. Calatinus, dixitque magistrum equitum L. Cæcilium L. F. C. N. Metellum, qui de Pœnis triumphaverat. Hi profecti quidem sunt in Siciliam, sed rem memorabilem nullam gesserunt. Interea L. Junius anxius rerum suarum, & naufragii culpam egregio facinore abolere studens, cum in omnes occasiones intentus esset, Erycis occupandi viam, proditione nocturna quo-

§ XXVIII. Polyb. 1, 54. Cic. de Nat. Deor. 2, 3. Liv. Epit. Suet. Tib. 1, 2. Fast. Capitol.

rundam, quos donis & promissis suos fecerat, invenit.

XXX. Eryx mons est Siciliae post Ætnam editissimus, in ea parte insulae, quae Italiam respicit, medio ferme inter Drepana & Panormum situ: sed ab illa parte asperior. In vertice planiciem habet cum templo Veneris, quam ex loco *Erycinam* vocant, longe omnium, quae in Sicilia sunt opulentissimo. Sub ipsum deinde cacumen in medio montis urbs est cognominis, accessu valde difficili, qui a radicibus montis per longas & angustas femitas, non citra laborem expeditur. Igitur L. Junius loci natura perspecta, tum in summo montis jugo, tum in faucibus, quae Drepana spectant, praesidia constituit, tutus loco, & si incessetur, vim hostium levi negotio propulsaturus. Sed & Ægithallum muro cinxit, firmavitque praesidiaria manu militum octingentorum. Ceterum Carthalo noctu expositis ibi copiis castellum expugnavit. praesidarii partim occisi captive: partim ad Erycem pertugerunt.

XXXI. Cetera de L. Junii rebus incerta sunt apud scriptores: quidam enim *a Carthalone captum Ægithalli*; alii, *metu accusationis ob classem amissam sibi necem conscivisse*, prodiderunt. Neque minus de secularibus ludis ambigitur, tumne potius tertium celebrati fuerint, an quartodecimo post anno, P. Cornelio Lentulo, C. Licinio Varro consulibus. Credibilis tamen arbitror, hoc anno factos, incitante etiam ex tot cladibus metu, & spe meliorum temporum, si religiones diligentius colerentur. Fertilis hic annus fuit, oleique librae duodenae singulis assibus venire. Interea cum dictaturae vel tempus effluxisset, vel abdicata per Calatinum potestas esset; magistratum inierunt C. Aurelius L. F. C. N. Cotta, P. Servilius Q. F. Cn. N. Geminus, iterum uterque consules. Hi res in Sicilia fatis prospere gesserunt, circa tamen magnae aut victoriae, aut utilitatis gloriam. Coercuerunt sane Poenos Lilybaeum & Drepanum tenentes, ne tam aut frequenter, aut late auderent excurrere: &

§ XXIX. Polyb. 1, 52 & 55. Val. Max. 8, 1, 4. Fasti Capri. Plin. 7, 43. Dio A. 36. Zonar. Diol. § XXX. Diod.

quæ in locis a mari remotioribus præsidia habuerant, receperunt.†

XXXII. Adversus hos Carthalo cum multa conatus frustra esset, consilium Italicæ oræ vastandæ cepit : ut hoc tumultu consules a rebus Siculis distraheret ; aut si auxilio venire suis neglexissent, occasione temporum ad populandos agros, urbesque capiendas uteretur. Ceterum ne hic quidem fortuna cœptis adfuit. Missus enim ad prohibendos sociorum injurias cum urbano milite prætor, de successu consilii sui desperantem redire in Siciliam compulit. Ubi cum mercenarius miles seditionem excitasset, quod stipendia non solvebantur ; multos ex eo numero in desertis insulis exposuit, multos ad pœnam remisit Carthaginem. Quam rem ægre ferentibus reliquis, adeo sunt exasperati animi, ut manifesta defectio omnium, & ex eo novi belli materia timeretur. Sed in tempore Hamilcar, successor Carthaloni datus, advenit : tumultuantem noctu adortus, alios occidit, alios demersit mari : ceteros veniam petentes, in gratiam concordiamque recepit. Hic est ille Barcæ cognomento notus Hamilcar, quo meliorem ducem Carthago non habuit, futurus incomparabilis, nisi Hannibalem genuisset.

XXXIII. Ex eo tempore durius Romanis bellum fieri cœpit. Statim enim sedato mercenariorum motu, cum classe ad Italiam devastandam profectus Hamilcar, Locrensum & Bruttiorum agros late populatus est. At Romani, cum Hieronis Syracusani Regis in eos constans fides & magna exstarent merita, remisso tributo annuo, quod priori fœdere pepigerant, perpetuam cum eo societatem amicitiamque sanciverunt. Interim Hamilcar ex Italia reversus in finibus Panormitanis exscensione facta, inter Panorum & Erycem castris locum cepit natura munitissimum. Epiercte vocatur mons omni ex parte abruptus, qui ex circumfusa regione

§ XXXI. Cic. de Nat. Deor. 2, 3. Zonar. Liv. & Val. Antias ap. Gens. de die natal. c. 14. Aug. de civ. Dei 3, 18. Plin. 15, 1. Fasti Capitol. § XXXII. Diod. l. 23 & 24, ap. Vals. Orat. 4, 10, Polyb.

in magnam altitudinem se erigit, non tenui fastigio, sed spatium centum plus minus stadiorum complexo: quæ tota regio pecori alendo frugibusque ferendis aptissima est, ut quæ marinis flatibus opportune adversa, pestiferis animalibus omnibus vacat. Ibidem verruca quædam affurgit, quæ & arcis vicem, & speculæ in circumjectos campos obtinere queat.

XXXIV. Adjacet portus perquam aptus Drepano aut Lilybæo Italiam petituris, cum aqua dulci copiosa. Tribus omnino viis iste mons adiri potest: a terra duo sunt aditus, unus a mari, sed omnes impediti & perdifficiles. Hic castra locavit Hamilcar, audaci plane consilio, cum urbem sociam habens omnino nullam in medios hostes se demitteret: sed munitione loci suæque virtute & peritia rei militaris confusus, plurimum negotii Romanis exhibuit, Carthaginensiumque res valde confirmavit, quæ jam etiam domi satis prospere ire cœperant. Namque Pœnorum alius dux Hanno, cui cum Hamilcare virtutis erat æmulatio, gloriæ parandæ causa, simul ut militem citra sumtum civitatis ex hostico aleret, belloque exerceret, Libyæ parti, quæ circa Hecatonpylon est, arma intulerat; & urbe positus, obsidum tria millia Carthaginem deduxerat. Neque tamen usquequaque res eis lætæ eo tempore fuere. Quippe L. Cæcilio L. F. C. N. Metello secundum, Num. Fabio M. F. M. N. Buteone Coss. privatorum opibus parata classis Africam vastavit.

XXXV. Quanquam enim Senatus iterum abstinere mari decreverat, civibus tamen id postulantibus navigandi potestatem fecit: ea conditione, ut naves ex publico acceptas restituerent; prædam fervarent sibi. Sic facta classis non contemnenda, litoribus Africanis multum terroris damnique intulit: sed & Hipponem Regium, urbem non e vilissimis adorti, naves Hipponensium & ædificia multa igne consumerunt. Regressuri deinde, cum exitum portus catenis

§ XXXIII. Appian. ap. Urf. Polyb. Barclay. § XXXIV. Polyb. Diocl. l. 24.

clausum reperissent, ex magno periculo salutem sibi arte & consilio pepererunt. Incitatis enim navibus, cum proræ catenam prope jam contingerent, universi in puppes navium recesserunt: sic levatæ onere proræ catenas facile superarunt. hoc factō contulerunt se omnes in proras, hisque depressis effecerunt, ut puppes itidem supra catenas lapsæ, liberi cursus facultatem periclitantibus redderent. Sic ingenti metu liberati, paulo post apud Panormum cum Punicis navibus prosperam pugnam fecere.

XXXVI. Consules autem Romani, divisus belli muniis, L. Metellus Lilybæum, Num. Fabius Drepanum obsidebant. Adjacet Drepano Austrum versus insula, sive scopulus verius est, quem Peliadem insulam Græci, nos Columbariam appellamus. Hanc occiso præsidio Punico per suos milites noctu consul occupavit. Neque distulit Hamilcar, qui ad defendendum Drepanum accurrerat, orta luce ad locum recuperandum egredi. Quo animadverso consul, cum suis opem ferre non posset, tota vi Drepanum oppugnare instituit. Sic retracto Hamilcare, tenuit insulam, eaque deinceps ad obsessos acrius infestandos usus est. Jactis enim molibus continenti eam annexuit; & quoniam illa parte infirmiora urbis erant mœnia, operibus excitatis oppugnationem inde est orsus.

XXXVII. Sed pugnas Hamilcari cum his & sequentium annorum consulibus pugnatas, neque ob frequentiam posse describi, neque ob similitudinem casuum debere Polybius censuit: cum triennio fere continuo Epierctæ castra habens cum Romanis ducibus, maxime postquam illi castris ante Panormum locatis, vix quinque stadiorum intervallum inter se & hostem reliquissent, propemodum quotidiana prælia fecerit. neque enim aut quietæ res esse poterant, cum collata castris castra essent; neque rursus ad universæ dimicationis discrimen ventum est. multa enim prohibebant: præcipue quod pari copiarum firmitudine, locorumque

§ XXXV. Polyb. Diod. l. 24. Zonar. § XXXVI. Cluv. Sic. 2, 1. Zonar.

munitionibus, etiam qui in prælio inferiores fuerant, vici-  
nitate castrorum protegerentur. Ita fiebat, ut inter pu-  
gnandum semper aliqui caderent: acie semel inclinata, tu-  
lus ad munimenta receptus esset. Ceterum eodem anno, quo  
Drepana obsessa sunt, non Sicula modo, sed etiam Italica  
litora Carthaginiensium classes infestant. & ipse Hamil-  
car, deprædando quidquid adiri poterat, maritimam Italiæ  
oram ad Cumanos usque fines pervastavit.

XXXVIII. His incurſionibus, & Siculis pugnis cum multî  
Romanorum civium in servitute apud hostes essent, duces  
Romani cum Pœnis pacti sunt, ut captivi permutarentur:  
utra pars plures accepisset, argenti pondo bina & felibras  
in capita daret. Plures cum recepissent Pœni, quam red-  
didissent, pecuniam ex pacto pependerunt. Duas hoc anno  
colonias in Italia deductas invenio, Æsulum & Alſium.  
Lustrum item Romæ conditum duodequadragesimum, ab  
A. Atilio A. F. C. N. Calatino, A. Manlio T. F. T. N.  
Attico, censoribus. Censæ sunt civium capita ducenta quin-  
quaginta unum millia, ducenta viginti duo: cum superiore  
lustrò paulo minus trecenta millia censæ fuissent. tantam  
civium multitudinem eo tempore bellum & naufragia con-  
sumferunt. Nec ideo seignius suppleti exercitus Siculi, M.  
Otacilio C. F. M. N. Craſſo iterum, M. Fabio C. F. M. N.  
Licino consulibus deducuntibus.

XXXIX. Hi laboriosam quidem & exercitam militiam  
habuere; verumtamen, quia locorum, quæ præceperat, op-  
portunitatibus emovere Hamilcarem nequiverant, nihil me-  
moriam dignum gessere. quod sequentibus etiam aliquot Ro-  
manis consulibus accidit, ob idem incommodum: & quia  
repentini duces adversus perpetuum veteremque delecti,  
plus propemodum temporis in apparatus, & locorum  
situ, militum voluntate statuque belli cognoscendo con-  
sumere cogebantur, quam ad res gerendas superabat. Quo  
etiam consilio factum videtur illo anno, ut cum instaret

§ XXXVII. Zonar. Polyb. 1, 56. § XXXVIII. Zonar. Liv. 21,  
23. Ejud. Epir. 19. Veil. 1, 14. Fast. Capitol.

Comitiorum tempus, dictatorem potius dici placeret, quam consulum alterutrum ex Sicilia evocari. Dictus est Ti. Cornucanius Ti. F. Ti. N. comitiorum habendorum causa. is magistrum equitum M. Fulvium Q. F. M. N. Flaccum dixit. Interea duo tribuni plebis C. Fundanius & Ti. Sempronius Claudia, Appii Cæci filia, diem ad populum dixerunt, quod a ludis rediens, cum turba premeretur, in conferta multitudine ægre procedente carpento, vocem miserat impii voti, *utinam frater meus revivisceret, iterumque classem duceret!*

XL. Nulla fere nobilis Romæ domus erat, quin Claudiam gentem propinqua cognatione aut affinitate contineret. Itaque non deerant, qui ream tuerentur, *claritatem familiæ, patris Appii merita, fragilitatem sexus* obtendentes: *inaudatum esse, feminas ad iudicium populi vocari. neque satis gravem causam, cur a Clodia mos novus inciperet, quæ nullo aut consilio aut facto majestate populi Romani deminuta, tantum intra verba peccavisset.* Adversum quæ duo tribuni plebis ita disseruere: *Quam impiam, quamque detestabilem vocem Claudia jecerit, non ignoratis, Quirites. neque enim testimoniis opus est, confitente rea: neque etiam illa negare, si vellet, posset; quod palam in publico, non Jovem, cum sub dio hæc diceret, non multitudinem ipsam civium, quam incubabat, reverita, effudit.* Quorsum igitur, cum de crimine confici, de pœna dubitamus? *parumne diligenter legibus cautum est? an nos verba legum numerantes, mentem earum circumveniri patimur? Feminam hoc iudicio peti novum esse contendunt, esto: novum enim etiam est, feminam hoc pacto delinquere: necdum enim ullam tanta improbitate mulierem urbs nostra tulerit.*

XLI. Atque utinam ne nunc quidem novum exemplum statui opus esset! mallems profecto nullis delictis quietam ac veluti conditam legum aciem pati, quam adversus nocentes, utili quidem, sed tamen acerbo rigore distringere. Ceterum civitati stare volenti necessaria legum est custodia: quas utique minime deberent

§ XXXIX. Zonar. Agell. 10, 6. Suet. Tib. 1, 2. § XL. Val. Max. 8, 1. Liv. Epit. Sueton. L. 29 ff. de leg.

subvertere, qui Reipublicæ nostræ principes & columnina haberi volunt. Quos profecto juris omnis peritissimos latere non potest, cum pluribus in legibus nulla sit expressa mulierum mentio, verbo si quis, & similibus, non minus illum sexum, quam masculinum contineri. Quid igitur mirum, si leges, quæ de majestate latæ sunt, ad utrumvis sexum pertinere credimus, cum exemplo sit isthæc Claudia, ab utrovis in eas peccari posse? Sed elevant illi rem, parvumque videri delictum volunt, quod ultra verba non processisset. Hoc enim restabat, ut conatum, studium, facta conjungeret, cum Pœnis consilia sociaret, centuriaret homines, armaret servitia, occuparet Capitolium, & pestem, quam civibus verbo voverat, opere quoque ipso & manu inferret?

XLII. Atqui legibus profecto non facta magis, quam consilium & animus patrantis puniuntur. neque enim si quid furiosus aut infans nocuit, jure adversus eum prodita est actio: animi vero cujusque multis in causis non minus certa ex verbis, quam ex operibus, indicia petuntur. Quæ sic optat, quid faceret, si facere quod optet, in ejus manu esset? Quod si aliorum quoque hominum judicia non contemnimus (cur autem contemnamus?) etiam alibi pro scelere habitum vindicatumque est impium votum. Athenis, quæ Græciæ civitas præ ceteris sapientiæ laudibus clara habetur, damnatus est, qui magnum lucrum optaverat, cum necessaria funeribus curandis venderet, quod consequi posse non videbatur, nisi multi mortales interfissent. Et tamen illis in verbis locum habere poterat mitior interpretatio: hæc non ambigue neque perplexe, exitium civibus, cladem exercitui, calamitatem Reipublicæ optavit. Utinam frater meus revivisceret! votum improbum, etiamsi fratris causa sic optavisset.

XLIII. Cur enim illi reddenda vita esset, cujus opera tot civium millibus erepta est? qui Rempublicam non minus per superbiam despexit, quam per temeritatem afflixerat? qui prædamnatus omnium hominum sententiis, non infamiam ejus judicii, sed pœnam casu effugit? Hunc tu, si scaperes, optares reviviscere? cujus si memoriam eodem tumultu potuisset olruere, quo cineres teguntur, nihil antiquius habere debuisset. Quemadmo-



*dum enim fratrum egregiorum fama aliæ matronæ non inepte gloriantur: ita tibi hic pudori esset, si quidquam apud te pudoris remaneret. Sed ignoscamus feminæ nobili, si fratrem stulte fortassis, sed tamen pie desideravit. immo absolvite eam, si tam insolens ineptumque votum, quam causa optandi abominabilis fuit. Cur enim voluisti fratrem reviviscere? ut aspectus propinqui hominis te recrearet? ut opera ejus utilitati, auctoritas præsidio, honores ornamento essent? nihil horum. quid igitur? ut iterum classẽm duceret. Hoc enim erat, o scelestissimum caput, cur, quantum in te fuit, suscitare mortuos, naturam in ordinem cogere, inferorum refringere claustra cupivisti, ut reperires, per quem periremus.*

*XLIV. Hæc est, Quirites, cujus misereri vos jubent, qui, dum bonos se propinquos probant, vix satis cavent, ne mali cives habeantur. Et tamen intercedit nemo, quin ipsorum arbitratu misereamini, si cujusquam vestrum illa miserta est. Sin vero aliis interitum, aliis luctum & orbitatem, omnibus calamitatem, cladem, pestem imprecata est; tam inepta mansuetudine quisquam erit, ut animum tam hostilem, tam insensum, tam inhumanum ulla misericordia dignum existimet? Nuper cum lustro confecto civium numerum censores edidissent, qui gemitus hominum, quanta mœstitia fuit? quanquam multa prosperè per annos istos evenerant, vix tamen bonis viris satis salva videbatur Respublica, quæ minus nunc civium numeraret, quam superiore lustro habuisset. At hæc illorum jactura, qui periere, nihil movetur: hoc dolet, quod aliqui supersuerunt: nimiam Romæ turbam esse queritur; reviviscere optat eum ipsum, cujus maxime culpa superioris census rationes decrevere. Sed ipsa quidem mulier indigna est misericordia vestra: ceterum si quid peccavit, majoribus ejus & patri condonabitis!*

*XLV. Hoc igitur jus in civitate nostra statuemus, ut si quis patriæ quoquo modo profuisse dicatur, ejus posterì possint eandem illam patriam impune lædere? Minime profecto sic sensere majores nostri, qui M. Manlium de saxo dejecerunt, cum Capitolium, ultimam tum spem Romani generis, non pater ipsius aut avus aut progenitorum aliquis, sed ipse servavisset. Non*

debebat quidem adjunctæ Reipublicæ præmium uberius quærî, quam facti conscientia: sed tamen si qua bonam ei operam Ap. Claudius præstitit, mercedem abunde recepit, locupletatus opibus, satiat honoribus, quibus ad ultimam usque senectutem pervi-  
guit. Quanquam fortasse satius fuisset Appii & superiorum Clau-  
diorum mentionem prætermittere, quam admonere vos injuria-  
rum, quas domus illa ab extrema origine minime popularis,  
atroces vobis sæpe & acerbas intulit. Quem enim Appium vos  
meminisse volunt? aliumne, quam illum, qui semper commodis  
vestris inimico animo adversatus est; qui potius cum exercitu  
perire voluit, quam a plebejo consule, collega suo, servari; qui  
censuram ultra legitimum tempus gerere invitis ordinibus omni-  
bus perseveravit.

XLVI. Si jam placet, ulterius merita Claudiae gentis populo  
Romano exprobrent, & ad decemviralia usque tempora proce-  
dant; vel ad ultimam usque generis istius originem: reperient  
profecto potius, quomodo superbia & contumacia mulierem istam  
majoribus suis similem esse ostendant, quam ut illorum in gra-  
tiam huic parcendum esse demonstrant. Quid igitur causæ, cur  
hæc mulier impune peccare debeat, vel isti attulerunt, vel af-  
ferre quisquam potest? nisi forte metuitur, ne tam salutaris exem-  
pli feminam ex civitate nostra amittamus. Quod si vos etiam  
veremini, Quirites, retinete, retinete hanc Claudiam, ut, cum  
matronæ nostræ dubiis Reipublicæ temporibus ad pulvinaria deo-  
rum supplicatum ibunt, illarum pia vota contrariis votis hæc  
moretur: ut, cum illæ salutem militibus vestris; hæc exitium  
optet: illæ incolumes videre; hæc audire oppressos, concisos,  
crucidatos voveat: illæ sollicitent deos, ne multi in bello pereant;  
hæc incuset, si multi revertantur.

XLVII. Retinete mulierem, quæ, sicut aliæ matronæ claro-  
rum virorum æmulatione liberos propinquosque solent ad vir-  
tutem, ad amorem patriæ, ad caritatem civium incendere; suos  
exemplo P. Claudii pugnare temere, fugere turpiter, cives sce-  
leste perdere, Rempublicam contumeliose despicere doceat. hæc  
ab infantia meditanda proponat nobilibus pueris; hæc imitan-  
da adolescentibus; sic imbuantur, quibus classēs vestras, quibus

*exercitus commissuri essis.* Talia cum ultro citroque jactata essent, missus in suffragium populus damnavit ream, multaue ei dicta est æris gravis quinque & viginti millia. Ex hac aliaque mulctaticia pecunia Ti. Sempronius ædilis ædem libertatis in Aventino fecit, dedicavitque. M. deinde Fabius M. F. M. N. Buteo, C. Atilius A. F. A. N. Bulbus, consulatum iaeunt. Coloni tum deducti Fregellas, urbem Etruriæ maritimam, ad nonum lapidem ab Alfiō, colonia ante biennium deducta. Pugnatum his consulibus est navali prælio magno apud Æginurum, neutris læto exitu quippe magnum & hominum & navium numerum perdere Pœni; victrix Romanorum classis ex hoste parva ingentia spolia, vi tempestatum amisit.

XLVIII. In Sicilia pari & consilio & fortuna res gestæ, quam superiore anno tactum fuerat: difficili consulibus bello non magis ob asperitatem locorum, quam ob Hamilcaris ingenium: qui sicut in audaciam promptus, ita ad artes belli callidissimus erat. Quibus rebus illo tempore Romanos ita sustinuit, ut non modo loca, quæ ceperat, tutaretur; hostiumque socios in Sicilia Italiæque ora incurfaret; sed etiam in alia intentus, ruentem rem Punicam ubique fulciret, industrius idem, & cum animi firmitudine consilii ex tempore capiendi artifex. Itaque Lilybætanos, qui terra maxime premebantur, inopia & metu liberare cupiens, partem classis, ut Lilybæum petentem, in alto iussit obversari. cujus ad conspectum cum Romani evolassent, ipse cum navibus, quas ad hoc in loco, unde conspici nequiverant, occultas habuerat, portum occupavit, obsessosque præsentia sua & rerum necessariorum invecta copia, magnam in spem alacritatemque erexit.

XLIX. Cum ad hunc modum tempus in Sicilia bellando extraheretur, consules A. Manlius T. F. T. N. Torquatus Atticus, C. Sempronius Ti. F. Ti. N. Blæsus iterum,

§ XLVII. Agell. 10, 6. Liv. 24, 14, 17. Ejsd. Epit. 19. Fast. Capitol. Vell. 1, 14, S. Flor. 2, 2, 30. § XLVIII. Front. Strateg. 3, 10.

ad exercitus venerunt. Sub id tempus non tam commutata, quam magis adstricta ejus belli ratio est. Romani, uti paulo ante narravimus, supra Erycem urbem in summo monte præsidium collocaverant: aliud itidem infra urbem in radice montis, munitio præterea situsque loci, cum custodiæ tales accederent, facile efficiebant, ne quid ei urbi metuendum videretur. Sed audacia Hamilcaris, nihil homini impervium esse passa, quod aggredi libuisset, rem tantam brevissimo tempore perfecit. Ille enim noctu cum copiis appulsus, & ascensum stadiorum triginta silentio emensus, cum ipse ante agmen suorum princeps incederet, nec opinantes oppressit: majorique parte eorum, qui in urbe reperti fuerant, interfecta, ceteros Drepanum amandavit.

L. Ex eo tempore mira facies rerum & valde severa militia fuit. Nam Hamilcar inter duo præsidia hostium medius, ab inferiore obsidebatur, cum ipse vicissim superius obsideret. Romanique pariter Pœnique, toleratis laboribus & periculis incredibilibus, cum in tanta vicinia castrorum nulla non dies modo, sed ne hora quidem, aut discrimine prælii aut metu vacaret; fortissimorum virorum opera per proximum ferme biennium ediderunt: non fessicedentesque invicem, neque sua aut victoria aut clade diremti, sed ad extremum pares invictique, & navali interim pugna decreto bello. Iisdem consulibus Brundisium in agro Sallentino colonia deducta est, vicessimum post annum, quam in deditionem regiones istæ venerant. Sub idem tempus Ti. Coruncanio, qui primus ex plebe Pontificatum maximum gesserat, in extrema senectâ mortuo, L. Cæcilius Metellus in locum ejus factus est. Interea consulatus Romæ C. Fundanio C. F. Q. N. Fundulo, C. Sulpicio C. F. Ser. N. Gallo mandatur.

LI. Tum quoque pari forma & fortuna, ut hætenus, bellum cum Hamilcare gestum est: nisi quod Gallorum mercenaria manus, alique nonnulli, qui Pœnis militave-

§ XLIX. Fasti Capitol. Polyb. Diodor. § L. Vell. 1, 14, 8. Liv. Epit. 19. Pigh. Annal. ex Cic. Cat. majore.

rant, ob stipendia non soluta injuriasque alias, Erycinam urbem Romanis conati prodere (ibi enim præsidium agitabant) postquam consilium irritum fuit, ad consules transfugerunt: primique exterorum ab Romanis in commilitium adsciti sunt. Sic auctis viribus, tamen pedestri exercitu finem bello imponere non poterant, obliſtente cumprimis Hamilcaris audacia, qui neque decipi dolis, neque domari viribus patiebatur. Ergo denuo reditum est ad classis instaurandæ consilia, marisque repetundi. Nec enim aliter posse Carthaginienses prohiberi Sicilia, quam si maris usum perdidissent: spemque non vulgarem fecerant res superioribus annis privatorum ausu bene gestæ. Sed pecunia deerat, inani dudum ærario, & sumtus tam diuturni belli male sustinente. Tum vero Romani mores laboranti reipublicæ tempestivo auxilio subvenere.

LII. Quippe tanta fuit Senatorum eo tempore generositas, ut in publico discrimine privatis opibus puderet parcere, plusque statim pecuniæ reperiretur, quam ad impensam classis opus esset. nam ex ditissimis singuli, aliorum bini ternive, ut facultates erant, quinquagemam unam cum armamentis omnibus justoque remigio præstandam suscipiebant, ea lege, ut republica meliorem in statum reversa, sua cuique pecunia restitueretur. Hac cura consilioque quinquagemas ducentæ comparatæ sunt, quas ad exemplum navis, quæ Hannibalis Rhodii fuerat, fabricandas curaverunt. Magna inde expectatio fuit, certis hominum animis, quod ad extrema remedia ventum esset, hac classe de summa belli necessario decretum iri.

LIII. Dum hæc ita fiunt, consulatum C. Lutatius C. F. C. N. Catulus, A. Postumius A. F. L. N. Albinus, inivere. Flaminium Martiale A. Postumius habebat; eoque provinciam sortiri cupiente, L. Cæcilius Metellus pontifex maximus dicta multa prohibuit, negans fas esse flamini a sacris recedere. cujus facti posterioribus quoque temporibus probata ratio est. aliud in tuenda religione patria exem-

plum iisdem temporibus Senatus edidit, vetito C. Lutatio consule Prænestinas sortes consulere, peregrinisve auspiciis in administranda republica uti. Tum ad belli curam conversis animis, quia neque salvis religionibus ambo consules proficisci posse, neque unus tanto oneri suffecturus videbatur; alterum ex prætoribus, cum eo primum anno creati duo cœpissent, cum C. Lutatio proficisci placuit. ea provincia Q. Valerio Faltoni obvenit. Hi cum omnes & publicas & privatorum naves studiose collegissent, numero circiter trecentarum expleto, cum pontonibus aliisque navigiis septingentis, Siciliam, statim atque remisit hiems, petivere. Venientibus confestim Lilybætanus Drepanitanusque portus patuerunt. quippe hostes nulla suspitione classis ex Italia venturæ omnibus suis navibus in Africam regressi fuerant.

LIV. Hoc tam prospero rerum initio consul animatus, cum & suoapte ingenio impiger, & ad res gerendas incitatus esset, Drepana operibus factis obsedit: neque eo segnus ad prælium navale, quod instare prævidebat, classarios milites quotidie exercuit, eo successu, ut quos rudes fere maritimorum casuum adduxerat, ii satis jam ad quodlibet discrimen cruditi paratique viderentur. Inter hæc cum urbs Drepanitana terra marique oppugnaretur, jamque muri parte dejecta res Pœnorum in summo periculo esset, consul, dum inter primores strenue pugnam ciet, grave vulnus in femore accepit: ejusque periculo perterriti milites, & ad faucium concurrentes, locum jam pane captum omisere.

LV. Nondum usum pedis receperat, cum maxima Pœnorum classis adesse nuntiatur. Naves erant quadringentæ, repletæ commeatu, quem ad exercitum portabant, copiis præterea militum permagnis, armorumque & pecuniæ amplissimo numero. Summæ rerum Hanno præerat, nobilis

§ LIII. Liv. Epit. 19. Tacit. 3, 71, 5. Cic. Philipp. 11, 8. Val. Max. 1, 3, 1. Eutrop. 1. 2. Diodor. § LIV. Polyb. 2, 7. Zonara. Crof. 4, 10. Eutrop.

Pœnus. hic magno studio id agebat, ut Erycem appulsus, onere levatas naves, acceptis ab Hamilcare strenuis viris compleret, atque sic deinde cum Romana classe confingeret. Ceterum conceptum optime consilium C. Lutatii consulis circumspecta prudentia fregit. Is enim victoriam in eo consistere reputans, si cum classe gravi suisque apparatus impedita congregaretur, ante diem VII Idus Martias, assumpto in naves optimo quoque militum, Ægates insulas, contra Lilybæum jacentes, progressus, Hannonem ab Hieronneso venientem conspexit. Tum gubernatores militesque hortatus, pugnam in diem sequentem indixit.

LVI. Ceterum orta luce, rursus ambigua consultatio fuit: quod ventus hosti favens, Romanis adversus surrexerat. Quare jactatis utrinque momentis rationum, cum ventis & Hannone solo pugnare, classem onustam habente, satius visum; quam permittere, ut ille navibus onere levatis, florem pedestris militiæ, ipsumque adeo Hamilcarem, quo nihil eo tempore formidabilius habebatur, in certamen adduceret. Itaque conspectis hostium navibus, quæ pleno cursu iter suum prosequerantur, e portu progreditur, & quo suis animum adderet, ipse, licet uti pede non posset, in prætoriam se deportandum curat. Pœni quoque viam sibi interclusam cernentes, aciem instruunt, vi perrupturi. Sic utrinque signo dato acriter concurritur; per valetudinem C. Lutatii, quæ vicibus eum suis fungi prohibebat, omnia imperatoris munia obeunte Q. Valerio. Neque diu pugnatum est, quin appareret, utra ex parte futura esset victoria.

LVII. Quippe graves & propemodum immobiles Pœnorum naves arbitrio suo Romanæ levæ & expeditæ assultabant: ceteris etiam rebus omnibus longe superiores. quidquid enim hætenus infestum incommodumque fuerat, experientia docti mutaverant correxerantque: naves ad optimum exemplar fabricatæ: onera pugnae inutilia diligenter

§ LV. Flor. 2, 2, 34. Polyb. 1, 60. Liv. 22, 14, 15. Diodor.  
§ LVI. Eutrop. Val. Max. 2, 8, 2. Flor. & Polyb.

amota : remiges exercitati validique , robur legionum haudquaquam spernenda ad victoriam momenta adérant. Contra Pœnis gravia oneribus navigia , recens delecti remiges , & , ut in magna securitate , negligenter : neque enim Romanos mare retentaturos esse speraverant. Ergo , uti necessum erat , in tam impari certamine , non longa victoriæ mora fuit. Centum & viginti navibus amissis , quarum septuaginta cum ipsis hominibus ( millia ferme decem erant ) captæ sunt , ceteri percommode mutato inter pugnae tempus vento , Hieronnesum fuga evaserunt.

LVIII. Hæc est illa nobilis Pœnorum ad Ægates insulas clades , quemadmodum a Polybio maxime descripta est. nam alii scriptores captas naves tres & septuaginta , centum viginti quinque demersas , duo & triginta millia hominum capta , tredecim millia cæsa retulerunt. Præda fuit ingens , non in commeatu modo & armis , sed etiam auro argentoque. Ex Romana classe naves interiere duodecim. Ferunt ab initio pugnae conspectam in cælo supra Romanas naves facem , Punicae classi velut infesta cuspide minitantem , præfagium eventus mox consecuti fecisse. Hanno cum reliquis ex prælio navibus , præter eas , quæ Lilybæum evaserant , Carthaginem revector , pœnas infelicitatis suæ supplicio capitis luit. At C. Lutatius consul ad Lilybætanum exercitum profectus , donec percuratur vulnus , recensendis navibus hominibusque captivis , imperandoque quid de singulis fieri vellet , tempus impendit. Inde profectus ad Erycem cum Hamilcare prælium secundum fecit , duobus occisis Pœnorum millibus.

LIX. At Carthaginenses , cognita cladis suæ magnitudine , nondum quidem animi ad instaurandum bellum , sed jam vires & facultates deficiebant. neque enim Erycino exercitui subministrare necessaria poterant , mare tenentibus Romanis : neque si hunc amisissent , alium aut militem aut ducem habebant , cui auderent confidere. Hac neces-

§ LVII. Flor. Polyb. Diod. 1. 24. § LVIII. Eutrop. Oros. Zonar. Polyb.



ſtate ad deſperationem acti, miſerunt ad Hamilcarem, poteſtatem ei deferentes agendi, quidquid e Republica videretur. Neque ipſe, cum haſtenus optimi ducis officium feciſſet, deteriorem patriæ civem præſtitit. Libratis enim rationibus omnibus cum videret, omnia ſe expertum nullam amplius ad ſalutem civitatis ſuæ viam, niſi per pacem, reperire; legatos ea de re ad conſulem miſit. Neque huic ingrata accidit pacis mentio: exeunte enim jam magiſtratu ſuo, nullam ampliorem ſperare gloriam, quam finiti per ſe belli quavis ratione poterat: eam vero gloriam ad ſucceſſorem transmittere, cum ſui operis eſſe videretur, importunum inconfultumque judicabat. Movebatur etiam notis Romanæ rei anguſtiis, & poſt labores continuos tot annorum aliquando Rempublicam quiete refoveri oportere ſentiebat.

LX. Itaque conditionibus ultro citroque jaſtatis, convenit, *ut univerſa Sicilia Pœni excedrent: bellum cum Hierone, Syracuſaniſque & ſociis eorum ne gererent: captivos omnes ſine pretio conſeſtim redderent, itemque transfugas: argenti puri talenta Euboica bis mille & ducenta per annos viginti aquis penſionibus penderent: ſocii utriuſque populi ab utroque tuti forent: neutri in alterius ditione quidquam imperandi publiceve inædificandi, militiſve inde conducendi jus eſſet: neque alterius populi ſocios alter in amicitiam & ſocietatem admitteret.* Additum eſt, *hæc ita rata fore, ſi populus Romanus juiſſet.* At, ut arma, qui Erycem tenebant, traderent, quamquam a conſule poſtulatam fuerat, obtineri non potuit: cum Hamilcar prius & patriam & ſe oblaturum exitio diceret, quam tantam adiret ignominiam. Illam tamen conditionem, *ut in capita duodevicens denariis præſtitis, ab Eryce emitteretur,* accepit.

LXI. Miſſi deinde Romam & a conſule & a Pœnis legati, qui de pacis initæ legibus Senatū populūque Romanum edocerent. Non probavit pacem populus: ſed de-

§ LIX. Nepos Hamilc. 1, 3. Polyb. Zonar. § LX. Appian. ap. Urf. Polyb. Liv. 2, 41.

*cem legatos ad res inspiciendas mitti jussit : iisque reversis ins- tendit condiciones , ut mille talenta statim , deinde proximo decennio duo millia ducenta penderentur : ut præter Siciliam , omnibus insulis , quæ inter hanc & Italiam essent , excederetur : neve longis navibus in Italiam aut Romani juris insulas navigarent Pœni ; neque militem mercenarium ex iis conducerent. Carthaginienses , dum pace potirentur , nihil recusavere. Ham- ilcar statim deposito imperio , priusquam jurejurando pacta sancirentur , Lilybæum , atque inde Carthaginem trans- milit : cum & consiliis & armis ducum omnium , qui res eo bello gesserunt , haud dubie præstantissimum se exhibuisset. Hoc maxime modo & gestum & confectum est bellum illud Carthaginiense primum ; quod in quartum & vicesimum annum traxere varii casus , & atrocia utrinque damna , sed majora eorum , qui ad extremum vicerunt.*

LXII. Nam Punicas quidem quinquereemes circiter quin- gentas eo bello periisse tradunt , qui singularum cladium rationem inivere ; Romanarum ad septingentas. quo ma- xime argumento Romanæ constantiæ robur apparuit , quod nullis neque præliorum adversis , neque temporum casibus fractum , vim hostium , impetum fortunæ , tædium laboris , paupertatem ærarii pari patientia sustinuit vicitque. Post hæc ad res Siciliæ constituendas C. Lutatio Catulo , cujus annus jam exierat , prorogatum imperium est. ex novis consulibus eodem missus Q. Lutatius C. F. C. N. Cerco , Catuli frater , A. Manlii T. F. T. N. collega. Hi provin- ciam ordinarunt , quietamque reddiderunt , omnibus tur- barum causis , quæ ut ex tanto motu non paucae super- erant , abolitis resectisque. Nam & Siculis , qui cum Ha- milcare fenserant , & Gallis , qui ab eo desciverant , arma ademta : Galli navibus impositi , & extra populi Romani ditionem abire jussi ; quod præter alia facinora , cum in præsidio montis Erycis essent , templum Veneris spoliave- rant. Siciliæ vero urbibus tributa & portoria sunt imposita ,

pro facultatibus singularum : factaque provincia, quo prætor cum imperio annuo Roma mitteretur.

LXIII. Adfuere interea Romæ Pœnorum legati, petentes, *ut sibi captivos suos redimere liceret* : redditique sunt Senatusconsulto gratis, quotquot custodia publica attinebantur ; qui in privatorum manu essent, eos certa pecunia redimi placuit : cuius pars major jussu Senatus ex ærario soluta est. At Romani populi lætitiā valde imminuerunt graves in urbe casus. Jamprimum Tiberis amnis ultra solitum auctus, late stagnantibus aquis, omnia inferiora Urbis loca replevit. Multa tum ædificia primo allabentis impetu prostrata sunt : & quibus ista pestis pepercerat, ex his sensim fundamentis (per multos enim dies isthæc inundatio tenuit) recedente jam aqua vitium fecere. Secutum est hanc calamitatem gravius ex igne damnum, qui noctu temere ortus, multasque urbis regiones pervagatus, domorum hominumque incredibilem numerum hausit : neque privatis cladibus contentus, omnia in circuitu fori devastavit. Ad extremum ipsa quoque ædes Veltæ ardere cœpit.

LXIV. Tum vero L. Cæcilius Pontifex Maximus sacra populi Romani & arcana imperii pignora periclitari videns, dignum loco suo animum gessit. Nam in medios ignes intiliens, nulla sui cura, dum divinæ res salvæ essent, deserta a virginibus sacra ex incendio rapuit. Ipse brachio semiustulatus, & exusta flammis oculorum acie, præter solatium facti sui, præmium a populo Romano pulcherrimum accepit, ut quoties in Senatum iret, curru vereretur ad curiam : quod ab condita Urbe tributum nemini fuerat. Interea Q. Lutatius consul cum fratre Catullo, & Q. Valerio prætore, rebus in Sicilia constitutis, exercituque deportato, ad Urbem redierant : decretosque sibi triumphos navales C. Lutatius Catulus a. d. IV Nonas Octobres, Q. Valerius a. d. Prid. eandem Nonas,

§ LXII. Polyb. Appian. ap. Urf. Fasti Capitol. § LXIII. Euprop. l. 2. Jros. 4, 10. Aug. de Civ. Dei 3, 18. Val. Max. 4, 4.

duxerant. Memorabile certamen inter duces istos de triumpho Q. Valerii fuit.

LXV. Cum enim C. Lutatio haud dubie decretus triumphus esset, Q. Valerius haud leviozem in eo negotio suam operam fuisse contendens, honore quoque pari haberi postulabat, quemadmodum societate periculi curaque fuisset. Pugnat contra Catulus, ne minor potestas majori intribuendis honoribus æquaretur. Cum incaluisset certamen, sponsione Catulum provocavit Q. Valerius, *ni suo ductu Punica classis oppressa esset*; nec ille dubitavit restipulari. Delectus est arbiter Atilius Calatinus: qui interrogato Valerio, *utrum in-consultatione de pugna ineunda, si dissensissent, consulis an prætoris major futura fuisset auctoritas? itemque si diversa habuissent auspicia, utra potius sequenda fuissent?* cum utrobique majus consulis quam prætoris jus futurum, Q. Valerius respondisset; non expectato Catuli fermone, litem secundum illum dedit: quod controversia de imperio & auspicio inter eos fuisse videretur. Sed Q. Valerius, quamquam arbitri sententia victus, cum nota & oelebris eo bello virtus ejus fuisset, nihilo fecius triumphandi jus obtinuit.

LXVI. Censores eo anno C. Aurelius Cotta, M. Fabius Buteo, lustrum undequadragesimum fecere. Censa sunt civium millia ducenta sexaginta. duabus adjectis tribubus, Velina & Quirina, numerus quinque & triginta tribuum, quem deinde retinuerunt, expletus est. Cum jam perdomita Sicilia, qua Pœnorum fuerat, & pace cum Carthaginiensibus facta, non quieta modo omnia, sed etiam tuta viderentur; repentinum, unde minime timebatur, bellum paucis diebus & terrore motus intestini sollicitam, & admiratione celerrimi exitus stupentem Italiam habuit. Falisci, nescio quibus causis ad insaniam conciti, arma Romana provocare sustinuerunt. Sed missi cum legionibus consules, sextum intra diem confecere bellum, gente in po-

§ LXIV. Liv. Epit. 19. Dionys. 2, 67. Orosius. Plin. 7, 3. Triumph. Capitol. Val. Max. 4, 4. § LXV. Agell. 13, 14. Val. Max. 4, 4.

testatem populi Romani redacta. Priore tamen prælio (nam duo facta traduntur) ambiguum victoriam fecere, peditatu superiores, cum equestri prælio vincerentur.

LXVII. Sed posterius certamen, minime dubio Marte pugnatum, Faliscos ad pacem petendam compulit, cum suæ juventutis ad millia quindecim amisissent. Facta deditione armis, equis, supellectile, servitiis, & agri semisse mulctati sunt: urbs, cujus munitionibus confisi bellum cœperant, ex arduo & prærupto loco in planum translata. Severius in deditos consulturus populus Romanus fuerat, odio civitatis, quæ toties rebellaverat, acrem vindictam meditans; sed imperavit iræ, edoctus a Papirio (qui jussu consulum sua manu deditionis formulam scripserat) *Faliscos non potestati, sed fidei se Romanorum commisisse*. tantumque apud omnes sacrosanctum *fidei* nomen valuit, ut *hoc interposito nihil inclementius in victos statuendum esse* judicarent. Id bellum effecit, ut triumphis consulum annus iste clauderetur. Q. Lutatius a. d. Kalendas Martias de Faliscis triumphavit: a. d. IV Non. Mart. de iisdem A. Manlius.

§ LXVI. Pigh. Annal. Euseb. n. 772. Eutrop. l. 2. Liv. Epir. 20. Polyb. 1, 85. Zonar. § LXVII. Oros. 4, 11. Eutrop. l. 2. Val. Max. 6, 5, 1. Zonar. Fast. Capitol.

JOANNIS FREINSHEMII  
SUPPLEMENTORUM  
LIVIANORUM  
LIBER X.

IN LOCUM LIB. XX LIVIANI.

---

EPITOME

LIBRI VICESIMI.

*Spoletium colonia deducta est. Adversus Ligures tunc primum exercitus promotus est. Sardi & Corsi, cum rebellassent, subacti sunt. Tuccia virgo Vestalis incesti damnata est. Bellum Illyriis propter unum ex legatis, qui ad eos missi erant, occisum, indictum est: subactique in deditionem venerunt. Prætorum numerus ampliatus est, ut essent quatuor. Galli Transalpini, qui in Italiam irruerant, cæsi sunt. Eo bello populus Romanus sui Latiniq[ue] nominis CCC millia armatorum habuisse dicitur. Exercitibus Romanis tum primum trans Padum ductis, Galli Insubres, aliquot præliis fusi, in deditionem venerunt. M. Claudius Marcellus consul, occiso Insubrium Gallorum duce Viridomaro, opima spolia retulit. Istri subacti sunt, item Illyrii, cum rebellassent, domiti in deditionem venerunt. Lustrum a censoribus conditum est, quo censa sunt civium capita CCLXX millia, CCXIII. Libertini in quatuor tribus redacti sunt, cum antea dispersi per omnes fuissent, Esquilinam, Palatinam, Suburrnam, Collinam. C. Flaminius censor viam*

*Flaminiam munivit: & circum Flaminium exstruxit. Coloniae deductae in agro de Gallis capto, Placentia & Cremona.*

I. **P**ACATA rursus Italia, cum securitate & imperio etiam voluptates publicae crevere. I. Livius Andronicus scenae spectacula, quae hactenus ultra Satyram non processerant, Comœdiam Tragœdiamque Græcorum imitatus, ad fabulas transduxit, C. Claudio A. P. F. C. N. Cenchone, M. Sempronio C. F. M. N. Tuditano consulibus, cum ludî Romani celebrarentur. Idem annus alii quoque generi ludorum initium attulit. A. d. IV Kalendas Majas Floralia sunt instituta ex Sibyllinis libris, ad avertendam pestem frugum, aliorumque terra nascentium, quae illa parte anni florere solent. Ludos edidere L. & M. Publicii Malleoli fratres, iidemque ædiles plebis, ex pecunia mulctaticia, condemnatis pecuariis, qui in publico paverant. Magistratus horum fratrum alio quoque nomine celebris est, quod cli-vum, qui exinde Publicius vocatus est, sternendum locaverunt: quo commodius in Aventinum itei vehiculis esset, cum antea rupes ibi difficilis & aspera fuisset: quodque ædem Floræ, juxta Circum maximum, construxere.

II. Hæc domi acta. foris fere quietæ res fuerunt, nisi quod in Gallis & Liguribus consilia belli agitari suspicio tenuit. Has igitur provincias consulibus fuisse, jamque tum bellari cum Gallis utique cœpisse, conjecturæ potius, quam historiæ est, nullis, qui gesta ea satis accurate doceant, ex vetustate reliquis scriptoribus. id unum constat, in Umbria Spoletium Coloniam Latinam esse deductam. De proximo quoque anno proclivius est dicere, pacem non fuisse, quod Jani templum clausum non est, quam indicare, quibus in locis, quave fortuna bellatum sit. neque ulla ferme re notior est C. Mamillii Q. F. Q. N. Turini, Q. Valerii Q. F. P. N. Faltonis consulatus, quam quod anno eo natus est

§ I. Liv. 7, 2, 6. Agell. 17, 21. Cassiod. Chron. Vell. 1, 14. Plin. 18, 29. Ovid. Fast. l. 5.

Ennius, primus apud Romanos poeticarum elegantiarum conditor. Sed anno sequente, cum Ti. Sempronius Ti. F. Cn. N. Gracchus, P. Valerius Q. F. P. N. Falto, consules essent, & Gallica bella recruderunt, & novus hostis Ligures tum primum exercitu petiti sunt.

III. Ti. Sempronio hæc obvenit provincia. P. Valerius, Gallos aggressus, primum improspere pugnavit, amissis militum tribus millibus quingentis. Repetita pugna illustrem victoriam dedit, qua Gallorum millia quatuordecim cæsa sunt, duo millia capta. Sed ob prioris prælii detrimenta, negatus est consuli triumphus: præsertim cum etiam alioqui res bene gesta non tam ad rationem consiliumque consulis, quam ad fortunam publicam referenda videretur. Ille enim, audito post primum certamen auxilia sibi ab Urbe adduci, confirmavit, *se malle cum suis internecione deleri, quam aliena ope vincere*: atque hoc æstro instigatus, seque & exercitum populi Romani in discrimen dedit. Melior feliciorque Ti. Graccho in Liguribus administratio belli fuit. Profligatis enim prælio hostibus, magnam Liguriæ partem victor populatus est. Ex Liguria deinde transmisit in Sardiniam & Corsicam, magnaque inde captivorum multitudine reportata, locum proverbio dedit, quo *Sardi Venales* dicuntur, in fastidiosa rerum vilium copia.

IV. Ceterum, ut vera fateamur, occupandæ Sardiniae Corsicæque bona magis occasio temporibus istis, quam iusta causa adfuit. Carthaginenses, post pacem Siculam gravi bello cum mercenariis suis implicati, ad extrema pericula venerant. Unde sumtis animis conductitii eorum alii, qui per Sardiniam in præsidiis erant, Hostarem Pœnorum ducem cum suis interfecere: Hannonem alium ducem ad vindicandum facinus Carthagine missum, pertracto in societatem rebellionis exercitu ejus, comprehensum in crucem egerunt: totaque pallim insula Punici sanguinis hominibus in-

6 II. Var. de L. LL. 4. Ovid. Fast. 1. 5. Tacit. 2, 49, 2. Liv. Epit. 20. Fasti Capitol. 6 III. Oros. 4, 11. Zonar. S. Capito ap. Fest. voce, Sardi venales.



terentis, ipsi munita loca obtinuerunt: donec discordia inter ipsos & Sardos orta, pulsi ab his, in Italiam se recepere. Tum igitur perfecerunt, quod aliquanto prius, cum adhuc in Sardinia essent, nequiverant: nam eo quoque tempore Romanos ad insulæ dominium occupandum invitaverant. Sed præsentis sive precibus, sive occasione crescendo apertius demonstrata, ut in Sardiniam navigatio susciperetur, obtinere. Nec enim vulgatæ virtutis est, abstinere rebus alienis, quarum prompta sit possessio: neque hic animus apud cupidos & ambitiosos aut bene aut diu simulatur.

V. Sed hæc paulo supra repeti non alienum videtur. Nam Romani ut humanitatis laudem consequerentur, ab initio belli istius magno animo Carthaginiensium causam foverant. Et copias quidem auxiliares, uti petiverant Pœni, nullas misere: sed neque Uticenses, neque quemquam ad se deficientium receperunt: mercatores suos ex Italia & Sicilia res necessarias ad Carthaginienses deferre iusserunt, cum hostibus Carthaginiensis populi commercium vetuerunt: militis ex Italia, & in istud saltem bellum, conscribendi fecerunt potestatem. Missis quin etiam legatis bellum componere, quanquam irritò conatu, studuerunt. Et inciderat quidem paulo ante controversia, quod homines Italicos forum rerum venalium ad hostem deportantes capiebant Pœni, carceribusque publicis includebant.

VI. Jamque ad quingentos ejus generis habebant in vinculis; neque pauci dicebantur occisi, & ad tegendam latrocinii famam in mare præcipitati esse: cum Romani rem eam graviter ferentes, belli minas ostentare cœperunt. Sed Pœni legatis missis, qui omnes, quotquot detenti Carthagine fuerant, reducerent restituerentque, adeo placarunt populum Romanum, ut reliqui ex Siciliensi bello captivi Punici omnes sine pretio restituerentur. Sed postremo vicit ambitio, premendique populi studium, quocum per annos quatuor & viginti ancipiti fortuna pugnatum meminerant,

§ IV. Polyb. 1, 3 & 65. § V. Zonar. Nepos in Hamilc. Appian ap. Ursi. Polyb.

& nisi in tempore occurreretur, etiam postea pugnandum sibi prospiciebant. Quare cum Sardiniam inviti dimitterent Poeni, jamque bello contra mercenarios defuncti, arma defectionis auctoribus inferre meditantur, arrepta hæc a Romanis est occasio, *bellumque Pænis decretum, ni armis, quæ in speciem adversus rebelles suos, re autem vera contra Romanos fumsissent, abstineretur.* Ita Carthaginienſes alieno tempore bellum gravissimum fuscipere nolentes, non modo cessere Sardinia, sed etiam postulantiſus Romanis ad priorem summam adjecerunt argenti talenta mille ducen- ta: quæ maxime injuria ægros habuisse Carthaginienſium animos, neque ulla magis causa bellum mox Hannibali- cum exarſisse, creditur. Hamilcaris enim perpetuum adver- sus Romanos odium, cui bellum Punicum secundum non inepte imputatur, non aliunde aut stimulum acriorem, aut fomentum certius habuit. Ceterum hæc postea evenerunt.

VII. Tum vero novis consulibus L. Cornelio L. F. Ti. N. Lentulo Caudino, Q. Fulvio M. F. Q. N. Flacco, Galli Cispadani provincia data. Coloniam hoc anno deductam esse Valentiam, quanquam a quibusdam traditur, haud- quaquam constans opinio est: nisi alia Valentia præter Vi- bonem fuit, quam annis post quinquaginta L. Quintio Flaminio, Cn. Domitio Ænobarbo consulibus, colonis oc- cupatam esse certioribus auctoribus credam. Ceterum con- sulibus in agro Gallico, donec conjunctas legiones habuere, tuta & prospera expeditio fuit: postquam cupidine plura vastandi diviserunt exercitum, Q. Fulvii castra noctu op- pugnata, & ægre retenta sunt. Galli, re infecta digressi, paulo post graviore cum terrore auctisque majorem in mo- dum copiis ad bellum reverterunt. Bojorum enim duces, clanculum inter se consiliis agitata, ingentem Transalpi- norum manum ad societatem armorum contra Romanos exciverunt.

VIII. Interea L. Lentulus consul, qui ad Ligusticos fines

§ VI. Appian. Zonar. Polyb. 3, 28. Cornel. Nepos. § VII. Fast. Capitoli. Vell. 1, 14. Liv. 35, 40. Zonar.

exercitum abduxerat, cum Liguribus prospere collatis signis dimicavit. Decretus igitur ei triumphus est, quem duxit Idibus Intercalaribus. Auctores habeo, *illos primum consules Romana signa trans Padum fluvium promovisse, diversisque præliis Ligurum & Gallorum Insu brium interfecta millia quatuor & viginti, capta quinque fuisse.* Sed verius esse putem, tumultu Gallico, qui postea maximus secutus est, Padum transitum, Insu bresque in suis sedibus bello tentatos primum fuisse. Sub idem tempus ad Ptolemæum Ægypti regem legati missi *auxilium obtulerunt cum Antiocho & Syris bellanti.* gratias egit rex, ceterum *in præsentia sibi opus auxilio esse negavit, quod passionibus finitum jam bellum esset.*

IX. Lætus deinde Romanis adventus Hieronis fuit, Syracusarum regis. exceptus omnibus honoribus, sicut regem amicissimum, & bene meritum, & maximæ victoriæ socium oportuit; populo Romano ducenta millia modiorum tritici dono dedit. Venerat ad ludos spectandos, qui in sequentem annum apparabantur. Nam ludi Seculares tertii, secundum quosdam, P. Cornelio L. F. Ti. N. Lentulo Caudino, C. Licinio P. F. P. N. Varo, celebrati sunt: ut supra quoque retulimus. Magistri procurandorum ludorum M. Æmilius M. F. M. N. Livius M. F. M. N. Salinator creati. Bojorum interea principes, elati numerosis Transalpino-rum auxiliis, ad consules misere, petitum, *ut Ariminensis ager cum urbe, quæ haud ambigue Gallici juris essent, sibi restituerentur. ni fieret, bellum atrox & internecivum minabantur.*

X. Consules, qui nondum contractis copiis, neque ca-sui paucitatem suorum objicere audebant, neque postulata Gallorum concedere poterant, *si quid vellent, ad Senatum mittendos esse legatos,* responderunt. placuit conditio Gallis, & dum ire ac redire legati possent, utrinque dierum aliquot induciæ constitutæ. Et legati quidem Romam pro-

§ VIII. Polyb. 2, 21. Eutrop. l. 3. §. IX. Eutrop. l. 3. Fast. Capitol. Zenar.

fecti adverſum a Senatu reſponſum acceperere : ſimul majores contra hunc tumultum apparatus facti, quorum uſus poſtea non fuit, cum formidabile bellum ſine Romano ſanguine fortuna confeciſſet. Dum enim legati redeunt, Boji cum Tranſalpinis auxiliis acie dimicavere hiſ de cauſis. Ignara plebe Bojorum Tranſalpinus exercitus Ariminum proceſſerat. Inde ſuſpicionem ortæ, ne ad regionem iſtam ſibi retinendam veniſſent. tantumque conflatum eſt odiorum, ut Regibus ſuis Ate & Galato, tanquam ob prodicionem interfectis, advenarum copias agro ſuo depellere vi conarentur. Ita magna cæde pugnatum : & valde imminentis utrinque viribus, Tranſalpini domos rediere; Bojis adempta pars agri pacem a Romanis dedit.

XI. Hoc bello tam celeriter confecto, conſules in Liguriam abivere. Ibi P. Lentulus proſtigatis, qui occurrerant, hoſtibus, de cetero per illorum regionem exercitum circumducens, caſtella quædam armis, alia deditione recepit. C. Licinius in Corſicam tranſjecturus, cum ad univerſum exercitum una deportandum navigia deeſſent, M. Claudium Glyciam cum parte copiarum præmiſit. Qui vanitate vâcors, cum perterritos adventu ſuo Corſos viſiſſet, neque conſulis, cujus auſpiciis venerat, neque ſui juris aut loci memor, certis conditionibus fœdus cum Corſis ſuo nomine pepigit, tanquam in ſe tracturus inſulæ receptæ gloriam. At Varus cum exercitu reliquo ſupervenienti, fruſtra Claudianam pacem invocantes, armis urgere non deſiit, donec in poteſtatem redacti ſunt. Senatus ad liberandam perfidiæ nota Rempublicam, fœdæ pacis auctorem Corſis dedendum cenſuit. Deinde, quia receptus non erat, in publica cuſtodia necari juſſit.

XII. Cenſores iſ annus habuit L. Cornelium L. F. Ti. N. Lentulum Caudinum, Q. Lutatium C. F. C. N. Cerconem, qui luſtrum non condiderunt, Q. Cercone in magiſtrato mortuo. Quanquam M. Claudius deditus Corſis, dein-

§ X. Polyb. 2, 21. Zonar. § XI. Dio ap. Valeſ. Zonar. Marſep. 14, 40. Val. Max. 6, 3, 3.

de supplicio affectus fuerat, non ideo persuaderi barbaris potuit, iusto se postea bello petitos fuisse. Quare faucios eo dolore animos, vicinæ Sardiniae motus facile impulit, ut ad arma resumenda proflirent. Nam Sardos Pœnorum occulta promissa traxerant ad rebellionem cœptandam, proclivibus ad hoc barbaris, qui nec nimium odissent veteres dominos, nec amarent novos. Quæ Romæ audita metu & ira impleverunt urbem, non ob Sardiniam, quam tanti non faciebant, sed quia bellum Punicum videbatur renasci. Quod quia facilius futurum credebant, quanto citius inciperetur, invalidis adhuc a superiore bello Carthaginienſibus; quamprimum adornandum, inferendumque Pœnis decreverunt.

XIII. At Pœnos quidlibet potius eo tempore, quam bellum Romanum, pati certos, ea res nuntiata sic exterruit, ut legatis semel iterumque missis, postquam nihil mite responsum eſſet, decem ex principibus iisdem iterato mitterent, infimis precibus, *ut impetrata semel pace frui liceret*, obtestaturos. Ne sic quidem æqui quidquam obtineri potuit ab iratis & metuentibus: donec inter legatos atate minimus Hanno, adolescens intrepidus, & linguæ ut mentis liberæ, *Atqui*, inquit, *ſi vobis ſedet denegare pacem, Romani, quam non in unum aut alterum annum, ſed perpetuam a vobis emimus: at pretium ejus Siciliam & Sardiniam reducite. ne privatis quidem contractibus viri boni eſt, emtione reſciſſa, recipere mercem, non reſtituere pecuniam.* Tunc vero pudore commoti Romani, ne iniuste bellum inferre viderentur, meliore cum responſo legatos dimiſerunt. Sic alter conſulum ejus anni C. Atilius A. F. A. N. Bulbus, qui magistratum hunc iterum gerebat, in Italia manſit: T. Manlius T. F. T. N. Torquatus, cui Sardinia evenerat, profectus eſt.

XIV. Hic multis locis cum hoſte feliciter congreſſus, univerſam inſulam pacavit, Sardosque ſubegit: & de iis ante diem ſextum Idus Martias triumphavit. His rebus perfectis, cum nullo jam uſquam hoſte, Romana arma

quiescerent, insolitum bellatrici Urbi spectaculum, Jani ædes clausa est, quod indicium pacis, post Numæ tempora, per annos ferme quadringentos quadraginta, visum non fuerat. Quo nomine miseram fuisse civitatem Romanam arbitror, quod perpetuis conflictata laboribus, præmia laborum assequi non potuit. cum enim nemo sapiens bellum, nisi pacis ergo, gerat; hæc urbs tot maximis bellis prospere confectis, nec impetrare tamen pacem sæpe, nec retinere diu didicit. Nam tunc quoque, post menses non ita multos, novi terrores nuntiati, lætitiā otii vix adhuc animis perceptam cito discusserunt. Nam & Sardi recens subacti, jugum excutiebant: & Corforum erumpebant consilia: & in ipsa Italiā Ligures tumultum moverant.

XV. Ergo L. Postumio A. F. A. N. Albino, Sp. Carvilio Sp. F. C. N. Maximo consulibus negotium datum, ut exercitus conscriberent. quibus trifariam divisus, ut hostes ab ope mutuo ferenda distringerentur, L. Postumius Ligures adortus est; Sp. Carvilius Corfos; in Sardiniam P. Cornelius ivit. Hujus insulæ cælum insalubre, morbis & pestilentia tentavit exercitum: multique ex eo mortales cum ipso prætore absunt. Unde elatos animo Sardos consulis Sp. Carvili adventus ingenti prælio coercuit: Corfi quoque ab eodem sunt subacti. Ob eas res triumphus ipsi decretus est, quem a. d. Kalendas Apriles duxit. In Liguribus etiam ab altero consule & exercitu consulari res bene gestæ. At Romæ Tuccia virgo Vestalis incesti damnata, eo majore probro, quod consuetudinem stupri cum servo habuerat, sua se manu interemit. Censores deinde C. Atilius A. F. A. N. Bulbus, A. Postumius A. F. L. N. Albinus, lustrum quadragesimum fecere.

XVI. Hoc quoque lustro pauciores, quam superioribus, fuisse censos ( numerum enim non reperio traditum ) argumentum est, quod ad augendam hominibus civitatem cen-

§ XIV. Fast. Capitol. Zonar. Liv. 23, 34. Col. Capitol. Flor. 2, 3, 1. Vell. 2, 38, 3. Orosius. § XV. Zonar. Liv. Epit. 22. Col. Capitol. Marian. Scotus.

fores jurare singulos coegerunt, *uxorem se liberorum quærendorum gratia habituros*. Hoc anno Cn. Nævius Campanus, qui bello Punico stipendia fecerat, fabulas primum scenæ dedit. Interea Ligures & Sardi denuo rebellantes consuli-bus novis provinciæ decretæ. Q. Fabio Q. F. Q. N. Maximo Verrucoso Ligusticum bellum, M. Pomponio M. F. M. N. Mathoni Sardoum obvenit. Cum *horum motuum causæ penes Carthaginienses esse* diceretur, *qui barbaros ad defectionem secretis nuntiis allicerent*, legati missi sunt Carthaginem cum asperis mandatis, quo *stipendium* exigent, atque *insulis ad Romanos pertinentibus abstinere* juberent, *belli minis additis, ni imperata fecissent*.

XVII. Jam ex priori calamitate vires & animum receperant Pœni, Hamilcaris maxime industria non modo pacatis Africæ populis, qui a Carthaginiensibus desciverant, sed etiam latius promota ditio: magnoque jam in Hispania imperio per eundem ducem parto. Itaque tum ad cetera ferociter legatis responsum est, tum etiam, cum illi, quemadmodum in mandatis habebant, hastam caduceumque proposuissent, data Pœnis optione, *utrum mallent eligendi; neutrum se legere* succlamatum est, sed *utrum mallent ipsi legati relinquerent, æquo animo accepturis*. Inde flagrare denuo cœperunt inter duos populos odia, sed neutro bellum adhuc incipere volente, species amicitiae, magis quia non bellabatur, quam quod fida pax esset, interea tenuit. Ambo deinde consules ad Urbem reversi, cum de rebus a se gestis disseruissent, triumphum impetraverunt. Q. Fabius multos Ligurum in prælio occiderat, coegeratque reliquos in Alpēstribus locis se continere, tutumque ab illorum latrociniis vicinum Italiae latus reddiderat. Sic ante diem Kalendas Februarias triumphavit de Liguribus. Idibus deinde Martiis M. Pomponius triumphum duxit de Sardis, quos vicerat.

§ XVI. Agell. 4, 3 & 7, 21. Zonar. Fast. Capitol. § XVII. Diod. ap. Vales. Polyb. 2, 21. Nepos in Hamilc. Zonar. Plut. in Fabio 1, 3. Capit. Tabul. Auct. de Vir. ill. c. 43.

XVIII. Neque tamen destitit bello Sardi, sed irritati potius damnis suis, quam fracti, majori mole rebellionem instaurarunt. Ambo igitur consules M. Æmilius M. F. M. N. Lepidus, M. Publicius L. F. L. N. Malleolus in Sardiniam missi, magnam ex ea insula prædam coegere: quam deinde, cum in Corsicam transmisissent, ereptam a Corsis amiserunt. Domi quoque vehementer eo tempore turbatum: agrariam legem ferente tribuno plebis C. Flamini, *ut Picenus atque Gallicus ager, qui Senonum Gallorum fuerat, populo viritum divideretur.* Resistebat huic actioni Senatus, neque precibus apud tribunum, neque minis abstinens, postremo dato magistratibus negotio, ut exercitum conscriberent, quo Rempublicam tutarentur: neque dimoveri a sententia C. Flaminius potuit, adversum vim contumax, & precibus inexorabilis.

XIX. Monuerat eum pater quoque, *ut voluntati Senatus cederet, neque seditionis auctor audire vellet.* Sed ille persistens in sententia, vocata concione, recitare legem instituit. tum vero pater Flaminius dolore ardens accessit ad Rostra, correptumque manu filium detraxit. mirumque est exemplum editum sive pietatis, sive venerationis, qua tum homines jus patriæ potestatis prosequerantur. qui enim universi Senatus indignationem minasque atroces contemserat, in maximo calore perficiendi operis, inspectante plebe Romana, apud quam gratiosissima erat ferendæ legis mentio, unius senis manu de superiore loco detrahi passus est. Nec omittenda concionis in hoc negotio modestia: quæ licet habitu tribuni spes suas destitui videret, ne minimo quidem murmure factum illius improbavit. Dilata tamen hoc modo potius, quam evitata lex est, C. Carvilio tribuno plebis collegam adjuvante: quod quidem initium fuit, & corrupendæ plebis, & Gallici belli, quod octavo post divisionem agri Gallici anno, gravissimum exortum est.

§ XVIII. Zonar. Polyb. 6, 2, 21. Val. Max. 5, 4, 3. §. XIX. Cic. de Invent. 2, 17. Val. Max. Polyb. 2, 23.



XX. Tum vero M. Pomponius M. F. M. N. Matho, C. Papirius C. F. L. N. Maſo, cum magistratum inivissent, provincias M. Pomponius Sardiniam, C. Papirius Corſicam obtinuerunt. Utrobique ceſſit hoſtis, & in ſilvas montesque arduos refugiens, locorum potius, quam armorum, munitio- nibus ſe tutatus eſt. Ergo M. Pomponius, cum laborioſius eſſe videret invenire barbaros, quam vincere, canes ſaga- ces ex Italia curavit advehendos, quorum indicio homines more ferarum in cubilibus ſuis latentes deprehenderet. C. Papirius Corſos, campis pulſos, ad montana loca ſecutus eſt. Ibi labor ingens cum periculo fuit: multique militum ſiti, aut ſubito barbarorum incurſu periire: donec inven- tis aquis, reſectoque exercitu, Corſi de exitu rei timentes, conſuli ad deditio- nem hortanti paruerunt.

XXI. Dum his rebus gerundis attinentur conſules, co- mitia per dictatorem ad hoc creatum ſunt habita. C. Du- lius fuit M. F. M. N. is magiſtrum equitum dixit C. Au- relium L. F. C. N. Cottam. Cenſores etiam tum fuere T. Manlius T. F. T. N. Torquatus, Q. Fulvius M. F. Q. N. Flaccus: ſed vitio facti, abdicarunt. Novi moris originem huic anno ſcriptores aſſignant, non indignam quæ refe- ratur. Divortium ab Urbe condita nullum fuerat: primus Sp. Carvilius Ruga ſterilem uxorem dimiſit, jurejurando a cenſoribus obſtrictus, *ſe liberorum quærendorum cauſa con- jugem habiturum*. Diſplicuit populo non magis novitas, quam atrocitas rei, quod ad perpetuam vitæ ſocietatem junctas uxores, quacunque de cauſa repudiari lævum & iniquum putabat: & Sp. Carvilius ſemper deinceps odio habuit, quanquam neceſſitate coactus, de amicorum ſententia, uxorem bene convenientem morumque gratia cariſſimam di- miſerat. Ex eo tempore plus in jure nexuum, plus apud præ- torem litium fuit, tum primum cautionibus rei uxoriæ re- pertis, quarum, nullis antea divortiis, ſupervacanea fuerat calliditas.

§ XX. Faſti Capitol. Zonar. § XXI. Marm. Capitol. Plut. Numa c. 48. Agell. 4, 3 & 17, 21. Serr. Sulp. in l. de dot. ap. Agell.

XXII. Eodem anno alia quoque nova consuetudo in honoribus imperatorum cœpit. Sub finem consulatus sui C. Papirius de Corfis in monte Albano triumphavit, a. d. III Nonas Martias. Causa ejus consilii fuerat, quod ipse sibi res triumpho dignas gessisse videbatur, pacata tandem Corfica: neque ab Senatu honorem eum impetrabat. Idque deinceps exemplum multis ad imitationem placuit: ut negato sibi triumpho in Albano monte triumpharent. Spectavit deinde ludos myrto coronatus, delecta hac corona ob memoriam rei gestæ, quod in campis myrteis Corfos superaverat. Sardiniae Corsicæque motibus compositis, Ligures restabant, adversus quos missi consules M. Æmilius L. F. Q. N. Barbula, M. Junius D. F. D. N. Pera, inter proficiscendum comperto, Gallos rebus novis studere, fines illorum cum exercitu intraverunt.

XXIII. Irritatis enim lege Flaminia Gallorum animis, natus erat metus Romæ, ne quid molirentur homines lati bello, & ad iram præcipientes. quare nuper edictum fuerat a magistratibus, ne quis homini Gallo aurum vel argentum daret; Boji enim ceterique Galli, tum ex aliarum rerum, tum mancipiorum venditione ingentem pecuniam cgebant: inceseratque suspicio, ne ista ad bellum Romanum uterentur. Quare magis etiam incitati, cognito consulibus Ligusticum bellum esse decretum, occultis consiliis hoc agere dicebantur, ut exercitibus Romanis expeditione longinqua detentis, ipsi Urbem aggredierentur. Ceterum adventu consulum territi, cum ad vim faciendam imparati essent, Romanos in pacis amicitiaeque speciem simulatis obsequiis excepere. Consules quoque bellum oppressisse contenti, causam, cur eo venissent, finxere, *ut per Gallicum agrum commodius exercitum in Liguriam ducerent.*

XXIV. Superiore anno censores vitio facti abdicaverant. ita his demum consulibus Q. Fabius Q. F. Q. N. Maximus Verrucosus, M. Sempronius C. F. M. N. Tuditanus,

§ XXII. Col. Capitol. Val. Max. 3, 6. Plin. 15, 29, 12. Zonar. § XXIII. Polyb. 2, 8.

lustrum primum & quadragesimum condidere. Dum hæc in Italia & Urbe geruntur, novi cum Illyriis belli causæ talibus initiis exstiterunt. Illyrii, ferox & avidum prædæ genus, piraticam faciendo, multos Italicorum negotiatorum, Brundusino portu egressos, ceperant, nonnullos quoque trucidaverant: & primo quidem delatas ob ea querimonias Senatus inter alias curas negligentius auscultaverat: postremo tamen cum prædonum audacia impunitate cresceret, crebrioresque jam querelæ pervenirent, visum est legatos mitti ad res repetendas: simul ut Isthæorum, qui nuper in fidem Romanorum concesserant, causam tuerentur.

XXV. Hos enim Jonii maris insulam habitantes, quod a se defecerant, gravibus odiis damnisque Illyrii prosequabantur. Missi sunt C. & L. Coruncanii. Hi dum in itinere sunt, Illyriorum, qui Ardyæ vocantur, rex Agron Pleurati F. ad quem ibant, morbo decessit: filio adhuc impubere (cui nomen fuit Pinneus) relicto: regnumque noverca pueri Teuta, consiliis amicorum administrabat. Hæc impotens animi, & rebus prosperis elata, legatis Romanorum contemtim auditis, respondit, *curæ sibi futurum, ne Romani ab Illyriis publice læderentur: vetare vero, ne quis suorum privatim lucrum, quod posset, ex mari captaret, id Regibus Illyriorum nequaquam in more positum esse.* Non tenuit ad hæc iram minor Coruncanius, & intempestiva potius, quam injusta, libertate usus, *At Romanis, inquit, in more positum est, Teuta, privatim factas injurias publice exsequi, læsisque consulere. Conabimur autem, diis bene juvantibus, te ad instituta regia cupide & celeriter emendanda cogere.* Quibus verbis supra modum offensa mulier, sed animo interim utcunque dissimulato, legatis jam profectis latrones immisit, a quibus minor Coruncanius cum parte comitum interfectus est; ceteris in vincula coniectis, præfectisque navium igne combustis. Legatus etiam Isthæorum, *Calemporus* nomine, ab iisdem prædonibus occisus est. X

§ XXIV. Marm. Capitol. Dio ap. Urf. Polyb. 2, 13. & XXV. Ap-  
pian. Illyr. Polyb. 2, 8. Zonar. Flor. 2, 5. Plin. 34, 6. Liv. Epit. 26.

XXVI. *Is rebus Romæ cognitis, T. Coruncanio & P. Junio honoris causa tripedanæ statuæ in foro sunt positæ: Teutæ vero & Illyrii bellum indictum. Teuta rudis imperandi, & muliebris ingenii vitia neque ratione, neque usu domare docta, sicut ad irritanda odia præcipitem, sic ad toleranda timidam se gerebat. Itaque comperto, bellum adversus se parari, reddituram Romanis vivos pollicita est: interfectos reddere non posse, quos injussu suo prædones peremissent. Hæc legatio, quanquam pro magnitudine delicti parum satisficeret, tamen, quia spem præbebat, controversias Illyricas citra bellum componi posse, inhiberi vim placuit, petique ad pœnam eos, a quibus interfecti legati dicebantur. Mulier arma, quæ timuerat, differri videns, vicissim ex metu ad priorem insolentiam rapiente animi levitate, neque dedituram se quemquam dixit; & ut factis quoque ferociam ostenderet, quam verbis prætulerat, continuo copias ad Isthmum obsidendam misit.*

XXVII. Non ergo diutius cunctari visum, quin ambo consules (Lucius Postumius A. F. A. N. Albinus iterum, Cn. Fulvius Cn. F. Cn. N. Centumalus jam iniverant) cum navalibus pedestribusque copiis proficiscerentur. Cn. Fulvius classem ducebat navium ducentarum; L. Postumius legiones. Tum iterum territa Teuta Demetrium Pharium ad consules pacem petitem milit. Atqui illi pepigerunt inducias, si Corcyra, quam nuper occupaverant, Illyrii decederent. Profectis ad recipiendam Corcyram Romanis, tanquam longissime metus omnis abcessisset, ad priora consilia relabitur Teuta, præfectosque suos ad Dyrhachium & Apolloniam obsidendas mittit. Alii non voluntate Teutæ deditam Corcyram, sed Demetrii privato consilio tradunt, qui criminibus se apud Teutam peti gnarus, adversus illius iracundiam proditione præsidii, cui præerat, apud Romanos per fugium sibi quaesiverit. Præsidio Illyriorum tradito, Corcyrenses publico consilio Romanis se permiscere, nullam sibi reliquam salutis

viam esse rati, nisi potentia tam claræ civitatis adversus Illyriorum injurias protegerentur.

XXVIII. A Coreyra consul Apolloniam cum classe petiit: venitque eodem L. Postumius, qui Brundisio transjecerat, cum pedestribus copiis. peditum ad viginti millia erant, equitum duo. Romanos Apolloniatae cupide recepere, seque fidei illorum tradidere. Ab hac liberata statim ad Dyrrhachium itum. id quoque Romanorum exemplo factum, ad famam advenientis exercitus, dilapsis pavore Illyriis, qui obsidere urbem cœperant. Eodem impetu gens Ardyæorum ad deditionem coacta est: veneruntque ab ulteriore Illyrico legati variarum nationum, *imperata facturos suos polliciti, si in amicitiam recipiantur*: ex quibus Parthini fuerunt, & Atintanes. Plurimus ad hæc usus Demetrii Pharii fuit, qui a consulibus circumductus, robur & fidem Romanorum extollendo, Teutæque incusando temeritatem & inconstantiam, alios rationibus & consilio, alios auctoritate sua ad societatem Romanorum adducebat. Post hæc ad Isthmum cursus institutus: & inter navigandum multis locis exscensione facta, pleraque oppida levi negotio capta sunt. Nutria strenue ab Illyriis defensa est, multoque sanguine constitit victoria, tribunis etiam quibusdam, & quæstore desideratis. Cujus rei leviolem dolorem fecerunt lembi viginti, quos cum præda & pecunia ex Peleponneso venientes Romani exceperere.

XXIX. Jam ad Isthmum ventum erat. Ibi perinde, ut ad Dyrrhachium acciderat, adventu Romanæ clâssis obsidio soluta est, diversa in loca diffugientibus barbaris, præter Pharios, qui in gratiam Demetrii, quod ex eadem insula ortus, eique sub Agrone præfectus fuerat, corporibus rebusque salvis in fidem accepti sunt. Hæc audita instabilem Teutæ animum varie moverunt, alternantibus timoris & fiduciæ causis. Nam sicut amissa & deleta oppida, vastatæ maritimæ regiones, ubivis fugatæ Illyriorum copie, metum

6 XXVII. Fasti Capitol. Polyb. 2, 10 & 11. Dio ap. Fulv.  
 7 XXVIII. Appian. Zonar. Dio. Polyb.

ei maximum incusserant; ita vicissim spem dabat Nutrinorum audacia, & hibernum jam mare, cujus formidine rebatur Romanos cito repetituros domum esse. Itaque Rhizonem oppidum, cognomini fluvio impositum, cum paucis se contulit, exspectatura remedium, quod tempus offerret.

XXX. Alebant vanam opinionem acta consulum, qui pleraque parte regionum, quas occupaverant, Demetrio tradita, Dyrrhachium & classem & exercitum reducere. Sed postquam L. Postumius cum quadraginta navibus relictus, exercitum ex finitimarum urbium delectu fecit, Ardyæis, & qui præterea Illyriorum ad societatem Romanam accesserant, præsidio futurus; tum vero desperatis rebus suis Teuta de pace quibuslibet conditionibus redimenda cogitavit. Ideo sub initium veris legatione Romam missa, quæ præterita essent, tanquam Agronis imperio facta, excusavit, cujus facta tueri necessum sibi fuisset. Romani non illi, cujus ea propria potestas non esset, & quæ de Romanis nihil tale meruisset; verum Agronis filio Pinneo pacem dederant his legibus: *ut stipendia imperata penderet: Illyrico omni, paucis exceptis locis, decederet: neque ultra Lissum pluribus, quam binis lembis, & his inermibus, navigaret.*

XXXI. Coreyra, Pharus, Issa, Dyrrhachium & Atintanes hac pace Romanis cesserunt: cetera, quæ sub Agronis imperio fuerant, Pinneo relictæ. Teuta sive pudore & metu, sive jubentibus Romanis, administratione regni abiit, quam tutorio nomine suscepit Demetrius Pharius. Sic finita cum Illyriis contentione, finibusque imperii jam ad limites Græciæ promotis, ab alia parte parum secura Respublica erat: meditantibus bellum Gallis, & maximis in Hispania incrementis rei Punicæ, quam sine periculo Romanæ confirmari posse nemo credebat. Hasdrubal, gener & successor Hamilcaris, vindicata focii morte, multas præterea nationes partim armis, plerumque consilio & facundia, qua mire pollebat, Carthaginienfium imperio subdidit: etiam altera Car-

*thagine*, quæ *nova* appellata est, in sinu maris juxta portum amplissimum & satis commodum, condita. Sed propior a Gallis metus, durius aliquod contra Pœnos consilium inire vetuit. quod reliquum erat, fœderibus pactisque cursum fortunæ eorum sistere studuerunt. Legatis ergo Carthaginem missis, aliisque ad Hasdrubalem, pepigerunt, *ut trans Iberum amnem se continerent Pœni, Saguntinis suæ leges & libertas servaretur.*

XXXII. Hæc in annum inciderunt, quo Sp. Carvilius Sp. F. Cn. N. Maximus, Q. Fabius Q. F. Q. N. Maximus Verrucosus, uterque iterum, consules fuere. Sub idem tempus L. Postumius præconsule, qui in Illyrico hibernaverat, legatos ad Ætolorum Achæorumque populos Corcyra misit, ad exponendum rei gestæ ordinem, *quibus causis bellum istud susceptum, qua fortuna gestum, quibusque conditionibus finitum esset.* Comiter excepti, studioseque auditi sunt, quod eæ nationes ceterique Græci vehementer exosum habebant Illyriorum nomen, ob continua latrocinia, quæ sub Agrone Teutaque exercuerant. Hæc ubi domum nuntiata sunt, Senatus *rite atque ordine a præconsule facta esse censuit*, aliamque statim legationem decrevit, quæ publico nomine Corinthios & Athenienses adiret, *populique Romanæ studium erga Græcos, & æquitatem erga omnes* commendaret.

XXXIII. Ea res magnam in iis terris nomini Romano benevolentiam peperit, confestimque decreto Corinthiorum honor hic populo Romano est habitus, ut *Isthmiorum* (qui ludi inter quatuor celeberrimos sunt Græciæ) *participes haberentur.* Maxime movit eos, præter Apolloniam & alias Græci generis civitates, Corcyra libertati reddita, quæ colonia Corinthiorum fuerat. Athenienses quoque societatem Romanam amplexi, decreverunt, *ut Romanis jus civitatis Atticæ, initiorumque Eleusiniarum esset.* Interea Cn. Fulvius præconsule triumphum navalem ex Illyriis egit a. d. Kalendas Quinctiles: & principes Illyricos in triumpho ductos

§ XXXI. Dio. Zonar. Diodor. l. 25. Polyb. Liv. 21, 2 & 26, 42. Appian. Flor. 2, 6.

securi percussit. Hic primus de Illyriis triumphus fuit. Anno sequente P. Valerio L. F. M. N. Flacco, M. Atilio M. F. M. N. Regulo consulatum gerentibus, prætorum duplicatus est numerus: quaternosque creari visum, ut essent, qui in Siciliam Sardiniamque provincias cum imperio mitterentur. ex his M. Valerius Sardiniam, attributamque huic Corsicam, C. Flaminius Siciliam fortiti sunt. Ingens eo tempore fuit metus Gallici belli, de quo Boji Infubresque non inter se modo, sed etiam cum Transalpinis populis agitare, magnasque Gæfatarum Gallorum copias stipendio conduxisse ferebantur.

XXXIV. Ergo non solita modo remedia quæsitæ sunt, sed etiam iis rationibus malo, quod timebatur, occursum, quas apud severos iudices, præter amorem patriæ, & in ejus gratiam quandoque concessa, quæ alias negarentur, nihil excusaret. Cum enim præter alios ex diis hominibusque terrores, etiam in Sibyllinis libris repertum esset, *Gallos & Græcos Urbem Romanam occupaturos*, ad prædictionis ejus minas calliditate avertendas, M. Valerio M. F. M. N. Messalla, L. Apustio L. F. C. N. Fullone Coss. ex auctoritate Pontificum homines quatuor, Gallum & Gallam, similiterque Græcum & Græcam, in medio foro boario vivos defoderunt, ut ita quasi partem aliquam Urbis tenentes implevisse fata viderentur. Ceterum hic annus inter res alias non magnas, apparatu maxime Gallici belli, quod jam instabat, consumptus est. Descriptæ sunt ad id bellum equitum peditumque copiarum, incredibili numero, tota pro Romanis Italia consentiente. Q. Fabius historicus, qui rebus gerendis interfuit, *effecta fuisse* scribit *armatorum octingenta millia*.

XXXV. Romanorum quidem Campanorumque numero, peditum explente ducenta quadraginta octo millia ducentos; equitum viginti sex millia sexcentos. cetera multitudo

§ XXXIII. Zonar. App. Illyr. Thucyd. 7, 10. Tab. Capitol. Flor. 12, 5. Eutrop. l. 3. Liv. Epit. 20. L. 2. § 32. ff. de O. J. Solin. c. 11. Polyb. 2, 22. § XXXIV. Fasti Capitol. Oros. 4, 13. Eutrop. l. 3. Plin. 3, 20.



reliquorum Italiæ populorum fuit. Etiam Veneti ac Cenomani auxilia dederunt Romanis, hominum millia viginti, qui jussi sunt finitimos Bojos metu & damnis, ad patriam tuendam cogere, ne cum ceteris hostium copiis conjungi possent: quando a bellandi consilio legationis Romanæ studiis avocari nequiverant. Venetis enim & Cenomanis ad instaurandam cum populo Romano amicitiam persuasis, Insubres Bojique in hostili animo propositoque perfitere. Minutæ tamen vires eorum fuerunt, non ausis omnem armatorum multitudinem educere regibus, coactisque partem juventutis ad fines defendendos relinquere.

XXXVI. Ita reliquis cum copiis (peditum quinquaginta millia, equitum viginti numerabantur) iter per Etruriam tentare coeperunt. Intera L. Æmilius Q. F. Cn. N. Papus, C. Atilius M. F. M. N. consules Sardiniam & Ariminum cum vicina Gallia provincias obtinuerunt. Sardi enim gravati perpetuam Romani prætoris præsentiam, fascesque non ante conspectos, iterum tumultuati fuerant: sed hos C. Atilius consul haud magno negotio coercuit. Major moles L. Æmilio cum Gallis fuit: perrupta Etruria Romam tendentibus. Eos prætor, cui Etruria provincia decreta fuerat, cum arcere transitu nequivisset, circa Clusium confectus, præcipiti in occasum die, castra non procul ab hostilibus posuit. Galli, quo Romanos ad pugnam elicerent, meditato dolo, cum omni peditatu ad oppidum Fæfulas nocturno itinere perveniunt: relictis equitibus, quibus imperatum fuerat, ut orto die conspiciendos se tantum præberent hostibus, deinde statim ad pedites se referrent, castra ad recipiendum equitatum, hostesque ex improviso turbandos apto loco habituros.

XXXVII. Ea fraus Romanis imposuit, ut quasi fugientes avidè sequerentur. Ita circa Fæfulas a recentibus & paratis excepti sunt, fessi cursu, & consilio, ut in re nec opinata, destituti. Quod unum supererat, pugnando tueri

§ XXXV. Diod. l. 25. Oros. 4, 13. Polyb. 2, 22. Strabo l. 5.

§ XXXVI. Zonar. Polyb. 6, 2, 23 & 25.

salutem, aut vindicare sanguinem statuere. Sed præter alia numero quoque vincentibus Gallis, plures sex millibus in loco pugnae concisi sunt, ceteri fugerunt. Galli munitum quendam collem, quo pleraque fugientium turba concesserat, capere conati, postquam nocturno itinere diurnaque pugna vires exhaustas sensere, ad corpora curanda abiverunt: relicta parte equitum, quæ tumulum obsideret, postridie vi aut deditioe haud dubie in potestatem redigendum. In hoc articulo rerum L. Æmilius consul optabili potius, quam sperato, casu supervenit. Nam ad famam adventantium Gallorum Ariminum missus, defensurus Adriatici litoris oram, postquam Urbem audivit peti, magnis itineribus Arimino profectus, ad ea loca bona quadam fortuna pervenerat, & parvo ab hostibus intervallo castra metatus fuerat.

XXXVIII. Obfessi ex ignibus ab ea parte conspectis, id quod erat, Romanum exercitum venisse conjicientes, quosdam suorum miserunt sine armis, quo facilius hostium excubias fallerent. Ex his cognito rerum statu, consul, citra longiorem deliberationem, quam neque res, neque tempus ferebat, statim orta luce cum equitatu præcessit ad tumulum, tribunis militum cum legionario milite sequi jussis. Gallos jam iidem ignes admonuerant de adventu Romanorum, & ad consilium de præsentibus coegerant. Ibi rex Aneroestus suasit, *ne agmen locupletissima præda onustum objicerent hosti: sed domum digressi, deposita præda, si bellandum ultra videretur, expediti redirent.* Probato ab omnibus consilio ante noctem disceditur, itinere per Etruriam juxta litus maris instituto. L. Æmilius receptis, qui in tumulum confugerant, & Gallorum protectione cognita, cum his quidem collatis signis pugnare volebat: sed insequi tamen statuit, occasione, quam tempus obtulisset, usus.

XXXIX. In hoc articulo rerum rursus aliquid ex improviso molita fortuna est. Alter consul C. Atilius ex Sardinia cum legionibus Pisas appulerat, atque ibi militibus

expositis pedestri itinere petebat Romam, per eandem Etrusci maris oram incedens, qua Galli veniebant. Circa portum Etruriæ Telamonem primum obviam sibi facti sunt præcursores utriusque exercitus: captivisque nonnullis ad consulem adductis, ubi de itinere Gallorum, & insequentis eos collegæ instituto cognovit, miratus casum, & spe impulsus, quod medius inter duos consulares exercitus hostis teneretur, tribunis præcepit, *ut acie instructa, quantum locorum natura pateretur, quadratum agmen gradu militari ducerent*: ipse animadverso colle opportune itineri, qua venire Gallos necessum erat, imminente, ad præoccupandum eum cum equitatu contendit. Festinabat enim cum hoste quamprimum decernere, certus, si urgeretur, collegam venturum subsidio; & si inceptum successisset, potiorē bene gestæ rei laudem penes se futuram esse.

XL. Galli viso in superioribus locis hostium agmine, noctu circummissos ab L. Æmilio equites rati, suum & ipsi equitatum emittunt, adjuncta levis armaturæ parte, ad iter aperiendum. deinde captivorum indicio consulis alterius adventus cognitus, peditatum continuo instruere coegit anticipati acie, quæ ante & retro in hostem versa, interius oppositis invicem tergis cohæreret. Nam videbant a fronte C. Atilium instare, a tergo sequi L. Æmiliū noverant. Huic igitur ex Transalpino genere mercede conductos, qui ab armorum nomine Gæsatæ vocantur, opposuerunt in prima acie; post hos in subsidiis Insubres: at Taurisci Bojique adversus Atilianas copias locati sunt. effedis deinde carris, quæ cornu utrunque vallarunt: præda cum idoneo præsidio vicinum in collem seposita est. Jam pugnari ad tumulum ab C. Atilio occupatum cœperat, & ex eo conjiciebat, L. Æmilius adesse collegam, cujus de itinere nihil habebat compertum, præterquam quod appulisse Pisas audiverat.

XLI. Igitur ex tempore consilio capto, equites suos & ipse ad collem, ubi pugnabatur, jussit accurrere. Certatum

§ XXXIX. Clav. Ital. antiq. 2, 2. Polyb. 2, 26. § XL. Liv. 26, 6, 4. Oros. 4, 13. Polyb. 2, 2.

ibi est equestri prælio acerrimo, in quo & C. Atilius consul occisus est, ejusque caput ad reges Gallorum relatum. ad extremum tamen connisi totis viribus Romani, loco retento, hostem repulere. Decreta hunc ad modum equestri pugna, pedites concurrere. Ibi vero certamen vidisses cum numero atque robore virorum, tum ipsa dispositione acierum terribile: cum inter duos Romanos exercitus Gallorum intercepta multitudo, simul in utrosque obversa dimicaret, ambiguo judicio, plusne prodesset eis ista prælii forma, quod cum divisis hostium copiis pugnantes, terga sibi invicem tuta præstabant, etiam amissa spe fugæ ad fortitudinem stimulat; an vero noceret, quod inter duos consulares exercitus conclusi tenebantur. Ceterum Romanos partim aspectus virorum terrebat, qui eximia specie & magnitudine corporum, primis in ordinibus stabant; partim ad pugnandum incitabat, non modo laudis, sed etiam spoliis dulcedo; quod inter Gallorum antesignanos erat nemo, quin manicis armillisque aureis fulgeret.

XLII. Conserto igitur prælio, immissi primum velites maximam hostium edidere cædem, præsertim ubi Cæsaræ pugnant, qui per ferociam & barbaram ostentationem abjectis vestibus, nudî ante prima signa constiterant. Cum enim scurum Gallicum prælongum & angustum, non possit corpus obtegere, tanquam exposita jaculatoribus signa certis ictibus petebantur; cadebantque inulti, quod neque ferire hostem eminus poterant, neque conserta manu pugnari secum levis armatura patiebatur. Qua desperatione pars temere in hostem ruentes, priusquam ad manus venirent, missilibus confossi sternebantur: ceteri sensim referentes gradum, suorum perturbabant ordines. Ita Cæsarum acie per velites disjecta, gravis armaturæ miles Bojos Insu-bresque ac Tauriscos undiquaque adortus, multos interfecit.

XLIII. Stabant tamen obfirmatis animis, neque ulla re inferiores, nisi quod armorum genere vincebantur, neque ad muniendum corpus apte instructi, neque ad hostem per-

cutiendum. gladius enim Gallicus tantum ad rem cæsim gerendam accommodatus, mucronem idoneum non habet : præterea ad primum ictum incurvatur, sequentesque parum efficaces habet, nisi pede pressus iterum dirigatur. Eventum prælii, cum in meliore spe Romani essent, haud dubium fecit equitum reditus, qui Gallico equitatu in fugam compulso, ex colle decurrentes, in latus hostium impressionem fecerunt, tanto minus tolerabilem, quod ex superiore loco ingruerat. Hoc maxime modo cum Gallis in Etruria pugnatum Polybius tradidit : a quo parum probabiliter alii dissentiunt. quis enim temere credat, ita potius rem gestam esse, ut Gallos noctu orta tempestas fugere coegerit, tanquam deorum iram rimentes? postremosque eorum aggressus C. Atilius occubuerit? deinde post aliquot dies, cum interea suo quilibet in colle se continuisset, L. Æmilius cum exercitu Gallico prospere pugnaverit? Neque plus merentur fidei, qui pugnae locum ex litorali regione, in agrum Aretinum transtulerunt.

XLIV. Cecidisse tum Gallorum millia quadraginta non ambigitur. capta sunt haud minus millia decem cum uno regum Concolitano : alius Anercestus, qui plurimum opinionione virtutis & potentia valuerat, paucis comitantibus elapsus, in fuga necessarios suos seque ipsum secta gula interemit. Recepta est præda ingens, quam consul reddendam iis curavit, quibus ademta fuerat, suas unoquoque res agnoscentibus dominis. Inde cum suo & Atiliano exercitu juxta fines Ligurum in Boicum agrum profectus, ut operæ navatæ mercedem haberet miles, diripiendam ei regionem dedit; paucisque diebus satiata præda copias in Urbem reduxit : tanto majore omnium letitia, quanto acrior istius belli metus fuerat. Ergo vix cujusquam triumphus faventium vocibus tam celebratus est : insignis alioquin, & rerum gestarum gloria, & captivorum spoliisque prælatorum numero pretioque. X

§ XLIII. Polyb. 2, 30. Zonar. § XLIV. Orof. 4, 3. Eutrop. l. 3. Diodorus. Polyb. 2, 30 & 33. Zonar.

XLV. Multa inter hæc signa militaria fuere, plurimique torques aurei armillæque, virorum fortium apud Gallos ornamenta. Sed maxime adverterunt oculos hominum Britomarus, aliique principes Gallorum, quos L. Æmilius per ludibrium accinctos in Capitolium duxit, tanquam voti sui religionem servaturos, quod *non prius soluturos se baltea, quam Capitolium ascendissent*, juraverant. A. d. III Nonas Martias L. Æmilius consul de Gallis triumphavit. Eodem anno lustrum alterum atque quadragesimum conditum esse reperio, a censoribus Q. Claudio Ap. F. C. N. Centhone, M. Junio D. F. D. N. Pera. Depositus jam belli Gallici metus, nondum vindictæ cupiditas erat: ambobusque proximi anni consulibus ea provincia data. T. Manlius T. F. T. N. Torquatus, Q. Fulvius M. F. Q. N. Flaccus erant, uterque iterum. His exercitus, & quæ ad bellum instruendum gerendumque pertinebant, alacriter decreta. Spes enim erat, post tantam victoriam, toto circa Padum agro depelli Gallos posse, si nervi intenderentur.

XLVI. Consules cum copiis profecti primo statim terrore Bojos ad deditionem compulere: segnior deinde expeditio fuit, ob pestilentiam & continuos imbres. Alii tradunt, *hos consules Pado transito collatis signis vicisse Insubres, hominum occidisse tria & viginti millia, cepisse quinque*: sed nobis Polybii potior est in his rebus auctoritas. Interea quia consules e longinquis regionibus, sive rebus gerendis, sive tempestatibus impediti ad comitia occurrere non potuerant, ejus rei gratia dictator creatus est L. Cæcilius L. F. C. N. Metellus, isque N. Fabium M. F. M. N. Buteonem magistrum equitum dixit. Comitiis habitis consules facti sunt C. Flaminius C. F. L. N. P. Furius Sp. F. M. N. Philus. Hi, primi Romanorum, ut existimo, Padum transivere cum exercitu, qua fluvius Padusa Pado committitur, in regionem Insubrum irruptione facta. Multo labore neque nullo sanguine hæc audacia constitit: nam & in transitu flumi-

§ XLV. Flor. 2, 4, 2 & 3. Zonar. Fast. Triumph. Fasti Capitol. Polyb. 2, 32.

nis, & dum castra ponuntur, acriter incurrentes hostes Romanorum haud paucos occiderunt.

XLVII. Ex harum rerum nuntiis ortam sollicitudinem immensum auxere prodigia, quod in *Piceno flumen manasse sanguine*, in *Etruria cælum ardere visum*, *Arimini noctu luxisse*, *tresque lunas eodem tempore apparuisse*, nuntiabatur: & quod Romæ in foro vultus per dies complures federat. nam sub idem forte tempus Caria motu terræ concussa, & collapsus Rhodi colossus nihil tum ad rem Romanam pertinere credebantur. Ceterorum causa consulti augures, *consules vitio creatos videri*, responderunt, secutæque sunt Senatus ad eos literæ, quibus in Urbem revocabantur. Illi inter hæc per inducias Insubrum agro excesserant, deinde in Cenomanorum finibus sociorum adscitis auxiliis, iterum campos Alpibus subjacentes infestare cœperant; permotique ira Insubres, etiam aureis signis ex æde Minervæ depromptis, quæ *immobilia* vocabantur, quod nisi ob extremam necessitatem moveri fas non esset, cum exercitu quinquaginta milium occurrerant, acie dimicaturi.

XLVIII. Hoc ad tempus literæ Senatus venere. C. Flaminius sive conjectura earum argumentum affectus, sive literis amicorum præmonitus, collegæ persuasit, *ne ante pugnam commissam aperirentur*.—Sic obstinato ad dimicandum animo, de auxiliis Gallorum deliberabant, *ne forte neglecta causam nocendi haberent; adhibita, occasionem*. levitas enim gentis timebatur, præsertim adversus cognatum hostem suscipiendo prælio. tandem hoc consilium placuit. Gallos in ulteriorem ripam miserunt: deinde ruperunt pontes. Ita neque lædi ab iis Romanus poterat, & copia fugæ penitus ablata, omnia in virtute erat habiturus. Post acre prælium, victoria Romanis cessit; majori tribunorum laude, quam consulum. Nam C. Flaminius aciem ita ripæ fluminis ad-moverat, ut nihil ad receptum cohortium relinqueret spa-

§ XLVI. Polyb. Oros. 4, 13. Fast. Capitol. Liv. Epit. 20. Zonar. § XLVII. Polyb. 2, 32. Plut. Marcel. c. 4 & 40. Marianus. Oros. 4, 13.

tii: haud dubie totum exercitum perditurus, si urgentibus hostibus vel minimum recedere coactus fuisset. Tribuni vero, prioribus prœliis experti, Gallorum vim omnem in primo impetu esse, hunc acerrimum, sed brevem, si quis sustinisset, nihil postea metuendum habere; primis ordinibus hastas triariorum dividunt, quibus hostium excipiant ictus, deinde abjectis his gladium stringant.

XLIX. Ubi ventum ad certamen est, hastarum objectu Gallici gladii statim ad primum ictum hebetati curvatique sunt: quos donec dirigere student, suggestus stricto mucrone Romanus omnem armorum usum iis ademit. Nam & hoc habent enses Gallici, quia cœsim tantummodo iis pugnari potest, ut ad feriendum aliquantum requirant spatii, quod si quis abstulerit, omnino fiunt inutiles. Romani vero etiam punctim ferire ex minimo intervallo poterant, eoque modo ad corpus hostis appressi faciem ejus atque pectus impune cædebant. Interfecta dicuntur millia Gallorum novem: quasi duplum ejus numeri captum esse. Post victoriam ager hostium longe lateque vastatus est, multumque prædæ partum. Tum demum literas Senatus legi placuit: quibus cum pariturus P. Philus esset, C. Flaminus, *invidiam hanc patrum esse testatus, nullis auspiciorum vitiis, cujus rei nullum argumentum certius ipsa illa, quam obtinissent, victoria adduci posset*, negavit, *se nisi finito vel bello, vel magistratus tempore, decessurum esse*. Quin etiam addidit *effecturum, ut populus Romanus auguriorum aliarumque talium rerum inepta observatione falli desinat*.

L. Ceterum in sententia persistente P. Furio, Flaminianus exercitus, metuens, ut digresso illo fatis in hostili regione tutus esset, exoravit eum, ut per dies aliquot remaneret. nihil tamen rerum postea gerere voluit: C. Flaminio interim castella quædam, urbemque non incelebrem illis gentibus recipiente, concessaque militi præda ad instans cum Senatu certamen sibi conciliante animos. Tanta

§ XLVIII. Strab. l. 5. Liv. 21, 63. Zonar. Polyb. § XLIX. Orof. 4, 13. Plut. Marcel. c. 4. Zonar.



enim exorta fuerat in Urbe indignatio, ut redeuntibus consulibus neque obviam ex more iretur; triumphusque non C. Flaminio modo, sed in ejus odium etiam P. Philo negaretur. Ad extremum C. Flaminii magnus apud plebem favor vicit: isque triumphans Urbem ingressus est, a. d. VI Idus Martias. Multa in eo triumpho translata sunt spolia, magna vis armorum: torques itidem aurei permulti, ex quibus tropæum Jovi C. Flaminius in Capitolio posuit, inverso Gallorum voto, qui *de spoliis Romanorum Marti suo torquem* promiserant. Alter mox consul de Gallis & Liguribus triumphum egit a. d. IV Idus Martias.

LI. Sic magis accensa, quam victa, Senatus odia non quievere, donec consules statim secundum triumphum abdicare sunt coacti. Pari severitate sub idem fere tempus viri clarissimi duo sacerdotii honore caruerunt: M. Cornelius Cethegus extis non rite porrectis; Q. Sulpicius, quod inter sacrificandum apex ei de capite defluerat. Cum magistratu consules abivissent, comitia per interregem sunt habita, quibus consul factus M. Claudius M. F. M. N. Marcellus, qui magistratu inito collegam ascivit Cn. Corneliū L. F. L. N. Scipionem Calvum. Hi pacem petentibus Insubribus resistere, M. Marcello potissimum cupiditate provinciæ triumphique conditiones omnes aspernante: sed & ipsi Galli belli potius, quam otii, consilia tractare videbantur, cum de integro mercede conductæ Gæfatarum triginta millia superatis Alpibus longe majorem Insubrium multitudinem concivissent.

LII. Bello sic exorto, profecti primo vere consules, Accerras (oppidum est inter Padum & Alpes) circumfederunt. Cujus obsidione cum depellere Romanos difficile videretur; Britomarus, assumpta decem millium Gæfatarum manu, Circumpadanam regionem vastare instituit. quo comperto, consules ita inter se partiti sunt copias, ut Cn. Cornelius cum exercitu reliquo urgeret obsidionem; M. Marcellus duas

§ L. Liv. 22, 6, 3. Zonar. Plutarchus. Col. Capitol. Flor. 2, 4.  
4. § LI. Plutarchus. Val. Max. 1, 14. Polyb. 2, 34.

partes equitum & delectos ex levi armatura ducens, feciis succurreret. Delegit expeditissimum quemque, non ultra sexcentos: cum his & equitibus suis non die non nocte intermissio itinere contendit ad hostes. quos circa Clastidium adeptus, priusquam reficere suos quiete posset, adortus est, non voluntate sua, sed ferocia Gasatarum, qui numero potiores & equestris militiæ principatum sibi vindicantes, audito, paucos adduci pedites a consule, protinus ad obtinendum eum, ommissa Clastidii obsidione, proruperunt. M. Marcellus acie in longum porrecta, ne circumveniretur ab hostium multitudine, Gallis processit obviam: neque longe aberant invicem acies, cum jam impetum facere molientem equus clamore cantuque Gallorum exterritus abripuit, & retrorsum tulit.

LIII. Ibi consul, veritus, ne in omen tractus ille casus animum suis minueret, equum circumagendo Solem adoravit, tanquam ea de causa convertisset: ex veteri more, quo deos adoraturi se circumagebant. Ferunt, eum ante primum congressum *pulcherrima hostilium armorum Jovi Feretrio* vovisse, mox conspecto Britomaro, qui suorum agmen præcedebat arma ferens auro argentoque & coloribus eximie perornata, hæc judicavisse arma esse debere, quæ vovisset. Jam ipse quoque rex, viso Romanorum duce, provectus longe ante suos, voce & gestu eum ad pugnam provocabat. neque cunctatus M. Marcellus, perosso regis thorace, vulneravit eum hasta, & equi adacti impetu dejectum humi, semel iterumque repetitis ictibus occidit. Tum desiliens ex equo, manibusque arma tenens, suspexit in cœlum, *Jupiter*, inquit, *Feretri*, *qui fortium ducum in præliis facta præclara aspicias*, *en ego te teste tertius Romanorum, cæso hostium Imperatore Imperator, opima tibi spolia consecro. Tu vero ad reliqua etiam belli res nostras prospera fortuna pergere finito!*

LIV. Repetente post hæc locum M. Marcello, totis vi-

§ LII. Polyb. 2, 34. Plut. Zonar. § LIII. Front. Strat. 4, 5. Plutarch. Orof. 4, 13.

ribus configi cœptum, fortissime pugnantibus Romanis, quos consulis audacia & fortuna non minus ardore pugnandi, quam spe victoriæ impleverat. Itaque non eques Gallus, non pedes, quanquam & ille suis subsidio venerat, sustinere vim tantam potuit: raroque exemplo paucissimi de numerofo exercitu pulcherrimam victoriam retulere. Lectis deinde spoliis ad collegam revertit consul, qui Acerris occupatis, ubi magnam annonæ copiam reperit, circa Mediolanum caput Insubrium Gallorum adversus hostes ægre se tutabatur: nam illi validissimæ frequentissimæque urbis obsidione implicatum, vicissim quasi obsidebant. Sed adventu M. Marcelli cito commutatus est rerum status. Nam & Gæsatæ audito regis sine discesserunt: & ab his relictæ Mediolanenſes defendere urbem non potuere. Sic ingentibus Insubrum copiis cæsis, captaque Mediolano, & subinde Como, ceteræ deinceps urbes, & Insubrum tota natio, pecunia & agrorum parte mulctati, de cetero fatis æqua pace impetrata, in deditionem venerunt.

LV. M. Marcellus provincia confecta celeberrimum triumphum de Gallis Insubribus & Germanis duxit Kalendis Martiis. Hæc prima Germanorum in historia Romana mentio, qui ex transrhenanis gentibus mercede conducti Viridomaro duce in Italiam venerant. Ex his Gallisque captivi forma staturaque corporis ingenti, currum victoris inter spolia maximi pretii antecedeabant. Sequebatur ipse consul rarissimo spectaculo cæsi ducis arma Jovi Feretrio ferens, quem profecutus a tergo exercitus splendidis ornatus armis, militari acclamatione cantuque celebrabat. Hoc ordine cum ad ædem Feretrii perventum esset, descendens curru M. Marcellus, opima spolia post Romulum regem & A. Corneliū Cossū tertius, neque post illum alius suspendit. Hæc arma populus Romanus majori cum voluptate spectavit, quod Romanorum militum arma hostes Vulcano vovisse dicebantur: tantaque victoriæ ejus lætitia fuit, ut Senatus

§ LIV. Val. Max. 3, 2, 5. Zonar. Plut. Oros. 4, 13. Zof. Eutr. 1. 3.

populusque Romanus ex manubiis donum Apollini Delphico cratera aureum, & circum amicas sociasque civitates arma de spoliis Gallicis mitteret: ad Hieronem Syracusanum præter spolia, missum etiam frumenti pretium est, quo inter bella Gallica rem Romanam juverat.

LVI. Novi deinceps hostes Istri exorti, qui piratico scelere maria infestantes, Romanorum aliquot naves frumentarias diripuerant. Adversus hos ambo consules, P. Cornelius, M. Minucius Rufus missi, multos populos vi aut deditione subegerunt. Triumphatum tamen ab his non reperio, credo quia multo etiam Romano sanguine victoria confiterat. Hoc anno infaustum multis gentibus urbibusque sidus in Hispania exortum est Hasdrubalis successor Hannibal, de cujus initiis gestisque multa deinceps majori spiritu dicenda erunt. Interea novi consules L. Veturius, C. Lutatius cum exercitu ad Alpes progressi sunt. sed conditionibus magis, quam armis usi, multos eorum locorum populos voluntate ipsorum ad amicitiam Romanam adduxerunt. Bellum hoc tempore cum Illyriis instauratum est improbitate Demetrii Pharii, adversus quem sub amicitiae Romanae prætextu vicinas civitates arbitrio suo vexantem, omnibus ex partibus querelæ venerunt.

LVII. Nam fretus potentia, quam a Teuta deficienti Romani circumdederant, tutelaque regis Pinnei, cujus matrem Triteutam connubio sibi junxerat, regem & ipse se ferens, popularibus juxta, finitimisque gravis & intolerandus incumberebat. Et Illyrici quidem populos, Romanorum socios & amicos, suæ dominationi studebat subicere: Cycladas autem insulas, contra fœdus cum lembis armatis quinquaginta ultra Lissum provectus, alias depopulabatur, ab aliis extorquebat pecunias: jamque & Istrorum partem, quotquot a recenti bello Romanos oderant, & Atin-

§ LV. Oros. 4, 13. Marm. Capitol. Propert. 4, 10. Virg. Æneid. 6, 855. Flor. 2, 4, 5. Plut. Marcel. c. 11. Liv. 24, 21, 9. Diod. l. 25. § LVI. Oros. 4, 13. Eutrop. l. 3. Zonar. Liv. Epit. 20. App. Illyr. Dio ap. Vales.

tānes vi coactos in partes suas traxerat. Neque Romanos revere batur, quibus Gallico bello implicitis, deinde Punicum metuentibus, neque vires neque otium ad vindicandas sociorum injurias fore censebat: & a Philippo Macedonum rege quidlibet sperabat, quod bello Cleomenico dux Illyricorum auxiliorum Macedonicas opes adjuvisset. Igitur decretum adversus eum bellum est, apparatusque facti.

LVIII. Lustrum interea tertium & quadragesimum L. Æmilius, C. Flaminius censores condiderunt. Censa sunt civium capita ducenta septuaginta millia ducenta tredecim. Libertinorum promiscua multitudo per omnes tribus sparsa, multum hactenus turbarum dederat: eam imitatione Q. Fabii Maximi censores in quatuor tribus, Esquilinam, Palatinam, Suburranam, Collinamque redegerunt. C. Flaminius in eadem censura viam Ariminum usque munivit, & Circum exstruxit. utrique operi nomen ab auctore est impositum, Circusque Flaminius, & via Flaminia vocata. Idem censores legem Metiliam de fullonibus ad populum ferendam tradere: ne minorum quidem rerum curam tanti magistratus fastigium dedecere rati. Per idem tempus Illyriorum rebellio Senatum movit, ut M. Livio M. F. M. N. Salinatori, L. Æmilio M. F. Paulo consulibus provinciam illam mandaret.

LIX. Contra Demetrius bellum & ipse haud segniter comparare instituit, valido praesidio Dimalum missō, provisisque omnibus, quorum ad longam sustinendam obsidionem usus est. Quibusdam locis interficiendos curavit principes, de quorum fide dubitabat, aliisque sibi addictis regimen urbium tradidit. ex omni vero regno delectum robur, sex millia virorum, secum ad praesidium Phari retinuit. Dum haec aguntur, L. Paullus consul primo vere profectus, in Illyricum venit; intellectoque, magnam esse ho-

§ LVII. Just. 2, 1. Polyb. 3, 16. Appian. Illyr. § LVIII. Liv. 23, 32, 2 & 9, 46, 14. Cassiod. Festus voce Circus Flam. Plan. 35, 17.

fibus spem in munitionibus Dimali, quem locum inexpugnabilem putabant; ratus plurimum inde terroris oriturum, si hunc expugnasset, tanta sua militumque alacritate est aggressus, ut septimo quam oppugnare coëpta esset die, vi caperetur. Neque falsus fuit animo consul, sparsaque per vicinam regionem fama confestim ex omnibus urbibus oratores venire, se suaque omnia Romanis dedituri.

LX. Quibus in fidem receptis, Pharum insulam, ubi Demetrii regia erat, petiit. Quam ubi copiarum omni genere refertam, fortissimorumque virorum presidio, tum situ operibusque, ad hæc præsentia tyranni munitam esse didicisset; moram obsidionis veritus, astum excogitavit accelerandæ victoriæ non inutilem. Partem enim majorem exercitus, noctu trajectis copiis, in silvosis quibusdam callibus occuluit: ipse cum navibus viginti luce clara proximum urbi portum petens, elicit Pharios, inter quos ipse Demetrius ad prohibendam hostium exscensionem accucurrit. Conserto certamine, plures subinde, ut sit, suis auxilio venientes, ad extremum omni fere presidio militarium virorum urbem nudavere. Interea Romani, qui noctu exscenderant, itinere per tecta loca facto, collem inter oppidum portumque medio ferme spatio situm occupavere. quo facto iis, qui urbe fuerant egressi, reditus ad eam occludebatur.

LXI. Demetrius animadverso quid fieret, consilium cepit, ut in tam ancipiti periculo, non spernendum. Omisso enim præsentis certamine, revocatisque suis, *Viri fortes, inquit, apparet virtutem nostram hostibus formidabilem esse: nam ad dolos conversi fatentur se viribus armisque dissidere. Furto noctis usi hanc in terram irrepere, unde, si bene vos novi, retinebunt nihil, nisi quod corporibus tegent, anima entum. Vos modo, Pharii mei, vosque omni ex Illyrico delecta juvenus, vel patriæ, vel gloriæ vestræ memores, ostendite Romanis, neque suæ fortitudinis, neque nostræ imbecillitatis fuisse, quod semel de Illyriis Romæ triumphatum est. Non Fulvius eo tempore aut Postumius Illyrios consiliis & armis, sed impotentia, sed tene-*

ritate sua Teuta vicit. Neque ignoratis, ut de aliis taceam, non ita proclivem illis futuram fuisse victoriam, si me defensorum potius, quam inimicum, habere Teuta maluisset. Verum enimvero, & quia vobis præclare confido, & quia facta potius quam verba tempus postulat, abrumpo. Habetis animos, habetis arma, videtis necessitatem, quæ timidissimum quemque posset acueret, vobis pariter ubique discrimen extremum imminet, nisi virtute vestra discusseritis. Eamus igitur, & fortuna bene juvante istos e latibulis suis paulo ante progressos petamus, securi de his, qui exscensionem faciunt. nam illos si ceciderimus, hi majori cum studio naves repetent, quam reliquerunt.

LXII. Ita suos pro tempore cohortatus, instructis ordinibus ad eos invadendos, qui collem tenebant, ducit. qui & ipsi non segnius congressi sustinuerunt hostem, donec advenientes, qui exscensionem interea fecerant, & a tergo cum adorti, magno cum terrore detrimentoque disjecere. Paucos in oppidum retulit fuga: ceteri passim per invios calles dilapsi. Demetrius, qui solis quibusdam locis paratos lembos in omnem casum habebat, uno eorum consensu ad Philippum Macedoniæ regem profugit, cujus in amicitiam receptus, mores adolescentis antea laudatos adulatione & tyrannicis consiliis corrumpit, bellique Romani & multarum præterea calamitatum, suavor & auctor ei exstitit. Post hanc pugnam Pharus ex itinere capta, jussuque imperatoris direpta & diruta est. Illyrici deinde rebus ex sententia ordinatis, ad triumphum petendum, affecta jam ætate, consul Romam rediit.

LXIII. In hujus quoque belli narratione Polybium sequi malui, non ignarus, apud alios auctores ambobus consulibus ejus perfecti gloriam communiter tribui, qui evocatum ad se Demetrium, quia non parebat, aggressi primum in Ista insula, quibus dixi artibus vicerint; deinde Pharo proditione capta, Demetrium expulerint. de cujus fine quoque dissidentanea Polybio tradunt, istis & annis & locis proximo: quæ aliud in tempus egressa prætermitto.

Ceterum Illyriis in regis Pinnei gratiam, quem innocentem ætate & proposito fuisse constabat, pepercit Senatus, fœdusque cum eo, adjectis tamen conditionibus quibusdam, renovavit. Interea L. Æmilius consul splendidissimum de his populis triumphum duxit: sed & M. Livium ex eo bello triumphasse reperio. plures tamen scriptores hunc prætereunt: credo, quod majores L. Paulli res fuerunt, quibus collegæ famam gloriamque potuerit obscurare. sed nobilius ejusdem M. Livii paulo post judicium & condemnatio fuit. Per invidiam ipse ac L. Paullus accusati, quod prædam militibus non æqualiter divisissent, quodque ex ea multa avertissent, judicium populi subiverunt.

LXIV. L. Paullus ambustus vix evasit, M. Livium omnes tribus, excepta Mæcia, damnaverunt. Ique contumeliam istam tam indigne tulit, ut Urbe relicta, cœtus omnes fugeret, donec eum ad instituta vitæ prioris resumenda Republicæ tempora retraxere. Sed hæc in P. Cornelii Scipionis, Tib. Sempronii Longi consulatum inciderunt. Anno autem, quo M. Livius & L. Paullus adhuc consules erant, Archagathus quidam Lyfaniæ filius ex Peloponneso Romam venit, qui medicinam professus, jure Quiritium donatus est, eique taberna in compito Acilio emta publice. res ad memoriam minime celebris, nisi tum primum artis medicæ nomen auditum Romæ agnitumque esset, hætenus ad sanitatem tuendam sufficiente temperantia & inemtis remediis. Eisdem consulibus coloniæ deductæ sunt in agro Gallico Placentia & Cremona, non postrema causa irarum, quibus commoti Boji Insubresque respicere Hannibalem cœpere, qui tum Saguntinam urbem summis viribus oppugnans, per ruinas ejus iter ad Romana bella muniebat. sed hi ceterique motus, qui magno numero, neque minori mole, continuo ingruerunt, ab altiore paulo principio sunt repetendi.

§ LXIII. Zonar. Dio ap. Vales. Appian. Illyr. Polyb. 4, 66. Aust. de vir. ill. c. 50. Just. 29, 2. Front. Strat. 4, 1. § LXIV. Liv. 22, 35, 2 & 27, 36, 3. Plin. 29, 1. Liv. 21, 25, 2. Ejust. Epit. 29.



# TITI LIVII PATAVINI HISTORIARUM

AB URBE CONDITA

LIBER XXI.

---

EPI TOME

LIBRI VICESIMI PRIMUS.

In Italiam belli Punici secundi ortus narratur, & Hannibalis Pœnorum ducis contra foedus per Iberum amnem transitus, a quo Saguntum, sociorum populi Romani civitas, obsessa octavo mense capta est. De quibus injuriis missi legati ad Carthaginienses, qui quererentur. cum satisfacere nollent, bellum iis indictum est. Hannibal, superato Pyrenæo saltu, per Gallias, fufis Volcis, qui obsistere conati erant, ad Alpes venit; & laborioso per eas transitu (cum montanos quoque Gallos obvios aliquot præliis repulisset) descendit in Italiam, & ad Ticinum amnem Romanos equestri prælio fudit: in quo vulneratum P. Cornelium Scipionem protexit filius, qui Africanus postea nomen accepit. iterumque exercitu Romano ad flumen Trebiam fuso, Hannibal Apenninum quoque, per magnam militum vexationem propter vim tempestatum, transiit. Cn. Cornelius Scipio in Hispania contra Pœnos prospere pugnavit, duce hostium Magone capto.

I. **I**N parte operis mei licet mihi præfari, quod in principio summæ totius professi plerique sunt rerum scriptores, bellum maxime omnium memorabile, quæ unquam gesta sint, me scripturum; quod Hannibale duce Carthaginienses cum populo Romano gessere. Nam neque validiores opibus ullæ inter se civitates gentesque contulerunt arma, neque his ipsis tantum unquam virium aut roboris fuit: & haud ignotas belli artes inter se, sed expertas primo Punico conferebant bello. & adeo varia belli fortuna ancepsque Mars fuit, ut propius periculum fuerint, qui vicerunt. Odiis etiam prope maioribus certarunt, quam viribus: Romanis indignantibus, quod victoribus victi ultro inferrent arma; Pœnis, quod superbe avareque crederent imperitatum victis esse. Fama etiam est, Hannibalem annorum ferme novem, pueriliter blandientem patri Hamilcari, ut duceretur in Hispaniam, cum, perfecto Africo bello, exercitum eo trajecturus sacrificaret, altaribus admotum, tactis sacris jurejurando adauctum, se, cum primum posset, hostem fore populo Romano. Angebant ingentis spiritus virum Sicilia Sardiniaque amissæ: nam & Siciliam nimis celeri desperatione rerum concessam, & Sardiniam inter motum Africæ fraude Romanorum, stipendio etiam insuper imposito, interceptam.

II. His anxius curis ita se Africo bello, quod fuit sub recentem Romanam pacem, per quinque annos, ita deinde novem annis in Hispania augen-

do Punico imperio gessit, ut appareret, majus eum, quam quod gereret, agitare in animo bellum: &, si diutius vixisset, Hamilcare duce Pœnos arma Italiæ illaturos fuisse, quæ Hannibalis ductu intulerunt. Mors Hamilcaris peropportuna, & pueritia Hannibalis, distulerunt bellum. Medius Hasdrubal inter patrem & filium octo ferme annos imperium obtinuit: flore ætatis (uti ferunt) primo Hamilcari conciliatus; gener inde ob altam indolem provecto annis ascitus, &, quia gener erat, factionis Barcinæ opibus, quæ apud milites plebemque plus quam modicæ erant, haud fane voluntate principum, imperio potitus. Is plura consilio, quam vi, gerens, hospitiiis regulorum magis, conciliandisque per amicitiam principum novis gentibus, quam bello aut armis, rem Carthaginensem auxit. Ceterum nihilo ei pax tutior fuit. barbarus eum quidam palam, ob iram interfecti ab eo domini, obtruncavit; comprehensusque ab circumstantibus haud alio, quam si evasisset, vultu, tormentis quoque cum laceraretur, eo fuit habitu oris, ut, superante lætitia dolores, ridentis etiam speciem præbuerit. Cum hoc Hasdrubale, quia miræ artis in sollicitandis gentibus, imperioque jungendis suo fuerat, foedus renovaverat populus Romanus, ut finis utriusque imperii esset annis Iberus, Saguntinisque mediis inter imperia duorum populorum libertas fervaretur.

III. In Hasdrubalis locum haud dubia res fuit, quin prærogativam militarem, qua extemplo juvenis Hannibal in prætorium delatus, imperator-

que ingenti omnium clamore atque assensu appellatus erat, favor etiam plebis sequeretur. Hunc vixdum puberem Hasdrubal literis ad se arcessierat: actaque res etiam in senatu fuerat, Barcinis nitentibus, ut assuesceret militiæ Hannibal, atque in paternas succederet opes. Hanno, alterius factionis princeps, *Et æquum postulare videtur*, inquit, *Hasdrubal; & ego tamen non censeo, quod petit, tribuendum.* Cum admiratione tam ancipitis sententiæ in se omnes convertisset, *Florem ætatis*, inquit, *Hasdrubal, quem ipse patri Hannibalis fruendum præbuit, justo jure eum a filio repeti censet. nos tamen minime decet, juventutem nostram pro militari rudimento assuescere libidini prætorum. An hoc timemus, ne Hamilcaris filius nimis sero imperia immodica & regni paterni speciem videat? & ,cujus regis genero hereditarii sint relictî exercitus nostri, ejus filio parum mature serviamus? Ego, istum juvenem domi tenendum, sub legibus, sed magistratibus docendum vivere æquo jure cum ceteris, censeo: ne quandoque parvus hic ignis incendium ingens excuset.*

IV. Pauci, ac ferme optimus quisque, Hanno assentiebantur: sed (ut plerumque fit) major pars meliorem vicit. Missus Hannibal in Hispaniam primo statim adventu omnem exercitum in se convertit. Hamilcarem juvenem redditum sibi vereres milites credere; eundem vigorem in vultu, vimque in oculis, habitum oris, lineamentaue intueri. dein brevi effecit, ut pater in se minimum momentum ad favorem conciliandum esset. Nunquam ingenium idem ad res diversissimas, parendum at-

que imperandum, habilis fuit. itaque haud facile decerneres, utrum imperatori, an exercitui, carior esset: neque Hasdrubal alium quenquam præficere malle, ubi quid fortiter ac strenue agendum esset: neque milites alio duce plus confidere, aut audere. Plurimum audaciæ ad pericula capeffenda, plurimum consilii inter ipsa pericula erat. nullo labore aut corpus fatigari, aut animus vinci poterat. Caloris ac frigoris patientia par: cibi potionisque desiderio naturali, non voluptate, modus finitus: vigiliarum somnique nec die, nec nocte discriminata tempora. Id, quod gerendis rebus superesset, quieti datum: ea neque molli strato, neque silentio arcessita. Multi sæpe militari sagulo opertum, humi jacentem inter custodias stationesque militum, conspexerunt. Vestitus nihil inter aequales excellens: arma atque equi conspiciebantur. Equitum peditumque idem longe primus erat. princeps in prælium ibat; ultimus conferto prælio excedebat. Has tantas viri virtutes ingentia vitia æquabant; inhumana crudelitas, perfidia plus quam Punica, nihil veri, nihil sancti, nullus Deum metus, nullum jusjurandum, nulla religio. Cum hac indole virtutum atque vitiorum triennio sub Hasdrubale imperatore meruit, nulla re, quæ agenda videndaque magno futuro duci esset, prætermissa.

V. Ceterum ex quo die dux est declaratus, velut Italia ei provincia decreta, bellumque Romanum mandatum esset, nihil prolatandum ratus, ne se quoque, ut patrem Hamilcarem, deinde Hasdrubalem, cunctantem casus aliquis opprimeret, Sa:

guntinis inferre bellum statuit. quibus oppugnandis quia haud dubie Romana arma movebantur, in Olcadum fines prius (ultra Iberum ea gens in parte magis, quam in ditione Carthaginensium erat) induxit exercitum, ut non petisse Saguntinos, sed rerum serie, finitimis domitis gentibus, jungendoque, tractus ad id bellum videri posset. Cartejam, urbem opulentam, caput gentis ejus, expugnat diripitque. Quo metu percussæ minores civitates, stipendio imposito, imperium accipere. victor exercitus, opulentusque præda, Carthaginem novam in hiberna est deductus. Ibi large partiendo prædam, stipendio præterito cum fide exsolvendo, cunctis civium sociorumque animis in se firmatis, vere primo in Vaccæos promotum bellum. Hermandica & Arbocala urbes vi captæ. Arbocala & virtute & multitudine oppidanorum diu defensa. Ab Hermandica profugi exsulibus Olcadum, priore æstate domitæ gentis, cum se junxissent, concitant Carpetanos: adortique Hannibalem, regressum ex Vaccæis, haud procul Tago flumine agmen grave præda turbavere. Hannibal proelio abstinuit; castrisque super ripam positis, cum prima quies silentiumque ab hostibus fuit, amnem vado trajecit: valloque ita producto, ut locum ad transgrediendum hostes haberent, invadere eos transeuntes statuit. Equitibus præcepit, ut, cum ingressos aquam viderent, adorirentur. Peditum agmen in ripa, elephantos ante quadraginta disposuit. Carpetanorum cum appendicibus Olcadum Vaccæorumque centum millia fuere: invicta acies,

fi æquo dimicaretur campo. Itaque & ingenio feroces, & multitudine freti, & quod metu cessisse credebant hostem, id morari victoriam rati, quod interesset annis, clamore sublato, passim sine ullius imperio, qua cuique proximum est, in amnem ruunt. Et ex parte altera ripæ vis ingens equitum in flumen immissa, medioque alveo haudquaquam pari certamine concursus: quippe ubi pedes instabilis, ac vix vado fidens, vel ab inermi equite, equo temere acto, perverti posset; eques, corpore armisque liber, equo vel per medios gurgites stabili, cominus eminisque rem gereret. Pars magna flumine absumpta: quidam, vorticoso anni delati in hostes, ab elephantis obtriti sunt: postremi, quibus regressus in suam ripam tutior fuit, ex varia trepidatione cum in unum colligerentur, priusquam ex tanto pavore reciperent animos, Hannibal, agmine quadrato amnem ingressus, fugam ex ripa fecit: vastatisque agris, intra paucos dies Carpetanos quoque in deditionem accepit. Et jam omnia trans Iberum, præter Saguntinos, Carthaginensium erant.

VI. Cum Saguntinis bellum nondum erat: ceterum jam belli causa certamina cum finitimis ferebantur, maxime Turdetanis. quibus cum adesset idem, qui litis erat sator, nec certamen iuris, sed vim quaeri appareret; legati a Saguntinis Romam missi, auxilium ad bellum jam haud dubie imminens orantes. Consules tunc Romæ erant P. Cornelius Scipio & Ti. Sempronius Longus: qui cum, legatis in senatum introductis, de republica retulissent, placuissetque mitti legatos in Hispaniam

ad res fociorum infpiciendas ; quibus ſi videretur digna cauſa, & Hannibali denuntiarent, ut ab Saguntinis, fociis populi Romani, abſtineret, & Carthaginem in Africam trajicerent, ac fociorum populi Romani querimonias deferrent. Hac legatione decreta, necdum miſſa, omnium ſpe celerius Saguntum oppugnari allatum eſt. Tunc relata ex integro res ad ſenatum. Alii, provincias conſulibus Hiſpaniam atque Africam decernentes, terra marique rem gerendam cenſebant : alii totum in Hiſpaniam Hannibalemque intendebant bellum. Erant, qui non temere movendam rem tantam, exſpectandosque ex Hiſpania legatos cenſerent. Hæc ſententia, quæ tutiſſima videbatur, vicit : legatique eo maturius miſſi, P. Valerius Flaccus & Q. Bæbius Tamphilus, Saguntum ad Hannibalem, atque inde Carthaginem, ſi non abſiſteretur bello, ad ducem ipſum in poenam ſœderis rupto depoſcendum.

VII. Dum ea Romani parant conſultantque, jam Saguntum ſumma vi oppugnabatur. Civitas ea longe opulentiſſima ultra Iberum fuit, ſita paſſus mille ferme a mari. Oriundi à Zacyntho inſula dicuntur, mixtique etiam ab Ardea Rutulorum quidam generis. ceterum in tantas brevi creverant opes, ſeu maritimis, ſeu terreſtribus fructibus, ſeu multitudinis incremento, ſeu ſanctitate diſciplinæ, qua fidem ſocialem uſque ad perniciem ſuam coluerunt. Hannibal, infeſto exercitu ingreſſus fines, pervariſtis paſſim agris, urbem tripartito aggreditur. Angulus muri erat in planiorem patentioremque, quam cetera circa, vallem vergens. adverſus eum vineas



agere instituit, per quas aries mœnibus admoveri posset. Sed ut locus procul muro satis æquus agendis vineis fuit; ita haudquaquam prospere, postquam ad effectum operis ventum est, cœptis succedebat. & turris ingens imminebat: & murus, ut in suspecto loco, supra ceteræ modum altitudinis emunitus erat: & juvenus delecta, ubi plurimum periculi ac laboris ostendebatur, ibi vi majore consistebant. Ac primo missilibus submovere hostem, nec quidquam satis tutum munientibus pati. deinde jam non pro mœnibus modo atque turri tela micare, sed ad erumpendum etiam in stationes operaque hostium animus erat: quibus tumultuariis certaminibus haud ferme plures Saguntini cadebant, quam Pœni. Ut vero Hannibal ipse, dum murum incautius subit, adversum femur tragula graviter ictus cecidit; tanta circa fuga ac trepidatio fuit, ut non multum abesset, quin opera ac vineæ defererentur.

VIII. Obsidio deinde per paucos dies magis, quam oppugnatio, fuit, dum vulnus ducis curaretur. per quod tempus ut quies certaminum erat, ita ab apparatu operum ac munitionum nihil cessatum. Itaque acrius de integro obortum est bellum, pluribusque partibus, vix accipientibus quibusdam opera locis, vineæ cœptæ agi, admoverique aries. Abundabat multitudine hominum Pœnus: ad centum enim quinquaginta millia habuisse in armis satis creditur. Oppidani ad omnia tuenda atque obeunda multifariam distineri cœpti sunt: & non sufficiebant (jam enim feriebantur arietibus) muri,

quassatæque multæ partes erant. una continentibus ruinis nudaverat urbem: tres deinceps turres, quantumque inter eas muri erat, cum fragore ingenti prociderant: captumque oppidum ea ruina crediderant Pœni; qua, velut si pariter utrosque murus texisset, ita utrinque in pugnam procursum est. Nihil tumultuariæ pugnæ simile erat, quales in oppugnationibus urbium per occasionem partis alterius conferi solent: sed justæ acies, velut patienti campo, inter ruinas muri tectaque urbis modico distantia intervallo confiterant. hinc spes, hinc desperatio animos irritat: Pœno cepisse jam se urbem, si paululum annitatur, credente; Saguntinis pro nudata mœnibus patria corpora opponentibus, nec ullo pedem referente, ne in relictum a se locum hostem immitteret. Itaque quo acrius & conferti magis utrinque pugnabant, eo plures vulnerabantur, nullo inter arma corporaque vano intercidente telo. Falarica erat Saguntinis, missile telum hastili abiegno, & cetera tereti, præterquam ad extremum, unde ferrum exstabat. id, sicut in pilo, quadratum stuppa circumligabant, linebantque pice. Ferrum autem tres longum habebat pedes, ut cum armis transfigere corpus posset. Sed id maxime, etiamsi hæssisset in scuto, nec penetrasset in corpus, pavorem faciebat; quod, cum medium accensum mitteretur, conceptumque ipso motu multo majorem ignem ferret, arma omitti cogebat, nudumque militem ad insequentes ictus præbebat.

IX. Cum diu anceps fuisset certamen, & Sagun-

tinis, quia præter spem resisterent, crevisset animi; Pœnus, quia non vicisset, pro victo esset; clamorem repente oppidani tollunt, hostemque in ruinas muri expellunt; inde impeditum trepidantemque exturbant; postremo fusum fugatumque in castra redigunt. Interim ab Roma legatos venisse nuntiatum est. quibus obviam ad mare missi ab Hannibale, qui dicerent, nec tuto eos adituros inter tot tam efferatarum gentium arma: nec Hannibali, in tanto discrimine rerum, operæ esse legationes audire. Apparebat, non admissos protinus Carthaginem ituros. literas igitur nuntiosque ad principes factionis Barcinæ præmittit, ut præpararent suorum animos, ne quid pars altera gratificari pro Romanis posset.

X. Itaque, præterquam quod admissi auditique sunt, ea quoque vana atque irrita legatio fuit. Hanno unus adverso senatu causam foederis, magno silentio propter auctoritatem suam, non assensum audientium, egit. *Per Deos, foederum arbitros ac testes, monuisse, prædixisse se, ne Hamilcaris progeniem ad exercitum mitterent. non manes, non stirpem ejus conquiescere viri: nec unquam, donec sanguinis nominisque Barcini quisquam supersit, quietura Romana foedera. Juvenem flagrantem cupidine regni, viamque unam ad id cernentem, si ex bellis bella ferendo succinctus armis legionibusque vivat, velut materiam igni præbentes, ad exercitus misistis. aluistis ergo hoc incendium, quo nunc ardetis. Saguntum vestri circumfident exercitus, unde arcentur foedere: mox Carthaginem circumsidebunt Romanæ legiones, ducibus iis.*

dem Diis, per quos priore bello rupta fœdera sunt ultî.  
*Utrum hostem, an vos, an fortunam utriusque populi, ignoratis? Legatos, ab sociis & pro sociis venientes, bonus imperator vester in castra non admisit, jus gentium sustulit. hi tamen, unde ne hostium quidem legati arcentur, pulsî ad vos veniunt, res ex fœdere repetunt. publica fraus absit: auctorem culpæ & reum criminis deposcunt. Quo lenius agunt, segnius incipiunt; eo, cum cœperint, vereor, ne perseverantius sæviant. Ægates insulas Erycemque ante oculos proponite; quæ terra marique per quatuor & viginti annos passi suis. Nec puer hic dux erat, sed pater ipse Hamilcar, Mars alter, ut isti volunt. sed Tarento, id est, Italia, non abstinuimus ex fœdere: sicut nunc Sagunto non abstinemus. Vicerunt ergo Diî hominesque; &, id de quo verbis ambigebatur, uter populus fœdus rupisset, eventus belli, velut æquus iudex, unde jus stabat, ei victoriam dedit. Carthaginî nunc Hannibal vineas turreſque admovet: Carthaginis mœnia quatit ariete. Sagunti ruinæ (falsus utinam vates sim!) nostris capitibus incident: susceptumque cum Saguntinis bellum, habendum cum Romanis est. Dedemus ergo Hannibalem? dicet aliquis. Scio, meam levem esse in eo auctoritatem propter paternas inimicitias. Sed & Hamilcarem eo perisse lætatus sum, quod, si ille viveret, bellum jam cum Romanis haberemus; & hunc juvenem, tanquam furiam facemque hujus belli, odi ac detestor. Nec dedendum solum id piaculum ruptî fœderis; sed, si nemo deposcat, devehendum in ultimas maris terrarumque oras, ablegandumque eo, unde nec ad nos nomen fumæque ejus accedere, neque sollicitare quietæ civitatis sta-*

*tum possit. Ego ita censeo, legatos extemplo Romam mittendos, qui senatui satisfaciant: alios, qui Hannibali nuntient, ut exercitum ab Sagunto abducat, ipsumque Hannibalem ex fœdere Romanis dedant: tertiam legationem ad res Saguntinis reddendas decerno.*

XI. Cum Hanno perorasset, nemini omnium certare oratione cum eo necesse fuit; adeo prope omnis senatus Hannibalis erat: infestiusque locutum arguebant Hannonem, quam Flaccum Valerium, legatum Romanum. Responsum inde legatis Romanis est, *Bellum ortum ab Saguntinis, non ab Hannibale esse. populum Romanum injuste facere, si Saguntinos vetustissimæ Carthaginensium societati præponat.* Dum Romani tempus terunt legationibus mittendis, Hannibal, quia fessum militem præliis operibusque habebat, paucorum iis dierum quietem dedit, stationibus ad custodiam vinearum aliorumque operum dispositis. interim animos eorum nunc ira in hostes stimulando, nunc spe præmiorum accendit. Ut vero pro concione prædam captæ urbis edixit militum fore, adeo accensi omnes sunt, ut, si extemplo signum datum esset, nulla vi resisti videretur posse. Saguntini ut a præliis quietem habuerant, nec laceffentes, nec laceffiti per aliquot dies; ita non nocte, non die unquam cessaverant ab opere, ut novum murum ab ea parte, qua patefactum oppidum ruinis erat, reficerent. Inde oppugnatio eos aliquanto atrocior, quam ante, adorta est: nec, qua primum aut potissimum parte ferrent opem, (cum omnia variis clamoribus streperent) satis scire poterant. Ipse Hannibal, qua tur-

ris mobilis, omnia munimenta urbis superans altitudine, agebatur, hortator aderat. quæ cum admota, catapultis ballistisque per omnia tabulata dispositis, muros defensoribus nudasset; tum Hannibal, occasionem ratus, quingentos ferme Afros cum dolabris ad subruendum ab inio murum mittit. nec erat difficile opus, quod cæmenta non calce durata erant, sed interlita luto, structuræ antiquæ genere. Itaque latius, quam cæderetur, ruebat: perque patentia ruinis agmina armatorum in urbem vadebant. Locum quoque editum capiunt: collatisque eo catapultis ballistisque, ut castellum in ipsa urbe velut arcem imminemtem haberent, muro circumdant: & Saguntini murum interiorem ab nondum capta urbis parte ducunt. Utrinque summa vi & muniunt, & pugnant: sed, interiora tuendo, minorem in dies urbem Saguntini faciunt. Simul crescit inopia omnium longa obsidione, & minuitur expectatio externæ opis; cum tam procul Romani, unica spes, circa omnia hostium essent. Paulisper tamen affectos animos recreavit repentina profectio Hannibalis in Oretanos Carpetanosque. qui duo populi, delectus acerbitate consternati, retentis conquisitoribus, metum defectionis cum præbuissem, oppressi celeritate Hannibalis, omiserunt mota arma.✠

XII. Nec Sagunti oppugnatio segnior erat, Maharbale, Himilconis filio, (eum præfecerat Hannibal) ita impigre rem agente, ut ducem abesse nec cives, nec hostes sentirent. Is & prælia aliquot secunda fecit, & tribus arietibus aliquantulum

lum muri discussit; strataque omnia recentibus ruinis advenienti Hannibali ostendit. Itaque ad ipsam arcem extemplo ductus exercitus, atroxque prælium cum multorum utrinque cæde initum, & pars arcis capta est. Tentata deinde per duos est exigua pacis spes, Alconem Saguntinum, & Alorcum Hispanum. Alcon, inficiis Saguntinis, precibus aliquid moriturum ratus, cum ad Hannibalem noctu transisset, postquam nihil lacrimæ movebant, conditionesque tristes, ut ab irato victore, ferebantur, transfuga ex oratore factus, apud hostem mansit; moriturum affirmans, qui sub conditionibus his de pace ageret. Postulabatur autem, redderent res Turdetanis; traditoque omni auro atque argento, egressi urbe cum singulis vestimentis ibi habitarent, ubi Pœnus jussisset. Has pacis leges abnuente Alcone accepturos Saguntinos, Alorcus, vinci animos, ubi alia vincantur, affirmans, se pacis ejus interpretem fore pollicetur. Erat autem tum miles Hannibalis; ceterum publice Saguntinis amicus atque hospes. Tradito palam telo custodibus hostium, transfugæ munimenta, ad prætorem Saguntinum (& ipse ita jubeat) est deductus. quo cum extemplo concursus omnis generis hominum esset factus, submota cetera multitudine, senatus Alorco datus est. cujus talis oratio fuit:

XIII. *Si civis vester Alcon, sicut ad pacem petendam ad Hannibalem venit, ita pacis condiciones ab Hannibale ad vos retulisset, supervacaneum hoc mihi fuisset iter, quo nec orator Hannibalis, nec transfuga ad vos venissem. Cum ille, aut vestra, aut sua culpa,*

*manserit apud hostem, (si metum simulavit, sua; vestra, si periculum est apud vos vera referentibus) ego, ne ignorareis, esse aliquas & salutis & pacis vobis conditiones, pro vetusto hospitio; quod mihi vobiscum est, ad vos veni. Vestra autem causa me, nec ullius alterius, loqui, quæ loquor apud vos, vel ea fides sit, quod, neque dum vestris viribus restitistis, neque dum auxilia ab Romanis sperastis, pacis unquam apud vos mentionem feci. Postquam nec ab Romanis vobis ulla spes est, nec vestra jam aut arma vos, aut mœnia satis defendunt, pacem afferro ad vos magis necessariam, quam æquam. cujus ita aliqua spes est, si eam quemadmodum ut victor fert Hannibal, sic vos ut victi audiat: si non id, quod amittitur, in damno, (cum omnia victoris sint) sed, quidquid relinquitur, pro munere habituri estis. Urbem vobis, quam ex magna jam parte dirutam, captam fere totam habet, adimit, agros relinquit, locum assignaturus, in quo novum oppidum ædificetis: aurum argentumque omne, publicum privatumque, ad se jubet deferri: conjugum vestraque corpora ac liberorum vestrorum servat inviolata, si inermes cum binis vestimentis velitis ab Sagunto exire. Hæc, victor hostis imperat. Hæc, quanquam sint gravia atque acerba, fortuna vestra vobis suadet. Equidem haud despero, cum omnium potestas ei facta sit, aliquid ex his rebus remissurum. Sed vel hæc patienda censeo potius, quam trucidari corpora vestra, rapi trahique ante ora vestra conjuges ac liberos belli jure finatis.*

XIV. Ad hæc audienda cum, circumfusa paulatim multitudine, permixtum senatui esset populi concilium; repente primores, secessione facta,



(priusquam responsum daretur) argentum aurumque omne, ex publico privatoque in forum collatum, in ignem ad id raptim factum conjicientes, eodem plerique semet ipsi præcipitaverunt. Cum ex eo pavor ac trepidatio totam urbem pervasisset, alius insuper tumultus ex arce auditur. Turris diu quassata prociderat: perque ruinam ejus cohors Pœnorum impetu facto cum signum imperatori dedisset, nudatam stationibus custodiisque solitis hostium esse urbem; non cunctandum in tali occasione ratus Hannibal, totis viribus aggressus urbem, momento cepit, signo dato, ut omnes puberes interficerentur. quod imperium crudele, ceterum prope necessarium cognitum ipso eventu est. Cui enim parci potuit ex iis, qui aut inclusi cum conjugibus ac liberis domos super se ipsos concremaverunt, aut armati nullum ante finem pugnae, quam morientes, fecerunt?

XV. Captum oppidum est cum ingenti præda. Quanquam pleraque ab dominis de industria corrupta erant, & in cædibus vix ullum discrimen ætatis ira fecerat, & captivi militum præda fuerant; tamen & ex pretio rerum venditarum aliquantum pecuniæ redactum esse constat, & multam pretiosam supellectilem vestemque missam Carthaginem. Octavo mense, quam coeptum oppugnari, captum Saguntum, quidam scripsere: inde Carthaginem novam in hiberna Hannibalem concessisse: quinto deinde mense, quam ab Carthagine profectus sit, in Italiam pervenisse. Quæ si ita sunt, fieri non potuit, ut P. Cornelius, Ti. Sempronius

consules fuerint, ad quos & principio oppugnationis legati Saguntini missi sint, & qui in suo magistratu cum Hannibale, alter ad Ticinum amnem, ambo aliquanto post ad Trebiam, pugnaverint. Aut omnia breviora aliquanto fuere: aut Saguntum principio anni, quo P. Cornelius, Ti. Sempronius consules fuerunt, non coeptum oppugnari est, sed captum. Nam excessisse pugna ad Trebiam in annum Cn. Servilii & C. Flaminii non potest: quia Flaminius Arimini consulatum iniit, creatus ab Ti. Sempronio consule; qui, post pugnam ad Trebiam ad creandos consules Romam cum venisset, comitiis perfectis ad exercitum in hiberna rediit.

XVI. Sub idem fere tempus & legati, qui redierant a Carthagine, Romam retulerunt, omnia hostilia esse, & Sagunti excidium nuntiatum est: tantusque simul moeror Patres, misericordiaque sociorum peremtorum indigne, & pudor non lati auxilii, & ira in Carthaginenses, metusque de summa rerum cepit, velut si jam ad portas hostis esset; ut, tot uno tempore motibus animi turbati, trepidarent magis, quam consulerent. Nam neque hostem acriorem bellicosioresque secum congressum; nec rem Romanam tam desidem unquam fuisse atque imbellem. Sardos, Corsosque, & Istros, atque Illyrios, laceffisse magis, quam exercuisse, Romana arma: & cum Gallis tumultuatum verius, quam belligeratum. Poenum, hostem veteranum, trium & viginti annorum militia durissima inter Hispanas gentes semper victorem, primum Hamilcare, deinde Hasdrubale, nunc Hannibale duce acerr-

mo affuetum, recentem ab excidio opulentissimæ urbis, Iberum transire: trahere secum tot excitos Hispanorum populos: conciturnas avidas semper armorum Gallicas gentes. cum orbe terrarum bellum gerendum in Italia, ac pro mœnibus Romanis esse.

XVII. Nominatæ jam antea consulibus provinciæ erant; tum fortiri jussi. Cornelio Hispania, Sempronio Africa cum Sicilia evenit. Sex in eum annum decretæ legiones, & socium quantum ipsis videretur, & classis quanta parari posset. Quatuor & viginti peditum Romanorum millia sunt scripta, & mille octingenti equites: sociorum quadraginta millia peditum, quatuor millia & quadringenti equites: naves ducentæ viginti quinqueres, celoces viginti deductæ. Latum inde ad populum, *vellent, juberent, populo Carthaginiensi bellum indici*. Ejusque belli causâ supplicatio per urbem habita, atque adorati Dii, ut bene ac feliciter eveniret, quod bellum populus Romanus jussisset. Inter consules ita copiarum divisæ. Sempronio datæ legiones duæ, (ea quaterna millia erant peditum, & trecenti equites) & sociorum sexdecim millia peditum, equites mille octingenti: naves longæ centum sexaginta, celoces duodecim. Cum his terrestribus maritimisque copiis Ti. Sempronius missus in Siciliam, ita in Africam transmissurus, si ad arcendum Italia Pœnum consul alter fatis esset. Cornelio minus copiarum datum, quia L. Manlius prætor & ipse cum haud invalido præsidio in Galliam mittebatur. Navium maxime Cornelio numerus diminutus. sexaginta quinqueres datæ (neque enim

mari venturum, aut ea parte belli dimicaturum hostem credebant) & duæ Romanæ legiones cum suo justo equitatu, & quatuordecim millibus fociorum peditum, equitibus mille sexcentis. Duas legiones Romanas, & decem millia fociorum peditum, mille equites socios, sexcentos Romanos, Gallia provincia eodem anno versa in Punicum bellum habuit.

XVIII. His ita comparatis, ut omnia iusta ante bellum fierent, legatos maiores natu, Q. Fabium, M. Livium, L. Æmilium, C. Licinium, Q. Bæbium, in Africam mittunt ad percontandos Carthaginienses, publicone consilio Hannibal Saguntum oppugnasset? & si, id quod facturi videbantur, fateantur, ac defenderent publico consilio factum, ut indicerent populo Carthaginiensi bellum. Romani postquam Carthaginem venerunt, cum senatus datus esset, & Q. Fabius nihil ultra, quam unum, quod mandatum erat, percontatus esset; tum ex Carthaginiensibus unus: *Præceps vestra, Romani, & prior legatio fuit, cum Hannibalem, tanquam suo consilio Saguntum oppugnantem deposcebatis: ceterum hæc legatio verbis adhuc lenior est, re asperior. Tunc enim Hannibal & insimulabatur, & deposcebatur. nunc ab nobis & confessio culpæ exprimitur: &, ut a confessis, res extemplo repetuntur. Ego autem non, privato publicone consilio Saguntum oppugnatum sit, querendum censeam: sed utrum jure, an injuria. Nostra enim hæc quæstio atque animadversio in civem nostrum est, nostro, an suo fecerit arbitrio. Vobiscum una disceptatio est, licueritne per fœdus fieri. Itaque quoniam*

*discerni placet, quid publico consilio, quid sua sponte imperatores faciant; nobis vobiscum fœdus est a Lutatius consule iktum: in quo cum caveretur utrorumque sociis, nihil de Saguntinis (nec dum enim erant socii vestri) cautum est. At enim eo fœdere, quod cum Hasdrubale iktum est, Saguntini excipiuntur. adversus quod nihil ego dicturus sum, nisi quod a vobis didici. Vos enim, quod C. Lutatius consul primo nobiscum fœdus icit, quia neque auctoritate Patrum, nec populi jussu iktum erat, negastis vos eo teneri. itaque aliud de integro fœdus publico consilio iktum est. Si vos non tenent vestra fœdera, nisi ex auctoritate aut jussu vestro iktâ; ne nos quidem Hasdrubalis fœdus, quod nobis insciis icit, obligare potuit. Proinde omitte Sagunti atque Iberi mentionem facere, &, quod diu parturit animus vester, aliquando pariat. Tum Romanus, sinu ex toga facto, Hic, inquit, vobis bellum & pacem portamus: utrum placet, sumite. Sub hanc vocem haud minus ferociter, daret, utrum vellet, succlamatum est. & cum is iterum sinu effuso bellum dare dixisset, accipere se omnes responderunt, &, quibus acciperent animis, iisdem se gesturos.*

XIX. Hæc directâ percontatio ac denuntiatio belli magis ex dignitate populi Romani visa est, quam de fœderum jure verbis disceptare, cum ante, tum maxime Sagunto excisa. nam, si verborum disceptationis res esset, quid fœdus Hasdrubalis cum Lutatii priore fœdere, quod mutatum est, comparandum erat? cum in Lutatii fœdere diserte additum esset, *ita id ratum fore, si populus censuisset*; in Hasdrubalis fœdere nec exceptum tale

quidquam fuerit, & tot annorum silentio ita vivo eo comprobatum sit fœdus, ut ne mortuo quidem auctore quidquam mutaretur. Quanquam, etsi priore fœdere staretur, satis cautum erat Saguntinis, fociis utrorumque exceptis: nam neque additum erat, *iis, qui tunc essent*; nec, *ne qui postea assumerentur*. & cum assumere novos liceret socios, quis æquum censeret, aut ob nulla quenquam merita in amicitiam recipi? aut receptos in fidem non defendi? tantum, ne Carthaginensium focii aut sollicitarentur ad defectionem, aut sua sponte defiscerentur recipere. Legati Romani ab Carthagine, sicut his Romæ imperatum erat, in Hispaniam, ut adirent civitates, ut in societatem perlicerent, aut averterent a Pœnis, trajecerunt. Ad Bargusios primum venerunt: a quibus benigne excepti, quia tædebat imperii Punici, multos trans Iberum populos ad cupidinem novæ fortunæ erexerunt. Ad Volcianos inde est ventum: quorum celebre per Hispaniam responsum ceteros populos ab societate Romana avertit. ita enim maximus natus ex iis in concilio respondit: *Quæ verecundia est, Romani, postulare vos, uti vestram Carthaginensium amicitiam præponamus, cum, qui id fecerunt, Saguntinos crudelius, quam Pœnus hostis perdidit, vos focii prodideritis? ibi quæratissocios, censeo, ubi Saguntina clades ignota est. Hispanis populis, sicut lugubre, ita insigne documentum Sagunti ruinæ erunt, ne quis fidei Romanæ aut societati confidat.* Inde extemplo abire finibus Volcianorum iussi, ab nullo deinde concilio Hispaniæ benigniora verba

tulere. itaque nequidquam peragrata Hispania, in Galliam transeunt.

XX. In his nova terribilisque species visa est, quod armati (ita mos gentis erat) in concilium venerunt. cum, verbis extollentes gloriam virtutemque populi Romani ac magnitudinem imperii, petissent, ne Pœno, bellum Italiæ inferenti, per agros urbisque suas transitum darent; tantus cum fremitu risus dicitur ortus, ut vix a magistratibus majoribusque natu juvenus sedaretur. Adeo stolidam impudensque postulatio visa est, censere, ne in Italiam transmittant Galli bellum, ipsos id avertere in se, agrosque suos pro alienis populandos objicere. Sedato tandem fremitu, responsum legatis est, *Neque Romanorum in se meritum esse, neque Carthaginensium injuriam, ob quæ aut pro Romanis, aut adversus Pœnos sumant arma. Contra ea audire sese, gentis suæ homines agris finibusque Italiæ pelli a populo Romano, stipendiumque pendere, & cetera indigna pati.* Eadem ferme in ceteris Galliæ conciliis dicta auditaque: nec hospitale quidquam pacatumve satis prius auditum, quam Massiliam venire. Ibi omnia, ab fociis inquisita cum cura ac fide, cognita, præoccupatos jam ante ab Hannibale Gallorum animos esse. sed ne illi quidem ipsi satis mitem gentem fore, (adeo ferocia atque indomita ingenia esse) ni subinde auro, cujus avidissima gens est, principum animi concilientur. Ita peragratis Hispaniæ & Galliæ populis, legati Romam redeunt, haud ita multo post, quam consules in provincias profecti erant. civitatem omnem in expectationem

belli erectam invenerunt, fatis constante fama, jam Iberum Pœnos transmisisse.

XXI. Hannibal, Sagunto capto, Carthaginem novam in hiberna concefferat. ibique, auditis, quæ Romæ, quæque Carthagine acta decretaque forent, seque non ducem solum, sed etiam causam esse belli, partitis divenditisque reliquiis prædæ, nihil ultra differendum ratus, Hispani generis milites convocat: *Credo ego vos, inquit, socii, & ipsos cer-  
nere, pacatis omnibus Hispaniæ populis, aut finien-  
dam nobis militiam, exercitusque dimittendos esse:  
aut in alias terras transferendum bellum: ita enim  
hæ gentes non pacis solum, sed etiam victoriæ, bonis  
florebunt, si ex aliis gentibus prædam & gloriam quæ-  
remus. Itaque, cum longinqua ab domo instet militia,  
incertumque sit, quando domos vestras, & quæ cuique  
ibi cara sunt, visuri sitis, si quis vestrum suos invisere  
vult, commeatum do. Primo vere, edico, assitis, ut,  
Diis bene juvantibus, bellum ingentis gloriæ prædæ-  
que futurum incipiamus.* Omnibus fere visendi do-  
mos oblata ultro potestas grata erat, & jam desi-  
derantibus suos, & longius in futurum providen-  
tibus desiderium. Per totum tempus hiemis quies  
inter labores aut jam exhaustos, aut mox exhau-  
riendos, renovavit corpora animosque ad omnia  
de integro patienda. Vere primo ad edictum con-  
venere. Hannibal, cum recensuisset omnium auxi-  
lia gentium, Gades profectus Herculi vota exsol-  
vit: novisque se obligat votis, si cetera prospera  
evenissent. Inde partiens curas simul in inferen-  
dum atque arcendum bellum, ne, dum ipse ter-



reftri per Hispaniam Galliasque itinere Italiam peteret, nuda apertaue Romanis Africa ab Sicilia esset, valido præsidio firmare eam statuit. Pro eo supplementum ipse ex Africa, maxime jaculatorum, levium armis, petiit; ut Afri in Hispania, in Africa Hispani, melior procul ab domo futurus uterque miles, velut mutuis pignoribus obligati, stipendia facerent. Tredecim millia octingentos quinquaginta pedites cetratos misit in Africam, & funditores Baliares octingentos septuaginta: equites mixtos ex multis gentibus mille ducentos. Has copias partim Carthagini præsidio esse, partim distribui per Africam jubet. simul conquistatoribus in civitates missis, quatuor millia conscripta delectæ juventutis, præsidium eosdem & obsides, duci Carthaginem jubet.

XXII. Neque Hispaniam negligendam ratus, (atque ideo haud minus, quod haud ignarus erat, circumitam ab Romanis eam legatis ad sollicitandos principum animos) Hasdrubali fratri, viro impigro, eam provinciam destinat, firmatque eum Africis maxime præsidiis, peditum Afrorum undecim millibus octingentis quinquaginta, Liguribus trecentis, Baliaribus quingentis. ad hæc peditum auxilia additi equites Libyphœnices (mixtum Punicum Afris genus) trecenti, & Numidæ Maurique accolæ Oceani ad mille octingentos, & parva Ilergetum manus ex Hispania, ducenti equites: & ne quid terrestris deesset auxilii genus, elephanti quatuordecim. classis præterea data ad tuendam maritimam oram, (quia, qua parte belli vicerant,

ea tum quoque rem gesturos Romanos, credi poterat) quinquaginta quinqueres, quadrires duæ, trires quinque: sed aptæ instructæque remigio triginta & duæ quinqueres erant, & trires quinque. Ab Gadibus Carthaginem ad hiberna exercitus rediit: atque inde, profectus præter Etovissam urbem, ad Iberum maritimamque oram ducit. Ibi, fama est, in quiete visum ab eo juvenem divina specie, qui *se ab Jove diceret ducem in Italiam Hannibali missum: proinde sequeretur, neque usquam a se deflecteret oculos.* Pavidum primo, nusquam circumspicientem aut respicientem, secutum: deinde, cura humani ingenii, cum, quidnam id esset, quod respicere vetitus esset, agigaret animo, temperare oculis nequivisse: tum vidisse, post sese serpentem mira magnitudine cum ingenti arborum ac virgultorum strage ferri, ac post insequi cum fragore coeli nimbum: tum, *quæ moles ea, quidve prodigii esset,* quærentem audisse: *Vastitatem Italiæ esse. pergeret porro ire, nec ultra inquireret, sineretque fata in occulto esse.* †

XXIII. Hoc visu lætus tripartito Iberum copias trajecit, præmissis, qui Gallorum animos, qua traducendus exercitus erat, donis conciliarent, Alpiumque transitus specularentur. nonaginta millia peditum, duodecim millia equitum Iberum traduxit. Ilargetes inde, Bargusiosque, & Ausetanos, & Læcetaniam, quæ subiecta Pyrenæis montibus est, subegit: oræque huic omni præfecit Hannonem, ut fauces, quæ Hispanias Gallis jungunt, in potestate essent. Decem millia peditum Hannoni ad præ-

fidium obtinendæ regionis data, & mille equites. Postquam per Pyrenæum saltum traduci exercitus est cœptus, rumorque per barbaros manavit certior de bello Romano; tria millia inde Carpetanorum peditum iter averterunt. constabat, non tam bello motos, quam longinquitate viæ insuperabilique Alpium transitu. Hannibal, quia revocare aut vi retinere eos anceps erat, ne ceterorum etiam feroces animi irritarentur, supra septem millia hominum domos remisit, quos & ipse gravari militia fenserat, Carpetanos quoque ab se dimissos simulans.

XXIV. Inde, ne mora atque otium animos sollicitarent, cum reliquis copiis Pyrenæum transgreditur, & ad oppidum Illiberi castra locat. Galli quanquam Italiæ bellum inferri audiebant, tamen, quia vi subactos trans Pyrenæum Hispanos fama erat, præsidiaque valida imposita, metu servitutis ad arma consternati, Ruscinonem aliquot populi conveniunt. quod ubi Hannibali nuntiatum est, moram magis, quam bellum, metuens, oratores ad regulos eorum misit, *colloqui semet ipsum velle cum his; & vel illi propius Illiberi accederent, vel se Ruscinonem processurum, ut ex propinquo congressus facilius esset: nam & accepturum eos in castra sua se letum, nec cunctanter se ipsum ad eos venturum. Hospitem enim se Galliæ, non hostem, advenisse: nec stricturum ante gladium, si per Gallos liceat, quam in Italiam venisset.* Et per nuntios quidem hæc. Ut vero reguli Gallorum, castris ad Illiberim extemplo motis, haud gravate ad Pœnum venerunt;

capti donis, cum bona pace exercitum per fines suos præter Ruscinonem oppidum transmiserunt.

XXV. In Italiam interim nihil ultra, quam Iberum transisse Hannibalem, a Massiliensium legatis Romam perlatum erat: cum perinde, ac si Alpes jam transisset, Boji, sollicitatis Insubris, defecerunt; nec tam ob veteres in populum Romanum iras, quam quod nuper circa Padum, Placentiam Cremonamque colonias in agrum Gallicum deductas ægre patiebantur. Itaque, armis repente arreptis, in eum ipsum agrum impetu facto, tantum terroris ac tumultus fecerunt, ut non agrestis modo multitudo, sed ipsi triumviri Romani, qui ad agrum venerant assignandum, diffisi Placentiæ mœnibus, Mutinam confugerint, C. Lutatius, C. Servilius, T. Annius. Lutatii nomen haud dubium est. pro C. Servilio & T. Annio, Q. Acilium & C. Herennium habent quidam annales: alii P. Cornelium Asinam & C. Papirium Mafonem. Id quoque dubium est, legati, ad expostulandum missi ad Bojos, violati sint, an in triumviros agrum metantes impetus sit factus. Mutinæ cum obsiderentur, & gens, ad oppugnandarum urbium artes rudis, pigerrima eadem ad militaria opera, segnis instructis affideret muris, simulari coeptum de pace agi. evocatique ab Gallorum principibus legati ad colloquium, non contra jus modo gentium, sed violata etiam, quæ data in id tempus erat, fide, comprehenduntur; negantibus Gallis, nisi obsides sibi redderentur, eos dimissuros. Cum hæc de legatis nuntiata essent, & Mutina præsidiumque in peri-

culo effet, L. Manlius prætor, ira accensus, effusum agmen ad Mutinam ducit. Silvæ tunc circa viam erant, plerisque incultis. ibi, inexplorato profectus, in insidias præcipitatus, multaque cum cæde suorum ægre in apertos campos emerfit. ibi castra communita; &, quia Gallis ad tentanda ea defuit spes, resecti sunt militum animi, quanquam accisas res satis constabat. Iter deinde de integro cœptum, nec, dum per patentia loca ducebatur agmen, apparuit hostis: ubi rursus silvæ intratæ, tum postremos adorti, cum magna trepidatione ac pavore omnium, octingentos milites occiderunt, sex signa ademere. Finis & Gallis territandi, & pavendi Romanis fuit, ut e saltu invio atque impedito evasere. inde, apertis locis facile tutantes agmen, Romani Tanetum, vicum propinquum Pado, contendere: ibi se munimento ad tempus com meatibusque fluminis & Brixianorum Gallorum auxilio, adversus crescentem in dies multitudinem hostium, tutabantur.

XXVI. Qui tumultus repens postquam est Romam perlatum, & Punicum insuper Gallico bello auctum Patres acceperunt; C. Atilium prætorem cum una legione Romana & quinque millibus fociorum, delectu novo a consule conscriptis, auxilium ferre Manlio jubent: qui sine ullo certamine (abscefferant enim metu hostes) Tanetum pervenit. Et P. Cornelius, in locum ejus, quæ missa cum prætore fuerat, transcripta legione nova, profectus ab urbe sexaginta longis navibus, præter oram Etruriæ Ligurumque, & inde Salyum montes, per-

venit Massiliam, & ad proximum ostium Rhodani (pluribus enim divisus amnis in mare decurrit) castra locat: vixdum satis credens, Hannibalem superasse Pyrenæos montes. quem ut de Rhodani quoque transitu agitare animadvertit; incertus, quoniam ei loco occurreret, necdum satis reffectis ab jactatione maritima militibus, trecentos interim delectos equites, ducibus Massiliensibus & auxiliariis Gallis, ad exploranda omnia visendosque ex tuto hostes præmittit. Hannibal, ceteris metu aut pretio pacatis, jam in Volcarum pervenerat agrum, gentis validæ. Colunt autem circa utramque ripam Rhodani: sed, diffusi ceteriore agro arceri Poenum posse, ut flumen pro munimento haberent, omnibus ferme suis trans Rhodanum trajectis, ulteriorem ripam amnis armis obtinebant. Ceteros accolæ fluminis Hannibal, & eorum ipsorum quos sedes tenuerant, simul perlicit donis ad naves undique contrahendas fabricandasque: simul & ipsi trajici exercitum, levarique quamprimum regionem suam tanta urgente hominum turba cupiebant. Itaque ingens coacta vis navium est linteumque temere ad vicinalem usum paratarum: novæque alias primum Galli inchoantes cavabant ex singulis arboribus: deinde & ipsi milites, simul copia materiæ, simul facilitate operis inducti, alveos informes, (nihil, dummodo innare aquæ & capere onera possent, curantes) quibus se suaque transeherent, raptim faciebant.

XXVII. Jamque omnibus satis comparatis ad trajiciendum, terrebant ex adverso hostes, omnem

ripam equites virique obtinentes: quos ut averteret, Hannenem, Bomilcaris filium, vigilia prima noctis cum parte copiarum, maxime Hispanis, adverso flumine ire iter unius diei jubet; & ubi primum possit, quam occultissime trajecto amni, circumducere agmen, ut, cum opus facto sit, adorietur ab tergo hostem. Ad id dati duces Galli edocent, inde millia quinque & viginti ferme supra, parvæ insulæ circumfusum amnem, latiore, ubi dividebatur, eoque minus alto alveo, transitum ostendere. ibi raptim cæsa materia, ratesque fabricatæ, in quibus equi virique & alia onera trajicerentur. Hispani sine ulla mole, in utres vestimentis coniectis, ipsi cetris suppositis incubantes, flumen tranavere. Et alius exercitus, ratibus junctis trajectus, castris prope flumen positus, nocturno itinere atque operis labore fessus, quiete unius diei reficitur, intento duce ad consilium opportune exsequendum. Postero die, profecti ex loco, prodito fumo significant, se transisse, & haud procul abesse. quod ubi accepit Hannibal, ne tempori deesset, dat signum ad trajiciendum. Jam paratas aptatasque habebat pedes lintres. equites fere propter equos nantes navium agmen, ad excipiendum adversi impetum fluminis parte superiore transmittens, tranquillitatem infra trajicientibus lintribus præbebat. Equorum pars magna nantes loris a pupibus trahebantur, præter eos, quos instructos frenatosque, ut extemplo egresso in ripam equiti usui essent, imposuerant in naves.

XXVIII. Galli occurrant in ripam cum variis

ululatus cantuque moris fui, quatientes scuta super capita, vibrantesque dextris tela: quanquam & ex adverso terrebat tanta vis navium cum ingenti sono fluminis & clamore vario nautarum & militum, qui nitebantur perrumpere impetum fluminis, & qui ex altera ripa trajicientes suos hortabantur. Jam satis paventes adverso tumultu terribilior ab tergo adortus clamor, castris ab Hannone captis. mox & ipse aderat, ancepsque terror circumstabat, & e navibus tanta vi armatorum in terram evadente, & ab tergo improvisa premente acie. Galli, postquam, ultro vim facere conati, pellebantur, qua patere visum maxime iter, perrumpunt, trepidique in vicos passim suos diffugiunt. Hannibal, ceteris copiis per otium trajectis, spernens jam Gallicos tumultus, castra locat. Elephantorum trajiciendorum varia consilia fuisse credo: certe variata memoria actæ rei. quidam, congregatis ad ripam elephantis, tradunt, ferocissimum ex iis irritatum ab rectore suo, cum refugientem in aquam nantem sequeretur, traxisse gregem, ut quemque timentem altitudinem destituerat vadum, impetu ipso fluminis in alteram ripam rapiente. Ceterum magis constat, ratibus trajectos: id ut tutius consilium ante rem foret, ita, acta re, ad fidem pronius est. Ratem unam, ducentos longam pedes, quinquaginta latam, a terra in amnem porrexerunt: quam, ne secunda aqua deferretur, pluribus validis retinaculis parte superiore ripæ religatam, pontis in modum humo injecta constraverunt; ut belluæ audacter velut per solum ingre-



derentur. altera ratis, æque lata, longa pedes centum, ad trajiciendum flumen apta, huic copulata est: & cum elephanti, per stabilem ratem, tanquam viam, prægredientibus feminis, acti, in minorem applicatam transgressi sunt; extemplo resolutis, quibus leviter annexa erat, vinculis, ab actuariis aliquot navibus ad alteram ripam pertrahitur: ita primis expositis, alii deinde repetiti ac trajecti sunt. Nihil fane trepidabant, donec continenti velut ponte agerentur. primus erat pavor, cum, soluta ab ceteris rate, in altum raperentur. ibi, urgentes inter se, cedentibus extremis ab aqua, trepidationis aliquantum edebant; donec quietem ipse timor circumspicientibus aquam fecisset. excidere etiam sævientes quidam in flumen: sed, pondere ipso stabiles, dejectis rectoribus, quærendis pedentim vadis, in terram evasere. ✕

XXIX. Dum elephanti trajiciuntur, interim Hannibal Numidas equites quingentos ad castra Romana miserat speculatum, ubi, & quantæ copiæ essent, & quid pararent. Huic alæ equitum missi, ut ante dictum est, ab ostio Rhodani trecenti Romanorum equites occurrunt. prælium atrocius, quam pro numero pugnantium, editur. Nam præter multa vulnera, cædes etiam prope par utrinque fuit: fugaque & pavor Numidarum Romanis, jam admodum fessis, victoriam dedit. victores ad centum sexaginta, nec omnes Romani, sed pars Gallorum: victi amplius ducenti ceciderunt. Hoc principium simul omenque belli, ut summæ rerum prosperum eventum, ita haud fane incruentam ad-

cipitisque certaminis victoriam, Romanis portendit. Ut, re ita gesta, ad utrumque ducem sui redierunt, nec Scipioni stare sententia poterat, nisi ut ex consiliis coeptisque hostis & ipse conatus caperet: & Hannibalem incertum, utrum coeptum in Italiam intenderet iter, an cum eo, qui primus se obtulisset Romanus exercitus, manus confereret, avertit a præsentī certamine Bæjorum legatorum regulique Magali adventus: qui se duces itinerum, socios periculi fore, affirmantes, integro bello, nusquam ante libatis viribus, Italiam aggrediendam censent. Multitudo timebat quidem hostem, nondum oblitterata memoria superioris belli: sed magis iter immensum Alpesque, rem fama utique inexpertis horrendam, metuebat.

XXX. Itaque Hannibal, postquam ipsi sententia stetit pergere ire, atque Italiam petere, advocata concione, varie militum versat animos castigando adhortandoque: *Mirari se, quinam pectora semper impavida repens terror invaserit. per tot annos vincentes eos stipendia facere; neque ante Hispania excessisse, quam omnes gentesque & terræ eæ, quas duo diversa maria amplectantur, Carthaginiensium essent. Indignatos deinde, quod, quicumque Saguntum obsedissent, velut ob noxam, sibi dedi postulare populus Romanus, Iberum trajecisse ad detendum nomen Romanorum, liberandumque orbem terrarum. Tum nemini visum id longum, cum ab occasu solis ad exortus intenderent iter. Nunc, postquam multo majorem partem itineris emensam cernant, Pyrenæum saltum inter ferocissimas gentes superatum, Rhodanum, tantum ar-*

nem, tot millibus Gallorum prohibentibus, domita etiam ipsius fluminis vi, trajectum, in conspectu Alpes habeant, quarum alterum latus Italia sit; in ipsis portis hostium fatigatos subsistere, quid Alpes aliud esse credentes, quam montium altitudines? Fingerent altiores Pyrenæi iugis. nullas profecto terras cælum contingere, nec inexsuperabiles humano generi esse. Alpes quidem habitari, colli, gignere atque alere animantes. pervias paucis esse, exercitibus invias? cos ipsos, quos cernant, legatos non pennis sublime elatos Alpes transgressos. ne majores quidem eorum indigenas; sed adversas Italiæ cultores, has ipsas Alpes ingentibus sæpe agminibus cum liberis ac conjugibus, migrantium modo, tuto transmississe. Militi quidem armato, nihil secum præter instrumenta belli portanti, quid invium aut inexsuperabile esse? Saguntum ut caperetur, quid per octo menses periculi, quid laboris exhaustum esse? Romam, orbis terrarum caput, petentibus, quidquam adeo asperum atque arduum videri, quod inceptum moretur? Cepisse quondam Gallos ea, quæ adiri posse Pœnus desperet. proinde aut cederent animo atque virtute genti, per eos dies toties ab se victæ: aut itineris finem sperent campum interjacentem Tiberi ac mœnibus Romanis. ✠

XXXI. His adhortationibus incitatos corpora curare, atque ad iter se parare jabet. Postero die, profectus adversa ripa Rhodani, mediterranea Galliæ petit: non quia rectior ad Alpes via esset, sed, quantum a mari recessisset, minus obvium fore Romanum credens: cum quo, priusquam in Italiam ventum foret, non erat in animo manus conferere. Quartis castris ad Insulam pervenit: ibi Arar Rho-

danusque amnes, diversis ex Alpibus decurrentes, agri aliquantum amplexi, confluunt in unum. Mediis campis Insulæ nomen inditum. Incolunt prope Allobroges, gens jam inde nulla Gallica gente opibus aut fama inferior: tum discors erat. Regni certamine ambigebant fratres. major, & qui prius imperitarat, Brancus nomine, minore ab fratre & cœtu juniorum, qui jure minus, vi plus poterant, pellebatur. Hujus seditionis peropportuna disceptatio cum ad Hannibalem rejecta esset, arbiter regni factus, quod ea senatus principumque sententia fuerat, imperium majori restituit. ob id meritum com meatu copiaque rerum omnium, maxime vestis, est adjutus, quam infames frigoribus Alpes præparari cgebant. Sedatis certaminibus Allobrogum, cum jam Alpes peteret, non recta regione iter instituit; sed ad lævam in Tricastinos flexit; inde per extremam oram Vocontiorum agri tetendit in Tricorios: haud usquam impedita via, priusquam ad Druentiam flumen pervenit. Is & ipse Alpinus amnis longe omnium Galliæ fluminum difficillimus transitu est. nam, cum aquæ vim vehat ingentem, non tamen navium patiens est: quia nullis coercitus ripis, pluribus simul, neque iisdem alveis fluens, nova semper vada novosque gurgites faciens, (& ob eadem pediti quoque incerta via est) ad hæc saxa glareosa volvens, nihil stabile nec tutum ingredienti præbet; & tum, forte imbris auctus, ingentem transgredientibus tumultum fecit, cum super cetera trepidatione ipsi sua atque incertis clamoribus turbarentur.

XXXII. P. Cornelius consul, triduo fere post, quam Hannibal ab ripa Rhodani movit, quadrato agmine ad castra hostium venerat, nullam dimicandi moram factururus. ceterum, ubi deserta munimenta, nec facile se tantum prægressos affecuturum videt; ad mare ac naves rediit, tutius faciliusque ita descendentem ab Alpibus Hannibali occursurus. Ne tamen nuda auxiliis Romanis Hispania esset, quam provinciam sortitus erat, Cn. Scipionem fratrem cum maxima parte copiarum adversus Hasdrubalem misit; non ad tuendos tantummodo veteres socios conciliandosque novos, sed etiam ad pellendum Hispania Hasdrubalem. ipse cum admodum exiguis copiis Genuam repetit, eo, qui circa Padum erat, exercitu Italiam defensusus. Hannibal ab Druentia campestri maxime itinere cum bona pace ad Alpes incolentium ea loca Gallorum pervenit. Tum, quanquam fama prius (qua incerta in majus vero ferri solent) præcepta res erat, tamen ex propinquo visa montium altitudo, nivisque cælo prope immixtæ, tecta informia imposita rupibus, pecora jumentaque torrida frigore, homines intonsi & inculti, animalia inanimaque omnia rigentia gelu, cetera visu, quam dictu, fœdiora, terrorem renovarunt. Erigentibus in primos agmen clivos apparuerunt imminentes tumulos infidentes montani: qui, si valles occultiores infidissent, coorti in pugnam repente, ingentem fugam stragemque dedissent. Hannibal consistere signa jubet; Gallisque ad visenda loca præmissis, postquam comperit, transitum ea non esse, castra inter

confragosa omnia præruptaque, quam extentissima potest valle, locat. Tum per eosdem Gallos, haud sane multum lingua moribusque abhorrentes, cum se immiscuissent colloquiis montanorum, edoctus interdium tantum obsideri saltum, nocte in sua quemque dilabi testa; luce prima subiit tumulos, ut ex aperto atque interdium vim per angustias factururus. Die deinde simulando aliud, quam quod parabatur, confumto, cum eodem, quo consliterant, loco castra communissent, ubi primum degreſſos tumultis montanos laxatasque sensit custodias, pluribus ignibus, quam pro numero manentium, in speciem factis, impedimentisque cum equite relictis, & maxima parte peditum; ipse cum expeditis, acerrimo quoque viro, raptim angustias evadit: iisque ipsis tumultis, quos hostes tenuerant, confedit.

XXXIII. Prima deinde luce castra mota, & agmen reliquum incedere cœpit. Jam montani signo dato ex castellis ad stationem solitam conveniebant; cum repente conspiciunt alios, arce occupata sua, super caput imminentes, alios via transire hostes. Utraque simul objecta res oculis animisque immobiles parumper eos defixit. deinde ut trepidationem in angustias, suoque ipsum tumultum misceri agmen videre, equis maxime consternatis, quidquid adjecissent ipsi terroris, fatis ad perniciem fore rati, perversis rupibus juxta invia ac devia affueti discurrunt. Tum vero simul ab hostibus, simul ab iniquitate locorum Pœni oppugnabantur; plusque inter ipsos, (sibi quoque tendente, ut pe-

riculo prius evaderet) quam cum hostibus, certaminis erat. Equi maxime infestum agmen faciebant, qui & clamoribus dissonis, quos nemora etiam re-percussæque valles augebant, territi trepidabant, & icti forte aut vulnerati adeo consternabantur, ut stragem ingentem simul hominum ac sarcinarum omnis generis facerent: multosque turba, cum præcipites deruptæque utrinque angustiae essent, in im-mensum altitudinis dejecit; quosdam & armatos. sed ruinæ maximæ modo jumenta cum oneribus devolvebantur. Quæ quanquam foeda visu erant, stetit parumper tamen Hannibal, ac suos continuit, ne tumultum ac trepidationem augeret. deinde postquam interrumpi agmen vidit, periculumque esse, ne exutum impedimentis exercitum nequidquam incolumem traduxisset, decurrit ex superiore loco; &, cum impetu ipso fudisset hostem, suis quoque tumultum auxit. sed is tumultus momento temporis, postquam liberata itinera fuga montanorum erant, sedatur: nec per otium modo, sed prope silentio, mox omnes traducti. Castellum inde, quod caput ejus regionis erat, viculosque circumiectos capit, & captivorum pecoribus per triduum exercitum aluit. & quia nec montanis primo percussis, nec loco magnopere impediabantur, aliquantum eo triduo viæ confecit.

XXXIV. Perventum inde ad frequentem cultoribus alium, ut inter montana, populum. ibi non bello aperto, sed suis artibus, fraude, deinde insidiis est prope circumventus. Magno natu principes castellorum oratores ad Poenum veniunt: *alie-*

*nis malis, utili exemplo, doctos, memorantes, amicitiam malle, quam vim experiri Pœnorum. itaque obedienter imperata facturos: commeatum itinerisque duces, & ad fidem promissorum obsides acciperet.* Hannibal nec temere credendo, nec aspernando, ne repudiati aperte hostes fierent, benigne cum respondisset; obsidibus, quos dabant, acceptis, & commeatu, quem in viam ipsi detulerant, usus, nequaquam ut inter pacatos, composito agmine duces eorum sequitur. Primum agmen elephantum & equites erant: ipse post cum robore peditum, circumspiciens sollicitusque omnia, incedebat. Ubi in angustiore viam ex parte altera subjectam iugo insuper imminenti ventum est, undique ex insidiis barbari a fronte, ab tergo coorti, cominus eminus petunt: saxa ingentia in agmen devolvunt: maxima ab tergo vis hominum urgebat. in eos versa peditum acies haud dubium fecit, quin, nisi firmata extrema agminis fuissent, ingens in eo saltu accipienda clades fuerit. Tunc quoque ad extremum periculi ac prope perniciem ventum est: nam, dum cunctatur Hannibal demittere agmen in angustias; quia non, ut ipse equitibus præsidio erat, ita peditibus quidquam ab tergo auxilii reliquerat; occurrentes per obliqua montani, per rupto medio agmine, viam infedere: noxque una Hannibali sine equitibus atque impedimentis acta est.

XXXV. Postero die, jam segnius intercurrentibus barbaris, junctæ copię, saltusque haud sine clade (majore tamen jumentorum, quam homi-



num, pernicie) superatus. inde montani pauciores jam, & latrocinii magis quam belli more, concurrabant: modo in primum, modo in novissimum agmen, utcunque aut locus opportunitatem daret, aut progressi morative aliquam occasionem fecissent. Elephantis, sicut præcipites per arctas vias magna mora agebantur, ita tutum ab hostibus, quacunque incederent, (quia insuetis adeundi propius metus erat) agmen præbebant. Nono die in jugum Alpium perventum est, per invia pleraque & errores, quos aut ducentium fraus, aut, ubi fides iis non esset, temere initæ valles a conjectantibus iter, faciebant. Biduum in jugo stativa habita: fessisque labore ac pugnando quies data militibus: jumentaque aliquot, quæ prolapsa in rupibus erant, sequendo vestigia agminis in castra pervenere. Fessis tædio tot malorum nivis etiam casus, occidente jam fidere Vergiliarum, ingentem terrorem adiecit. Per omnia nive oppleta cum, signis prima luce motis, segniter agmen incederet, pigritiaque & desperatio in omnium vultu emineret; prægressus signa Hannibal in promontorio quodam, unde longe ac late prospectus erat, consistere jussis militibus Italiam ostentat, subiectosque Alpinis montibus Circumpadanos campos: *mæniaque eos tum transcendere non Italiæ modo, sed etiam urbis Romanæ. cetera plana, proclivia fore: uno, aut summum altero prælio arcem & caput Italiæ in manu ac potestate habituros.* Procedere inde agmen cœpit; jam nihil ne hostibus quidem, præter parva furta per occasionem, tentantibus. Ceterum iter multo, quam in

ascensu fuerat, (ut pleraque Alpium ab Italia sicut breviora, ita arrectiora sunt) difficilior fuit. omnis enim ferme via præceps, angusta, lubrica erat: ut neque sustinere se a lapsu possent; nec, qui paululum titubassent, hædere afflictis vestigio suo; alique super alios, & jumenta & homines, occiderent.

XXXVI. Ventum deinde ad multo angustiorum rupem, atque ita rectis faxis, ut ægre expeditus miles tentabundus, manibusque retinens virgulta ac stirpes circa eminentes, demittere sese posset. Natura locus jam ante præceps, recenti lapsu terræ, in pedum mille admodum altitudinem abruptus erat. Ibi cum, velut ad finem viæ, equites constitissent, miranti Hannibali, quæ res moraretur agmen, nuntiatur, rupem inviam esse. digressus deinde ipse ad locum visendum. haud dubia res visa, quin per invia circa nec trita antea, quamvis longo ambitu, circumduceret agmen. Ea vero via insuperabilis fuit. nam cum super veterem nivem intactam nova modicæ altitudinis esset, molli nec præaltæ nivi facile pedes ingredientium insisterent. ut vero tot hominum jumentorumque incessu dilapsa est, per nudam infra, glaciem fluentemque tabem liquescentis nivis ingrediebantur. Tetra ibi luctatio erat, ut a lubrica glacie, non recipiente vestigium, & in prono citius pede se fallente, &, seu manibus in assurgendo, seu genu se adjuvissent, ipsis adminiculis prolapsis, iterum corruissent, nec stirpes circa radicesve, ad quas pede aut manu quisquam eniti posset, erant; ita in levi tantum glacie

tabidaque nive volutabantur. jumenta secabant; interdum etiam, tum infimam ingredientia nivem, & prolapsa jactandis gravius in continendo ungulis, penitus perfringebant: ut pleraque, velut pedica capta, hærent in durata & alte concreta glacie. >

XXXVII. Tandem, nequidquam jumentis atque hominibus fatigatis, castra in jugo posita, ægerime ad id ipsum loco purgato. tantum nivis fodiendum atque egerendum fuit. Inde ad rupem munendam, per quam unam via esse poterat, milites ducti, cum cædendum esset saxum, arboribus circa immanibus dejectis detruncatisque, struem ingentem lignorum faciunt: eamque (cum & vis venti apta faciendo igni coorta esset) succendunt, ardentiaque saxa infuso aceto putrefaciunt. Ita torridam incendio rupem ferro pandunt, molliuntque anfractibus modicis clivos, ut non jumenta solum, sed elephantum etiam, deduci possent. Quatriduum circa rupem consumtum, jumentis prope fame absumtis: nuda enim fere cacumina sunt, &, si quid est pabuli, obruunt nives. Inferiora valles & apricos quosdam colles habent, rivosque prope silvas, & jam humano cultu digniora loca. Ibi jumenta in pabulum missa, & quies muniendo fessis hominibus data triduo. inde ad planum descensum, etiam locis mollioribus & accolarum ingeniis.

XXXVIII. Hoc maxime modo in Italiam perventum est, quinto mense a Carthagine nova, (ut quidam auctores sunt) quinto decimo die Alpibus superatis. Quantæ copię transgresso in Italiam Hanni-

bali fuerint, nequaquam inter auctores constat. qui plurimum, centum millia peditum, viginti equitum fuisse scribunt; qui minimum, viginti millia peditum, sex equitum. L. Cincius Alimentus, qui captum se ab Hannibale scribit, maxime auctor me moveret, nisi confunderet numerum, Gallis Liguribusque additis: cum his octoginta millia peditum, decem equitum, adducta in Italiam: (magis affluxisse verisimile est, & ita quidam auctores sunt) ex ipso autem audisse Hannibale, postquam Rhodanum transierit, triginta sex millia hominum, ingentemque numerum equorum & aliorum jumentorum amisisse in Taurinis, quæ Gallis proxima gens erat, in Italiam degresso. Id cum inter omnes constet, eo magis miror ambigi, quamam Alpes transierit: & vulgo credere, Penino, atque inde nomen & jugo Alpium inditum, transgressum. Coelius per Cremonis jugum dicit transisse: qui ambo saltus eum non in Taurinos, sed per Salassos montanos ad Libuos Gallos deduxissent. Nec verisimile est, ea tum ad Galliam patuisse itinera; utique, quæ ad Peninum ferunt, obsepta gentibus semigermanis fuissent. neque, Hercule, montibus his (si quem forte id movet) ab transitu Pœnorum ullo Veragri, incolæ jugi ejus, norunt nomen inditum; sed ab eo, quem in summo sacratum vertice, Peninum montani appellant.

XXXIX. Peroportune ad principia rerum Taurinis, proximæ genti, adversus Insubres motum bellum erat. sed armare exercitum Hannibal, ut parti alteri auxilio esset, (in reficiendo maxime

sentientem contracta ante mala) non poterat. otium etenim ex labore, copia ex inopia, cultus ex illuvie tabeque, squalida & prope efferata corpora varie movebant. Ea P. Cornelio consuli causa fuit, cum Pisas navibus venisset, exercitu a Manlio Atilioque accepto tirone, & in novis ignominiiis trepido, ad Padum festinandi; ut cum hoste nondum refecto manum confereret. sed cum Placentiam consul venit, jam ex stativis moverat Hannibal; Taurinorumque unam urbem, caput gentis ejus, quia volentis in amicitiam non veniebant, vi expugnavit: junxissetque sibi, non metu solum, sed etiam voluntate, Gallos accolae Padi; ni eos, circumspectantes defectionis tempus, subito adventus consulis oppressisset. Et Hannibal movit ex Taurinis, incertos, quæ pars sequenda esset, Gallos præsentem se secuturos ratus. Jam prope in conspectu erant exercitus, convenerantque duces, sicuti inter se nondum satis noti, ita jam imbutus uterque quadam admiratione alterius. Nam Hannibalis & apud Romanos, jam ante Sagunti excidium, celeberrimum nomen erat: & Scipionem Hannibal eo ipso, quod adversus se dux potissimum lectus esset, præstantem virum credebat. & auxerant inter se opinionem, Scipio, quod, relictus in Gallia, obvius fuerat in Italiam transgresso Hannibali; Hannibal, & conatu tam audaci trajiciendarum Alpium, & effectu. Occupavit tamen Scipio Padum trajicere, &, ad Ticinum amnem motis castris, prius, quam educeret in aciem, adhortandorum militum causa, talem orationem exorsus est:

XL. *Si eum exercitum, milites, educerem in aciem, quem in Gallia mecum habui, supersedissem loqui apud vos. quid enim adhortari referret. aut eos equites, qui equitatum hostium ad Rhodanum flumen egregie vicissent, aut eas legiones, cum quibus fugientem hunc ipsum hostem secutus, confessionem cedentis ac detrectantis certamen pro victoria habui? Nunc, quia ille exercitus, Hispaniæ provinciæ scriptus, ibi cum fratre Cn. Scipione meis auspiciis rem gerit, ubi eum gerere senatus populusque Romanus voluit; ego, ut consulem ducem adversus Hannibalem ac Pœnos haberetis, ipse me huic voluntario certamini obtuli: novo imperatori apud novos milites pauca verba facienda sunt. Ne genus belli, neve hostem ignoretis; cum iis est vobis, milites, pugnandum, quos terra marique priore bello vicistis: a quibus stipendium per viginti annos exegistis: a quibus capta belli præmia, Siciliam ac Sardiniam, habetis. Erit igitur in hoc certamine is vobis illisque animus, qui victoribus & victis esse solet. Nec nunc illi, quia audent, sed quia necesse est, pugnaturi sunt: nisi creditis, qui exercitu incolumi pugnam detrectavere, eos, duabus partibus peditum equitumque in transitu Alpium amissis, (cum plures pæne perierint, quam supersunt) plus spei nactos esse. At enim pauci quidem sunt, sed vigentes animis corporibusque, quorum robor ac vires vix suslinere vis ulla possit. Effigies, immo umbræ hominum, fame, frigore, illuvie, squalore enecti, contusi ac debilitati inter saxa rupesque. ad hæc, præussi artus, nive rigentes nervi, membra torrida gelu, quassata fractaque arma, claudi ac debiles equi. Cum hoc equite, cum hoc peditate pugna-*

turi estis: reliquias extremas hostium, non hostes, habebitis. Ac nihil magis vereor, quam ne, vos cum pugnaveritis, Alpes vicisse Hannibalem videantur. Sed ita forsitan decuit, cum fœderum ruptore duce ac populo Deos ipsos, sine ulla humana ope, committere ac profligare bellum: nos, qui secundum Deos violati sumus, commissum ac profligatum conficere.

XLI. Non vereor, ne quis me hoc vestri adhortandi causa magnifice loqui existimet; ipsum aliter animo affectum esse. Licuit in Hispaniam, provinciam meam, quo jam profectus eram, cum exercitu ire meo: ubi & fratrem consilii participem ac periculi socium haberem, & Hasdrubalem potius, quam Hannibalem, hostem, & minorem haud dubie molem belli. tamen, cum præterveherer navibus Galliæ oram, ad famam huius hostis in terram egressus, præmisso equitatu, ad Rhodanum movi castra. Equestri prælio, qua parte copiarum conferendi manum fortuna data est, hostem fudi: perditum agmen, quod in modum fugientium raptim agebatur, quia assèqui terra non poteram, regressus ad naves, quanta maxima celeritate potui, tanto maris terrarumque circuitu, in radicibus Alpium obviui fui. Huic timendo hosti utrum, cum declinarem certamen, improvisus incidisse videor, an occurrere in vestigiis ejus? laceßere ac trahere ad decernendum? Experiri juvat, utrum alios repente Carthaginenses per viginti annos terra ediderit: an iidem sint, qui ad Ægates pugnaverunt insulas, & quos ab Eryce duodevicens denariis æstimatos emisistis: & utrum Hannibal hic sit æmulus itinerum Herculis, ut ipse fert, an vestigialis stipendiariusque & servus populi Romani a patre

relictus : quem nisi Saguntinum scelus agitare , respu-  
ceret profecto , si non patriam victam , domum certe ,  
patremque , & fœdera Hamilcaris scripta manu . qui ,  
jussus a consule nostro , præsidium deduxit ab Eryce :  
qui graves impositas victis Carthaginienfibus leges fre-  
mens mœrensque accepit : qui decedere Sicilia , qui sti-  
pendium populo Romano dare pactus est . Itaque vos  
ego , milites , non eo solum animo , quo adversus alios  
hostes soletis , pugnare velim ; sed cum indignatione  
quadam atque ira : velut si servos videatis vestros arma  
repente contra vos ferentes . Licuit ad Erycem clausos ,  
ultimo supplicio humanorum , fame interficere : licuit  
victicem classẽ in Africam trajicere , atque intra pau-  
cos dies sine ullo certamine Carthaginem delere . Ve-  
niam dedimus precantibus : emisimus ex obsidione : pa-  
cem cum victis fecimus : tutelæ deinde nostræ duxi-  
mus , cum Africo bello urgerentur . Pro his imper-  
titis , furiosum juvenem sequentes , oppugnatum pa-  
triam nostram veniunt . Atque utinam pro decore tan-  
tum hoc vobis , & non pro salute , esset certamen . non  
de possessione Siciliae ac Sardiniae , de quibus quon-  
dam agebatur , sed pro Italia vobis est pugnandum :  
nec est alius ab tergo exercitus , qui , nisi nos vin-  
cimus , hosti obsistat ; nec Alpes aliae sunt , quas dum  
superant , comparari nova possint præsidia . hic est  
obstandum , milites , velut si ante Romana mœnia pu-  
gnemus . Unusquisque se non corpus suum , sed con-  
jugem ac liberos parvos armis protegere putet : nec do-  
mesticas solum agitet curas , sed identidem hoc ani-  
mo reputet , nostras nunc intueri manus senatum po-  
pulumque Romanum : qualis nostra vis virtusque fue-



*rit, talem deinde fortunam illius urbis ac Romani imperii fore.*

XLII. Hæc apud Romanos consul. Hannibal, rebus prius, quam verbis, adhortandos milites ratus, circumdato ad spectaculum exercitu, captivos montanos vinctos in medio statuit; armisque Gallicis ante eorum pedes projectis, interrogare interpretem iussit, ecquis, si vinculis levaretur, armaque & equum victor acciperet, decertare ferro vellet? Cum ad unum omnes ferrum pugnamque poscerent, & dejecta in id fors esset, se quisque eum optabat, quem fortuna in id certamen legeret. Ut cujusque fors exciderat, alacer, inter gratulantes gaudio exsultans, cum sui moris tripudiis arma raptim capiebat. ubi vero dimicarent, is habitus animorum non inter ejusdem modo conditionis homines erat, sed etiam inter spectantes vulgo, ut non vincentium magis, quam bene morientium, fortuna laudaretur.

XLIII. Dum sic aliquot spectatis paribus affectos dimisisset, concione inde advocata, ita apud eos locutus fertur: *Si, quem animum in alienæ sortis exemplo paulo ante habuistis, eundem mox in estimanda fortuna vestra habueritis, vicimus, milites. neque enim spectaculum modo illud, sed quædam veluti imago vestræ conditionis erat. Ac nescio, an majora vincula majoresque necessitates vobis, quam captivis vestris, fortuna circumdederit. Dextra levaque duo maria claudunt, nullam, ne ad effugium quidem, navem habentibus. circa Padus amnis, major Padus ac violentior Rhodano; ab tygo Alpes urgent, vix in-*

tegris vobis ac vigentibus transire. Hic vincendum aut moriendum, milites, est, ubi primum hosti occurristis. & eadem fortuna, quæ necessitatem pugnandi imposuit, præmia vobis ea victoribus proponit, quibus ampliora homines ne ab Diis quidem immortalibus optare solent. Si Siciliam tantum ac Sardiniam, parentibus nostris ereptas, nostra virtute recuperaturi essemus, satis tamen ampla pretia essent. quidquid Romani tot triumphis partum congestumque possident, id omne vestrum cum ipsis dominis futurum est. In hanc tam optimam mercedem, agite, cum Diis bene juvantibus arma capite. Satis adhuc in vastis Lusitaniæ Celtiberiæque montibus, pecora consectando, nullum emolumentum tot laborum periculorumque vestrorum vidistis: tempus est jam, opulenta vos ac ditia stipendia facere, & magna operæ pretia mereri, tantum itineris per tot montes fluminaque & tot armatas gentes emensos. Hic vobis terminum laborum fortuna dedit: hic dignam mercedem emeritis stipendiis dabit. Nec, quam magni nominis bellum est, tam difficilem existimaritis victoriam fore. saepe & contemptus hostis cruentum certamen edidit, & incliti populi regesque perlevi momento victi sunt. Nam, dempto hoc uno fulgore nominis Romani, quid est; cur illi vobis comparandi sint? Ut viginti annorum militiam vestram cum illa virtute, cum illa fortuna taceam; ab Herculis columnis, ab oceano terminisque ultimis terrarum, per tot ferocissimos Hispaniæ & Galliæ populos vincentes huc pervenistis: pugnantis cum exercitu tirone, hac ipsa astate cæso, victo, circumfesso a Gallis, ignoto adhuc duci suo, ignorantique ducem. An me, in pretorio patris,

*clarissimi imperatoris, prope natum, certe educum, domitorem Hispaniæ Gallicæque, victorem eundem non Alpinarum modo gentium, sed ipsarum, quod multo majus est, Alpium, cum semestri hoc conferam duce, desertore exercitus sui? Cui si quis, dentis signis, Pænos Romanosque hodie ostendat, ignoraturum certum habeo, utrius exercitus sit consul. Non ego illud parvi æstimo, milites, quod nemo vestrum est, cujus non ante oculos ipse sæpe militare aliquod ediderim facinus; cui non idem ego, virtutis spectator ac testis, notata temporibus locisque referre sua possim decora. Cum laudatis a me millies donatisque, alumnus prius omnium vestrum, quam imperator, procedam acie adversus ignotos inter se ignorantesque.*

*XLIV. Quocunque circumtuli oculos, plena omnia video animorum ac roboris; veteranum peditem, generosissimarum gentium equites frenatos & infrenatos, vos socios fidelissimos fortissimosque, vos Carthaginienses, cum ob patriam, tum ob iram justissimam, pugnaturos. Inferimus bellum, infestisque signis descendimus in Italiam, tanto audacius fortiusque pugnaturi, quanto major spes, major est animus inferentis vim, quam arcentis. Accendit præterea animos & stimulat dolor, injuria, indignitas. ad supplicium depoposcerunt me ducem primum, deinde vos omnes, qui Saguntum oppugnassetis: deditos ultimis cruciatibus affecturi fuerunt. Crudelissima ac superbissima gens sua omnia sui-que arbitrii facit. cum quibus bellum, cum quibus pacem habeamus, se modum imponere æquum censet: circumscribit includitque nos terminis montium fluminumque, quos ne excedamus: neque eos, quos flauit, ter-*

*minos observat. Ne transferis Iberum: ne quid rei tibi sit cum Saguntinis. Ad Iberum est Saguntum: nusquam te vestigio moveris. Parum est, quod veterrimas provincias meas Siciliam & Sardiniam adimis. etiam Hispanias? & inde cessero, in Africam transcendes. Transcendes autem, dico? duos consules hujus anni, unum in Africam, alterum in Hispaniam miserunt. nihil usquam nobis relictum est, nisi quod armis vindicarimus. Illis timidis & ignavis licet esse, qui respectum habent, quos suus ager, sua terra, per tuta ac pacata itinera fugientes, accipient: vobis necesse est fortibus viris esse, & omnibus inter victoriam mortemve certa desperatione abruptis, aut vincere, aut, si fortuna dubitabit, in praelio potius, quam in fuga, mortem oppetere. Si hoc bene fixum omnibus destinatumque in animo est, iterum dicam, vicistis: nullum momentum ad vincendum homini ab Diis immortalibus acrius datum est.*

XLV. His adhortationibus cum utrinque ad certamen accensi militum animi essent, Romani ponte Ticinum jungunt, tutandique pontis causa castellum insuper imponunt. Pœnus, opere occupatis hostibus, Maharbalem cum ala Numidarum, equitibus quingentis, ad depopulandos fociorum populi Romani agros mittit. Gallis parci quam maxime jubet, principumque animos sollicitari ad defectionem. Ponte perfecto, traductus Romanus exercitus in agrum Insubrium, quinque millia passuum a Viêtumviis confedit. Ibi Hannibal castra habebat: revocatoque propere Maharbale atque equitibus, cum instare, certamen cerneret, nihil unquam fa-

tis dictum præmonitumque ad cohortandos milites ratus, vocatis ad concionem certa præmia pronuntiat, in quorum spem pugnarent. *Agrum sese daturum esse in Italia, Africa, Hispania, ubi quisque velit, immunem ipsi, qui accepiisset, liberisque: qui pecuniam, quam agrum, maluisset, ei se argento satisfacturum: qui sociorum cives Carthaginenses fieri velent, potestatem facturum: qui domos redire mullent, daturum se operam, ne cuius suorum popularium mutata secum fortunam esse vellet.* Servis quoque dominos profecutis libertatem proponit, binaque pro his mancipia dominis se redditurum. Eaque ut rata scirent fore, agnum læva manu, dextera silicem retinens, si falleret, Jovem ceterosque precatus Deos, ita se mactarent, quemadmodum ipse agnum mactasset, secundum precationem caput pecudis saxo elisit. Tum vero omnes, velut Diis auctoribus in spem suam quisque acceptis, id moræ, quod nondum pugnarent, ad potienda sperata rati, prælium uno animo & voce una poscunt.

XLVI. Apud Romanos haudquaquam tanta alacritas erat, super cetera recentibus etiam territos prodigiis. nam & lupus intraverat castra, laniatiffque obviis ipse intactus evaserat; & examen apum in arbore prætorio imminente confederat. Quibus procuratis, Scipio, cum equitatu jaculatoribusque expeditis profectus ad castra hostium, exque propinquo copias, quantæ, & cuius generis essent, speculandas, obvius fit Hannibali, & ipsi cum equitibus ad exploranda circa loca progresso. neutri alteros primo cernebant: densior deinde incessu tot

hominum equorumque oriens pulvis signum propinquantium hostium fuit. Constatit utrumque agmen, & proelio sese expediebant. Scipio jaculatores & Gallos equites in fronte locat; Romanos, sociorumque quod roboris fuit, in subsidiis. Hannibal frenatos equites in medium accipit, cornua Numidis firmat. Vixdum clamore sublato, jaculatores fugerunt inter subsidia ad secundam aciem. inde equitum certamen erat aliquamdiu anceps; dein, quia turbabant equos pedites intermixti, multis labentibus ex equis, aut desilientibus, ubi suos premi circumventos viderent, jam magna ex parte ad pedes pugna ierat: donec Numidæ, qui in cornibus erant, circumvecti paululum, ab tergo se ostenderunt. Is pavor perculit Romanos, auxitque pavorem consulis vulnus, periculumque intercursum primum pubescentis filii propulsatum. Hic erit juvenis, penes quem perfecti hujusce belli laus est, Africanus ob egregiam victoriam de Hannibale Pœnisque appellatus. Fuga tamen effusa jaculatorum maxime fuit, quos primos Numidæ invaserunt. Alius confertus equitatus consulem in medium acceptum, non armis modo, sed etiam corporibus suis, protegens, in castra, nusquam trepide neque effuse cedendo, reduxit. Servati consulis decus Cœlius ad servum natione Ligurem delegat. malim equidem de filio verum esse, quod & plures tradidere auctores, & fama obtinuit.

XLVII. Hoc primum cum Hannibale proelium fuit; quo facile apparuit, & equitatu meliorem Pœnum esse, & ob id campos patentes, quales sunt

inter Padum Alpesque , bello gerendo Romanis aptos non esse. Itaque proxima nocte , jussis militibus vasa silentio colligere , castra ab Ticino mota , festinatumque ad Padum est ; ut ratibus , quibus junxerat flumen , nondum resolutis , sine tumultu atque infestatione hostis , copias trajiceret. Prius Placentiam pervenire , quam satis sciret Hannibal ab Ticino profectos : tamen ad sexcentos moratorum in citeriore ripa , segniter ratem solventes , cepit. transire non potuit pontem , ut extrema resoluta erant , tota rate in secundam aquam labente. Coelius auctor est , Magonem cum equitatu & Hispanis peditibus flumen extemplo transnasse ; ipsum Hannibalem per superiora Padi vada exercitum traduxisse , elephantis in ordinem ad sustinendum impetum fluminis oppositis. Ea peritis annis ejus vix fidem fecerint. nam neque equites , armis equisque salvis , tantam vim fluminis superasse verisimile est , ut jam Hispanos omnes inflati transvexerint utres : & multorum dierum circuitu Padi vada petenda fuerant , qua exercitus gravis impedimentis traduci posset. Potiores apud me auctores sunt , qui biduo vix locum rate jungendo flumini inventum tradunt ; ea cum Magone equites Hispanorum expeditos præmissos. dum Hannibal , circa flumen legationibus Gallorum audiendis moratus , trajicit gravius peditum agmen , interim Mago equitesque ab transitu fluminis diei unius itinere Placentiam ad hostes contendunt. Hannibal paucis post diebus sex millia a Placentia castra communivit , & postero die , in

conspectu hostium acie directa , potestatem pugnae fecit.

XLVIII. Insequenti nocte cædes in castris Romanis, tumultu tamen quam re major, ab auxiliaribus Gallis facta est. ad duo millia peditum & ducenti equites, vigilibus ad portas trucidatis, ad Hannibalem transfugiunt: quos Pœnus benigne allocutus, & spe ingentium donorum accensos, in civitates quemque suas, ad sollicitandos popularium animos dimisit. Scipio, cædem eam signum defectionis omnium Gallorum esse ratus, contactoque eo scelere, velut injecta rabie, ad arma ituros; quanquam gravis adhuc vulnere erat, tamen quarta vigilia noctis insequentis tacito agmine profectus ad Trebiam fluvium, in loca altiora collectoque impeditiores equiti castra movet. Minus, quam ad Ticinum, fefellit: missisque Hannibal primum Numidis, deinde omni equitatu, turbasset utique novissimum agmen, ni aviditate prædæ in vacua Romana castra Numidæ devertissent. Ibi dum, perferutantes loca omnia castrorum, nullo satis digno moræ pretio tempus terunt, emissus hostis de manibus est: & cum jam transgressos Trebiam Romanos, metantesque castra conspexissent, paucos moratorum occiderunt, citra flumen interceptos. Scipio, nec vexationem vulneris in via jactanti ultra patiens, & collegam (jam enim & revocatum ex Sicilia audierat) ratus expectandum, locum, qui prope flumen tutissimus siativis est visus, delectum communiit. Nec procul inde Hannibal cum confedisset, quantum victoria equestri elatus, tantum



anxius inopia, quæ per hostium agros euntem, nusquam præparatis com meatibus, major in dies excipiebat, ad Clastidium vicum, quo magnum frumenti numerum congefserant Romani, mittit. ibi cum vim pararent, spes facta proditiōis: nec sane magno pretio, nummis aureis quadringentis, Dasio Brudunfino præfecto præsidii corrupto, traditur Hannibali Clastidium. id horreum fuit Poenis sedentibus ad Trebiam. In captivos ex tradito præsidio, ut fama clementiæ in principio rerum colligeretur, nihil sævitum est. ✕

XLIX. Cum ad Trebiam terrestre constitisset bellum, interim circa Siciliam insulasque Italiæ imminentes, & a Sempronio consule, & ante adventum ejus, terra marique res gestæ. viginti quinqueremes cum mille armatis ad depopulandam oram Italiæ a Carthaginienfibus missæ, novem Liparas, octo insulam Vulcani tenuerunt, tres in fretum avertit æstus. Ad eas conspectas a Messana duodecim naves ab Hierone rege Syracusanorum missæ, qui tum forte Messanæ erat, consulem Romanum opperiens, nullo repugnante captas naves Messanam in portum deduxerunt. Cognitum ex captivis, præter viginti naves, cujus ipsi classis essent, in Italiam missas, quinque & triginta alias quinqueremes Siciliam petere ad sollicitandos veteres socios. Lilybæi occupandi præcipuam curam esse: credere eadem tempestate, qua ipsi disjecti forent, eam quoque classem ad Ægates insulas dejectam. Hæc sicut audita erant, rex M. Æmilio prætori, cujus Sicilia erat provincia, perscribit, monetque,

Lilybæum firmo teneret præsidio. Extemplo & circa prætorem ad civitates missi legati tribunique, qui suos ad curam custodiæ intenderent; ante omnia Lilybæum teneri: ad apparatus belli, edicto proposito, ut focii navales decem dierum cocta cibaria ad naves deferrent; ubi signum datum esset, ne quis moram conscendendi faceret; perque omnem oram qui erant, ex speculis prospicerent adventantem hostium classẽ. Simul itaque (quanquam de industria morati cursum navium erant Carthaginienſes, ut ante lucem accederent Lilybæum) præſensum tamen est, quia & luna pernox erat, & sublati armamentiſ veniebant; extemplo datum e speculis signum, & in oppido ad arma conclamatum est, & in naves conscensum: pars militum in muris portarumque in stationibus, pars in navibus erant. Et Carthaginienſes, quia rem fore haud cum imparatis cernebant, usque ad lucem portu se abstinerunt, demendis armamentiſ eo tempore aptandaque ad pugnam classe absumto. Ubi illuxit, recipere classẽ in altum, ut spatium pugnae esset, exitumque liberum e portu naves hostium haberent. Nec Romani detrectavere pugnam, & memoria circa ea ipsa loca gestarum rerum freti, & militum multitudine ac virtute.

L. Ubi in altum eveſti sunt, Romanus conferre pugnam, & ex propinquo vires conferre vellet: contra eludere Poenus, & arte, non vi, rem gerere, naviumque, quam virorum aut armorum, malle certamen facere. nam ut fociis navalibus affatim instructam classẽ, ita inopem milite habe-

bant: &, sicubi conferta navis efflet, haudquaquam par numerus armatorum ex ea pugnabat. Quod ubi animadversum est, & Romanis multitudo sua auxit animum, & paucitas illis minuit. Extemplo septem naves Punicæ circumventæ; fugam ceteræ ceperunt. mille & septingenti fuere in navibus capti, milites nautæque; in his tres nobiles Carthaginiensium. Classis Romana incolumis, una tantum perforata navi, sed ea quoque ipsa reduce, in portum rediit. Secundum hanc pugnam, nondum gnaris ejus, qui Messanæ erant, Ti. Sempronius consul Messanam venit. Ei fretum intranti rex Hiero classem ornatam obviam duxit: transgressusque ex regia in prætoriam navem, gratulatus fospitem cum exercitu & navibus advenisse, precatusque prosperum ac felicem in Siciliam transitum; statum deinde insulæ & Carthaginiensium conata exposuit: pollicitusque est, quo animo priore bello populum Romanum juvenis adjuvisset, eo senem adjuturum. Frumentum vestimenta que sese legionibus consulis sociisque navalibus gratis præbiturum. grande periculum Lilybæo maritimisque civitatibus esse, & quibusdam volentibus novas res fore. Ob hæc consuli nihil cunctandum visum, quin Lilybæum classe peteret: & rex regiaeque classis una profecti. navigantes inde, pugnatum ad Lilybæum, fusasque & captas hostium naves, accepere.

LI. A Lilybæo consul, Hierone cum classe regia dimisso, relictoque prætore ad tuendam Siciliae oram, ipse in insulam Melitam, quæ a Carthaginiensibus tenebatur, trajecit. Advenienti Ha-

milcar, Gisgonis filius, præfectus præsidii, cum paulo minus duobus millibus militum, oppidumque cum insula traditur: inde post paucos dies reditum Lilybæum, captivique & a consule & a prætore, præter insignes nobilitate viros, sub corona venierunt. Postquam ab ea parte satis tutam Siciliam censebat consul, ad insulas Vulcani (quia fama erat, stare ibi Punicam classem) trajecit. nec quisquam hostium circa eas insulas inventus. Jam forte transmiserant ad vastandam Italiæ oram: depopulatoque Vibonensi agro, urbem etiam terrebant. Repetenti Siciliam consuli exscensio hostium in agrum Vibonensem facta nuntiatur: literæque ab senatu de transitu in Italiam Hannibalis, &, ut primo quoque tempore collegæ ferret auxilium, missæ traduntur. Multis simul anxius curis, exercitum, extemplo in naves impositum, Ariminum supero mari misit: Sex. Pomponio legato cum viginti quinque longis navibus Vibonensem agrum maritimamque oram Italiæ tuendam attribuit: M. Æmilio prætori quinquaginta navium classem explevit: ipse compositis Siciliæ rebus, decem navibus oram Italiæ legens, Ariminum pervenit: inde cum exercitu suo profectus ad Trebiam flumen, collegæ conjungitur.

LII. Jam ambo consules, & quidquid Romanarum virium erat, Hannibali oppositum, aut illis copiis defendi posse Romanum imperium, aut spem nullam aliam esse, satis declarabat. Tamen consul alter, equestri proelio uno & vulnere suo minutus, trahi rem malebat: recentis animi alter, eoque fe-

rocior, nullam dilationem patiebatur. Quod inter Trebiam Padumque agri est, Galli tum incolebant; in duorum præpotentium populorum certamine, per ambiguum favorem, haud dubie gratiam victoris spectantes. Id Romani, ne quid modo moverent, æquo fatis, Pœnus periniquo animo ferebat, ab Gallis accitum se venisse ad liberandos eos, dicitans. Ob eam iram, simul ut præda militem aleret, duo millia peditum & mille equites, Numidas plerosque, mixtos quosdam & Gallos, populari omnem deinceps agrum usque ad Padi ripas jussit. Egentes ope Galli, cum ad id dubios fervassent animos, coacti ab auctoribus injuriæ ad vindices futuros declinant: legatisque ad consulem missis, auxilium Romanorum terræ, ob nimiam cultorum fidem in Romanos laboranti, orant. Cornelio nec causa, nec tempus agenda rei placebat: suspectaque ei gens erat, cum ob infida multa facinora, tum, ut alia vetustate obsolevisent, ob recentem Bojorum perfidiam. Sempronius contra, continendis in fide sociis maximum vinculum esse primos, qui egissent ope, defensos, censebat. Tum, collega cunctante, equitatum suum, mille peditum jaculatoribus ferme admixtis, ad defendendum Gallicum agrum trans Trebiam mittit. Ii, sparsos & incompósitos, ad hoc graves præda plerosque, cum inopinatos invasissent, ingentem terrorem cædemque ac fugam usque ad castra stationesque hostium fecere: unde multitudine effusa pulsi, rursus subsidio suorum prælium restituere. Varia inde pugna sequentes, quanquam ad extremum æquassent cer-

tamen, major tamen hostium Romanis fama victoriæ fuit.

LIII. Ceterum nemini omnium major justiorque, quam ipsi consuli, videri; gaudio efferri, *qua parte copiarum alter consul victus foret, ea se vicisse. restitutos ac refectos militibus animos: nec quenquam esse, præter collegam, qui dilatam dimicationem vellet: cum, animo magis, quam corpore, ægrum, memoria vulneris aciem ac tela horrere. Sed non esse cum ægro senescendum. Quid enim ultra differri aut teri tempus? Quem tertium consulem, quem alium exercitum exspectari? Castra Carthaginensium in Italia, ac prope in conspectu urbis esse. non Siciliam ac Sardiniam victis ademptas, nec cis Iberum Hispaniam peti, sed solo patrio terraque, in qua geniti forent, pelli Romanos. Quantum ingemiscant, inquit, patres nostri, circa mœnia Carthaginis bellare soliti, si videant nos, progeniem suam, duos consules consularesque exercitus, in media Italia paventes intra castra? Pœnum, quod inter Alpes Apenninumque agri sit, suæ ditionis fecisse? Hæc assidens ægro collegæ, hæc in prætorio prope concionabundus agere. Stimulabat & tempus propinquum comitiorum, ne in novos consules bellum differretur, & occasio in se unum vertendæ gloriæ, dum æger collega erat. Itaque, nequidquam dissentiente Cornelio, parari ad propinquum certamen milites jubet. Hannibal, cum, quid optimum foret hosti, cerneret, vix ullam spem habebat, temere atque improvide quidquam consules acturos. cum alterius ingenium, fama prius, deinde re cognitum, percitum ac ferox sciret esse, fe-*

rociusque factum prospero cum prædatoribus suis certamine crederet; adesse gerendæ rei fortunam haud diffidebat. cujus ne quod prætermitteret tempus, sollicitus intentusque erat, dum tiro hostium esset miles, dum meliorem ex ducibus inutilem vulnus faceret, dum Gallorum animi vigerent: quorum ingentem multitudinem sciebat segnius secuturam, quanto longius ab domo traherentur. Cum ob hæc taliaque speraret propinquum certamen, & facere, si cessaretur, cuperet; speculatoresque Galli, ad ea exploranda, quæ vellet, tutiores, quia in utrisque castris militabant, paratos pugnæ esse Romanos retulissent; locum insidiis circumspectare Pœnus cœpit.

LIV. Erat in medio rivus, præaltis utrinque clausus ripis, & circa obsitus palustribus herbis, & quibus inculta ferme vestiuntur, virgultis vepribusque. quem ubi ad equites quoque tegendos satis latebrosus locum circumvectus ipse oculis perlustravit: *Hic erit locus*, Magoni fratri ait, *quem teneas. Delige centenos viros ex omni peditum atque equitum; cum quibus ad me vigilia prima venias. Nunc corpora curare tempus est.* Ita prætorium missum. mox cum delectis Mago aderat. *Robora virorum cerno*, inquit Hannibal. *sed, ut & numero etiam, non animis modo, valeatis, singulis vobis novenos ex turmis manipulisque vestri similes eligite: Mago locum monstrabit, quem infideatis. Hostem cæcum ad has belli artes habebitis.* Ita mille equitibus Magoni, mille peditibus dimissis, Hannibal prima luce Numidas equites, transgressos Trebiam flumen, obequitare jubet

hostium portis, jaculandoque in stationes elicere ad pugnam hostem: injecto deinde certamine, cedendo sensim citra flumen pertrahere. Hæc mandata Numidis. ceteris ducibus peditum equitumque præceptum, ut prandere omnes juberent: armatos deinde, instratisque equis, signum exspectare. Sempronius, ad tumultum Numidarum primum omnem equitatum, ferox ea parte virium, deinde sex millia peditum, postremo omnes copias ad destinatum jam ante consilio, avidus certaminis, eduxit. Erat forte brumæ tempus & nivalis dies in locis Alpibus Apenninoque interjectis; propinquitate etiam fluminum ac paludum prægelidis. ad hoc raptim eductis hominibus atque equis, non capto ante cibo, non ope ulla ad arcendum frigus adhibita, nihil caloris inerat: & quidquid auræ fluminis appropinquabant, afflabat acrior frigoris vis. Ut vero refugientes Numidas insequentes aquam ingressi sunt, (& erat pectoribus tenus aucta nocturno imbri) tum utique egressis rigere omnibus corpora, ut vix armorum tenendorum potentia essent, & simul lassitudine, procedente jam die, fame etiam deficere.

LV. Hannibalis interim miles, ignibus ante tentoria factis, oleoque per manipulos, ut mollirent artus, misso, & cibo per otium capto, ubi transgressos flumen hostes nuntiatum est, alacer animis corporibusque arma capit, atque in aciem procedit. Baliares locat ante signa, levem armaturam, octo ferme millia hominum; dein gravio-rem armis peditem, quod virium, quod roboris



erat. in cornibus circumfudit decem millia equitum: & ab cornibus in utramque partem divisos elephantos statuit. Consul effusos sequentes equites, cum ab resistentibus subito Numidis incauti exciperentur, signo receptui dato, revocatos circumdedit peditibus. Duodeviginti millia Romani erant, focium nominis Latini viginti; auxilia præterea Cenomanorum. ea sola in fide manserat Gallica gens. his copiis concursus est. Proelium a Baliaribus ortum est; quibus cum majore robore legiones obsisterent, deductæ propere in cornua leves armaturæ sunt. quæ res effecit, ut equitatus Romanus extemplo urgeretur: nam cum vix jam per se resisterent decem millibus equitum quatuor millia, & fessi plerisque integris, obruti sunt insuper velut nube jaculorum a Baliaribus conjecta. ad hoc elephanti, eminentes ab extremis cornibus, (equis maxime non visu modo, sed odore insolito territis) fugam late faciebant. Pedestris pugna par animis magis, quam viribus, erat; quas recentes Pœnus, paulo ante curatis corporibus, in proelium attulerat: contra, jejuna fessaque corpora Romanis & rigentia gelu torpebant. restitissent tamen animis, si cum pedite solum foret pugnatum. Sed & Baliares, pulso equite, jaculabantur in latera, & elephanti jam in mediam peditum aciem sese tulerant: & Mago Numidæque, simul latebras eorum improvida præterlata acies est, exorti ab tergo ingentem tumultum ac terrorem fecere. Tamen in tot circumstantibus malis mansit aliquandiu immota acies; maxime præter spem omnium

adversus elephantos. eos velites, ad id ipsum locati, verutis coniectis & avertere, & infecuti aversos sub caudis, qua maxime molli cute vulnera accipiunt, fodiebant.

LVI. Trepidantesque prope jam in suos consternatos media acie in extremam, ad sinistrum cornu, adversus Gallos auxiliares agi jussit Hannibal. Extemplo haud dubiam fecere fugam. additus quoque novus terror Romanis, ut fusa auxilia sua viderunt. Itaque, cum jam in orbem pugnarent, decem millia ferme hominum, cum alii evadere nequissent, media Afrorum acie, quæ Gallicis auxiliis firmata erat, cum ingenti cæde hostium perurpere. &, cum neque in castra reditus esset flumine interclusis, neque præ imbri fatis decernere possent, qua suis opem ferrent, Placentiam recto itinere perrexere. Plures deinde in omnes partes eruptiones factæ: &, qui flumen petiere, aut gurgitibus absumti sunt, aut inter cunctationem ingrediendi ab hostibus oppressi. qui passim per agros fuga sparsi erant, vestigia cedentis sequentes agminis, Placentiam contendere: aliis timor hostium audaciam ingrediendi flumen fecit, transgressique in castra pervenerunt. Imber nive mixtus, & intoleranda vis frigoris, & homines multos, & jumenta, & elephantos prope omnes absumsit. Finis insequendi hostis Pœnis flumen Trebia fuit: & ita torpentes gelu in castra rediere, ut vix lætitiæ victoriæ sentirent. Itaque nocte insequenti, cum præsidium castrorum, & quod reliquum ex magna parte militum erat, ratibus Trebiam trajicerent,

aut nihil sentire, obstreperente pluvia; aut, quia jam moveri præ lassitudine nequibant ac vulneribus, sentire sese dissimularunt: cuietisque Pœnis, tacito agmine ab Scipione consule exercitus Placentiam est perductus: inde Pado trajectus Cremonam, ne duorum exercituum hibernis una colonia premeretur.

LVII. Romam tantus terror ex hac clade perlatus est, ut jam ad urbem crederent infestis signis hostem venturum; nec quidquam spei aut auxilii esse, quo portis mœnibusque vim arcerent. *Uno consule ad Ticinum victo, altero ex Sicilia revocato, duobus consulibus, duobus consularibus exercitibus victis, quos alios duces, quas alias legiones esse, quæ arcessantur?* Ita territis Sempronius consul advenit, ingenti periculo per effusos passim ad prædandum hostium equites (audacia magis, quam consilio aut spe fallendi resistendive, si non falleret) transgressus. Id quod unum maxime in præsentia desiderabatur, comitiis consularibus habitis, in hiberna rediit. Creati consules Cn. Servilius & C. Flaminius. Ceterum ne hiberna quidem Romanis quæta erant, vagantibus passim Numidis equitibus, &, qua his impeditiora erant, Celtiberis Lusitanisque. Omnes igitur clausi undique commeatus erant, nisi quos Pado naves subveherent. Emporium prope Placentiam fuit, & opere magno munitum, & valido firmatum præsidio. ejus castelli oppugnandi spe cum equitibus ac levi armatura profectus Hannibal, cum plurimum in celando incepto ad effectum spei habuisset, nocte adortus,

non fefellit vigiles. Tantus repente clamor est sublatus, ut Placentiæ quoque audiretur. Itaque sublucem cum equitatu consul aderat, jussis quadrato agmine legionibus sequi. Equestre proelium interim commissum: in quo, quia saucius Hannibal pugna excessit, pavore hostibus injecto, defensum egregie præsidium est. Paucorum inde dierum quiete sumta, & vixdum satis percurato vulnere, ad Viſtumnas ire pergit oppugnandas. Id emporium a Romanis Gallico bello fuerat munitum. inde locum frequentaverant accolæ mixti undique ex finitimis populis; & tum terror populationum eo plerosque ex agris compulerat. Hujus generis multitudo, fama impigre defensi ad Placentiam præsidii accensa, armis arreptis obviam Hannibali procedit. Magis agmina, quam acies, in via concurrunt; & cum ex altera parte nihil, præter inconditam turbam, esset, in altera & dux militi, & duci fidens miles, ad triginta quinque millia hominum a paucis fusa. Postero die, deditioe facta, præsidium intra mœnia accepere: jussique arma tradere cum dicto paruiſſent, signum repente victoribus datur, ut tanquam vi captam urbem diriperent. neque ulla, quæ in tali re memorabilis scribentibus videri solet, prætermiſſa clades est: adeo omnis libidinis, crudelitatisque, & inhumanæ superbiæ editum in miseros est exemplum. Hæ fuere hibernæ expeditiones Hannibalis.

LVIII. Haud longis inde temporibus, dum intolerabilia frigora erant, quies militi data est: & ad prima ac dubia signa veris profectus ex hiber-

nis, in Etruriam ducit, eam quoque gentem, sicut Gallos Liguresque, aut vi aut voluntate adjuncturus. Transcuntem Apenninum adeo atrox adorta tempestas est, ut Alpium foeditatem prope superaverit. Vento mixtus imber cum ferretur in ipsa ora, primo, quia aut arma omittenda erant, aut contra enitentes vortice intorti affligebantur, consistere: dein, cum jam spiritum includeret, nec reciprocare animam sineret, averſi a vento parumper confedere. Tum vero ingenti sono coelum strepere, inter horrendos fragores micare ignes. capti auribus & oculis, metu omnes torpere. Tandem, effuso imbre, cum eo magis accensa vis venti esset, ipso illo, quo deprehensi erant, loco castra ponere necessarium visum est. Id vero laboris velut de integro initium fuit. nam nec explicare quidquam, nec statuere poterant; nec, quod statutum esset, manebat, omnia perſcindente vento & rapiente. & mox aqua levata vento, cum super gelida montium juga concreta esset, tantum nivosa grandinis dejecit, ut, omnibus omiſſis, procumberent homines, tegminibus suis magis obruti, quam tecti. tantaque vis frigoris infecuta est, ut, ex illa miserabili hominum jumentorumque strage cum se quisque attollere ac levare vellet, diu nequireret, quia, torpentibus rigore nervis, vix flectere artus poterant. deinde, ut tandem agitando sese movere ac recepere animos, & raris locis ignis fieri est coeptus, ad alienam opem quisque inops tendere. Biduum eo loco, velut obsessi, mansere. multi homines, multa jumenta, elephanti quoque ex

his, qui prælio ad Trebiam facto superfuerant, septem absumti.

LIX. Degressus Apennino retro ad Placentiam castra movit, & ad decem millia progressus confedit. postero die duodecim millia peditum, quinque equitum adversus hostem ducit. Nec Sempromius consul (jam enim redierat ab Roma) detrectavit certamen: atque eo die tria millia passuum inter bina castra fuere. Postero die ingentibus animis, vario eventu, pugnatum est. primo concursu adeo res Romana superior fuit, ut non acie vincerent solum, sed pulsos hostes in castra persequerentur; mox castra quoque oppugnarent. Hannibal, paucis propugnatoribus in vallo portisque positus, ceteros confertos in media castra recepit, intentoque signum ad erumpendum spectare jubet. Jam nona ferme diei hora erat, cum Romanus, nequidquam fatigato milite, postquam nulla spes erat potiundi castris, signum receptui dedit. Quod ubi Hannibal accepit, laxatamque pugnam & recessum a castris vidit, extemplo equitibus dextra lævaque emissis in hostem, ipse cum peditum robore mediis castris erupit. pugna raro ulla magis fæva, & cum utriusque partis perniciæ clarior fuisset, si extendi eam dies in longum spatium sivillet. Nox accensum ingentibus animis prælium diremit. itaque acrior concursus fuit, quam cædes; & sicut æquata ferme pugna erat, ita clade pari discessum est. ab neutra parte sexcentis plus peditibus, & dimidium ejus equitum cecidit. Sed major Romanis, quam pro numero, jactura fuit: quia eque-

stris ordinis aliquot, & tribuni militum quinque, & præfecti sociorum tres, sunt interfecti. Secundum eam pugnam Hannibal in Ligures, Sempronius Lucam concessit. Venienti in Ligures Hannibali per insidias intercepti duo quæstores Romani, C. Fulvius & L. Lucretius, cum duobus tribunis militum, & quinque equestribus ordinis senatorum ferme liberis, quo magis ratam fore cum his pacem societatemque crederet, traduntur.

LX. Dum hæc in Italiâ geruntur, Cn. Cornelius Scipio, in Hispaniam cum classe & exercitu missus, cum, ab ostio Rhodani profectus, Pyrenæosque montes circumvectus, Emporiis appulisset classem, exposito ibi exercitu, orsus a Lacetanis, omnem oram usque ad Iberum flumen, partim renovandis societatibus, partim novis instituendis, Romanæ ditionis fecit. Inde conciliata clementiæ fama, non ad maritimos modo populos, sed in mediterraneis quoque ac montanis ad ferociores jam gentes valuit: nec pax modo apud eos, sed societas etiam armorum, parata est: validæque aliquot auxiliorum cohortes ex iis conscriptæ sunt. Hannonis cis Iberum provincia erat: eum reliquerat Hannibal ad regionis ejus præsidium. itaque prius, quam alienarentur omnia, obviam eundum ratus, castris in conspectu hostium positus, in aciem eduxit. nec Romano differendum certamen visum: quippe qui sciret, cum Hannone & Hasdrubale sibi dimicandum esse; malletque adversus singulos separatim, quam adversus duos simul, rem gerere. Nec magni certaminis ea dimicatio

fuit. sex millia hostium cæsa, duo capta cum præsidio castrorum. nam & castra expugnata sunt, atque ipse dux cum aliquot principibus capiuntur: & Scissis, propinquum castris oppidum, expugnatur. Ceterum præda oppidi parvi pretii rerum fuit; supellex barbarica, ac vilium mancipiorum. castra militem ditavere, non ejus modo exercitus, qui victus erat, sed & ejus, qui cum Hannibale in Italia militabat, omnibus fere caris rebus (ne gravia impedimenta ferentibus essent) citra Pyrenæum relictis.

LXI. Priusquam certa hujus cladis fama accideret, transgressus Iberum Hasdrubal cum octo milibus peditum, mille equitum, tanquam ad primum adventum Romanorum occursurus, postquam perditas res ad Scissim amissaque castra accepit, iter ad mare convertit. Haud procul Tarracone classici milites navalesque socios, vagos palantesque per agros (quod ferme fit, ut secundæ res negligentiam creent) equite passim dimisso, cum magna cæde, majore fuga ad naves compellit. nec diutius circa ea loca morari ausus, ne a Scipione opprimeretur, trans Iberum sese recepit. Et Scipio, raptim ad famam novorum hostium agmine acto, cum in paucos præfectos navium animadvertisset, præsidio Tarracone modico relicto, Emporias cum classe rediit. Vixdum digresso eo, Hasdrubal aderat: &, Iltergetum populo, qui obsides Scipioni dederat, ad defectionem impulsio, cum eorum ipsorum juventute agros fidelium Romanis sociorum vastat. Excito deinde Scipione hibernis, toto cis



Iberum rursus cedit agro. Scipio, relictam ab auctore defectionis Ilergetum gentem cum infesto exercitu invasisset, compulsi omnibus Athanagiam, urbem (quæ caput ejus populi erat) circumfedit: intraque dies paucos, pluribus quam ante obsidibus imperatis, Ilergetes, pecunia etiam multatos, in jus ditionemque recepit. Inde in Aufetanos prope Iberum, socios & ipsos Pœnorum, procedit: atque, urbe eorum obsessa, Lacetanos auxilium finitimis ferentes nocte, haud procul jam urbe, cum intrare vellent, excepit insidiis. Cæsa ad duodecim millia: exuti pæne omnes armis, domos passim palantes per agros diffugere: nec obsessos alia ulla res, quam iniqua oppugnantibus hiems, tutabatur. triginta dies obsidio fuit: per quos raro unquam nix minus quatuor pedes alta jacuit: adeoque pluteos ac vineas Romanorum operuerat, ut ea sola, ignibus aliquoties conjectis ab hoste, etiam tutamentum fuerit. Postremo cum Amusitus princeps eorum ad Hasdrubalem profugisset, viginti argenti talentis pacti deduntur. Tarraconem in hiberna reditum est.

LXII. Romæ aut circa urbem multa ea hieme prodigia facta: aut (quod evenire solet, motis semel in religionem animis) multa nuntiata, & temere credita sunt: in quibus ingenuum infantem semestrem in foro olitorio triumphum clamasse: & foro boario bovem in tertiam contignationem suam sponte escendisse, atque inde tumultu habitatorum territum sese dejecisse: & navium speciem de cælo affulisse: & ædem Spei, quæ est in foro olitorio,

fulmine ictam: & Lanuvii hastam se commovisse: & corvum in ædem Junonis devolasse, atque in ipso pulvinario confedisse: & in agro Amiternino multis locis hominum specie procul candida veste visos, nec cum ullo congressos: & in Piceno lapidibus pluuisse: & Cære fortes extenuatas: & in Gallia lupum vigili gladium e vagina raptum abstulisse. Ob cetera prodigia libros adire decemviri jussi. quod autem lapidibus pluisset in Piceno, novemdiale sacrum edictum, & subinde aliis procurandis prope tota civitas operata fuit. Jam primum omnium urbs lustrata est, hostiæque majores, quibus editum est, Diis cæsæ; & donum ex auri pondō quadraginta Lanuvium ad Junonis portatum est; & signum æneum matronæ Junoni in Aventino dedicaverunt; & lectisternium Cære, ubi fortes attenuatæ erant, imperatum; & supplicatio Fortunæ in Algido; Romæ quoque & lectisternium Juventati, & supplicatio ad ædem Herculis nominatim, deinde universo populo circa omnia pulvinaria, indicta; & Genio majores hostiæ cæsæ quinque; & C. Atilius Serranus prætor vota suscipere jussus, si in decem annos respublica eodem stetisset statu. Hæc procurata vota ex libris Sibyllinis, magna ex parte levaverant religione animos.

LXIII. Consulū designatorum alter Flaminius, cui cæ legiones, quæ Placentiæ hibernabant, forte evenerant, edictum & literas ad consulem misit, ut is exercitus Idibus Martiis Arimini adesset in castris. Huic in provincia consulatum inire consilium erat, memori veterum certaminum cum Patribus,

quæ tribunus plebis, & quæ postea consul, prius de consulatu, qui abrogabatur, dein de triumpho habuerat; invisus etiam Patribus ob novam legem, quam Q. Claudius tribunus plebis adversus senatum, uno Patrum adjuvante C. Flaminio, tulerat; ne quis senator, quive senatoris pater fuisset, maritimam navem, quæ plus quam trecentarum amphorarum esset, haberet. Id satis habitum ad fructus ex agris vectandos. quæstus omnis Patribus indecorus visus. Res, per summam contentionem acta, invidiam apud nobilitatem suasori legis Flaminio, favorem apud plebem, alterumque inde consulatum, peperit. Ob hæc ratus auspiciis ementiendis, Latinarumque feriarum mora, & consularibus aliis impedimentis retenturos se in urbe, simulato itinere privatus clam in provinciam abiit. Ea res, ubi palam facta est, novam insuper iram infestis jam ante Patribus movit: *Non cum senatu modo, sed jam cum Diis immortalibus, C. Flaminium bellum gerere. consulem ante inauspicato factum revocantibus ex ipsa acie Diis atque hominibus non paruisse; & nunc conscientia spreto & Capitolium & sollemnem votorum nuncupationem fugisse: ne die initi magistratus Jovis optimi maximi templum adiret: ne senatum, invisus ipse, & sibi uni invisum, videret consuleretque: ne Latinas indiceret, Jovique Latiari sollemne sacrum in monte faceret: ne, auspicato profectus in Capitolium ad vota nuncupanda, paludatus inde cum lictoribus ad provinciam iret. lixæ modo sine in ignibus, sine lictoribus, profectum clam, furtim, haud aliter quam si exilii causa solum vertisset. ma-*

gis pro majestate videlicet imperii Arimini, quam Romæ, magistratum initurum, & in deversorio hospitali, quam apud penates suos, prætextam sumturum. Revocandum universi retrahendumque censuerunt; & cogendum omnibus prius præsentem in Deos hominesque fungi officiis, quam ad exercitum & in provinciam iret. In eam legationem (legatos enim mitti placuit) Q. Terentius & M. Antistius profecti, nihilo magis eum moverunt, quam priori consulatione literæ moverant ab senatu missæ. Paucos post dies magistratum iniit, immolantique ei vitulus jam ictus, e manibus sacrificantium sese cum proripuisset, multos circumstantes cruore respersit. Fuga procul etiam major apud ignaros, quid trepidaretur, & concursatio fuit. id a plerisque in omen magni terroris acceptum. Legionibus inde duabus a Sempronio prioris anni consule, duabus a C. Atilio prætore acceptis, in Etruriam per Apennini trames exercitus duci est cœptus.

---



30  
20  
—  
10

PA  
6452  
A2  
1784  
v.3

Livius, Titus  
Historiarum libri qui  
supersunt omnes

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---

